


國學基
本叢書
明

書

十二

257



書叢本基學國

書 明

(二十)

纂鱗維傳



國家圖書館典藏

行發館書印務商

由國家圖書館數位化



626.01
7567
V.12
明書卷一百五十八

列傳十八

宦官傳一

史官論曰。予讀范史所論寺人而歎其事之無極也。夫豎刁亂齊。伊戾禍宋。趙高覆秦。弘恭石顯之亂漢。政傾轍相尋。罔非殷鑒。乃至東京之亂。如蔚宗所稱。舉動回山海。呼吸變霜露。阿旨則光寵三族。忤意則參彝五宗。斯亦極矣。唐自楊高煽亂。輔臣繼之。幽囚太上。蹀血椒宮。僭真主。號尙父。重不可反。而後復有程魚仇田之僭。擅季明復恭之誅。逆九重。惕息甘同。報獻擊之不勝。則賢者爲陳寶。不肖者爲調注。計窮憤極。而何進崔胤。皆假手外兵。董卓朱晃之患成矣。明興太祖謂侍臣曰。吾見史傳所書。漢唐末世。皆爲宦官蠹敗。未嘗不爲惋歎。開國承家。小人毋用。其在宮禁。可使之供灑掃。給使令而已。豈宜典兵與政。故立制不兼文武銜。不干外廷政。不御外臣冠服。蓋三十年之間。宮府謐如也。至太宗而稍有所私寄。儼保之。譖行而撫監岌岌矣。暨車之勢張而馬駢以交趾。予敵矣。再傳而天子幼沖。母后不中制。豎振遂滔天矣。舉全盛之四海。挾至尊之萬乘。以畀蠢虜。恨其身死行陳。不獲樹磔以謝天下。而復辟之後。反降制爲之。澣洗何也。吉祥之創逆。汪直之啓。登繹洩盈朝。屍骨盈邊。則此制媒之哉。武宗尸位。慢遊是好。八虎橫。

三老繼奄瑾孽牙其間。叛藩乘之。幾覆廟祐。幸發自其偶。以收全勝。然一瑾死。百瑾生。參伍狡弁。表裏作姦。世宗赫然誅其渠首。收革諸鎮監軍。朝野吐氣。邊腹危而復安。則肅之爲肅宜也。神宗幼倚權相。末復倦勤。外廷朋黨與內監相應。和動有輕重。然威福中制。不假一政。故馮保等不爲瑾直之結。至熹宗童昏。漫不慮事。而魏豎之禍作矣。內倚乳保以滋其姦。外挾虎彪以肆其毒。清流滿北司。告密徧都邑。緹騎四出。忠臣諫士。交臂延頸。而受其戮。府藏內盜。禁兵中擅。假子穢祠。爭寵競麗。幸天厭其惡。英王勃興。縛之如孤雛腐鼠。然而崇禎之世。不監前車。恨督撫之用兵無功。邊腹復置監視。因而狡弁驕卒。倚其芘覆。萎縮於行陣之間。武暴乎閭里之內。動輒鼓譟。掉臂而去。而此輩以婦人之仁。泣涕招安。文臣不得抒其籌策。故將士莫肯用命。究至開關延賊。皆寺人之徒。則逆豎之貽禍烈也。大抵明之瑞禍。甚於西京。過於宋。而稍愈於漢唐之季者。以祖宗之防制具在。青宮豫建。無獨立廢置之權。朝發暮縛。無將相交兵之亂耳。至於竊爵掌兵。開邊隙市。內權毒流。縉紳固與國相終始也。其灼然稱賢如懷恩。覃昌雲奇之忠勤。王承恩之殉節。百不能一哀而次之。以存勸戒云。

雲奇。南粵人。太祖時守西華門。邇胡惟庸第。刺知其逆謀。惟庸誑言所居井湧醴泉。請上往觀。鑾輿西出。雲慮必與禍。急走衝蹕。勒馬銜言狀。氣方勃。辭。舌駭不能達。太祖怒其犯。左右搦搥亂下。雲垂斃。右臂將折。猶奮指惟庸第。上見狀。乃悟。登城眺。見其壯士披甲伏屏帷間。數市。亟返。發兵擒惟庸。召奇。則息絕矣。上追悼之。錫贈加等。令有司春秋祀之。葬鍾山之西。樹碣表其忠焉。

阮安交趾人。清苦介潔。善謀畫。太宗營建北京宮殿城池及治塞村驛諸河工。皆大著勞績。諸屬一受成算。臨終布衾衣篋而已。

鄭和洪武中入宮。豐軀偉貌。博辯機敏。太宗卽位。爲司禮太監。大見寵異。兩奉敕駕海舶入西洋。封諸夷國通西南海道朝貢。著有勞績。人稱爲三寶太監。數使滇黔百粵。領上密諭。蹤跡建文。凡至其國。皆圖其山川城郭。條其風俗物產。歸成帙以進。以是諸國古未通中華者。多附貢云。

陳蕪交趾人。永樂初入宮。至景泰時。歷事五朝。凡保抱皇子。四夷征討。悉與行。皆忠誠無疵繆。賜更姓名曰王瑾。寵費甚厚。太宗時。賜範金圖書四。曰忠肝義膽。曰金貂貴客。曰忠誠自勵。曰心跡雙清。

沐敬時爲太監。太宗北征四十日。不見敵。兵困糧竭。而前進。山川荒僻。隨征大臣皆勸回鑾。上怒。爲鎖項從。敬復苦諫。上罵曰。反蠻。敬舉首曰。不知不知。上怒。敬縛斬之。敬猶大聲諫不已。上忽悟曰。使我家養人。悉如此。何患不好。釋之。乃回鑾。

劉永誠順天人。虎視屹屹。便騎射。三扈太宗北征。奉宣宗使。偵漢邸逆謀。三帥師討兀良哈。俘馘無算。捕執磁相妖人李宜張普祥。英宗朝。監鎮甘肅。耀兵境外。屢陣於沙漠。數取勝。擒其酋。景泰末。召還。總督團營。英宗復辟。勒兵披甲。控持大內。獨不受賞。屢求辭職。杜門絕客。泊如素門。成化初。老。具辭。累朝所賜產第祿物。從之。自居一奄。若老僧。卒無長物。先是。憲宗欲封以伯爵。大學士彭時力爭之。或曰。中官古有封侯王者。時曰。此豈盛德事耶。祖宗成憲俱在。誰敢違之。事遂寢。而永誠亦無憾焉。

王振山西蔚州人。宣德中侍英宗於東宮。機慧狠謫。得英宗歡。及卽位。遂命掌司禮監。大見寵信。是年詔振偕文武大臣閱武於將臺。振遂集京營及諸衛武職試騎射。而殿最之。奏指揮僉事紀廣第一。超遷都指揮僉事。上每爲先生而不名。所言惟聽。時輔臣方欲開經筵。而振專意導上布武。權焰日盛。惟畏太皇太后不敢發。一日振謂三楊曰。朝廷事賴三先生。高齡亦倦瘁矣。後當如何。又一日振以事詣閣。遂可否其間。榮等憤懣不平。不出視事。太皇太后遣使問之。乃告以故。太皇太后怒鞭振。押至閣中伏罪。且戒之曰。再爾殺無赦。正統二年春。太皇太后欲殺振。事在宮闈紀。四年十月。福建僉事廖模杖死驛丞楊溥。欲坐償命。楊士奇欲擬因公致死。互爭不決。請裁於太后。王振因而進言。謂溥與驛丞同鄉。士奇與僉事同鄉。未免皆有私意。償命過重。因公過輕。宜對品降僉事爲府同知。太后聽之。自是振漸掩內閣之過。而權歸掌握矣。八年四月。太皇太后崩。楊榮卒。楊士奇以子穉之故。堅臥不出。惟楊溥當事。亦年老勢孤。後進皆委靡不前。於是內閣之柄悉爲王振所攘。生殺予奪。盡在其手。盡去大臣不附己者。而兵部尙書徐禕。工部侍郎王佑。皆儉邪小人。首開趨媚之路。百計殷勤。極盡諂媚。自是舉朝皆翁父稱振。禕等又宣言於衆曰。吾輩不進見致禮者。必且得禍。衆聞之。益懼。皆具金寶進贄。自此遂以爲常。初。惟府部院寺大臣。以後百執事及在外方面皆行之。當朝親日。郡邑庶職亦無不然。一時以廉者爲拙。貪者爲能。被其容接者。若登龍門。上下交征利。如水去隄防。勢不可止矣。王佑貌美無鬚。父事振。振甚眷之。一日問佑曰。王侍郎。爾何無鬚。佑對曰。老爺無鬚。兒子豈敢有鬚。時聞之。閱巷傳笑。初。振問於楊士奇。吾鄉人誰可大用者。士

奇薦薛瑄。時瑄爲山東提學僉事，乃召爲大理少卿。瑄至京，士奇白瑄宜詣振謝。瑄曰：「安有受僭公朝，謝恩私門邪？」後遇諸途，瑄復不禮。振不悅，會有武官病死，其妾有色，振姪王山欲娶之，妻持不可。妾因誣告其嫡妻毒殺其夫，都察院問已誣服。大理辨其冤，屢駁還之。都御史王文韶事振，譜之。振嗾御史劾瑄受賄，故出人罪，請廷鞫。竟坐瑄死罪，下獄。瑄怡然曰：「辯冤獲咎，死何愧焉？」在獄讀易以自娛。至復奏，將決，家人乞代死。大臣有申救之者，會振老僕哭廚下，哀振怪問之，曰：「聞薛夫子今日將刑，故也。」振亦惻然，得免死。除名放歸田里。南京國子監祭酒陳敬宗考績至京，王振素慕敬宗名，欲致之門下。適南畿巡撫周忱時亦在京謁振，振知忱與敬宗同年，語之以意。忱詣敬宗達之，敬宗不可，曰：「吾爲人師表，而可求謁中官，忱乃謂振曰：『陳祭酒書法極高，以求書爲名，先之以禮幣，彼將謁謝矣。』」振然之，乃遣文綺羊酒，求書程子四箴，敬宗爲書之，而返其禮幣，竟不往見。於是士夫之賢者，稱其風節云。六月，翰林侍講劉球以災異上疏，中謂太常不可用，道士宜以進士處之。至是，編修董璘自陳，願爲太常少卿。振因誣球與璘同謀，故先以言爲璘地，逮球璘，下詔獄。卽令其黨錦衣衛指揮馬順以計殺球。一日五更，順攜一小校推獄門入，球與董璘同臥。小校前持球，球知有變，大呼曰：「太祖太宗之靈在天，汝何得擅殺我！」小校持刀斷球頸，流血被體，屹立不動。順舉足踢倒，曰：「如此無禮，遂支解之。」裹以蒲包，埋衛後空地。董璘從旁匿球血裙，數日，密歸球家。家人始知球死，乃以血裙爲機歸葬。小校本盧氏人，與耿九疇爲鄉鄰。九疇素愛其年少俊美，因與往來，後久不至，甚訝之。一日來見，九疇視其貌，黃瘠不類，惜之，曰：「汝無有疾乎？」狀貌乃頓異如此。小校

吐實且曰馬順將舉事之日密語吾曰今夜有事汝當早來至期令懷刃相隨迫於勢不敢不行比聞劉公忠臣吾儕小人無故作逆天理事吾殆死有餘罪矣特來別公且謝娛愛因慟哭悔恨不已未幾果死馬順子亦登狂疾代球數順罪一狂謂爲球所憑云秋七月振惡祭酒李時勉守正誣搆傾擠傳旨荷枷國學門諸生石大用上章願以身代號哭奔走闕下者數千人釋之勒致仕去諸生涕泣送者塞途京師爲之罷市蕪州知州張需才長於治民先佐鄭州有聲泊守蕪見民游食者多每里置簿列戶各報男女大小口數派其各種粟麥桑棗紡績之具雞豚之數徧鄉示之暇則下鄉至其戶簿驗之缺者罰之於是民皆相勸勸力無游惰者不一年俱有恆產生理日滋蓋以生道使人其易如此朝覲至京遂受旌典尋畿內蝗作捕之有法吏部侍郎魏曠巡至其郡異之下其法於諸郡有牧馬者擾其民需笞之領牧者謂於振捕之下獄策楚幾死竟謫戍邊十三年福建參政宋彰交趾人結納中官肆侵漁餽振得陞左布政抵任計營所費驗戶科斂貧乏者爲所迫至不聊生於是鄧茂七因人心搖動遂奮異志乘縣句攝嘯聚窮民一呼而集旦夕數萬東南震動浙寇聞風而作若火燎原矣十四年冬北酋長也先遣使二千餘人進貢馬報作三千餘人振怒其詐減去馬價曾使回報遂失和好衆數萬入寇大同兵失利邊塞城堡多陷沒警報時至振不與大臣議勸上親征百官伏闕上章懇留不從七月十七日駕發京師八月至土木敗績車駕北狩皇太后命籍振家其珍奇寶玉綺繡及金銀凡十餘庫磔振姪錦衣衛指揮王山於市族屬無少長皆斬英宗復辟追復振官立祠祀之先是正統中振作大第於皇城東又明年作智化寺於第

左及土木之變。言官勸其擅權誤國。或有謂今陷寇中。反爲寇用者。振族黨並誅。第宅沒官。改京衛武學。至是振黨以聞。上大怒曰。振爲寇所殺。朕親見之。追責言者。皆貶竄。詔復振原官。刻木爲振形。招魂以葬。塑像於智化寺北祀之。敕賜祠額曰旌忠。憲宗立。以言論毀之。

阮浪。河間人。侍英宗南宮。浪下內官王堯者。往蘆溝橋抽分。浪以南宮所賞鍍金梁扣綉茄袋鍍金結束刀一把與堯。堯歸。飲錦衣指揮盧忠家。蹴毬。毬衣忠因見其刀袋非常制。遂令妻進酒醉堯。解之。俄而入皇城。白裏行太監高平。以爲南宮欲謀復。臬儲令浪遺堯以刀袋賞忠。求外應。堯竟以此與浪。義子趙縉皆凌遲沒產。浪入詔獄。炮烙燬煉。苦慘備至。卒不承命。斃獄中。英宗復辟。平忠亦凌遲。贈浪御用監太監。命儒臣撰文立碑。官縉子銳錦衣鎮撫。

曹吉祥。不通文墨。恐事歸司禮監。稍附內閣徐有貞。李賢行己意。吉祥侍禁中最久。正統景泰間。征麓川。福建諸寇。皆充監軍。號都統。因帶去韃官軍。能騎射取功。遂收置麾下。結爲牙爪腹心。後迎駕。亦用此輩爲助。俱冒大職。兄鐸。從兄鑽。皆都督。弟鉞爲都指揮使。韃官伯顏也先等亦爲都督。從子欽冒功。封昭武伯。與石亨爲左右臂。時稱曹石云。後亨敗。冒功者皆奪爵。此輩以吉祥庇。得不動。吉祥竊歎曰。亨與我同。亨死。我安得不反。結事張鵬。御史楊瑄等嘗論奏吉祥。吉祥泣訴於上前。得免。以故志益驕。未幾。黨陳汝言敗。上漸覺吉祥。且厭其干國事。欲抑之。念迎復功多所優假。久之。上廉迎立外藩之誣。因銜吉祥。李賢一日。因極陳奪門不可爲功。上始大悟。重疏抑之。吉祥不自安。卽懷異志。會御史論曹欽不法事。詔書劾。

欽遂行謀吉祥欲幽上於南宮而立皇太子及是陝西有鹵報上命兵部尙書馬昂懷寧伯孫鏜帥師往禦期是月初二日早昂等陞辭行吉祥與欽謀以是日欲乘機殺昂等擁兵入大內作亂事頗泄是日晚都指揮完顏者禿亮聞之急詣長安門告變時漏下二鼓奏入詔侍直中官執吉祥於內庭欽等不及知四鼓欽與鉉及鐸鐸伯顏也先等統番漢兵五百騎直抵東長安欽見門閉度事露急引兵詣錦衣衛指揮逮昶第執昶殺之時百官候朝待漏聞甲馬馳驟之聲謂征陝師出也既乃大亂百官多亡匿鐸率數騎而西殺都御史寇深欲殺尙書馬昂不得得大學士李賢於公署及尙書王翱於東朝房又散傷廣寧侯劉安欽遂縱火焚東西皇城門會大雨火滅欽欲殺李賢王翱不果賢被刀傷欽叱刀者脫之且告賢曰吾父子兄弟盡忠迎駕今被逮昶返欲相害因擲頭示賢曰誠爲此人激變非得已也賢曰此人信生事怨之者多旣除之可卽請命欽請賢爲作草疏進賢就翱所索紙爲草疏仍同翱自門隙入之味爽孫鏜領兵至圍之翱得脫走比旦王師漸集詔會昌侯孫繼宗領兵討賊孫鏜督諸軍先登恭順侯吳瑾及諸將分道迎擊馬昂以精兵殿之大戰於東華門外瑾爲欽所殺諸將奮擊斬鉉及鐸於陣又斬鐸於欽第欽匿其家督井中引出斬之伯顏也先縶城遁追獲斬之賢聞首惡旣盡誅恐衆心危疑卽具疏請宣令諭脅從者罔治以安反側捷奏是日晚上御午門朝百官詔吉祥磔於市籍沒其家餘黨並放嶺南遂詔天下布寬恤之恩一切不急之務悉皆停罷與民休息贈瑾梁國公諡忠壯深少保諡莊愍繼宗進太保鏜進懷寧侯昂翱賢加太子少保進完顏者禿亮爲都督餘將士陞賞有差

金英在正統中與興安同時爲太監二人俱志端識卓咸謂其有大臣風度當正統己巳之變人情洶洶思南遷以避之二人奉上命召廷臣集丹墀下獻計且對衆誓曰寇旗決不可使過都惟嚴厲城守爲最上計時惟于謙主守議二人協之選將練兵爲戰守長策區畫有方時侍講徐埜負時名以其占術倡言京師不可守必須南遷英首叱之令人扶出又宣言於廷曰死則君臣同一處死耳有以遷都爲言者上命必誅之成山侯王通欲挑京師外城興安鄙之不行賴二人奉景帝主謀於中固守之議始決景泰甲戌英奉命南京時公卿俱餞英江浒薛瑄獨不往英心重其人及還京每揚言於衆曰南京好官惟薛瑄耳時景帝有易儲之心一日語英曰七月初二日東宮誕辰蓋謂懷愍以餽英也英叩頭對曰東宮生日是十一月初二日蓋所對者憲宗也景帝默然時景帝最信任于謙言官有言其柄用過重興安曰只說日月與國家分憂不要錢不愛官爵不問家計朝廷正要用人似此才諸公尋一箇來換於是衆議乃息英宗復辟斥遠之憲宗在宮中知二人忠謀仍擢近侍以壽終

懷恩直隸河間人禮科給事中戴綸之幼子也綸字希文侍宣宗於皇太孫時以諫獵繫獄死恩幼被宮賜名懷恩成化間任司禮太監恩初受學翰林學士錢溥恩謂人性頗正直又長於問學及任司禮監上愛之一日遇聖誕被賜金二錠奏云臣蒙恩至此皆師父錢某之惠願留此金以轉奉會溥考績至京恩置宴以前金爲壽成化甲辰僧繼曉以服獻大建淫祀時主事林俊諫忤旨人皆危俊不測恩叩頭諍曰不可自古未聞有殺諫官者我祖宗朝開大言路故底盛治今欲殺諫官將失百官與天下之心奈何臣

不敢奉詔。上震怒曰：汝與林俊合謀，嬖我不然。彼安知我宮中事？因舉御前硯，擲之恩以首承，硯不中。復怒仆其几，恩免冠號哭不起。曰：不能復事陛下。上命左右扶出，至東華門。恩使謂鎮撫司曰：若等諂梁芳，合謀傾俊，俊死若等不得獨生，遂徑歸臥於家。曰：中風矣，不復起視事。上命醫調治，使者旁午於道。已而上亦釋俊。時有星變，黜傳奉官，御馬監太監王敏乞於上。凡馬房傳奉不必動上允之。敏持疏謁恩，跪於庭。恩徐曰：起。病實不能爲禮，問何爲？敏曰：已得旨。凡馬房傳奉不復動。恩大言曰：星之示變，專爲我輩內臣壞朝廷法也。外官何能爲？今甫欲正法，汝等又來壞之。他日天雷將擊汝首，指其坐罵曰：吾不能居此。汝來居之。汝兄弟一家，徧居權要，今乃爲此耶？敏惶怖歸家中氣死。又有章瑾以獻寶石進鎮撫司。上命恩傳旨。恩曰：鎮撫掌天下之獄，極武臣之美選，奈何以瑾得之？不肯傳。上曰：汝違朕恩，叩首曰：非敢違命，恐違法也，不得已。乃命覃昌傳之。恩曰：倘外庭有諫者，吾言尙可行也。時尙書余子俊在兵部，恩諷之曰：第執奏，吾爲汝從中贊之。子俊謝不敢。恩歎曰：吾固知外廷之無人也。時惟王恕每疏諫，時事切直，恩力扶之。每疏至，輒歎曰：天下忠義，斯人而已。時太監梁芳有寵於上，或告以固寵之術。時上鍾愛興王，爲芳計曰：不如勸昭德勸上易之，立興王。是昭德無子而有子，興王無國而有國。如此可保富貴於無窮。豈直免禍哉？芳以爲然。乘間言於昭德宮，勸易儲。時懷恩聞之，歎曰：此事只在懷恩。上召問懷恩，微露其意。恩免冠叩頭曰：奴婢死不敢從。寧陛下殺恩，無使天下之人殺恩也。伏地哭不起。上不懌而罷。恩退，遂閉門不出。已而詔往鳳陽守陵，以覃昌代之。丁未，孝宗卽位，召還。時何喬新有人望，大學士萬安欲遠之。黜

爲南京刑部尙書。恩一日詣內閣言新君卽位如何令喬新去南京耶。安默然。上斥安安乞哀猶無去意。恩遂摘其所懸牙牌曰請出矣。恩雅重王恕剛正力薦於上。遂召爲吏部尙書。其黨正擯邪類如此。大學士劉吉黨安嫉恕。恩深知恕賢力護之得不害。時言路大通造言者過激或指內臣爲刀鋸之餘。覃昌大恚。恩曰彼言是也。吾等本刑餘之人又何怒焉。其黨遂不能起。人雅慕其義云。

阿丑者。憲宗時優閑也。多機警善恢諧。每於上前作院本多有譏諫之風。時汪直驕橫。一日丑於上前作醉人酗酒。一人佯曰某官至。酌罵如故。又曰駕至。酌亦如故。又曰汪太監來矣。醉者驚迫帖然。傍一人曰駕至不懼而懼汪太監何也。曰吾知有汪太監不知有天子。由是直寵稍衰。時王越陳鉞媚直結爲死黨。丑復作直持雙斧趨階而行。或問故。答曰吾將兵。惟仗此兩鉞耳。問鉞何名。曰王越陳鉞。上晒之。而朱永掌團營。役兵治私第。丑作儒生高吟曰六千兵散楚歌聲。一人曰八千爭之不已。丑徐曰汝不知彼二千爲保國家作屋。上密遣人察之。永懼卽撤工。時上下行政多頗。丑於上前作六部差遣狀。命精擇之。既得一人。問其姓名。曰姓公名論。主者曰公論如今無用。次一人曰姓公名道。主者曰公道如今亦難行。最後一人曰姓胡名塗。主者首肯曰胡塗如今儘去得。上亦微晒之不罪也。丑每事規諷多類此。

汪直廣西豨種幼彼俘入昭德宮。黠桀最有寵。陸御馬監。憲宗懲李子龍事。設西廠置獄。命直往外調察。初出布衣小帽。時乘驢或驛往來京城。內外人皆不之疑。有章瑛者市井無賴。投內官章姓者爲僕。從征延綏。冒功陞百戶。直收之領校尉。用事自置獄。凡街市鬪毆罵詈爭雞縱犬及一切迴避不及者卽

加箠。致煩上聽。衆益效之。多爲贖書。誘人密以情告行事者。捕下獄。加以法外之刑。冤死相屬。託以捕妖言。圖官賞。無敢言者。楊榮曾孫華。以人命入都營。爲瑛所刺。謂華家資鉅萬。曾納生人棺中。招集亡命下海。謀不軌。卽掩捕下獄。波及其姪郎中楊仕偉。塔主事董序。卽家拷及妻女。華仕偉備嘗酷刑。羣死。因籍其家。沒人口資財。赴京。所過鴟張虎噬。有司賄賂狼籍。且謗及諸大臣。上由此信任之。威勢壯烈。吏部尙書尹旻。引爲內助。都御史王越。因從征。識瑛。藉之通情款。直益縱恣。御史王本。雲貴刷卷還。就其寓舍。搜得象笏等物。坐罪。刑部郎中武清。勘事廣西還。執訊無所得。釋之。不以聞。禮部郎中樂章。太醫院判蔣宗武。行人張廷綱。使安南還。浙江左布政劉福起服。皆執下獄。益遣校尉四出。內自京營。迨外鎮守。總兵等處。探聽事情。跟緝鉗制。沿河分布盤詰。獨嚴於公差官員。倚勢搜檢。無復體貌。道塗皆阻。商賈不通。直又日挾數千百人所在穿繞。震呼辟道。雖大臣莫不引匿。一日。過兵部。尙書項忠。蚤朝不避。就左掖下呼名。朝罷。校尉擁逼而去。直佯不見。叱之始散。法司曹郎御史等官。每遇弔查文卷。俱親齋赴廠。竟日伺候。不得一見。東西長安門牌上用黃紙貼寫太監汪傳奉聖旨。不書名。見者無不驚駭。司禮太監黃賜。陳祖生。每訴於上前。皆譴之。發南京。章瑛益引進奸人。王英專託人陰私。以固信任。人情洶洶。五月丙子。大學士商輅。學士萬安。劉翊。劉吉言。近日伺察太繁。法令太急。刑網太密。官校拘執職官。事皆出於風聞。暮夜搜檢家財。不見有無。駕帖。人心震懼。各懷疑畏。內外文武重臣。託之爲股肱心膂者也。皆不安於位。百司庶府官資之以建政立事者也。皆不得其職。商賈不安於市。行旅不安於途。士卒不安於伍。庶民不安於

業承平之世。豈容有此。蓋緣陛下委聽斷於汪直一人。而汪直者。轉寄耳目於羣小。如韋瑛者。自言親承密旨。得專予奪。百官進退。盡在掌握。擅作威福。虛張聲勢。其同惡相濟。如王英。則以附己而薦之。稍存公論。有所諫正。則以異己而黜之。一如狼虎。並無忌憚。傷害良善。大爲聖德之累。陛下若謂防微杜漸。不得不然。則前數年間。何以帖然無事。往者曹欽之反。皆由逮視生事。有以激之。人所共知。可爲明鑒。方妖物傷人。當時人言。必有應驗。及立西廠。驚動人心。一如妖傷之狀。以此觀之。天道示儆。不可不慮。伏願皇上體天道之包容。勿察察於事情。遵祖宗之成憲。勿屑屑於改易。旨意必經於六科。防將來之假冒。奏訴必由於通政。杜濫受於他門。責政事於府部。而嚴課功覈實之權。付刑獄於法司。而申三覆五奏之令。收回伺察之人。誅逐姦邪之輩。其有謀逆姦細。并貪贓壞法重情。悉依舊規。委任歷練老成之人管理。如此。則讒言不入於耳。苛政不加於下。國家長治。聖壽無疆。皆在於此。不然。此風日長。國之安危。未可知矣。疏入。上震怒。命太監懷恩。覃昌。黃高。至閣下。厲色傳旨。謂輅等曰。朝廷用汪直。緝訪姦弊。有何壞法。爾等遽如此說。是誰先主意。輅等對曰。汪直違祖宗法。壞朝廷事。失天下人心。輅等同爲朝廷除害。無有先後。恩曰。不然。聖意疑此奏。未必四人皆同。然下筆必有先之者。安曰。某等同受朝廷厚恩。同一主意。誰獨爲先。羽奮然泣曰。某等奉侍皇上於青宮。迨今幾二十年。幸而朝廷清明。四方無事。今忽汪直爲害。使遠近不安。何忍坐視。某等誓不與彼共戴天。吉曰。汪直之罪。縱使某等不言。人必有言之者。今既奏入。貶謫黜罰。惟命不避。於是恩降色徐曰。朝廷命恩等問具奏之由。今皆執論如此。當實回話。儻上召問。幸勿變前言。輅

等曰。唯恩等去。輅舉手加額曰。衆先生肯爲朝廷任事如此。輅復何憂。蓋安等三人皆隨侍青宮。輅以先朝舊臣。恐上見疑。且慮三人或不同心。故云然也。已。恩等復至。傳旨曰。卿等所言良是。汪直壞事。朕實不知。今便革去西廠。散遣官校。卿等各安心辦事。輅等皆頓首謝。翌日。兵部尙書項忠具草會諸部院大臣共劾之。留中不報。遂罷西廠。召恩數直罪而責之。復還本監。調章瑛於邊衛差操。諸旗校在外者俱撤還。人心快之。然上之密信任如故。仍傳旨用其黨吳綬於鎮撫司理刑。直目不知書。綬粗曉文義。能撰奏章。有薦者。故用之。輅等言雖行。知其禍尙未已。而項忠初具草。令武選郎中姚璧特赴吏部尙書尹旻請署名。旻曰。本兵部所選。當以兵部爲首。璧曰。公六卿之長。以次當爲首。旻怒曰。今日纔認得六卿之長。旻既署名。卽遣人報章瑛曰。本兵部所寫。某但以次居首爾。又數日。都御史王越遇瑛與吉於蚤朝。越曰。汪直所行事儘公道。如黃賜專權納賂。非直誰能去之。且商萬二公在任久。事多故有所畏。二先生入閣。幾日。況直加意扶掖。何爲亦論列乎。瑛默然。吉曰。不然。某等言事爲朝廷。非爲身謀也。設使汪直行事皆公。朝廷置公卿大夫欲何爲。天下後世謂此爲何等時耶。越無以應。遂與吉疏。時廠中所執人甚多。皆無案籍。旣革。其人各散去。蔣宗武因服到家。家人猶不知覺。項忠尋革職爲民。六月。御史戴縉言。近來災變洊臻。皇上諭南京人臣同加修省。夫何訓誥彰彰。聽之藐藐。未聞大臣進何賢才。退何不肖。以固邦本。亦未聞羣臣革何宿弊。進何謀猷。以匡治理。惟太監汪直。緝捕楊萃。吳榮等之姦惡。高崇王應魁等之賊貪。又如奏釋馮徽。冤抑之軍。囚禁裏河害人之宿弊。是皆允合公論。足以服人而警衆者。奈部下章瑛等不體聖心。

猖狂行事。已得大臣奏。允卽將西廠革罷。又見皇上此心。卽古帝王從諫如流之盛心。伏惟皇上推誠任人。及時修改。務俾宿弊革於下。善政清於上。然後天意可回。并條數事。其一。令大臣自陳。并請敕內府各監及錦衣衛禁治。上悅其言。命所司詳議施行。繙九年滿。未陞久無聊。探知西廠雖革。汪直猶幸。乃假災異建言。頌直功德。以覬倖進。先以奏草示吳綬。達於直。直得之。爲言於上。然後奏之。御史王億亦奏。以爲直所行。不獨可爲今日法。且可爲萬世法。傳聞四方。莫不唾罵。於是直復開西廠。調察益苛。人不堪命。繙奏內自陳一事。尤迎合直意。蓋直嘗謗楊暉。投大學士商輅。都御史李賓。尙書董方等。賄求緩其罪。上詰之。而難於施行。繙言適中機會。故尤爲直喜云。其月。商輅致仕去。工部尙書張文質。執下廠獄。上聞。切責錦衣衛。釋之。亦不問也。直威勢愈張。江西人楊福。詐稱直自蘇入浙。及閩。所至官司。望風跪謁。左右索賄無算。爲鎮守內臣。覺而縛之。十一月。直請嚴文武乘輿之禁。又請查都城逋逃軍民。皆從之。直旣屢興大獄。猶不快意。或以邊功說之。大喜。乃謀之王越。越曰。外夷可乘也。而陳鉞撫遼東。殺入貢夷人起釁。十四年。直欲自往體察。聞臣萬安。亦以爲不可。乃以馬文升往。比招安功垂成。直又請行。以處置邊務爲名。許之。至遼。不見敵。因殺無辜。掘死人髑髏以報。文升因之得罪。又與陳鉞比。陷副都御史牟俸。侍讀學士江朝宗等。皆得罪。初直之行也。鉞先遣人賂朝貴。與直相厚者。爲之地。又令人自廣寧抵山海關。諷居人候直過。羣伏道左。告保巡撫官行事。公當會及軍民。時直左右多有納鉞賂者。因加稱贊。直信之不疑。至廣寧。鉞使服雜僕從中。朝夕左右。惟直所命。直遂喜。與之合。鉞前爲山東布政。牟俸時爲巡撫。有隙。俸改撫。

直隸行事多不合人心。如禁索私租。勸富家出賑濟穀。動以千計。絕京宦請託之類。由是怨謗喧然。直會往南京。聞之未發。至是。俸議事至京。直還朝。鉞因噉而發之。事連翰林院侍讀學士江朝宗。并浙江僉事吳璠。鎮江府知府黎福。常州同知柳演。蘇州推官華清。吳江等縣知縣馮衡。孟瀛。宋端。驛丞甘仲璫。義官王祥。民吳伯昌等。時惟朝宗在京。併下獄。餘命錦衣衛差官逮治。凡半年。璠等始至。謂朝宗與俸有連。仲璫其壻也。爲華清通路於俸。衡亦俸鄉人。斂民財以餽瀛。爲部民所訐。黎福按之。柳演代行賂。并吳璠按宋端。皆受賂。俸不能察。理刑千戶吳綬拷訊。皆不實。俸獨誣服。受常熟等縣糧長銀三千五百兩。例追入官。俸不能辦。連坐者共爲備納。部擬俸等各坐徒杖。贖還職。璠及福皆無罪。釋之。奏上。上以俸職司風紀。容通私賂。謫戍。朝宗調市舶提舉。十五年。直請加尹晏太子太保。從之。給事中王坦。山東人。以都給事中。趙良年老居先。噉直奏良疏詞不謹。失體。且輕浮。難居言路。調廬山知縣。蓋尙書王直大學士劉瑄實主之。遼東失事。直與定西侯蔣琬刑部尙書林瓊往勸。諸將降。間有差。尋宣大遼東告警。直往行邊。還。陳鉞復希直意。奏言。蓋州女直伏當加恨。不得都督聲言來寇。往年蓋州三衛。搆海西毛憐。累犯邊境。朝廷授以都督都指揮之職。諸夷因起爭端。紛紛擾亂。亦欲挾制以求顯職。與其加陞而招侮。莫若整兵而征討。請簡剛正謀勇大臣。掩其不備。搆其巢穴。庶不縱寇長姦。尙書余子俊等集議。朱永瑛印總兵。直監督討之。直遂弄兵。諸大臣畏其勢。司禮內閣又有結爲心腹者。鉞奏得行。仍命鉞參贊軍務。方鉞奏上。子俊以鉞開邊。惡之。永直將兵。殊不及鉞。鉞疑爲子俊所沮。乃言本朝未嘗有武職節制文大臣者。且征討重務。

豈可無文臣總督。意蓋自薦。遂得此命。云部議諸夷有來朝不犯邊者。勿令驚疑。直以其示弱損威。乃招誘夷人郎禿等四十人來貢。欲寘之死。且言蓋州三衛法當殄滅。若今日縱還。明日復爲邊患。請錮於獄。從之。分五路出撫順關。半月抵其境。賊據險迎敵。官軍夾攻。且發輕騎焚其巢穴。賊大敗。擒斬六百九十五級。俘四百八十六人。破四百五十餘寨。賜敕獎之。加直祿米三十六石。十六年直復與永越往延綏禦敵。發邊兵三萬聽調。給事中孫博陳時事。中言校尉不宜緝大臣。直怒。奏請同行。人皆危之。軍還亦被及受賞。二月襲敵威寧海子。走之。御史強珍劾陳鉞挑敵報怨之罪。直反劾珍。逮入京。坐戍。凡劾鉞者。并兵部官皆奪俸。直與永越往遼東備敵。未行而罷。命督京營。十二月敵入大同。直永越會兵禦之。十七年論功。頒賞。其報捷人汪鈺。陞都督僉事。直之姪也。從來所無人益駭之。五月敵犯宣府。直與王越赴之。至冬請回京。不許。留鎮大同。悉召回遊擊參將等官。直怙寵驕功。一時貪冒邪妄之徒。競趨附之。獻謀畫策。惟恐弗及。邊方小警。輒諷守將重報之。與師動衆。殆無虛月。而越等尤巧爲設計。每出師必討內官常道及近侍者家人弟姪。挾之以往。有事資之以彌縫。敗則藉之掩飾。或少有斬獲。輒張大其功。以圖陞賞。而膺金紫典禁兵。職侍衛。據津要者。比比要皆上下相蒙。凡奏不勘不覆。盡失祖宗之舊。又因之造言興事。妨廢政務者有之。是行所獻俘十人。皆老幼孱弱。乃以爲奇功。其它大率類此。紀功官惟命是從。憚憚不敢出一語。反緣力得進用。執事者心知其非。胡盧附和。取容說。始蓋州次威寧海子。次大同。報三大捷。實開三大覺。自是邊境無寧日。士馬疲弊。餽運耗竭。公帑私蓄皆亦立。邊民荼毒。有不忍言。而直與越典軍。相

習久交最密。直時忘懷。洩禁中語。越識之。間以語其所厚者。及征蓋州。直納陳鉞譜。欲窘越。越以其語挾之。直不敢動。威寧之還。有盜夜越皇城。入西門內竊衣米。時索之急。東廠校尉緝獲太監尙銘。以聞。上喜其厚賜。質直聞。怒曰。銘吾所引用之人。乃敢背吾。獨擅其功。思有以傾之。銘懼。欲訪其事。適越所厚者潛以其語語銘。銘達於內。因發其交搆事。上自直行後。李孜省用事。萬安結昭德宮。受孟密金寶。與萬喜等攬權通賂。惡直交關浸淫。上頗聞之。并得向欺罔搆隙之狀。漸疏之。不使入。於是科道官交章奏其苛察。幻擾。請仍罷西廠。得旨後之。萬安約劉珣曰。西廠爲害久矣。今科道官欲革之。朝廷不從。吾輩豈可坐視。有疏必從。珣曰。西廠行事。有何不公安。安曰。公不欲。吾自爲之。乃自署名以進。上乃罷之。中外欣然。珣有慚色。蓋珣無它腸。爲越所誤。說者謂直狠而刻。所傷國體。安等盡而姦。傷在國脈。一狐遠羣。狐復穴其中。爲害更甚。上雖聖明。不能盡掃也。直在大同。與總兵許寧不協。凡事拘執。巡撫郭鏗以聞。上惡之。切責調直。南京遣太監李榮趣之行。直之前後出使也。厭健馬不乘。常御驪車。日夜馳逐。有司追候不及。動遭箠撻。有定州知州裴秦者。預爲僕。以待直至。僕從皆醉飽欣欣。直心識之。至是被調。道經曲陽縣。有司聞風。畏避。直至閭家。困臥館中。孤燈熒然。適秦以迎謁。所司至。直窘甚。求食。秦以所挾飲。僕與共。直遂忘爾我。待之。且曰。吾非復前比也。吾南行。上意猶未可測。明發。但得車馬備辦。起程足矣。秦曰。諾。至明。趣駕而去。聲勢寂然。人以小人得喪之態。可爲世戒云。尋有劾其八罪者。降奉御。孝陵司香。越奪伯爵。戴縉仕。至尙書。與吳綬皆爲民。侍郎張頤致仕。韋瑛調外。餘貶謫有差。項忠強珍復職。陳鉞已先二年爲都督。馬儀所許。

奪官後坐事爲民。馬文升尙在戍籍。右都李裕副都屠藩以爲言。奪俸。蓋上猶以蓋州事爲文升罪也。惟尙銘因直見疏。獨擅權勢。甘言悅色。釣取名譽。內肆陰狡。賣官鬻爵。無所不至。聞京師有富室。輒以事羅致之。得重賂乃已。又謀入司禮監。與常道者相埒。人知其必敗。二十年黜往南京。尋遣官校追械之還。杖百。充淨軍。藉其家。得資數萬。輦送內府者。累日不絕。韋瑛調萬全衛。計邀功起用。自撰妖言。陷巫人劉忠。與等十餘人。不軌。告督軍太監張善。捕獲。毒刑取其家資。誣服以聞。命官會鞫。得白。上命斬瑛梟首。惡黨論罪。被誣者盡釋。決歲間諸大害。悉出。莫不稱上之明斷云。

王敬事。憲宗爲太監。與王臣等以購書採藥爲名。乘傳南行。王臣者。初爲姦盜。被捶傷脛。號王癩子。多妖術。所至縱暴橫索。詐貨財。搜取奇玩。官民并受其害。凡江南書畫古玩之奇絕者。檢括殆盡。至蘇州。令諸生集公署鈔錄。所謂子平遺集者。衆以妨廢學業。辭。敬卽令有司追逮。至驛中。亂箠之。諸生趙汴等。閔罵數。其擾害百姓諸罪。敬還京奏訴。下巡按御史提問。擬杖。江南巡撫王恕奏。謂近見太監王敬。齋來駕帖。止開前往蘇常。採取藥餌。收買書籍。別無行拘大戶。索要銀兩緣由。豈期王敬動以朝廷爲名。需索詐害。無有紀極。東南騷然。民不堪命。鎮江諸處。已索銀數萬。而它府可知。發鹽一萬餘引。與寧國等府。逼銀三萬有奇。又有鹽數百船。發去江北江西等處。逼賣。不知又得銀幾十萬兩。至蘇常等府。刑驅勢逼。索取官民銀五萬餘兩。其在江浙。并南京。沿途索要官民金銀。不知又有幾千萬數。千戶王臣。專弄左道邪術。而王敬聽伊撥置。舳舻相銜。滿載而歸。虧損國體。大失人心。伏望留意於難保之天命。割恩於壞事之小人。

明正法典。上曰：民情常患不能上達。王敬等在外矯詐爲姦惡。東南罹其荼毒。非重戮不足以謝天下。詔差官校械二人下錦衣獄。王敬充淨軍。王臣伏誅。中外快之。

覃吉。憲宗時一老閹也。性溫雅誠篤。勤學問。曉義理。孝宗在東宮。吉入侍。常口授孝宗以學庸及論語諸書。暇則開導以臺省政務。民間疾苦。且言前代宦者專權誤國之弊。尤切。嘗曰：奴老矣。安望富貴。但得天下有賢主足矣。以是聖資賴吉薰育實多。一日。孝宗從他閹誦華嚴經。吉入。速匿之。別以孝經展誦。蓋知其必強己也。吉跪曰：千歲得無誦經乎。孝宗曰：否。讀孝經耳。其見敬憚如此。既卽位。賜以東宮五莊。吉懇辭。且進曰：天下山河皆皇上所有。何以莊爲。勞民傷財。爲左右之利而已。願皇上還之。民朝野爲韻語曰：一覃育孝宗之德。

李廣。內官監太監。事孝宗以左道。見寵任。權傾中外。大臣多賄求之。廣進言建誠秀亭於萬歲山。亭成。幼公主成痘。醫藥不效。廣飲以符水。遂鳩中宮方咎廣。而清寧宮災。成謂建亭年月犯太歲。太皇太后怒曰：今日李廣。明日李廣。興工動土。致此災禍。累朝所積。一旦灰燼。廣懼。飲鴆死。給事中葉紳奏其八大罪。給事中葉昶奏。略謂吏久而姦。法久而玩。今天下之財。多聚於大臣。大臣之財。多聚於內臣。內臣之惡。莫甚於李廣。雖云自殺。實天所誅也。其餘黨猶蟠據於中外。里巷傳誼。士人閔議。凡有欲爲大京堂者。必以二三千計。此輩盜攘剝削。已不容誅。況又納諸宦官之門。以爲固結之計。將何所不至耶。願亟發其私籍。盡收其私人。合其數千百萬之賂。內充帑藏之虛。外舒軍國之用。亦足以寬民力。弭災眚也。御史張縉。禮部

郎王雲鳳亦以爲言。上命內侍搜廣家財。得一納賂簿籍。首進之。簿中某送黃米幾百石。某送白米幾千石。通計數百萬石。上因詢左右曰。廣所食幾何。乃受許多米。對曰。黃米卽金。白米卽銀。上悟廣賊濫。遂籍沒之。科道請出簿籍。按名究問。凡預名者惶懼危甚。各潛赴戚畹張壽寧處求救。昏夜奔馳。不期而會者十有三人。事雖得寢。而納賄者之姓名。一一盡傳於朝野矣。





明書卷一百五十九

列傳十八

宦官傳二

蔣琮不知何許人。少入宮。累陞至太監。孝宗卽位。守備南京。多放縱恣肆。先是沿江蘆場。軍民開墾。辦納糧課。及供各署柴薪。成化初。江浦新生沙洲。縣人先後承業。以補沈江田畝租賦。太監黃賜時。姦人悉獻於三廠。盡收其利。而歲額租課如故。孝宗卽位。詔歸之民。御史姜綰等覆按。而琮屢囑託。使斷歸三廠。綰等遂劾琮。謂以守備重臣。與小民爭利。假公事以飾私情。用揭帖而抗詔旨。揚言陰中。脅以必從。因歷數琮十罪。且言今士夫側耳。人人自危。軍民負苦。怨聲載道。乞下琮於理。明正其罪。刑尙書何喬新。覆移南京。勘處。其時適有後湖勘田事。洪武中。設黃冊庫於元武湖中。戶部官同給事中。管理曠曠。及有事查理。移文內府請鎖鑰。方許過湖。禁甚厲。後守備人員。於邊湖灘岸。開墾作田。致湖面淤塞。人得往來。弘治元年。南御史余濬言於朝。行南戶部。委主事盧錦會勘。錦時與給事中方向同管庫。亦嘗於洲上墾種蔬瓜。又於湖灘放牧牲畜。伐蘆葦易銀。爲修理費。太監陳祖生等具奏。何喬新亦覆移南法司。及南戶部。勘聞。而琮適疏辯。謂其在京。嘗劾奏江西姦人李孜省罪狀。黜其黨。與守備南京。又嘗糾發諸司過犯。以此諸

人連謀搆陷。因條析綰等所言。而汎摭及御史劉愷。方岳。并南諸司違法事。且謂刑部尚書何喬新。主事曾望宏。皆汝省同鄉。姦黨。而綰亦江西人。以故喬新不詳虛實。附和之。上亦敕南京併勘。而太監郭鏞。奉使兩廣。過南京。適應天府尹楊守隨。南刑部郎中趙璧。大理寺正聞昭。會後湖勘盧錦。方向占種湖田事。鏞因鼓櫓過湖觀望。御史孫紘等。以擅游禁地。劾之。鏞還而自辯。因言向牧羊湖灘之上。鬻官地。蘆薪。而守隨等勘問。止坐錦爲民。謂向無罪。所擬未當。御史不行劾奏。俱黨比不公。請遣官覆按。上遣太監何穆等往。而綰等及琮。更相奏訴。綰等凡四章。琮凡六章。皆付穆等勘治。奏至。謂各因私忿。煩瀆聖聰。琮不當占管投獻蘆洲地。私囑勘官。及擅收班匠工銀。而所訐御史等官違法事。及何喬新曾望宏爲李汝省姦黨。其言皆誣。綰等不當道辱監生。及失舉盧錦占種湖田事。其所劾蔣琮違法事。如妄保內臣。批發狀詞。亦多不實。請并加逮問。都察院議以爲穆等所奏。無諸人款狀。請仍行穆等重勘。於是綰及御史金章。劉遜。孫紘。紀傑。曹玉。譚肅。徐禮。余濬。皆就逮。而琮所占官房酒樓田地。悉歸之官。又擬璧昭向俱贖杖還職。守隨降調外任。於是守隨調廣西參政。璧降吉安通判。向雲南驛丞。而綰等逮至。下部院會議。綰等有乖風紀。琮累辯。誣人。及太監陳祖生。鄭強等。各因襲受獻蘆場之類。并南刑部侍郎阮勤。僉都虞瑤。大理卿吳道宏。寺丞屠勳。擬罪不當。致仕。南工部尚書程宗。見任侍郎黃孔昭。因襲前弊。俱宜逮治。且琮與綰等。訐奏詞所連及者百餘人。經年未結。官吏人民。皆失職業。乞早爲決斷。上曰。御史不顧大體。搆詞訐奏。煩瀆朝廷。姜綰。劉遜。余濬。孫紘。繆樞。紀傑。方岳。各降一級。劉愷降二級。俱調外任。蔣琮亦有不實。姑宥之。陳

祖生、鄭強、錢能、李榮、程宗，免問。黃孔昭、阮勤、虞瑤、吳道宏、屠勳，各奪俸。於是綰等皆調州判官，愷縣丞。初，綰等下獄，而琮治事如故。衆論不平，都給事中陳璠、御史伊宏各上疏爭之，謂如按事者言，則琮與御史皆當下獄。如都察院議，則俱合待勘。罪同法異，難以服人。且以一內臣而置御史十人於獄，臺院爲空，傳之四方，殊累大體。都給事中韓重等、御史張賓亦以爲言，皆不聽。吏尙書王恕上言：琮獨蒙宥，人心不平。乞追還前旨，以消物議。且言諫者奉旨，皆以已發落爲言。夫事有不當，十易之不爲過。若謂已發落者不可易，則古之從諫如流者，豈皆未發落者乎？上曰：朕以守備重任，不宜輕劾。爲何復如此說？不允。自綰等降調，而琮之勢日重矣。琮小有才，言事班班，上且厭且喜之。先是李孜省遣戍，遇赦當還。琮在印綬，獨言罪大不可宥。復械至，下錦衣杖拷死。上甚悅之，命守備南京。至德州，奏劾都御史張鼎，創爲新法。於真定、河間等陸路千有餘里，築長垣掘濠，壘欲以禦盜。不知曠野沙窩，高下不一。一經風雨，立就坍塌。當此農月，興不急之務，愁歎之聲，溢於道路。上曰：官得其人，盜賊自息。徒爾勞民，何益於事？諭止之。又言自張家灣至儀真，增設巡河官數多，乞取回。以其事委所在官司帶管。吏部難之，命查永樂以來各官名數。以聞。吏部爲革沾頭主事及南直隸巡河郎中歸之兩淮鹽法御史。於是愈自恣，謂人莫已議。驕恣不法，而勘官皆右琮而抑綰。琮愈橫，復許奏南兵部郎中婁性，逞威擅權，欺凌軍職。諸不法事，上命給事中任倫等往勘。而琮復奏性潛易案卷，倫等阿附掩飾。又奏南兵部員外郎袁燾，侵欺馬快船價事。亦連性會廣洋衛指揮石文通奏。琮僭侈殺人，爲軍民所苦。又開掘聚寶山，有傷皇陵王氣。逮問獄具論死，仍有之發。

孝陵充淨軍。性亦革職爲民。

王岳，遵化人。清介不伍俗。正德初，劉瑾入黨用事，出岳居東廠。每維持士節，執法不徇。時東廠司詞刺，而科道官多走謁岳門。岳接以禮，多正對。會廷臣欲誅瑾，岳獨是之。因密請於上。瑾因中傷岳，謂岳授意東班，令論列中官。且云請試之。諭岳欲杖朝官，觀其解否。武宗如其試。岳果長跪乞宥。上大怒，謫戍孝陵。行至臨清，賜死於舟中。

蕭敬詳，諸國典。持重老成，歷事數朝。正德中，諸奸疊肆，誣上行私。武宗每召問之，輒對以非先朝故事，多所救正。嘉靖初，言官論列罷之。

孫裕，真定人。孝宗時舊璫也。嘉靖中，進獻皇稱宗，不考孝宗。及戚畹多罹憲網，泣控上前，極言不可。頗踰激。世宗怒撻之，遂自縊。孝廟中，朝野傷之。

劉瑾，附崔果張水孫和蘇進等瑾，陝西興平人。本性談，幼自宮，投中官劉姓者得進。因冒之，又自稱云賜姓。鷲悍陰狡，有

口辯，嘗慕王振之爲人。孝宗時，犯法當刑，主事朱恩寬之，憤鬱不得志。每切齒文臣。孝宗大漸，召內閣劉健、李東陽、謝遷受顧命，謂東宮聰明，但未嘗學問。先生宜勸其讀書，輔導爲賢聖之君。既崩，武宗卽位，瑾方執役鐘鼓司，與同輩谷大用等俱得幸，導上逸遊。凡遣詔中革監槍，各城門監局，內官與大漢將軍千百戶，俱格不行。時時爲上言弘治間事，權皆歸內閣司禮監。朝廷徒有空名。又言天下鎮守內臣，皆司禮

暨舉用多受賄自潤。今後令代者各入萬金爲貢。不猶愈於賂司禮暨乎。上從之。悉更置如瑾言。諸中貴遂皆以貲得出鎮。肆意誅求。無所忌憚。又奏置皇莊七所於畿內。後漸至三百餘處。畿內民不勝擾。先是苗遠率師禦敵。報功多虛冒。曲事瑾得懽心。因而濫敘者甚多。衆不敢問。然猶憚孝宗節制未盡肆。及是傲然率其同黨。先上意向。迎而道之。舊制視朝臨幸。隨駕內官皆有定額。每遇登極。必一簡選。至郊廟尤肅。帶刀披甲者絕少。蓋敬天事神爲重。不敢過多夸耀也。至是漸增至數倍。賜蟒玉禁城中乘馬者。不可勝數。每出。明盔甲。炫服擁簇。看牲時享。填塞殿庭。南郊尤甚。正德元年正月。傳旨劉瑾管五千營。時已自鐘鼓司改內官。尋提督團營。上旣信任得自便。視朝每晏。時或微行。大學士劉健等憂之。先後屢疏力諍。或報或否。二月。極言臣等伏見皇上春秋鼎盛。政令維新。而地震天鳴。白虹貫日。恆星晝見。太陽無光。卽位之初。詔書一下。天下延頸。想望太平。而朝令夕改。迄無甯日。百官庶府。倣效成風。非惟廢格不行。抑且變易殆盡。建言者以爲多言幹事者以爲生事。累章執奏。則謂之再擾。查革弊政。則謂之紛更。憂在於民生國計。則若罔聞知。事涉於近幸貴戚。則牢不可破。以一二人之私恩。壞百年之定制。而不顧以一二人之邪說。遠滿朝之公論。而不卹臣等叨居重地。而徒擁虛銜。或旨從中出。略不預聞。或有所議擬。徑行改易。似此之類。不能一一備舉。臣等心知不可議。所當言。累有論列。多不見允。比爲戶兵等部。議處鹽法功次等事。具本上陳。極言利害。拱俟數日。未見批答。若以臣等言非。則亦明加斥責。而乃留中不報。視之若無。使臣等趨向不明。進退無據。深憂極慮。寢食弗甯。亦知內告外順。人情之常。但政出多門。咎歸臣等。捫

心反顧。無以自明。展轉於衷。事非獲已。上報以待。斟酌行然。瑾等遽感。旋即若遺。九月。太監崔果等往南京。蘇杭織造。瑾爲奏討長蘆鹽萬二千引。部科皆執奏不允。尋請與六千引。半與價銀。工部請敕。健等言。敕不敢撰。乞收回成命。照部初擬。俱給價。上意未決。猶欲全予鹽引。乃於日講罷。召健等問曰。崔果所請。鹽引可全與之。健等奏曰。得價已足用矣。上曰。旣與半價。何不全與鹽引。健等曰。戶部亦是爲朝廷撙節用度。上曰。該部旣欲節用。何不留此半價。卽以鹽引與之。聽其變賣。不亦兩便乎。健等曰。價銀有限。不若鹽引費多。上曰。何故。東陽曰。鹽引數有夾帶。如引一紙夾帶數十引。以此私鹽壅滯。官鹽不行。先帝臨終。銳意整理。正是今日急務。不可不爲遠慮。上曰。若有夾帶。事覺。朝廷自有法度處之。東陽曰。此輩若得明旨。卽於船揭黃旗。書欽賜皇鹽字樣。勢燄烜赫。官吏酬應少誤。卽加笞辱。而隱忍受之。至鹽商竈戶。雖凌虐萬狀。誰敢呼冤。所以不若禁之於始。健等亦共言之。上正色曰。天下之事。豈專是內官壞了。譬如十箇人中。也有三四箇好人。壞事者十有六七。先生輩亦自知之。如是者。言至再。蓋是時已有先入之說矣。尋再疏得允。時災異疊見。五官監侯楊源。以星變疏諫。杖謫死於塗。健等極諫求去。報以改過。盡心輔導。不允辭。健等時涕泣。至十月。將劾上。會司禮監太監王岳素惡瑾等。密疏瑾。馬永成。高鳳。羅祥。魏彬。邱聚。谷大用。張永。八人示健。乃連章劾請誅之。留中未下。上命太監陳寬等同至內閣議。且有發瑾等南京新房。開住之意。健等以爲處之未盡。皆正色曰。先帝臨崩。執老臣手。付以大事。今陵土未乾。而使嬖倖若此。他日何面目見先帝於地下。寬等辭去。其意未決。戶部尙書韓文素剛正。聞之。令李夢陽草疏。倡九卿科道。

伏闕固諍。吏部尙書焦芳。泄其謀於八人。明晨。健等持之急。上驚泣不食。諸閣大懼。相對泣。上遣司禮王岳詣閣議。一日三至。健推案哭。執不肯下。岳獨稱曰。外廷議是明日。召諸大臣入。諸大臣或有答文者曰。公疏云何。文故不應。託吏侍郎王鑿趨詣閣候。健語鑿曰。事且十成七八。諸公第堅持。至左順門。岳手諸大臣疏曰。有旨。諸先生愛君憂國言良是。第奴儕事上久。不忍卽置之法。幸少寬。上自處。衆不能吐一語。岳謂文曰。此疏出。公公云何。文曰。今海內民窮盜起。水旱頻仍。天變日增。文等備員卿位。靡所匡救。上始踐阼。遊宴無度。狎暱羣小。文等何忍無言。岳曰。上非不知。第欲寬之耳。諸大臣遂旅退。鑿謂岳曰。設上不處。奈何。曰。我頸有裏鐵。邪。敢壞國事。是日。諸閣益窘。自求去。南京安置。閣議猶不肯下。夜。瑾等遶上前跪伏哭。頭觸地曰。非上恩。奴儕且噬餒狗。上色動。瑾又進曰。害奴儕者。王岳輩爾。上曰。何謂。曰。岳前掌東廠。謂言官先生有言。第言議閣時。岳又獨是外廷議。狗馬鷹兔。岳嘗獻否。上心所明也。今獨咎奴儕。不過連結內外。去其所忌。制上出入。自行私耳。益伏地痛哭。上怒。收岳等於東華門外。瑾又曰。狗馬鷹兔。何損萬幾。左班官敢譁無忌者。司禮監無人耳。有則惟上所欲爲。誰敢言者。上立詔。瑾入掌司禮監事。閣臣知事已中變。因言人君之於小人。若不知而誤用。其失猶小。其禍猶緩。天下尙望其知而去之。若既知而不治。則小人愈肆。君子愈危。必至於亂亡而後已。且邪正不竝立。今此數人者。滿朝皆欲決去。陛下知之。幾欲去之。乃使之尙在左右。非但朝臣盡懷疑懼。此數人亦恐不自安。上下相猜。內外不協。禍患之機。皆自此始。宗社所關。誠非細故。皆上疏求去。獨允健遷。雖給夫廩。賜敕乘驛。而意絕淡。惟恐去之不速。亦不俟再

疏存舊體也。岳等發南京充淨軍，死於臨清舟中。方諍時，東陽策內黨膠結，未必勝。閣中舊臣止三人，若俱逐，必新進者用事。次當屬焦芳，芳同年也。原以侍讀謫外，累陳乞得復。至今官切齒在廷諸臣。又陰賊無賴，一日得與閣權，無以壓之，必內外叶應。大逞其志，禍有不可測者。故獨嘿無所言。瑾果德之不允辭，健遷去位。越五日，傳旨芳兼文淵閣大學士，并探人望，加王鑿學士入閣。進東陽少師，芳欣欣得意。東陽委蛇難爲前，鑿悒鬱不樂爲後矣。既事出不意，衆皆駭愕。且爲健遷惜，給事中呂紳上言：「二臣受先帝付託，隨事救正，思以盡職。今輕棄老成，誰與共事？歷指不可聽去者五：下部議如紳言不聽，劉蒞又以爲言，亦不聽。日伺韓文無所得，適有解贖銀輸內庫事，覺歸罪於文，降一級致仕。給事中徐昂申教文，遂落職，并除昂名。瑾益自恣，乘上遊宴時，彙諸章疏瑣屑者進，上覽而厭之，麾下顧曰：『要汝何用？』瑾遂徑自決，上皆不聞。方人情洶洶，南京守備武靖伯趙承慶傳其奏稿，應天府府尹陸圻遍示諸司，兵部尙書林瀚聞之嘆息。南給事中戴銑、李光翰、任惠、徐蕃、牧相、徐暹、方劾太監高鳳，并其侄錦衣指揮高得林。又與南御史薄彥徵、賁安甫、王蕃、葛浩、史良臣、李熙、任諾、姚學禮、張鳴鳳、陸崑、蔣欽、曹閔、王昭道、王宏、蕭乾元等各具疏言健遷先朝元老，不宜輕去。又言上晏朝廢事，與六七內臣新進佞幸遊宴馳騁射獵諸事，上大怒。差官校械銑、彥徵等下詔獄鞫問。主事王守仁救之，杖三十謫驛丞。御史陳琳亦有疏降縣丞，而任諾、王蕃跪奏事不與知。獄具，請法司擬罪，詞連承慶、瀚、圻、洪紳、蒞、承慶、停半祿閑住。瀚、圻各降三級致仕。杖蒞、洪紳等三人，銑等六人，彥徵等十二人於闕下。昭道、宏、乾元逮未至，卽南京杖之，俱令爲民。旣而吏部擬

降瀚浙江右參政。珩爲兩淮運同。俱致仕。報可。南京副都御史陳壽。疏救除名。李夢陽以附韓文。主事王綸。以附劉大夏。御史潘瑾。以附王岳。並予致仕。時官寮以忤瑾意。下錦衣獄者。管衛事牟斌。頗善視之。杖皆從輕。瑾怒。調之南京。以徇私壞法。逮杖降百戶。閑住。而先後大臣。若馬文升。劉大夏。楊守隨。張敷華。張昇。閔珪。俱去位。焦芳在內閣。與瑾爲姦。中外附和。凡瑾所言。與芳如出一口。其所中傷。無不立應。恨韓文。李夢陽。必欲殺之。先逮文至京。罰米一千石。又以文卷不明。再罰一千石。夢陽逮至。以康海救得免。禁益嚴。尙寶卿崔璿。冊封副使姚祥。履任戶部郎中。劉繹。督餉工部郎中張璋。以乘輜。璿祥繹。枷長安門。璋張家灣。凡歸家枉道。請告違限。到官愆期者。皆黜降。有二進士亦與致仕。尋隙嫁事坐罪者。不可勝數。人人重足立。惟工部員外郎錢仁夫。得請致仕。人以先見不與。難歎美之。陝西都御史楊一清。南祭酒章懋。太常卿呂帝。病歸爲榮。列劉謝韓文等五十六人。願赦令鴻臚寺宣讀。榜示天下。其文皆焦芳所爲。瑾既不。通文義。大小章疏。持回私家。有禮部司務孫聰。其妹夫也。不謹黜歸。囑大同巡撫崔巖。以贊畫薦。改兵部。留京。張文冕者。華亭縣人。爲諸生。被革。潛入京。投瑾門下。用事。所攜章疏。皆二人閱之。撰僞旨。付出施行。多或累數百語。任其恣睢。往往有不可解者。引樹私人。曹元。劉宇。楊玉。曹雄。毛倫等。布列要地。以爲腹心。爪牙。谷大用。先主西廠。復立內廠。自領之。惡少石文義。沈彬。左堂。郝凱等。信用。入錦衣。詞察諸司。事無巨細。必先關白。而後奏聞。在外鎮巡。以下官奏事。皆先以紅揭帖取進止。謂之紅本。其下通政司者。謂之白本。至有本內不書名。稱劉太監者。都察院書其名。叱責謝罪。中外大權一歸瑾。不復知朝廷矣。大裁內外。

官五百八十餘員。革河南山東西鄖陽蘄州保定蘇松鳳陽雲貴巡撫。魏公徐備奪無錫莊田。撫按艾瑛曾大有已奪還之民。再遣往勘。盡與魏公瑛大有戍南海。宸濠暗相交結。復其護衛屯田。凡事先以威脅。賄賂隨之。選法獄情。任意顛倒。陞官謝薄者。隨即革職。加賄又輒用之。或竟自傳本。或別本帶批。惟所欲爲。不顧理法。各處鎮守中官。輒假以便宜行事。撫按官亦以賄瑾故。競爲苛斂。將官或失律不究。反加陞擢。有至伯都督者。人稱立地皇帝。創爲新例。罪無重輕。類決杖永遠戍邊。枷號發遣。枷數日輒死者。數年死殆數千人。科道官下獄。且杖且枷。且戍以爲常。至都給事中許天錫。懷奏疏縊邸舍。其有降調爲民者。反以爲幸。一日蚤朝。有匿名文書一卷。傳旨詰問。執後班五品以下三百餘人。送鎮撫司審究。次日李東陽等奏匿名文字出於一人。其陰謀詭計。正欲於稠人廣衆之中。掩其形蹟。而遂其詐術者也。各官倉猝拜起。豈能知見一人之外。皆無罪之人。而併置縲紲。互相驚疑。且天時炎熱。獄氣薰蒸。若拘繫數日。人不自保。惟望先行釋放。然後密加體訪。寘之典刑。上從之。得釋之時。曝而死者。刑部主事何欽。順天推官周臣。禮部進士陸伸。噶而病者無算。劉健謝遷既家居。亦岌岌不自保。健二子思生。塔南通政。司程文。遷之子。編修。丕弟。主事。迪。皆革職。意猶未已。復勒二人爲民。先是詔訪舉懷材抱德之士。浙江西餘姚周禮。徐子元。許龍。上虞徐文彪。四人應詔。所司未覆。四人屢奏求用。瑾以四人皆遷同鄉。而草詔由健。欲因此罪之。矯旨謂天下至大。豈無可應詔者。何餘姚隱士多如此。必有徇私援引之弊。遂下禮等鎮撫司鞫問。吏部尚書劉宇。阿瑾意。劾布政林符。邵寶。李贊。參政伍符。參議尙衡。馬輅。知府劉麟。推官謚聰。知縣汪度。訪

舉失實而鞫詞連及健遷。瑾持至內閣，必欲逮并坐。且籍其家。李東陽徐爲勸解。瑾意少釋。焦芳抗聲曰：「縱輕處亦當除名。既而旨下如之。禮等謫戍邊衛符等各罰米三百石。聽度罷職。且著令自今餘姚人毋選京官。奪馬文升劉大夏許進雍泰樊瑩官。焦芳故怨大夏。言籍其家可得金數十萬。遂以岑濬事與潘蕃并逮。坐以激變。王鏊及左都御史屠潛力救。謫戍極邊。又并與健等皆奪誥命。因而連及者六百七十五人。前尙書秦紘以家人誣告侍郎黃景通政強珍。以鄉人訐奏。都御史錢鉞以榮府祿米皆受害。紘家貧無所得。強氏二子坐斬。景高安人。鉞新城人。家人皆戍邊。流離酸楚。號慟之聲。人不忍聞。并連及在事諸司。皆罰米三百石。二縣人照餘姚例不得選京職。又用焦芳言。江西人皆不得任京職。又截其科額至五十名。獨增陝西試額三十五名爲一百名。焦芳因之。河南增十五名。與山東西皆增爲九十名。芳子黃中怨不得鼎甲。卽授編修。字子文。傳改庶吉士。未幾亦編修。自謂西人。凡其鄉陞見者必注目。有一少卿盤珊拜起不成禮。馬永成等笑曰：「此公鄉人耶。」瑾大慚。會安定人吏部郎中張綵至。貌偉聲閎。儀度閑雅。瑾大喜。退而引見。卽填文選郎中。未幾陞左僉都吏部左侍郎。代劉宇爲吏部尙書。用事。言無不從。更出焦芳劉宇上。值大覲。各布政餽銀二萬兩。出差官皆有獻。給事中周鑰過淮安。貸所親知府趙俊千金爲餽。許而不與。自剗桃源舟中。給事中邵夔查延甯功次。縉於公署。所得不可勝數。張綵醜之。謂利歸於人。得不過十一。乃更反之。斂餽者皆得罪。遣科道四出。稽考錢糧。鈎查故案牘。凡缺少者。過爛者。悉罰賠補。動至數十萬。先後巡撫馬中錫。鄧璋。王宗彝。周南。王嵩。及管糧郎中知州逮治數十人。皆押赴本治責償。

嵩至籍沒所償之數。自上及下。盡皆分派。少亦不下千餘。科斂攀染。靡有紀極。初諸邊鎮屯田大墾。又鹽商中納芻粟多。邊餉稍足。後屯田廢。戶部令商人入贖。司農不輸粟塞下。故每歲出內帑金濟之。謂之年例。瑾爲國初無其事。一切停發。修邊銀盡取入京。廣東庫銀取三之二。省城至五十三萬。輯事者四出。南康民吳登顯三家端午競渡。邏卒以爲龍船。密報。皆坐極典。一家有犯。輒連坐左右鄰。有瞰河而居無鄰者。以河外民坐之。民間稍有違禁事。覺。卽舉家收捕。殺人取貨。官校所過厚賂之。雖遠方小邑。莫不畏威屏息。惟恐得罪。查各邊屯田。倍增其稅。設巡鹽巡捕等官。搜索騷擾。遂遍天下。貪黷公行。盜賊蜂起。遣御史甯杲等嚴兵捕殺。愈熾。亂從此起矣。擅政三四年。疾視廷臣。欲欲欲噬。公候勳戚以下。因事私謁。率叩頭爲一拜禮。踞受之。小拂其意。麾叱如僕隸。然往往惶怖不敢仰視。卽所厚者。時亦厭薄。噴翰林官平揖。以擴充政務爲名。改南調外爲民者。徐穆等二十人。甚至重定官額。其豪爽不能致。且敬憚不敢加害者。惟康海一人。夢陽之免。康實投袂往見。大喜立解。副使蔡清。按察使王雲鳳。皆有盛名。召爲兩京祭酒。頗敬王鑿。信李東陽。鑿戚不能安位。賸贊俱絕。則曰。王先生何自苦如此。東陽有言。時亦曲聽。韓文之得免。楊一清以邊費逮。平江伯陳熊以漕事。幾革世爵。亦得免。罰米輸邊倉者。就本地。皆其力也。而怙終不悛。卒聽鑿去。東陽託纂修誤字。奪俸示威。雲鳳亦被訕弄。惟一清先卒不染。若楊廷和。失瑾意出之南京。旋加尙書。召還入閣。王瓊以謝禮薄。與南轉北。止與試職。京城南大起玄明宮。占貓竹廠草場。并小民房屋墳墓幾千區。奪長甯侯周或賜產。術士余曰。明余綸。余子仁輩。出入其家。以瑾侄孫二漢者當大貴。遂

有不軌圖。一切四方災異。及天象有變。俱令勿奏。兵杖局太監孫和。嘗私以衣甲遺瑾。鎮守兩廣太監蔡昭潘。午爲造弓弩矢。皆私貯之。其謀日急。會眞鑄反甯夏。以誅瑾爲名。朝廷已遣都御史楊一清總督。太監張永監軍討之。瑾復用其黨陳震。先往措兵餉。將取爲功。未至。眞鑄已擒。永故與瑾在八黨之列。瑾後嫉之。言於上。發往南京。榜禁門勿使入。永知徑趨上前。訴已無罪。爲瑾所間。上召瑾相質。語不合。永卽奮拳毆之。谷大用爲解。且置酒釋憾。馬永成欲陞所厚邵琪錦衣百戶。瑾持不可。邱聚主東廠恣肆。以它事忤瑾。奏發其事。調南京。王琇建新第大內。誘上居之。因奏賈人居積。瑾怒。罪其人得止。同輩多怨之。雖威行宮省。其勢實孤。至是永將班師。楊一清說使誅瑾。爲天下除害。永許之。初議八月十五日獻俘。瑾故令緩之。有泄其謀於永者。永遂十三日入。瑾愕然。以上方嚮永。未有以中之。旣入見。上置酒勞永。瑾等皆侍。比夜瑾辭退。永密白瑾反狀。且出袖中奏。數其不法十七事。上已被酒。俛首曰。瑾負我。永曰。此不可緩。緩則奴輩皆盡粉。陛下安所歸乎。永成等共誣瑾。上意遂決。令長隨四人往執之。上乘馬繼後往。時夜半。瑾宿內直房。聞喧聲。曰。誰也。應曰。有旨。瑾亟披青蟒衣。以出。長隨縛之。乃夜啓東華門。繫於東廠。復分遣官校。封瑾內外私第。明日晏朝。後外人始微知之。猶莫敢顯言者。上出永奏示內閣。遂降旨曰。朕嗣承大業。務期法祖保民。以安天下。委劉瑾以腹心。整理庶務。瑾乃不體朕心。蒙蔽專權。變亂成憲。肆行酷虐。使官員軍民無不受害。愁嘆之聲。有干和氣。朕深悔焉。瑾降奉御。令鳳陽閑住。文武官員順從。緘默。多非得已。今皆貸之。各處新查屯田文冊。卽令燒燬。照舊徵收。巡捕巡鹽查盤等項。新設官員俱革去。法司問擬囚。

犯但有新例俱改正。一照舊制行。凡瑾所行有虧國體者。法司卽會衆官。一一條具奏革。瑾所當坐罪名。從重議擬以聞。事倅從中發。選卒飛騎。交馳於道。黃紙黑索。驚駭見聞。衣冠失度。府寺閭巷。喧囂如沸。浹日乃定。丁酉。下瑾於獄。降奉御。上猶未有意誅之。及親籍其家。見金銀累數百萬。其他寶貨。不可勝計。又得僞璽一。穿宮牙牌五百扇。中所置刀二。及衣甲弓弩之屬。上大怒曰。奴果反。乃以付獄。於是六科給事中謝訥。十三道御史賀秦等。列瑾十九罪。奏入。上是之。令法司錦衣衛於午門前訊鞫。巡撫兵備官裁革者。添補考察京官。鄉試解額。并會試南北中卷。俱如舊制。餘姚萬安新城三縣。仍選京官翰林官調外任者。具名以聞。文武官誥俱免。追已追者。仍給之。補賠漚爛糧米。并罰米者。免之。職官籍沒家產。不係叛逆者。仍返其田宅。韓福黜爲民。劉奉曹謐革職。閑住。神英奪爵。仍爲右都督。焦芳劉宇。旣致仕已之。其餘事應改正者。諸司詳擬以聞。旣而鞠瑾於午門外。刑部尙書劉璟畏之。噤不能出一語。諸公卿稍稍退。獨駙馬蔡震折之。瑾仰曰。若何人忘我德。震厲聲曰。震國戚。何賴於汝。呼官校拷掠。是日微震。幾不成獄。戊申。大理評事熊桂成獄詞。奏罪大惡極。反形已具。當寘重典。命徇於市。凌厲三日。不必覆奏。仍以招情。并處決圖。榜示天下。行刑之日。仇家以一錢易一樹。有得而生噉者。海內聞之。莫不踴躍相賀。故事。內臣父母無贈典。瑾父雄。先已贈都督同知。其母劉氏。一品夫人。兄景祥。官亦如之。景祥病。贈三代給誥命。旣死。賜祭葬加等。公卿以下。弔賻惟恐後。車馬日填塞東華私第。至不能容。將葬。又設祭。重致錢帛。謂之辭靈。初京師私語籍籍。謂中秋日傾朝送葬。同惡已定。計爲變。時夜禁甚嚴。見星後寂然無鷄犬聲。有中夜竊聽。

者聞兵甲鏗然相繼不絕及瑾死先葬期止二日方密旨封門曳景祥棺棄於路既而剖焚其屍人竝快之餘黨分別治罪李東陽疏言臣誤蒙先帝及陛下委託誠不足以動物術不足以救時比者劉瑾專權亂政備員禁近事體相關凡稟本擬旨撰寫敕書或駁下再三或徑自改竄或帶回私宅假手他人或遞出賸黃逼令落飛真偽混淆無從辯白臣雖委曲匡持期於少濟而因循隱忍所損亦多荷蒙淵衷明見謂不於內閣然王毀牘中亦難辭責理宜罷黜更復何言伏望特降命旨放歸田里上曰卿受先帝顧命輔導朕躬四五年來劉瑾恣爲蒙蔽卿委曲匡持朕已具悉宜安心辦事不允所辭瑾亂政害人事即令各衙門逐一查革改正其最顯著者多至百餘件工部改正十九事內拆瑾京城內外原立祠亭石器止存其父母墓有旨朝廷內外官一體內臣建祠造墳亦舊制也該部不諳事體堂上官奪俸二月該司官三月蓋瑾雖死內臣用事如故各恣所欲爲乃於經者言於上往通州張家灣置皇店權商賈舟車微至擔負之利亦皆有稅中外多怨之然所進者僅八萬餘皆入囊僕隸侵亦數萬建香山碧雲寺自治瑩域請祠額二作費以百萬計皆出內帑上亦嘗幸焉凡二日乃還并贈其父母張雄者其父銳後妻悍甚雄被逐自宮遂怨其父既貴不與之見同類亟勸之雄立中堂垂簾杖其父二十既乃相抱而泣遂爲乞恩超授銳後府右都督猶以支俸爲疑兵部尙書陸完言雄忠謫勤誠受知聖明加以祿養亦不爲過詔令銳帶俸朝參劉允爲司設太監正德十年往烏思藏費送番供等物時左右近幸言西域胡僧有能知三生者土人謂之活佛遂傳旨查永樂宣德間鄧成侯顯奉使例遣允乘傳往迎之以珠琲爲旛幢黃金

爲七供。賜法王金印袈裟。及其從人饋賜以鉅萬計。內庫黃金爲之一價。敕允往返以十年爲期。得便宜行事。又所經路帶鹽茶之利。亦數十萬計。允未發。導行相續。已至臨濟。運船爲之阻截。入峽江。舟大難進。易以縹緲。相連二百餘里。至成都。有司先期除新館。督造旬日而成。日支官廩百石。蔬菜銀百兩。錦官驛不足。傍取近城數十驛供之。又治入番物料。估值銀二十萬。鎮巡爭之。減爲十三萬。取百工雜造。徧於公署。日夜不休。居歲餘始行。率四川指揮千戶十人。甲士千人。俱西。踰兩月至其地。番僧號佛子者。恐中國誘害之。不肯出。允部下皆怒。欲脅以威。番人夜襲之。奪其寶貨器械以去。軍官死者二人。士卒數百人。傷者半之。允乘馬疾走。僅免。復至成都。仍戒其部下。諱言其喪敗事。空函馳奏乞歸。時武宗已登遐矣。先所帶太監劉宗等八人。錦衣等衛官舍韋祿等一百三十三人。物故者十九。所請敕書皆失之。其後於經侍上。上旣感疾。飲食多不當。經挾寵應對有觸犯。上怒曰。此豎愚癡。至是其真。內書館令翰林官約束之。每日自辰至夕。必常在館。俟其知悔。出言能慎。乃以聞。時經已年老。且不識字。至則俛首與諸內豎齒。自是疏斥。不得復見。上以死。張永初稍持正。掌御用監。忠命總制宣大山。西延綏軍務。因發營兵三萬。京兵六千。太監張忠督之。聽永節制。忠請自爲一軍。不許。敵退召還。十二年。甘肅告急。復總制進兵。斬七十九級。隨護南征。周旋王守仁收善後之功。而雄後入司禮監。張銳居東廠。得幸爲首。皆弄權納賂。勢行中外。宸濠前後饋送各萬計。銳假緝事。侵撓諸司。稍不順。卽中以禍。人尤畏之。張忠兇暴。屢以提督軍務僞功受賞。時談武藝。誘上巡遊。窩盜官軍不敢捕。見流寇記。它如孫和謀管團營。挾勢通路。劉養專領內官監。

營造侵欺料值。拮斂役錢。公私蠹耗。幾竭。蘇進、佛保、趙林、馬英、劉拳、周昂。皆旦夕不離左右。而進尤親昵。劉祥、邱得、吳經、顏大經、許全、馬錫、張信。始賄銳雄。及錢甯出爲鎮守。復賄江彬。扈駕巡遊。與進等張皇聲勢。所至搜求婦女。科索民財。甚於狼虎。上爲此輩所誤。天下莫不恨之。宦官之禍。於斯而極。世宗卽位。重者發孝陵充軍。或司香弟姪封伯者。皆奪。張永降奉御南行。餘送都察院鞠治。率止革管事閑住。其餘雖稍熄。而罪固不得而正也。嘉靖五年。楊一清召入爲首輔。言於上。取永回。仍掌團營。未幾卒。立祠賜額。李芳。京師人。歷至乾清宮管事。內官監太監。事穆宗東宮。性鯁直。喜讀書。學問優長。及卽位。每有過失。芳輒直諫。一日疏奏。以爲昔在東宮。侍奉聖主。每接給音。詞理嚴明。事務精詳。真天縱之聖。出於尋常萬萬。而海內蒼生。莫不延頸以望。君臨天下。而樂其至治也。自聖主嗣位以來。今六月餘矣。太廟祭告之禮。雖行。而內殿日久。家禮未蒙躬謁。以展孝誠。朝儀雖設。未蒙早起。諸司章奏。雖有溫旨。未蒙容覽。親賜裁決。凡此數者。皆聖政之累。臣等府中諸臣。輔導無效之罪也。臣謹按祖宗時。每日常期出朝。先詣奉先殿拜謁。蓋亦晨省昏定之禮也。今聖主於太廟祭告之禮。謹故事奉行。而內殿諸聖祖母。及先帝聖母。故有定省之禮。冥於躬盡。則負荷罔極之恩。何由以言報乎。且聖朝以孝治天下。以聖主奉先簡略若此。將何以慰海內之望也。祖宗時出。俱在五更。故朝畢。百官奉職。寅畏自持。今聖主出朝太遲。百官入侍太早。既至朝回。則皆飢倦不堪。政事荒廢。恐日復一日。百官懈惰。非國體所宜也。祖宗時退朝後。卽御便殿。宣召儒臣講論治道。裁定奏章。故世底隆平。治臻太和。今聖主退朝後。深居九重。諸臣不得專對。仰接龍顏。謀

議政事。諸臣將謂聖主不喜於言也。自古聖帝明王。未有不接見臣下而能致治者。恐忠鯁醇厚之言。不能上達。回邪壅遏之弊。由斯而滋也。祖宗時百官奏章。出自宸衷。親爲標決。今聖主諸司奏章。未見沈潛。睿覽。龍翰批傳。諸臣將謂聖主不喜於政也。况國家事機重務。戶口錢糧。百官賢否。軍民利病。皆載之章疏。若今置之不覽。恐政事漸瘳。無由得而瞻睹矣。伏望聖明。念祖宗創業之艱難。思今日繼述之不易。克勤政務。每日早起。先謁列聖。以展孝思。次卽出朝。以率臣下。退朝後。或御經筵。或御便殿。澄靜收心。默思治道。議論奏章。諮訪民瘼。親爲批決。則獨理萬幾。事事有不難者矣。疏入。上頗是之。後竟坐事死。杖下朝野惜之。

陳奉湖廣承天人。初自興邸入宮。至萬曆中。累陞爲太監。奉敕監湖廣贛稅。時承天守備曰杜茂。茂在事久。陰鷲有心計。人皆畏之。奉悍而駭。貌僂。僂。直一木偶。既至。撫按及諸司。以計厚糜。與譚利害可否。唯唯惟謹。衆皆喜謂易制。且奉自稱原籍承天。墳墓在焉。念桑梓必不大恣。然聽人穿鼻。投賄附麗者。雲集江湖。大盜率皆收用。惟所欲爲。不復顧忌。且奉敕提督秦和山。轄行都司。擅香稅林木之利。承天轄本衛。若禁山玄祐宮租入。皆不與有司事。然不勝凌轢之苦。奉總全楚并江廣錯壤處。皆得以意行魚肉。所在水陸要津。及各村落。皆揭竿拽黃旗。重徵疊收。慘慘汗辱殆遍。初至。檄荊州府推官華鈺等。往各地方查倉庫。不應。卽參奏逮下獄。巡按曹楮止之。不聽。奏楮陽誣陰害。抗旨撓稅。又奏謫襄陽知府李商耕。黃州知府趙文煒。荊門知州高則巽。又有奸人奏湖廣各屬。存留羨餘。漏稅贓罰。空餉佃價。不止億萬萬。唐相李

林甫妻楊氏壙中金牌童子各金器重數百斤左右。未開金窖。黃金鉅萬。每被小民盜竄。詔清查解用。凡鄉紳生儒商賈之家。皆嚇以奏請抄沒。需索殆遍。少有趨避。直入內室奸辱。或榜掠下獄甚多。二十七年十二月。武昌漢陽二府人不勝憤。聚千餘控之。所司皆錯愕。第云權在稅監。奉方據新署。衆往訴。怒曰。聖旨誰敢違。卽鼓譟。拋輓石直上。撫按豫知有變。先馳往。各司官俱至救之。奉僅以身免。從人重傷者甚衆。明年正月。奉始若有懼心。奏謂小民勢窮所迫。且臬木兵餉。正在吃緊。恐清查事竣。數難取盈。朋掘故塚。金多遺亡。苛責於民。猖獗復起。特賜矜容。少垂雨露。解進御前。數之多寬。難以取必。而更添金銀真贋之奏。與它遺落之奏。遂遣人至蘄州。參政沈孟化。知州鄭夢禎。小加約束之。奏劾孟化調用。夢禎降處。與茂相表裏。其勢愈烈。乘船至承天。凡四十艘。載兵器火藥。沿江射獵劫奪。自石牌次金花灘。以淘金爲名。索取金爐等物。勒居民認價銅鈎。鈎肉銅撈。撈婦人乳。諸生被縛者十餘人。并拘鎖鍾祥縣知縣鄒堯弼。遠近大震。御史王立賢以聞。不報。士民於三月望日。訴之兵備副使萬振孫。知府王禹聲。求解。忽有衽服賣訪單入城者。士民擁而搜之。單開五十餘家。送奉處。皆拘空室中。奉一一詰問。使踵至。城中洶懼巷哭。奉適於城外杜茂處宴會。夜闌始歸。士民呼噪而隨。次日揭竿聚衆。守臣諭之。乃解。茂疏參留守黎國暉等。失於彈壓。當治罪。越二日。茂有養馬人。稱疏內士民姓名稿。在蘭榮家。榮茂客也。羣往毀門而入。果得之。茂立遣衛官擁兵。凡素有怨者。悉加毆辱。卷其家貲。諸生避宿玄祐宮。追而縛之。有截耳折臂者。傷四十餘人。茂疏再上。而諸生多被逮。多死於獄。振孫等皆削爲民。僉事馮應京疏奉罪狀。極言違旨詐贓。殺人

無數。且聚盜耀兵。僭妄無君。凡九事。并言湖廣苗患。加以奉惡不悛。人心厭亂。勢必赤子弄兵。青衿披髮。疏發撫按。皆震虞禍。奉因勅應京。滿邊方奉所遣人。皆直至有司堂坐。逼取庫銀。凡商賈至者。加稅。又欲盡糶倉穀。委襄陽府通判邸宅。推官何棟。如盤驗。往稍遲。因參朋謀。勒措宅棟。如皆逮問。時應京將去。百姓喧聚。遮留奉怒。率甲騎三百。發矢刃。殺五人。傷二十餘人。於是比屋奮臂。皆起格鬪。遂攻稅府。奉度不能敵。自焚大門脅之。將坐以謀反。巡撫支可大傳諭。殺命使禍必重。今已破膽。縱之。聽朝廷自治。衆始持甌石林立。奉急奔入藩府。不敢出。可大被論革職。湖口太監李道奏。全楚地廣財富。奉征多解少。侵欺國課。上怒。撤奉回。敕杜茂兼督。其時錦衣差校。財體訪被縛。投江者六人。餘爲土人所殲。而以工侍郎趙可懷往代。可大諸司。衛奉至荊州。將登陸。所攜多違制之物。忽舟焚悉燼。楚人赴可懷呼。愬者數萬人。可懷撫之。仍疏請祖宗湯沐地。求寬豁。不報。執奉用人。索賈迹。因訴列四十餘條。大者如初。至襄陽朝王。嚇孔妃。得其珠寶金帛甚多。再索各項。值萬餘金。又索棗陽王金。花玉帶。值數千金。其餘如發墳墓。藏亡匿貨。所得金銀約數十萬。餘物稱是。而諸惡少所私不與焉。是時天下皆有礦稅。而奉有淘金船料。鑄錢水晶。諸名目。故其禍尤甚。奉至京。上治之甚酷死。

明書卷一百六十

列傳十九

異教傳

史官論曰。原夫異教之興。莫不顯標理趣。陰挾伎能。逞理以虛誕爲宗。精伎以入神爲貴。使游其藩者。用意徇悅。莫窮其有無。感驗靈微。益堅其信悅。始皇之慕安期。漢武之貴文成。五利。石勒之崇禮佛。圖澄。皆能感通夢寐。招致神物。一日數化。幻影見光。世主惑之。終身不寤。此夫伎之至妙者也。又其甚者。老莊明自然。竺乾尊寂滅。自然者以誕放爲適性。任性必蔑禮。蔑禮必倚法。其究也。流而爲申韓。寂滅者。忘死生。齊得喪。而自忍其身。忍其身者。必忍於人。其究也。流而爲賊虐。昔者楚英好道。而至於叛。梁武捨身。而果於殺。此其徵也。明興。猶沿元習。崇事番僧。號帝釋國師。傾國極施。合宮膜拜。以致藩封導從。雜以緇流。而北平之亂。實斯道爲之倡。嗟乎。楊墨塞路。比於率獸食人。豈不信哉。今特摭二氏之流。有所可否者。著於篇。以爲鑒戒云爾。

金碧峯月庭宗泐來復永隆哈立麻溥洽板的達姚廣孝李贊傳

金碧峯。宣州僧也。姓石氏。六歲依雲寂溫法師爲弟子。遊峨眉山。絕粒啖柏。嘗趺坐大樹下。忽溪水橫溢。

人疑已死。越七日水退，跌坐如故。比歸，卽州治西草室靜息焉。時太祖渡江，偶一元臣迎謂曰：「今欲竊我財貨納贖，上叱曰：『我本順天應人行王道，汝敢竊視我耶？』」元臣曰：「若篤行王道，可尋宣州胡僧金碧峯，必有所授。」上抵宣州訪之，見一老僧端坐。太祖仗劍就問姓名，不對。因按劍視之，僧亦引頸就焉。上笑曰：「可見殺人王道乎？」僧曰：「可見不怕死和尚耶？」因相語甚洽。僧曰：「而欲行王道，我有所指。」上推誠溫詢，僧曰：「建康有地可王，此真帝王之居。」後遂定鼎云。乃設普濟會居之。時有李仕魯，字宗孔，濮州人，博學有行誼。太祖起兵時已識之。洪武初，詔求道學，郡吏以仕魯應，上迎謂之曰：「吾求子久矣，何至之晚也？」仕魯對曰：「臣聞君求臣，未聞臣求君。陛下以武定天下，而臣欲以文進，故臣有待耳。」除黃州同知。初，願備顧問，上曰：「朕姑以民事試子。」後以治聞，召爲大理寺卿。至是，金碧峯應對稱旨，上欲求爲建職司。仕魯三上章，謂：「今天下學校尙未建，儒風尙未振，而先爲異端立赤幟，非所以訓遠也。」上怒，仕魯乞歸，遂得罪以死。小說家傳金碧峯事，奇幻詭譎多僞。

月庭和尚者，不知何許人。越國公大海守蘭溪，獲之，檢囊中有天文地理書，越公留之帳下。太祖征婺州，大海與月庭見上，并上其書。上喜，問月庭師何人，曰：「師龍游朱德明，德明精於天文，及得婺州，立觀星臺，上與月庭夜登臺觀乾象，令長髮爲娶妻。月庭與鐵冠道人議論時不合，又出語犯上，安置和州。參軍郭景祥奏和尚怨謗，遣人至和州杖之死。」

宗渤，台州人，渤號季潭，性頗聰慧，凡經書一目輒能誦，長尤博涉古今，善屬文。住持京師天界寺。太祖嘗

幸寺見湧動止異常人。因令其蓄髮。欲官之。湧固辭。尋奉詔註心經、金剛、楞伽、三經。及馬后崩。葬之日。會風雨電震。上甚不樂。忽召湧。至謂之曰。太后將就葬。汝其宜爲偈。湧應聲曰。雨落天垂淚。雷鳴地舉哀。西方諸佛子。同送馬如來。上悅。頃之天霽。遂啓輓。詔賜湧白金百兩。有金室集行於世。

來復字見心。豫章人。初名明天淵。以人才仕元至學士。因亂遂祝髮爲僧。改今名。爲人髻甚長。後爲僧而髻如故。工於詩。所與遊皆名士。胸次清灑。出塵。時僧宗湧著稱。復與之齊名。太祖嘗誦其所爲詩文。稱賞久之。時蜀王雅志釋典。禮遇甚隆。王在中都。構西堂讀書。召儒臣日與講論。復亦在列。又建寶訓堂。以奉祖訓。及前代帝王經典。命復作記。王又爲正心、觀道、崇本、敬賢、四箴。以自警。復代草。以故得達。上一日召問曰。汝不欲仕我而去。出家爲僧。吾亦視汝。然留鬚亦有說乎。對曰。削髮除煩惱。留鬚表丈夫。上笑而遣之。又一日召見。賜之膳。旣罷。復上詩。詩云。淇園風雨曉吹香。手挽袈裟近玉牀。闕下彩雲生雉尾。座中金蕪動龍光。金盤蘇合來殊域。玉盃醞釀出上方。稠疊濫承天上賜。自慚無德誦陶唐。上覽詩大怒曰。汝詩用殊字。是謂我爲歹朱耶。又言無德誦陶唐。謂朕無德。則雖以陶唐誦我而不能耶。何物奸僧。敢大膽如此。欲殺之。復遂玉筯雙垂。圓寂於墀丹之下。上令人視之。死矣。命葬之。有蒲菴集行於世。先是復初被徵。其師訴公笑止之曰。上苑亦無頻婆果。且留殘命吃酸梨。復不聽。及上欲殺而悔。因道訴語。上聞。逮訴至。亦欲殺之。訴曰。此故偈。偶拈之。非有他也。上問何出。訴曰。出大藏某錄某函某卷某葉。檢視果然。乃釋之。

永隆。吳僧也。洪武二十五年。太祖頒度僧之令。冒請者至三千餘人。上怒。命錦衣衛悉捕。將俱戮之。隆上言。願焚身代諸僧死。詔許之。敕中官以武士衛其龕。至雨花臺。隆從容出龕。望闕叩辭。送入龕。取香一瓣。書風調雨順四字於其上。謂中使曰。煩奏陛下。遇旱以此香祈。雨必驗。遂秉炬自焚。體骨不倒。異香逼人。羣鶴舞於龕頂。中官復命。上乃宥衆僧。會歲大旱。命以所遺香於天禧寺禱雨。至果大雨。上曰。此真永隆雨也。御製魄僧傳以弔之。

哈立麻。西僧也。號尙師。至京。太祖駕往視之。合掌不拜。初太祖爲燕王時。開西城烏思藏。有尙師哈立麻。及卽位。遣中官侯顯以書幣迎之。往返凡五歷寒暑。始抵京。上命居之靈谷寺。封爲萬行具足十分最勝圓覺妙智慧善普應佑國演教如來大寶法王。西天大善自在佛。領天下釋教。明年丁亥春二月。卽靈谷寺啓建法壇。命哈立麻薦福皇。皇考妣。哈立麻率天下僧伽。舉揚普度大齋科。十有四日。上幸齋壇。是時見有卿雲天花。甘雨甘露。舍利祥光。青鸞白鶴。日集。及金仙羅漢於雲端。白象青獅。莊嚴妙相。天燈導引。旛蓋旋繞而下。又一夕檜柏生金色花。徧都城有之。又聞梵唄空樂。自天而降。羣臣表賀。上悅。賜金銀綵緞寶鈔甚多。織金珠袈裟。金銀器皿。其鞍馬儀仗。與羣王埒。從者李羅輩。悉封爲大國師。並賜印誥金幣等。仍召至華蓋殿宴之。自是屢著靈異。謂之神通。教人念唵嘛呢叭彌吽。信者晝夜念之。大學士胡廣作聖孝瑞應歌以獻。上亦潛心釋典。作爲佛曲。使宮中歌舞之。唯翰林侍讀李繼鼎私曰。若彼既有神通。當中國語。何爲待譯者而後知。且其所謂唵嘛呢叭彌吽者。乃云俺把你哄也。人不之悟耳。識者服其議。

溥洽字南洲山陰人爲僧能文洪武初薦高僧入京歷陞左善世燕兵起爲建文皇帝設藥師燈懺誚燕王金川門開又爲建文削髮太宗卽位微聞其事囚南洲十餘年榮國公廣孝疾革太宗遣人問所欲言言願釋溥洽太宗後之釋出獄時白髮長數寸覆額矣走大興隆寺拜廣孝牀下曰吾餘生少師賜也仁宗復其官卒年八十二

板的達天竺中印度僧也元至正甲辰至燕元主灌頂受戒洪武甲寅至金陵召見稱旨賜印號善世禪師居蔣山統制天下諸山仍移文各郡許詣蔣山受苦薩法戒所司勿禁人多繪像事之以爲活佛御製善世歌有談笑般若生蓮花之句尋遊方三年復還蔣山賜金鎖茜衣車駕臨幸必造其室咨問法要人不得聞屢賦詩有曰晨向巖前觀日出暮禪松底聽風來蓋規之也辛酉五月患疾卒死了無他異葬天禧寺而屋之

姚廣孝長洲人性桀黠有慧智初名天禧世業醫一日廣孝謂父震卿曰兒不樂爲醫但欲讀書以仕顯父母不則從佛爲方外之樂至正壬辰年十四出爲僧居妙智菴法名道衍字斯道遂刻意爲文出遊湖海時靈應觀道士席應真讀書學道好讀兵書兼爲詩遇異人授占術輒爲人決休咎能自退藏人少知者其友王衍獨知之曰他日必當有所遇道衍亦自負屢欲返冠巾一日入城見僧官從者頗盛慨然嘆曰僧官亦自有富貴乎遂不果已而知京口賦詩曰讎齒年來戰血乾烟花猶自半凋殘五洲山近朝雲亂萬歲樓空夜月寒江水無潮通鐵甕野田有路到金壇蕭梁事業今何在北固青青眼倦看僧宗泐見

其搖膝高吟。誦之曰。此豈釋子語耶。斯道斯道。汝薄南朝矣。洪武癸丑。請給禮部度牒。於覺林寺入冊。尤銳意詩文。自是遂知名。甲寅。詔通儒僧出仕。道衍不願仕。賜僧服還山。十五年。以宗泐薦入京。時太祖封秦晉燕等十王。太宗封燕。將之北平。道衍乘間請曰。大王骨相非常。英武冠世。今皇圖草昧。東宮仁柔。願厚自愛。大王試乞臣府中當奉一白帽與王戴。蓋王上加白。其文皇也。太宗已稔知。亦欲得道衍。會高皇后崩。上曰。王與一名僧誦經念佛修齋。道衍遂籍燕府。大喜。至北平。居故慶壽寺。太祖崩。建文卽位。伊周齊谷諸王相繼有罪削爵。湘王自燒死。燕王懼。問道衍曰。能卜乎。道衍操吳音曰。會會懷出太平錢。授太宗。密祝而擲之曰。大王卜天子乎。王曰。咄。毋妄言。拜對曰。大王幸賜臣燕。亡左右窺聽。故敢舉其愚。主上猜間宗室。侵漁齊藩。所戮辱囚首隸士伍。蓋五王矣。大王先帝所最愛也。且又神明英武。得士衆心。主上所最忌也。夫燕勝國之遺。而北方雄鎮也。其民習弓馬。地饒棗粟。悉雄薊屬郡之材。官良家子。穀甲可三十萬。粟支十年。大王之護衛精兵。投石超距者。又不下二三萬。鼓行定山東。略河南。此勢若建瓴而下。誰爲抗禦。大王卽不南。機先發。欲高臥得耶。旦暮匹夫耳。臣謂大王卜之心。與臣卜無異也。燕王曰。子休矣。道衍曰。臣有所與相者。袁珙。請以決。曰。與偕來。珙至。事在珙傳。悉屏左右。珙俯伏曰。大王。太平天子也。臣遊燕市。燕市中諸將相肩接。皆以大王故。方太祖初崩。大王入臨。至淮安。有詔不許。太宗怒。以道衍言還國。太宗召道衍入便殿。密議。或歎息泣下。道衍曰。天之所與。誰能廢之。忽簪瓦飄墮而碎。太宗不悅。道衍曰。此祥也。天意欲殿下易黃瓦耳。因問期。曰。未也。俟吾助者至。曰。助者何人。曰。吾師。又數日。入曰。可矣。遂

謀召張曷謝貴等宴。設伏斬之。遣張玉朱能勒衛士攻克九門出。祭纛。見披髮而旌旗蔽天。太宗顧之曰。何神。曰。嚮所言吾師。玄武神也。於是太宗傲其像。披髮仗劍相應。兵初起。暴風雨。太宗不悅。對曰。飛龍在天。從以風雨。元吉兵行道衍曰。每日師行必克。但費兩日耳。燕兵戰東昌敗還。太宗詢之曰。前已言之。兩日昌也。自此全勝矣。及太宗將南。道衍送道旁。言江南有方孝孺者。學行負盛名。卽不肯降。幸勿殺。事在孝孺傳。當是時。仁宗居守。廣孝及郭資等日夜守禦。輯拊兵民。南兵再攻城。設伏截其後。城上呼噪。伏發。急開門夾擊。大敗南兵去。又夜縋死士下城劫南兵。或遣數十人遠伏草莽間。夜舉火鳴砲。罷南兵不得休息。輒出精兵奮擊之。盡焚九門諸柵寨。成祖軍中有聞見異事。及兵進止。輒緘書飛騎問之。條答附去。並中機宜。壬午。太宗卽位。冬十月。拜僧錄司左善世。永樂甲辰春二月。簡東宮輔導。擢太子少師。始復姓姚。賜名廣孝。廣孝辭甚力。上曰。朕若非少師。默運神算。何得天下大統。如此功烈。豈敢忘乎。今屢欲加官以報。輒辭。將何意也。對曰。臣本一江南浮屠。叨賴陛下聖神文武。得成大業。臣何功之有。况殊恩已蒙。不勝感激。若又受厚爵。實非臣子自處之義。伏願聖慈。給還原牒。放臣復爲僧人。則死無憾矣。不許。至是召見。令人以冠服被體。亟命宣謝。廣孝受命。然不育髮娶妻。居止多在僧寺。未幾。特賜第於崇文門右。爲之卜妻於功臣家。皆固辭。後賜二宮人侍起居。不近。召還。上眷禮孔篤。每稱以少師而不名。是年六月。往賑南直隸蘇松等府。遂還鄉。初。廣孝爲僧。其姊嘗戒之曰。汝旣爲和尚。當以慈悲心。及聞燕兵起。姊嘆息。謂人曰。和尚慈悲。當如是耶。至是還往見姊。姊拒之曰。貴人何用。至貧家爲。不納。廣孝乃易僧服往。姊堅

不肯出家人強之。姊不得已。出立中堂。廣孝卽連下拜。姊曰。我安用拜許多爲耶。曾見做和尚不了底。是甚好人。言畢遂還戶。不復再見。時郡中隱士王賓。人稱爲光菴先生。素與廣孝友善。至是愧其所爲。不與接。廣孝屏騎。從衣短褐。以往賓閉戶不納。廣孝力請。賓伴問爲誰。廣孝曰。是昔日道衍也。不應。廣孝大呼曰。光菴不棄舊日之雅容。我老僧一見乎。賓答之曰。吾在割薪。忙不暇也。廣孝益請。久之。賓憐其誠。因與之約期而去。至日天未曙。廣孝已俟立門外。日出。賓方啓門。遂相與再拜坐。賓語不及他。且連聲曰。和尚誤矣。廣孝有慚色。徐應之曰。彼時老僧眞誤。蓋亦天命所關。實不由我。賓叱曰。汝旣大誤。尙何歸咎於天命乎。且汝一沙彌。特受高皇隆遇。而不能報。何反背之不義。心安忍焉。萬世之下。烏得無罪。廣孝悅然求退。事竣退朝。上疏乞休。上懇留之。再懇。上察其誠切。因賜自便。丁亥。皇長孫出閣。充講讀官。戊戌。春三月。有疾。亟命其下爲幄。曰。上將來視。已而駕果至。撫勞備至。賜金唾盂。尋遣太醫診疾。中使存問。病篤。駕再臨。問以後事。不肯言。逼之。對曰。出家人復何所戀。又強之。乃曰。泐季潭在獄久。願赦。上卽日出之。尋卒。年八十四。祭葬從優。詔加奉天靖難輔運功臣。贈榮國公。諡恭靖。配享廟庭。尋官其養子姚繼。廣孝過關門。見酒望書甚工。問誰書。乃一少年。召與相見。曰。若相當貴。爲吾子乎。其人願以身事。遂辭其母從之。廣孝曰。惜也。年不甚永。官止四品。歸以見上。曰。此行得一子上。爲賜名曰繼。使侍東宮讀書。未幾。晉尙寶司卿。廣孝喜讀書。博通內外典。工詩文。所著有述虛子集。皆浮屠語。別有道餘錄。專詆程朱。識者非之。修撰張洪與廣孝素友。嘗語人曰。少師於我厚。今死矣。吾無以報。但見道餘錄。輒爲焚棄。復佑享太宗廟。嘉靖中。

以髡徒撤侑享。移主祀大興隆寺焉。

李贄號卓吾。溫陵人。以鄉薦累官太守。致仕寄居麻城。結菴說法。招聚徒黨。雄辯無敵。每曰。大道不分男女。作觀音問一書。士人妻女。多有攜衾枕宿菴中者。其說新奇。有藏書焚書大德等書。以呂不韋李園爲知謀名臣。李斯爲才力名臣。馮道爲吏隱。卓文君奔相如爲佳偶。秦始皇自千古一君。他名賢皆在譏貶中。而大旨在翻孔子之是非。士大夫靡然信之。初爲耿天臺所惡。後忽協爲一。焦竑耿高弟。亦推尊不容口。至被謾罵。怡然受之。總河劉晉川招入署。禮爲師。通州御史馬經綸延至家。爲給事中張問達所參。逮入京。下鎮撫司。素好潔。旣束入臭穢。大不堪。以書刀自截。悉燬其書。然家藏戶守。後士風大都由其染化。亦孔子之道一大厄也。

周顛張中張君實邵道人胡守法王世能張正常邵元節陶仲文傳

周顛江西建昌人也。年十四患顛疾。人稱周顛。云顛不事家業。行乞江南。多誕言而動止尤詭譎。未幾入撫州。尋還南昌。元末。每對人輒曰。告太平。時天下未亂。人異之。已而陳友諒入南昌。顛未有告也。及太祖定南昌。兵出東華門。顛謁於道旁。遂識之。三月。太祖還金陵。六月。顛亦至。每遇上出。輒遮前羅拜告太平。如是者數數。太祖厭之。命沃以燒酒。顛暢飲不醉。因見其衣敝。命更以新衣。見舊裙腰間藏三寸許菖蒲一莖。太祖問曰。此何物。對曰。細嚼飲水腹無痛。上以水命嚼而吞之。自是日顛不已。且曰。公甯能死我耶。上命衛士覆以甕。積薪燬之。火息啓視。正坐晏然。如是者三。乃命居蔣山寺。月餘轉發狂。諸僧苦之。已而

與沙彌爭食。遂怒。不食者半月。上一日遊寺。顛出。迓無飢色。上命具殺羞。同享於翠微亭。膳畢。密令僧闔之空室中。飢之旬月。三日遣問如故。人是以益異之。上每出。顛伏於道左。以手畫地爲圈。顛謂上曰。打破一桶。再做一桶。蓋一桶者。一統之謂也。上征陳友諒。問顛曰。此行如何。顛應聲曰。好好。上曰。彼已稱帝。今欲取之。豈不難乎。顛仰視屋久之。端首正容搖手曰。上面無他的。上曰。汝從行可乎。對曰。可。卽以所扶杖作壯士揮擊狀。以示必勝意。遂行。舟師抵皖城。無風。上復以問顛。顛曰。只管行。只管有風。無膽不行。便無風。於是諸軍沿岸牽舟。泝流而上。頃之。細颺作已。而大風至。不移時。達小姑山。上命衆凡聞顛言。帆來白。至馬當河。見江豚戲波中。顛曰。水怪見。損人多。上怒。令持顛投之江中。久之。衆與顛偕來。上曰。何不死之。衆曰。灑擲水不溺。上更與同食。食罷。顛整容。飭衣若遠行狀。趨迎上來。曲腰伸頸。謂上。你殺之上。曰。且縱汝行。遂去。莫知所止。有言顛深入廬山。上遣人物色之。無從。洪武癸亥。秋八月。俄有赤脚僧名覺顯者。至報於匡廬深岩中。見一老人。使我來。謂大明天子有說。問其說。乃云。國祚殿廷儀禮司。以聞。上曰。無惑衆。不許見。尋寄以詩二首。而遣之。壬申冬。上患熱證危甚。諸御醫進藥。皆弗效。俄有赤脚僧詣闕。言天眼尊者。及周顛遣某進藥。其一曰。溫涼藥兩片。其一曰。溫涼石一片。其用之方。以金盆子盛石磨藥。注之。沈香盞以服。初服在末時。至酉刻時。周身抽掣。藥之應也。又兩服。乃聞有菖蒲香。盞底有丹砂。沈墜鮮紅。迺異病遂愈。自是覺精神日強。赤脚仙一名住得。自言湖口人。

鐵冠道人張中。字景和。臨川人。初舉進士。不得。遇異人。授以太極數學。談福禍多驗。狷介寡言。嘗戴鐵冠。

自稱鐵冠子人。皆呼鐵冠道人。元至正末。太祖起兵濼陽。卽問道人名。召道人至。上手餅食未半。卽賜道人。問道人能先知我。至試言我以後事。願直述無諱。道人隨口誦數十句。中有曰。戊寅閏五龍歸海。壬午青蛇火裏逃。至洪武建文間始驗。餘多祕密。上問曰。天下紛紛卒何歸。道人曰。天下亂。非命世之才。誰與易之。觀之今日。必在明公。公龍驤鳳目。狀貌非常。若神彩煥發。如風掃陰翳。卽受命日也。未幾辭歸。隱幕府山中。時亂。每與人言避兵處。從之者多獲全。壬寅參政郢愈徵入京。至上問曰。子定南昌。兵不血刃。市不易肆。生民自此蘇息否。對曰。天下自此大定。但此地旦夕當流血。廬舍焚燬必盡。鐵柱觀亦僅存一殿耳。後指揮康太反。果如其言。上嘗親疏其事云。當陳友諒圍豫章。三月不解。上舉兵伐之。召問之。對曰。五日當大勝。亥子之日。獲其首領。其戰必在南康。上因命道人從行。舟次孫山。無風。不知進。道人曰。當祭之。祭已。風大作。遂達彭蠡。常遇春與敵戰康郎山。被圍勢甚危。僉謂不可救。道人曰。亥時當自出。不須救也。如期果出。連戰輒大勝。當鄱陽之戰。友諒已中流矢死。軍中尙未覺。道人已知之。言於上曰。友諒死矣。然其下知者少。猶爲之力戰。請爲文以祭。使人持進哭之。則彼衆氣奪而事大濟矣。上如其言。漢兵遂大潰。及太祖定都金陵。凡諸營建。皆道人相度。鷄鳴山寺刹宇。高可瞰大內。上心計毀之。將遊視。道人忽語寺僧曰。今上有意毀汝寺。來日當臨。汝等於中道遮訴。可免也。僧果詰旦燃香出山數里迎候。頃之駕至。僧俯伏懇不已。上笑曰。我無此心。若輩何妄也。僧對曰。此鐵冠道人教之耳。上寢其事。時徐達爲大將。道人相之曰。公兩額赤色。目光如火。官至極品。所惜者僅得中壽耳。後果五十四而薨。涼公玉嘗訪道人於

鍾山之處。道人野服出迎。玉以其慢已不悅。及行酒。戲之曰。脚穿芒屨迎賓。足下無屨。時玉持椰杯自酌。道人應聲云。手執椰瓢酌酒。尊前不忠。初王不以爲意。後玉竟以反誅。其他如他日龍馬兩重之對。省署震擾之言。剪燈花之占。類多奇中。一日道人對衆自投於金陵大中橋水死。上亟令索其屍不獲。未幾潼關守臣馳奏。某月日。鐵冠道人杖策出關。計之正投橋日也。物色之不復見矣。

張君實字玄一。號玄玄。世稱遜老。遼東義州人。丰姿魁偉。龜形鶴骨。大耳圓目。鬚髯如戟。項作一髻。自號保合容。忍三丰子。手執方尺。無寒暑。惟衣一衲。或處窮寂。或遊城市。浩浩自如。傍若無人。有問之者。終日不答一語。及語論三教經書。則吐辭滾滾。皆本道德忠孝。每遇事輒先知。或三五日。兩三月。始一食。登山其行如飛。或隆冬臥雪中。麴躬如常時。人或異之。因呼爲張蓮。蓮云。元末居寶鷄金臺觀。一日辭世而逝。從者爲棺殮。臨窆發視之。復生。乃入蜀抵秦。遊襄鄧。往來長安。歷隴岷。甘肅。洪武初入武當。登天柱峯。徧歷名勝。使其弟子邱玄。清住五觀。盧秋雲住南巖。劉古泉。楊善登住紫霄。乃自結草廬於展旗峯北。曰遇真。營草菴於土城。曰會仙館。令弟子周真得守之。洪武庚午。拂袖長往。竟不知所之。明年太祖遣三山道士請玄。玄造朝了不可見。住青州雲門洞窟。永樂初。遣給事中胡濙。指揮楊永吉等。徧物色之。不可得。十年二月。太宗爲書云。皇帝敬奉書真仙張三丰先生足下。朕久仰真仙。渴思親承儀範。嘗遣使致香奉書。徧詣名山。虔請真仙。道德崇高。超乎萬有。體合自然。神妙莫測。朕才質疏庸。德行亦薄。而至誠願見之心。夙夜不忘。敬再遣使。謹致香奉書虔請。拱俟雲車風駕。惠然降臨。以副朕拳拳仰慕之懷。二月初六日。詔

道士玄虛子往武當。於玄玄舊遊處。建道場。焚書冀有聞焉。竟不獲。仍御製詩賜之。有若遇真仙。張有道。爲言。矜埃長相思之句。天順末。嘗出見。與士大夫遊。靡和甚多。踪迹不一。上聞之。封通微顯化真人。後住鶴名山半年。遂不知其所終。

邵道人居蜀。不知何許人。年七十餘。始至慶陽。慶陽前事不能知。道人館慶陽周家。築土被衲。晝夜露坐。郡中諸少年爭事道人。爲弟子。道人不開口言。頤指色授。人人見道人。頤指色授。亦輒心解。爲奔走。輒當道人意。道人善視人病。令病人張目。又令人張口。噓。卽知病人可活。目諸弟子。諸弟子置飯病人前。道人出袖中鐵尺。橫飯上。誦大悲呪。已起尺。摩病者曰。瘥矣。不可活。道人移出病家。問死期。出指示。日數輒驗。道人取謝錢。每歲正月始活一人。取尺布裹衲。衲完。弗復取。病家有見飯。飯道人。列碗案上。不問多少。盡飯。若加飯。更列碗不食。飯草惡。道人願喜。更謝造美食不食。飯雜葷物。第擇去葷物。終不欲更造。道人又喜飲水。鄉野人聞。人爭入城。願觀道人飲。諸弟子令鄉人。挾水於案上。無問多少。飲輒盡。冬月水冰。聞道人齒間。漣漣聲。頃之。屑踊而紅。汗下如雨。慶陽李患脛瘍久不愈。問道人曰。此祟也。汝往聘某氏。謂其女醜。將更聘。女慚死。此其祟汝。李大驚。伏地頓首。請奈何。道人曰。今遇我。三日解矣。瘍果瘥。卒之日。設几三層。坐其上。諸弟子夜登几旁。守道人。夜半霹靂隱隱起。屋脊。俄有戈甲士馬戰鬪聲。諸弟子攝伏地。天明起視。道人死矣。

胡守法。字浩然。嘉定人。父海。太常丞。守法生有骨相。始學易。爲儒生。嘗因病。適一黃冠至。識之。遂勸之入

道且曰從吾言疾即愈後當大振玄門守法從之疾果平宣德間入京領度奉詔偕天下高道校道藏經因禮部尚書胡濙薦擢神樂觀提點天順丁丑擢道錄司左演法兼朝天宮住持成化癸巳遷左正一明年封玄志守靜清虛高士尋進封沖虛靜默悟法從道凝誠衍範顯教真人賜誥命銀印并封贈其父母弘治改元授左正一特命掌道錄事踰三年卒守法性質直謹厚尤以謙約自持頗精於術而本之誠意以故用之有驗成化間屬歲大旱有旨命禱雨雨隨至明年秋又旱禱亦應如之又明年旱禱不應守法篆符於鐵授中貴往投西湖之龍潭頃之西南雲起如鳥翼駐潭上俄見青蛇長數尺許盤旋久之中貴還未入城雷雨大至上益喜賜第居之一日召入便殿詢以天人感應之理對曰惟德動天至誠感神此外無他道也上深然之聞者服其正對

王世能濟甯州人初生海州生元至正甲辰入明成化癸卯涉一百二十餘歲世能自幼慕長生之術遊四方入蜀聞雪山有異人因往訪之及至見一老人披氈衣臥深洞中石牀上顏貌如嬰兒臥側惟乾麪一囊時取啖之或掬飲澗水一二升世能伏拜不起遂依之朝夕不離左右居數日世能食盡老人出囊中麪遺之苦澀不可下世能乃採山果野菜自給如此者三年老人苦其志一日謂之曰子可以語道矣因授之術且曰他日非其人勿輕授也世能攝形鍊氣辭其師仍還居濟甯卽城東辟處居焉臥榻外無長物遂不舉火日或啖棗數枚或菜數莖飲水少許耳與人談皆靜坐寡欲之說其初州人不識也久而人漸異之濟甯指揮王宣原籍海州往訪得其姓名大驚曰吾祖常言上世有叔祖諱世能者少好道出

家弗違。翁是乎。詢之。歷歷盡合。遂日往候焉。人有慕而饋之。拒不受。又有指揮朱顯。欲業其術。世能謝之。曰。子非吾徒也。顯慚而退。因疏於朝。憲宗敕山東守臣。以安車載入京。賜寶鑑而遣之。當被召時。學士程敏政適以公至。因往問之。世能曰。老僕無能爲朝廷過聽而召之。僕豈知道。但習靜日久。今大敗吾事矣。敏政因及元末國初事。世能曰。一身之外。皆非所知也。又三年丙午。蘇州楊南峯亦以使事過濟甯。訪之時。世能著素白衣。坐一木榻。因扣其所以壽。世能曰。無他。但平生不食肉。不娶妻。不識數。不爭氣而已。後出遊不知所終。

張正常者。世貴溪人。明兵取江西。正常以張道陵四十二代孫。號正一主教天師。遣人納誠款。正常亦屢朝京師。洪武初。上謂羣臣曰。天至尊。豈有師。以此爲號。甚褻瀆。遂革舊號。號真人。正常有術。投符故永壽宮井中。有疾人飲井水輒瘳。詔作亭井上。名太乙泉。十三年。子字初嗣。上言前朝嘗給有正一玄壇符籙之印。印之符籙。今欽給真人銀印。止敢用上表箋。乞別賜龍虎山正一玄壇之印。印如六品制。宣德中。字卒。無子。姪懋承嗣。弘治中。子玄慶病。子彥獮嗣。終明世。皆曰真人。

邵元節。江西人。初爲龍虎山上清宮道士。以薦善房術。加號爲真人。賜銀印。居京師顯靈宮。供事。九年。八月。給事中高金奏。陛下龍御之初。凡法祖法師。國王佛子。有害正道者。盡從屏斥。近又諭禮官。革姚廣孝之配享。以大聖人之崇。正黜邪。有如此者。豈意有邵元節者。誤蒙除恩。以爲聖治累邪。元節一道家流耳。縱有恪修宗典。陰翊皇度之功。價以金帛足矣。豈可使之紫衣腰玉乎。上覽奏大怒。逮下詔獄。復詔禮部

再議姚廣孝配享事而尙書李時等議奏陛下撤廣孝之配位者正祀典也容元節等之供事者存祈禳也高金因廣孝之事遂論及元節固因事獻忠之心而未知其事之不同也予奪之宜惟上裁之得旨廣孝配享當如前議改正會元節亦疏辭恩命上不允金獄亦稍解十一年十一月編修楊名陳言辭連邵元節上怒亦逮繫詔獄元節上言名謂有昏夜乞哀臣門者是何主名既無指據誣妄爲甚乞罷臣封以謝人言上曰卿辭具恬退且卿專領道教用布玄風原與政事無與楊名狂悖之言勿庸介意而名戍邊十二年二月命邵元節孫邵成南爲太常寺丞甥孫魏時雍爲太常博士元節各疏辭不允令帶銜復加元節歲俸米一百石撥校尉四十名服役焉賜真人誥命元節復疏辭上褒答之不允十三年十月邵元節請還山得旨馳驛中途奏言山東魯橋驛驛丞王廷燦抗居民有毀辱之者至穀亭遇大學士李時弟員外郎李改舟懸內閣牌復爲其舟人侵毀乞賜懲究上皆命逮繫之居民皆令撫按執送京師株連者甚衆時上章引罪言元節所遇舟實臣壻如皋知縣劉永準遣送臣女舟也臣女隨壻以痼疾思歸因臣從弟改之便隨以附之家人無知輒懸內閣牌臣雖不知臣之罪也上覽奏嘉其謹畏令安心供職已而元節復疏言臣欲尊命而北乃長途艱險萬狀懼不得前乞賜臣退伏山林得旨卿毋以小人欺辱之故遂違朕命特遣錦衣官齎敕促令就道仍敕撫按官趣之入京賜號清微閣教輔國致一真人擢禮部尙書賜銀印玉帶及朝祭等服尋廢孫啓南爲太常司少卿未幾死時上幸承天計聞行在悼惜之諭禮部元節精心玄教於國有功建醮祈天稱朕之意而諸所福國利民者甚厚贈少師諡文康榮靜與祭十壇

遣內監錦衣衛官員各一員護櫬還。命有司視葬事。已而啓南復請命於墓及神道碑文。上命夏言許讚爲之撰文。三月以方士陶典真爲神霄保國宣教高士。典真名仲文。黃岡人。以吏爲遼東海州大使。九年滿。赴京守邊。師事邵元節。元節病不能從。南巡乃薦仲文。上命給誥印。仍許攜其家於官。尋進神霄保國宏烈宣教振法通真忠孝秉一真人。領道教事。總各宮觀住持。知道錄事。給誥印。贈父母。封其妻。各給與誥敕。食二品俸。仲文進所積賜資俸銀一萬兩。段二百疋。助邊。上嘉其忠。優詔答之。已上諭禮部。朕患疾甚。仰賴皇天后土。宗祧社稷。幸獲康疆。多賴秉一真人陶典真竭忠盡誠。爲朕禱叩。其加少保禮部尚書。妻封一品夫人。仲文奏建黃岡縣雷壇。安神祝壽。費不貲。上以其黨臧宗仁爲道錄司。左演法董理之。命翊國公郭勛。成國公朱希忠。京山侯崔元。大學士夏言。翟鑾。尙書嚴嵩。代獻仙器。貯食薦九朝。初。方士段朝用進銀萬兩。仲文實薦之。朝用因請歲進數萬金資國用。上大悅。已試其術不驗。朝用有徒王子巖者。害朝用寵。乃攻發其諸誣穢隱惡。且關仲文。仲文懼爲所累。遂上章自理。請禁繫子巖。責朝用歲辦銀四萬兩供國用。上曰。黃白之術。古昔有之。非真有道術者不能。卽初薦朝用。及彼進銀萬兩。朕亦信之。以其足代民膏血耳。卻屢試不效。始知作僞。卿本納忠。彼敢爲欺。何與卿事。子巖朝用俱下獄。考試雷壇成。仲文請遣其子培送安神像。并令其妻展墓。詔給傳。仍命內使衛行。二十三年八月。詔加仲文少傅。兼少保。支正一品俸。塔吳濬。孫陶良輔。各陞太常寺丞。十一月。加仲文少師。其少傅少保如故。明自開國來。勳戚文武大臣。未有兼三孤者。仲文獨以宗伯兼得之。時有大同順聖川水池莊軍卒劉伏玘者。擄板不孩部。

下小曾王三。三本華人附寇者。磔之。傳首諸邊。於是上傳諭曰。朕祇玄保民。伐逆。仰上天。下監。叛惡生擒。固義勇之效力。實鬼神默戮其魄也。逆曾屢犯中國。流血千里。自今少差。其加封仲文伯爵。仲文辭封。乞恩。廕乃贈其三代。如其官。妣妻俱一品夫人。廕其孫陶。倣入國學。爲胄監。十一月。仲文於原籍造御書樓。成。乞坊額。上賜名隆教。令工部製扁給之。二十五年八月。加封仲文爲神霄紫府闡範保國宏烈宣教振法通真忠孝乘一真人掌道教事。更給誥印。二十六年六月。仲文以正一品滿六年。吏部尙書開淵題考勳。上曰。尙書仲文。歷俸年深。忠勤懋著。加授特進光祿大夫柱國。兼支大學士俸。給與誥命。仍廕一子尙寶司丞。以示酬答。尋從仲文請。度天下道士二萬四千人。人皆入貽。始得之。二十七年。應天府丞朱隆禧。以考察黜會仲文之太和山。卽邀至其家。以藏方書。託之代進。上悅。命卽其家。以白金綵衣賜之。隆禧旣受賜。因自赴闕陳謝。意圖留用上。以考察罷閑官。例不得復起。令加太常卿致仕。仲文自河南王屋天壇山建醮還。因言本山殿宇一新。請賜敕設官以供祀事。得旨。准賜給護敕。增設提點。專職本山焚修。二十九年二月。封仲文爲恭誠伯。以禱雨濟旱。力贊平獄功也。給事中張秉燾言。皇上慮先民瘼。躬薦德馨。休徵之應。良不偶然。仲文安得貪天功爲己力。仲文疏辭。上曰。卿祝釐保國。祈禱雨暘。累累效職。若鞠獄非卿事也。果專恭盡誠。玄修。雖數爵亦未克酬。今以平獄謝似非宜。且准辭。八月。復申前命。三十二年。仲文奏山東齊河縣。有道士張演昇建大清橋。臣以募銀一萬五千餘兩助工。近聞濬河得龍骨一副。重千斤。又突出石砂。一脈長數丈。若有神助。迄今尙未報完。乞捐內帑以終大工。上令給銀一萬四千。賜仲文。而

仲文所建黃州城隍廟曰威靈。徽州壽山三官廟曰顯靈。黃岡三台河橋曰通濟。三十八年六月，以陶世恩爲太常寺丞。初，世恩以廢歷尙寶少卿爲言官，所列奪其官。至是改爲太常寺丞。已而仲文請假還里中。上諭禮部曰：仲文職掌玄教，屢盡忠誠，雖請假還鄉，年逾八旬，卽書敕遣錦衣千戶一人前去存問。仍賜白金綵繪錠鈔肥羶御酒以示眷懷。仍令有司日存問。三十九年十一月，仲文死。上聞之震悼，爲加贈特進光祿大夫，諡榮康惠肅，賜祭十壇，如致一真人故事。葬以伯禮，仍給齋糧麻布。與其子世恩爲送終費。仲文無異術，徒以房中術及符呪小方稱上意。驥承恩寵，自戊戌以後，上不復朝。輔弼大臣皆希得進見。獨仲文時被宣召，至卽賜坐與語，稱之爲師，賞賚以數萬計。又兼領三孤，列爵五等。前後幾二十年，以富貴終其身。其死也，復贈諡賜賻，恩眷有加。自古方士所未有也。隆慶元年，詔籍其家，欲起仲文棺戮屍。尋已，乃戮其子陶傲於市。餘悉奪官。仲文侍世宗修玄幾二十年，時內閣九卿、卿寺科道大小諸臣皆以進香獲賞賜。及其末年，獨主事海瑞彈及之，廷杖繫獄。



明書卷一百六十一

列傳二十

亂賊傳一

史官論曰。歷覽前世百六之會。孰非銅馬黃巾巢芝之屬。爲厲階乎。亂之興。莫不由賦煩徭亟。吏助天爲虐。勞以非時之作。困以無藝之征。車絕馬駭。挺而走險。亂之成。莫不由於撫勦失宜。星星不撲。而致燎原。斧斤未試。而尋芒刃。爭功掩能。不爲公家忠計。以致腸胃內蝕。瘡疽外潰。小寇不滅。大寇之資。而劉項操卓之勢成矣。方賊之始發。撲之散之。一守令責耳。漢重二千石。卽以太守爲將。張敞龔遂。虞翽。皆郡將也。平居察凶荒。弛微力。發斂貸租。禁奸止俠。日夜緝治。絕其萌芽。一旦有警。按籍得其主名。單車詣壘。持片檄入賊中。慮無不革。昔解佩。崩角恐後。此由守相思威素著。民無與爲亂故也。今也不然。平時無撫字整齊之力。臨變無解紛壓難之才。盜發徵兵。兵至復爲盜。兵與盜鬪。鬪而陰媾之。或勦者一人。撫者一人。議者任者各一人。有功則相媚。有罪則相委。此則倉卒召兵。事任不一之患也。至於金鼓未震。而卽樹招旌。渠魁猶存。而旋議散脅。賊以降餌我。而我以撫衆賊。驅除未畢。上功幕府。如渤海之理亂繩。滄中之計萬全。有遺種苞孽之慮。一勞永逸之方。未之聞也。故以賊遺君父。而與國終始。觀前世之所以敗。及明之所

以亡古與今如一邱之貉。嗚呼！誰生厲階，豈不痛哉！因哀集亂賊始末，併著明興以來文武治賊方略，可爲法戒者次於篇，而以張玉等入其中。蓋曰有共主而爲亂者爾。

張玉字世美，祥符人。仕元爲樞密知院。洪武十八年，投順來歸。二十一年，從征捕漁海子哈喇哈，授濟南衛副千戶。又從勦粉紅帖木兒，至延安。陸安慶衛指揮僉事。二十三年，從征永順，散毛諸洞。明年，逐北達至雅寒山，還調燕山左護衛。二十六年，追達至黑松林。明年，征野人，陸都指揮同知。建文皇帝卽位，稍繩削親藩。燕王兵起，玉謀畫爲多，事可否進止，衆論未定者。玉正色數語立決。首用玉策，奪北平九門，撫順、錫強三日，域內外悉定。師將南出，玉曰：「不先定薊州，將爲後患。」會馬宣起兵薊州，迎拒玉攻之，宣率衆出戰，執殺宣，并執毛指揮。是夜急趨遵化，戒將士止殺，曰：「師行以得人心爲本，簡敢勇士四鼓登陴，開其城門，將士皆入，城中始覺。」守將率衆拒戰，執殺之，不傷旁人。分兵永平、密雲，皆望風輸款。從燕王至灤河，玉進曰：「都督潘忠、楊松在鄭州，扼吾南路，宜先擒之。」燕王悅，立發兵。曰：「汝爲先鋒。」遂攻涿州，雄縣，擒潘、楊二都督。時長興侯耿炳文率兵二十萬屯真定，玉自請往覘敵，還言軍無紀律，且其上有敗氣，無能爲。燕王至無極，以敵衆我寡，欲試諸將勇怯，召問今兵所向，度可必勝否。衆未有說，玉曰：「今當徑趨真定，彼衆新集，我軍乘勝，一鼓可破也。」燕王曰：「善。」吾倚玉一人足辦吾事。抵真定，接戰，炳文大敗，獲其左右副將軍李堅、甯忠及都督顧成等，斬首三萬餘級，獲馬二萬。復敗安陸侯吳傑軍永平，馳報江陰侯吳高等以遼東兵圍城急。又諜報曹國公李景隆引兵數十萬，將攻北平城。燕王與玉謀東援永平，既至，高等望風棄輜。

重通。玉從燕王追斬甚衆。玉言大甯此去不遠。請移軍襲之。可。後顧燕王從之。遂收大甯。殺其都指揮朱鑑。北平報景隆兵圍城急。遂旋師。玉請擣景隆營。大戰三日。城中亦鼓噪出。表裏夾攻。景隆軍不支。大敗遁去。從攻廣昌。大同悉下。諜報景隆收潰卒號百萬。且復至。玉言兵貴神速。先事者勝。請往駐白溝河。以逸待勞。燕王命玉率衆馳駐河上。三日。景隆兵至。玉以騎兵接戰。景隆復大敗。收餘卒退保濟南。乘勝追擊圍其城。既而解圍。還攻滄州。獲其大將徐凱。進攻東昌。敵列陣決戰。燕王以數千騎繞出陣後。敵圍燕王數匝。衝擊得出。玉不知燕王所在。突入敵陣大戰。連殺數十人。玉竟被創死。年五十八。燕王哭。既旋師。諸將侍語及東昌事。燕王曰。勝負兵家常事。不足計。所恨艱難之際。失玉。令吾寢不帖席。食不下咽。隕涕不已。諸將皆泣。燕王卽大位。論功。顧侍臣曰。玉才備智勇。論靖難功。當第一。惜其早歿。贈奉天靖難推誠宣力武臣。特進榮祿大夫。右柱國。追封榮國公。諡忠顯。仁宗在春宮。數與侍臣言玉識見謀略。卓然老成。非諸將所及。且端方有匡直之益。洪熙元年。加封河間王。改諡忠武。侑享太宗廟廷。子輔。別有傳。譚淵。清流人。父勝。開國功。爲燕山副千戶。淵嗣官。從燕兵奪九門。永平。大甯。真定。薊城。滄州。功。陞都指揮。同知。建文三年三月。夾河戰死。子忠嗣。官。從南行有功。建文四年。贈淵崇信侯。諡壯節。立祠香山陽。京尹春秋少宰。祭。忠以淵故。得封新甯伯。食祿千石。與世券。宣德二年。征交趾。失律。下獄。赦出。八年卒。子環。乞嗣。伯。吏部言。忠失律。論死。子不得嗣。上曰。券有免死文。與環嗣。正統十三年卒。子裕。嗣。景泰三年卒。庶子祐。年九歲。優給。天順元年。嗣。祐。恭慎守法。好禮。爲京營總兵。最久。累加太保。太傅。嘉靖五年卒。諡莊僖。子

繪嗣卒子國嗣

史官曰。建文以嫡孫纂序。建極敷猷。頗有可稱。君臣魚水。禮樂蔚興。諸藩告變。踵至。亦必體勘而後行事。使建文修几杖不朝之儀。而太宗雄武。竭桀。甯肯類首老金臺耶。大抵從燕諸臣。有三等焉。太宗既立。日侍清班。牙璋辭闕。鐵騎從邊。戮力四方。功在疆域。則列之勳臣。祇齋誥券於殿陛。徒載簪纓於鸞班。無殊勳嘉績。著於鼎彝。則列之武臣。如玉淵者。橫屍竊弄之傷。隕首犯上之際。金陵之王氣方隆。一人之衰。旌無恙。雖欲不謂之亂賊。豈可得耶。玉且以元官。有開國功於靖難。又何誅焉。

賽兒。姓唐氏。自幼淫慧。能識字。適縣民林三材死。葬之一日。賽兒往塔墓回。經山麓。偶見石罅露一石匣。角取發視之。中藏寶劍。有兵書。賽兒取書究習。久之。遂通曉諸妖術。因誦佛經。自稱佛母。頗能言前後成敗事。歷歷如所言。日以其教施村里。中惟聽。遂及青齊。細民翕然從之。賽兒能翦紙爲人馬相戰鬪。凡衣食財貨。隨以術運至。煽從妖徒至數千人。於永樂十八年春二月。遂擁據益都石棚寨。爲亂。青州指揮高鳳。領兵捕之。爲所敗死。勢益猖獗。遂犯莒州。山東大懼。事聞朝廷。命柳升督兵往討。三月。升至益都。遂圍石棚寨。賊震怖乞降。且云寨中食盡。又無水。時東門舊有汲道。升卽往據之。不爲戒嚴。夜二鼓。賊襲官軍營。官軍出戰。多被傷。都指揮劉忠戰死。賽兒與其黨劉信等遁去。時升尙不之覺也。達旦。亟分兵追捕。獲賊黨劉俊等百餘人。餘復結衆行劫。賊首賓鴻率衆攻安邱。急時知縣張旗。縣丞馬橋。集民夫嬰城守。賊不能攻。復糾莒州卽墨餘黨至萬餘人。併力攻之。聲言屠城。時山東都指揮僉事衛青聞安邱圍急。率千

騎赴援。晝夜兼程。猝至城下。奮擊敗之。賊收殘衆再戰。城中亦鼓噪出夾擊之。賓鴻走。殺賊二千餘人。擒二千餘人。皆斬之。時城守幾不支。青援稍遲。必屠城矣。既而升至青迎謁。升怒其不待已。猝出兵。青不爲屈。是日。鷲山衛王眞亦以一百五十餘人擊敗賊衆於諸城。盡殺之。賊遂平。養兒竟不獲。事聞。刑部尙書呂中等劾升奉命征勦妖賊。聖諭諄諄。指授方略。諭以賊徒憑高無水。且乏糧。當坐困之。勿圖近效。升不留心。又不設備。致賊夜斫營。殺傷軍士。時都指揮劉忠身先士卒。幾破賊壘。升忌其功而不救。致忠力盡而斃。賊遂得間遁去。及衛青敗賊後三日。升始至。反忌青功而摧辱之。其不忠若此。宜治其罪。太宗亦謂升方命失機。媚功忌能。罪不可宥。下詔獄。尋赦出之。論功。陞張旗山東左布政。馬禡右參議。衛青都指揮。王眞亦都指揮。僉事。而疑養兒匿爲尼及道姑。乃盡逮河以北尼僧及道姑入京詰之。死者甚衆。思任發。其先麓川酋思命發也。國初思命乞內附。朝廷授以麓川宣慰。尋又改爲孟養宣慰。以刁某代之。正統初。宣慰使刁賓王弱。不能輯諸夷。思命後裔思任遂擁衆叛孟養地。刁賓王奔死永昌。無嗣。思任益橫。至是。遂寇騰衝及南甸。據潞江。自稱曰法法。蓋夷王號也。中國訛傳爲思任發云。正統四年己未春。命黔國公沐晟統兵往。以左都督方政。右都督沐昂副之。先是朝廷得思任叛報。乃遣刑部主事楊甯往諭之。不卽命甯還。英宗乃以晟行。兵次潞江。思任遣其將緬檢斷江而守。梗我師渡。晟復遣使諭降。思任無降心。伴諾之。晟遂不謀渡江。且緬檢數以兵來挑戰。政恥之。請晟渡江。晟不許。政不勝憤。夜獨率其麾下渡擊之。走緬檢。破其柵。斬首三千餘級。政復乘勝深入。逼思任上江。上江賊重地也。政至。賊伏四起。圍急。

求救屢屢惡其違節制渡江不遣政度不支乃遣其子璘還曰汝急歸吾分死也遂策馬突陣亡一軍皆沒後追論功贈政威遠伯諡忠毅屢開敗適春暮慮瘴發遂焚江上積聚倉卒奔還永昌時藩臬以其事聞朝廷遣使者責狀屢懼不免語使者曰吾主將失利喪師罪當死遂飲藥至楚雄卒時朝廷議多謂麓川夷小而遠發兵爲費不資宜置勿問會太監王振寵任事欲宣威四夷爲功遂力請發兵六年辛酉春命定西伯蔣貴爲征夷將軍統京營及湖廣廣西川貴兵一十二萬征之以兵部尙書王驥督軍務得便宜賞罪太監曹祥監軍時王振執政議朝臣莫與梗驥受命行乃薦太僕少卿李養郎中侯瑾楊甯主事蔣琳等隨參謀許之陛辭英宗賜驥貴等以金兜鍪細鎧弓矢鱗衣時侍讀劉球上疏請罷征麓川兵不報已而貴等師出球復疏云帝王馭夷不窮兵於小敵以傷生靈惟防患於大寇以安中國今北脫款也先父子併吞諸部深謀入寇而思任依阻山谷悔過乞降議者乃釋豺狼攻犬豕舍門庭之近圖邊徼之遠非計之得也臣愚以爲麓川僻陋滅之不爲武釋之不爲怯至於西北諸邊宜謹烽墩修墩堡選將帥練士卒豐糧餉備器械庶爲有備無患疏入時王振不從冬十月貴等師至雲南會賊攻大侯急驥遣兵擊破之遂進金齒分三道兵徑抵上江夾攻三日不下時大風作驥命縱火焚其柵貴等因奮兵乘之斬首數萬級賊走保險爲拒驥等益麾兵深入遂破連環七砦於沙木龍山又破象陣於馬鞍山之陰賊死者十萬餘思任走緬甸覘我師退復出爲寇驥等仍督軍往征之思任復走緬甸驥乃割思任所略孟養地畀緬甸購思任緬甸斬思任首送軍門驥始還兵奏設隴川宣撫司以緬甸宣撫子銀起莽爲宣撫

守孟養地。朝廷論封驩靖遠伯。進貴定西侯。餘陞賞有差。十三年戊辰冬十月。麓川酋思任子思機發思卜。發復據孟養地爲亂。仍命靖遠伯驩督軍務。以都督官聚充總兵。張軫田禮副之。率土漢兵一十三萬往討。十月。我師涉金沙江。賊沿西峯爲柵拒守。我兵破之。乘勝追至孟養地。賊復斂衆保鬼哭山及芒崖山等寨。又拔之。斬獲無算。時貴州都指揮使洛宜九谿衛指揮使翟享皆戰死。二孽竟失所之。或曰死亂兵中矣。王師踰孟養等處而還。孟養在金沙江之西。去麓川千餘里。見王師。諸夷酋皆震怖。相謂曰。自古漢人無渡金沙江者。今大軍至。真天威也。比驩還。復擁思任少子思祿爲亂。攻敗銀起莽。復據孟養地。驩與衆議曰。日久師且老。此賊度終不可盡滅。乃許思祿以酋目得部勒諸夷。居孟養如故。遂立石金沙江爲界。表曰。石爛江枯。爾乃得渡。思祿惟命。驩遂班師。以捷聞。詔增驩祿一百石。通前一千六百石。賜券世伯爵。時思祿雖未命以官。然豪據勢亦盛。後成化年間。有中官錢能出鎮雲南。貪嗾彼珍異。致思祿益橫。尋遇朝廷頒諸夷金牌信符。所司忘孟養久廢官。誤概給之。思祿亦與焉。思祿遂誑諸夷。稱王朝以復其官。時有參政毛科征猛密。因檄思祿兵爲助。科爲猛密所敗。并思祿兵殲之。思祿大怒。遂違誓渡金沙江。報猛密之恥。攻略城寨不可制。乘隙奏乞復宜慰官。詔不許。思祿據孟養自立。朝廷遂置不問。

宗留浙之慶元人。處州多銀坑。亡賴者緣爲奸利。正統十二年丁卯春二月。宗留聚衆盜掘少陽坑。數月獲甚微。去之。九月。又徧起雲和諸坑。亦不稱。遂轉慶元政和掘少亭坑。亦如之。且衆聚不能遣。宗留因與謀曰。爾等與其取於山。勞而無獲。孰若取於人。一舉而有餘。衆皆諾。時已數百人。是年九月。遂掠政和縣。

村落。還向慶元。一呼立得千餘人。龍泉良葛山人葉七善武藝。宗留遣人致之軍中。爲教師練兵。由浦城劫建陽。所過焚掠。從之者衆。進掠建甯府。掌府事福建左參政張瑛死之。官軍盡逃。賊又分衆截車盤嶺。鉛山震焉。行旅不通。明年戊辰。會閩賊鄧茂七反。九月。朝廷命都御史張楷帥兵討之。兵至廣信。緣葉寇道梗不得進。浙江諸藩臬請楷便宜移兵擊之。江西御史韓雍亦言葉寇爲地方危。皆國家事。不可坐視。民罹荼毒。楷不知計所出。乃以兵五百人。遣指揮戴禮往驅賊。時都督陳榮謂楷曰。受朝廷命討賊。今延平事急。鉛山不通。以大軍臨之。二賊敢並熾。而我輩逗遛不前。獨遣一部將往。朝廷知之。何所逃罪。榮請以二千兵偕禮往。楷不諳節制。授之。致兵行無紀律。是年冬十一月。遇宗留賊衆於黃柏鋪。戴禮出擊。死傷相當。時宗留衣緋。中流矢死。人莫識其爲宗留也。餘賊追奔入山。復擁葉希七等爲渠魁。劫車盤南駐十三都。欲回浦城。榮等追至十二都。賊悉衆出戰。官兵大敗。榮禮二人皆死。會福建趣楷。遂取道進兵。十四年己巳。命工部尙書石璞都督徐恭督兵討宗留。遂詔張楷移兵同討之。先是葉賊既敗。官軍遂盡掠其器仗。回劫浦城。燒縣治民居。過龍泉。衆已至數萬。盤據雲和山中。時麗水賊楊希。鮑村賊陶得二。各率衆數千歸之。居數月。賊謂其黨曰。山中出掠不便。不若由米湖盡掠處州府城。乃結寨駐鮑村。取貨於義烏。掠人於松楊。官軍雖衆。不能越馮公嶺而相薄矣。衆從之。遂掠府城。守臣遣使取溫台道抵省城。時御史盛琦黃英等。卽遣指揮沈麟參議耿定。僉事王晟等帥兵四千人。以是年三月抵處州。嬰城自守。月餘。賊縱掠滋甚。二御史先後以聞。上命璞等統二千兵。馳至處州。坐城中不敢迎擊賊。時制書亦及楷。令閩

賊稍平。以餘黨付金濂。楮還兵同討處寇。楮未至處州。城中乏食。諸將相泣。五月初。賊攻城急。徐恭等出禦之。沈麟耿定王晟皆戰死。恭以身脫。急走入城固守。是時楮兵至衢州。僉事陶成出迎之。泣陳其事。楮又分兵水陸並進。至蘭溪。御史黃英林廷舉來會。亦請速進兵。二十日至金華。楮乃令軍前製竹筩三百五十面。筩如牌製。糊以紙。畫獸形。可禦槍刀。遂兼程抵處州界。知府陸鍾等來迎。至銅山寺。駐師。賊遣人乞撫。實覘之也。楮亦給榜付之。去二十五日。官兵陳於平地。賊衆出萬人。索戰。楮分其軍馬三陣。賊來攻中軍。楮令射之。死者三百餘人。又左右合擊之。死者二百人。且持槍者。槍入竹隙。急不得出。多被我擒。又俘百餘人。其器仗亦稱是。賊殘衆退保險。千戶沈俊謂其部下多麗水鮑村人。父子兄弟陷賊中者衆。有何受等三人。自言於陣前。見其親屬。令欲招撫。俊以此三人可得要領。楮從之。令持榜入山曉諭之。詞多過徇。楮至以老母百口與誓。賊人陶得二先往。楮優恤而遣之。得二又同賊首葉希八等。併其黨十餘人來見。楮皆納之。令復業。始知前黃柏鋪緋衣死流矢者。葉宗留也。明日何志三等。又招得賊首余海四等三百餘家。皆令復業。六月初二日二十日。兩奉璽書。皆獎楮相機撫勸之宜。楮奏報其前後撫順者九千餘家。男婦二萬餘人。疏既入。陶得二等復疑懼。擁衆如故。會是月二十三日。得制諭。楮等俱已降賊。令所司撫之。廣布恩信。戒官吏勿相擾激。不聽者仍從勦處。楮乃乘制復遣人持榜入山再招之。陶得二懼悟。遂盡焚其寨出降。餘黨悉解。楮令所司皆撫處。遂班師。未幾。英宗北狩。舊經事大臣多陷沒。議者謂楮無功。且追論其都督陳榮等死。下楮獄。景帝以平寇功贖罪。得放歸。

鄧茂七建昌人。初名雲。幼勇悍自智。以豪俠爲衆所推。先在建昌殺人。因亡命入閩中。至甯化。訪豪民陳正景。依焉。改名茂七。正景藉遂能鳩衆爲墟。每呼立蟻。常數百人。有司怯之。會巡閩御史柳葉。檄各郡縣於村落。置隘門望樓。編其民爲什伍。設總小甲以統之。有警相援。不從者。聽總小甲糾之。以故總小甲各得恣所爲。號召鄉人。不敢誰何。時茂七與弟茂八。皆攝總甲。舊閩中佃人田者。例於輸租外。餽主於薪米。鷄鴨。茂七乘機得倡其衆。革之又輸租於遠者。令田主自運而歸。不許輒送其家。以故茂七能厭衆心。凡遠近至者。皆附其黨。彼亦橫恣。輒頤指殺人。尋爲讎家所訴。縣官捕之急。茂七輒拒捕。殺弓兵數人。縣聞於上司。調官軍三百人捕之。茂七格殺殆盡。權誅。是年正統十三年戊辰夏四月。遂刑白馬。敵血誓衆。舉兵反。因挾正景劫其黨。略上杭。從者日衆。轉攻汀州。推官王得仁統兵出殺敗之。執正景械京。茂七脫走。復聚衆行劫。奪杉關商旅貨。以贖衆。遂進略光澤。大掠而下。攻邵武府。時邵武官民悉奔避。茂七以衆又去。據順昌縣。邵武官民乃復入城。而順昌縣官民亦皆急保邵武。時尤溪墟主蔣福成乘亂亦號集墟丁及村落貧民亡賴者。旬日遂至萬餘。據尤溪。與茂七合。茂七兵勢遂猖獗。將劫沙縣及延平。時巡按御史汪澄將至延平。聞之亟轉。已而刷卷御史張海至延平。被圍。海躬撫諭之。賊且降。遂以實聞。澄忌之。朝廷命御史丁瑄往按賊事。瑄至。偕諸藩臬司遣同知鄧洪等帥兵二千出沙縣。被賊擊敗。洪等軍皆沒。瑄復作書遣使諭賊。且曰。解散得免死。茂七見書笑曰。吾豈畏死求免者。吾取延平。據建甯。塞二關。傳檄南下。定入閩。誰敢窺焉。於是殺使者。遂據貢川。諸處置置里圖甲役。據沙縣勢甚烈。而張海居延平。遣指揮張

某劉某者率兵四千出勦之行二十里雙溪口道隘我師不得陣賊乃以二十餘人匿左右村中候我兵過溪幾盡覘二指揮在殿賊伏猝起截焉舉排柵充塞前驅不得返賊遂壓我二指揮與其從兵數十人皆遇害前驅兵覺轉禦無及於是大潰賊擁衆登山瑄疏於朝請益兵是年九月命僉都御史張楷監軍都督劉聚充總兵官都督劉德新陳韶副之往討上面諭楷以賊狀曰相機持重毋墮賊計楷等受命出師次南畿分遣劉德新帥兵由江西道建昌會於邵武府楷自帥兵由浙入閩楷兵至廣信會處州賊葉宗留反阻鉛山等處不得入時茂七益張順流向延平御史丁瑄督官軍乘城守不敢出擊日遣使趣楷進兵楷緣道梗駐廣信先持榜往延平招撫之率指揮戴禮以兵五百人驅處州賊禮遇賊戰死楷聞敗遂益兵進尋得報劉德新兵已至邵武又聞茂七督衆數萬繕攻具聲言略延平楷乃分兵會德新取道趨建甯蓋楷怯懦故遠縮如此朝廷以爲憂未幾復遣太子太保戶部尚書金濂甯陽侯陳懋保定伯梁瑤平江伯陳豫等率京營軍及江西浙江等大軍討之以中官王瑾曹吉祥監軍濂等師未至時茂七在延平日久乃出其枝賊繞太平驛被副使邵宏奮擊敗之劉德新兵至建陽又擊殺賊千五百餘人先是賊就建陽城五里許斷橋爲守道阻不通及劉德新破賊又楷等招賊徒黃琴等三十餘人降之令得復業遂少散於是建陽路始通既而沙縣賊首張由孫詣延平自首願復業楷從之由孫又引其從賊羅汝先等詣楷請降楷收之先有賊首劉宗羅海郎七等俱從茂七掠財聚陳山寨黃琴以計擒之詣軍門械京羅汝先之降也請效殺賊貸罪告楷曰賊自曩敗後皆據山險自衛必欲取之吾爲公從中說伊攻城

公悉大軍擊之。吾爲內應。卽成擒矣。許之。楷遂益兵趨延平。遇賊攻城。出擊。殺賊千餘人。賊氣稍削。茂七等復移兵寇建甯。守臣張英出戰死之。十四年己巳春二月。楷等還取建甯。會金濂等大軍亦至。賊遂退。尋報賊復攻延平。劉德新等以兵駐城北。預於溪北伏兵器。賊擁衆溪南岸。乘浮橋渡。德新兵火齊發。遂殺賊數百人。賊衆大潰。官兵乘勝追殺之。俘數十人。茂七中流矢死。仍梟首以示。楷等至順昌等處。慰撫居民。賊黨推茂七兒子鄧伯孫爲主。尙聚衆后洋。或散走山砦。平江伯陳豫等分道捕之。不獲。乃下令立賞格。能擒殺其黨者。同斬敵功。自是擒斬而降者相繼。有老人言賊在尤溪山中欲降。宜遣人撫之。衆莫敢往。千戶龔遂榮偕驛丞周鑄毅然請。乃率數騎深入至老人家。或言老人亦賊也。遂榮呼老人。諭以禍福。老人闔門叩頭謝。因設草具。遂榮及鑄飲食之意。不爲少動。食竟就馬抵巢穴。盡降其衆而還。時賊將張留孫勇而健鬪。茂七起事多倚用之。茂七死。往倚伯孫。遂榮曰。不了。此則賊孽猶萌。不行間則難離其心。乃僞爲貽留孫書。許其自新。立功贖罪。若素有約者。伴使諜誤致之。伯孫伯孫果疑留孫殺之。由是賊黨人人自疑危。棄伯孫來降大軍。遂獲伯孫斬之。諸山砦賊擁衆保險。諸將先後擒斬殆盡。於是張楷遂承制。任討處賊。金濂等留撫閩中。閩中定。乃班師。濂卒諡榮表。追封沐陽伯。汪澄後爲兵部。奏其擅止浙軍。有罪下獄。龔遂榮有功。兵部以時方用兵。多議沮其賞云。

黃蕭養。南海沖鶴堡人。貌甚陋。頗曉智術。一目眇。先是坐強賊繫郡獄逾年。所臥竹牀。皮忽青色。漸生竹葉。同禁者一江西商人。謂曰。此祥瑞也。因誘以不軌。密授人使藏利斧飯桶中。遂破其肘鐐。凡十九人俱

越獄。惟商人遂逸去。不知所在。時官隸獄卒追揮斧而行。人莫敢近。其黨先舟以待。遂入海。正統十三年九月也。尋噍聚不逞之徒。應之者如響。旬月至萬餘人。明年八月。攻圍郡城。官軍出禦。輒敗。城中飢死者甚衆。又爲雲梯。呂公車衝城。城幾破。遂設開僞官。招誘愚氓。漸至十餘萬人。都指揮王清。自高州引兵赴援。至廣州。舟膠淺。適賊詐一小艇載柴及魚鹽者。奔進若避賊。收官軍問蕭養所在。言未脫口。賊伏兵出柴中。遂擒清。軍盡殲焉。城中大恐。三司官登城望之。刃矢冒發。相顧涕泣而已。事聞。朝廷適有土木之變。未暇理其事。景泰元年春。詔都督董興充總兵。都指揮同知姚麟副之。兵部侍郎孟鑑。僉都御史楊信民。贊理軍務。往討。時蕭養乘勝之餘。氣益橫。遂僭稱東陽王。改授僞官者百餘人。據五陽驛爲行宮。四出剽掠。信民先爲廣東參議。有惠政。素孚於民。及是。巡撫廣東。至廣州。民爭歸之。信民發粟賑濟。民益喜。賊黨聞之。漸懈。興等進兵。時天文生馬軾隨行。至江西。及夜。聞鷄鳴。興曰。此何祥也。軾對曰。鷄不以時鳴。由賞罰不明。顧公嚴軍令。及至清遠峽。有白魚入舟中。軾曰。武王伐紂。有此徵應。此逆賊授首之兆也。時蕭養聚舡於河之南。千餘艘。勢甚銳。諸將欲請兵。軾曰。兵貴神速。若請兵。則緩不及事。以所徵兩廣江西狼兵。取勝。猶拉朽耳。興從之。三月五日夜。有大星墜於河南。比旦。占之。告興曰。四旬內破賊必矣。四月十一日。興統兵次於大州頭。與賊遇。督戰。遂大破之。時信民使人齎榜諭賊。使降。蕭養曰。楊大人我父母也。當徐思之。已而獲鉅魚來獻。信民受之。立斫數十片。頒於有司。賊出而嘆曰。勢不佳矣。賊黨遂潰。留者不滿千人。已而信民中毒卒。鑑益招徠。興領兵擊賊。又破之。蕭養中流矢而臥。遂爲官軍所擒。械京伏誅。廣州遂

平詔以鑑代信民巡撫廣東興後封海甯伯天順中坐曹吉祥黨謫戍廣西

大藤峽賊卽兩廣蠻寇也峽水發源於柳州慶遠又東流至於潯州是爲潯江帶象州永安修仁荔蒲平樂諸縣其水皆夾山礪而下砢礪巖嶮稱最險惡惟大藤峽截潯水而南爲府江府江大藤相去約三百餘里諸蠻恃藤峽爲隩區以桂平大宜鄉崇姜里爲前庭象州東鄉武宣北鄉爲後戶藤縣五屯障其左貴縣龍山據其右若兩臂然峽以北岩洞以百計如仙女關九層崖極險絕者亦數十處迤南又有牛腸大帖諸村賊皆緣山立寨又藤峽府江之間有力山險於藤峽數倍地域蓋六百里中產僑人以藍胡侯盤四姓爲渠魁如力山等處又有獐人善傅毒於弩矢矢中人無不立斃雖四姓諸僑亦憚之景泰中僑酋侯大狗等倡亂嘯聚至萬人修仁荔蒲力山平樂皆應之出入攻劫郡邑會朝廷有寇警置不問守臣不能制率糜以招撫天順中益橫獼朝廷詔兩廣諸臣發兵捕不可得遂延及廣東雷廉高詔之境皆受殘毀兩廣守臣待罪朝廷有詔捕得侯大狗者賞千金爵一級至是憲宗卽位元年乙酉又報下廷議兵部尚書王鏊建言峽賊一向從招撫騷其傑鯨爲今不重懲之不足遏其禍也鏊薦浙江參政韓雍智勇過人才兼文武可屬以討賊都督趙輔才略可任大將上報可是年二月擢雍僉都御史督理戎務輔爲征夷大將軍又以右軍都督和勇爲遊擊太監盧康陳宣爲監軍戶部侍郎薛遠爲督餉御史劉慶汪霖紀功上降制雍曰將士有功者得自置三司而下不用命者輒以軍法論朕不中制也是年六月雍至南京會諸將議進兵諸將皆曰兩廣殘破盜所在屯聚宜分兵撲滅之雍曰不然賊已流劫蔓出而所至與

戰是煽禍也。大藤峽賊之巢穴，不覆其根本而翦其枝葉，非計之得也。今師鼓行而前，南可以攻大藤峽，援高雷廉，東可應南韶，西可取柳慶，北可斷陽峒諸路，如常山勢，動無不應。既潰其心腹，他無足慮矣。舍此不圖而分兵四出，則賊愈奔突汗漫，所謂救火而噓之也。其能濟乎？諸將皆服。雍遂以官軍三萬人進至全州，會陽洞西延苗賊爲梗，擊滅之。斬失律指揮李英等四人，將士股慄。九月至桂林，衆議請乘勝攻峽。雍按圖籍視曰：「修仁荔蒲爲藤峽翼蔽，須滅此而後可弱其黨。」乃以永順保靖及兩江土兵十六萬人分五路進，追至力山大敗之，俘一千二百餘人，斬首七千三百餘級。冬十一月抵潯州，延父老問計，皆以大藤險毒不可深入，莫若屯兵圍之，耕守可坐令賊斃。雍駁之曰：「山峽遼遠六百餘里，勢不可圍，且師老易潰，兵法曰：甯我薄人，又曰：先人有奪人之心，薄之也。我今新破府江，士氣十倍，賊且落魄矣。若因而乘之，破竹之勢也。」乃以總兵歐信等帥六萬八千人爲右軍，自象州武宣分五道入，攻其北，以都指揮白金等帥九萬二千人爲左軍，由桂平平南分八道入，攻其南，以參將孫震等守左江及龍山五屯，絕其奔路。雍與趙輔和勇營高振嶺，以督諸軍。雍又令歐信既破山北，便提兵入向桂州橫石等處。又曰：林峒沙田府江間道也，復令夏正統兵，越古眉雙髻諸山，伏林峒，扼其東奔。冬十二月朔，諸路兵並進，連破石門大岫等十餘寨，賊遁入林州橫石寺塘九層樓，據險立柵。雍麾死士奮擊之，用火箭焚其柵。夏正又自林峒出兵迎擊之，賊大潰，棄輜重山積，破賊巢三百二十有奇，燬廬屋六千三百有奇，擒侯大狗等七百八十餘人，斬首三千二百餘級，遂鑄崖石紀歲月而還。雍乃斬藤峽斷之，易名斷藤峽，仍以兵分捕雷廉高肇。

諸寇先後平之。雍疏於朝，謂諸徭之性，憚見官府，攝以流官，終難靖亂。請卽斷藤峽，置武靖州，以原上隘州土知州岑鐸掌州事，隸潯州府。又議設東鄉龍山等巡司，請用其部下有功土人季昇等，數有勤勞者，量授以土巡檢官秩，謂其諳民性而辨地里也。又請卽本地方設千戶，所以李慶爲千戶，擇獠人效順者爲酋帥以統之。上從之。明年丙戌春正月，雍班師論功，進左副都御史，提督兩廣戎務。磨一子錦衣衛千戶，封趙輔武靖伯。子孫世襲。餘各陞賞有差。自是兩廣三十年無蠻寇云。及正德以來，遺孽漸藤峽南賊尤甚，每出沒橫江禦人。時總制都御史陳金謂諸蠻不過利魚鹽耳，乃與約，商人入峽者，計舡大小，出魚鹽置水濱，諸蠻就領之，如榷稅，然不得爲商梗。蠻初獲利聽約，道頗通，遂謂此行可久。因易峽名曰永通。無何諸蠻啖熟，益無忌，反掠奪商，稍不愜，卽殺。因循久，遂負固爲大寇。嘉靖六年丁亥，王守仁爲總督兩廣，議撤湖廣土兵，誅盧蘇王受。至則二人已降。守仁班師，時兩江父老遮道，訴斷藤峽及八寨等賊出劫狀，請討之。守仁受訴，明年戊子春三月，守仁在南甯，因與諸守臣將帥議舉兵。僉謂當首事斷藤峽。守仁乃以湖廣原領兵僉事汪濬及廣西副使翁素僉事吳大挺參將張經都指揮謝佩等督湖廣土兵，仍分永順兵進勦牛腸等寨，保靖兵進勦六寺等寨。期以六月初二日各至信地，初斷藤賊聞官兵至，多匿山深險中。及蘇受降，總督駐南甯，遂散遣諸官兵及湖廣土兵，賊探無征勦意，遂弛備。至是官兵四面突進夾攻，賊大敗。退保仙女大山，據險結寨。官兵舉木緣崖仰攻之，諸寨皆破。賊急走入峽，官兵追之，窮奔渡橫石江，覆舟死者甚衆。擒斬俘獲稱是。方以兵徧搜山無所得。守仁還兵潯州，密檄諸將分兵勦仙臺等

賊。乃是月下旬。永順兵由磐石大黃江登岸。進勦仙臺花相等處。保靖兵由烏江口舟竹埠登岸。進勦白竹石陶羅鳳等處。刻期抵賊巢。是時賊聞牛腸等寨破滅。亦嚴爲備。官兵兩路奮擊。大破之。賊衆入保永安力山。進兵圍之。擄其巢穴。賊大潰。擒斬甚衆。殘賊奔諸路者。又爲參將沈希儀等截殲之。斷藤峽平。先是王守仁謂諸將曰。八寨去斷藤稍近。宜分兵一枝。可勦也。乃四月初五日。以布政使林富等率新附盧蘇王受等。領五千餘兵。并官兵嚮道千餘人。進勦。出賊不意。令士卒銜枚進。窮日抵賊巢。乘夜襲破之。入其石門天險。賊始覺。張佑等縱兵擊賊。賊且戰且奔。至日午。賊復聚衆二千餘人。迎敵。官兵擊之。賊大潰。奔入高山。嬰險寨。乘勢下礮石。官兵不能進。乃夜令死士掩其不備。諸將繼之。其古蓬周安古鉢都者。諸洞寨。相繼悉破。賊四散匿。沈希儀仍以兵截諸路。搜斬之。有賊千餘人。奪路走柳慶諸處。官兵追之。及橫水江。賊爭舟。會大風作。盡水死。僅數十人。走山谷間。兵逼之。墜山谷死。是役也。擒斬幾二千人。溺死俘獲甚衆。八寨又平。守仁疏薦林富爲都御史。巡撫其地。遂班師。嘉靖十七年戊戌春正月。以兵部侍郎蔡經提督兩廣軍務。征峽。副使翁萬達。參議田汝成。誘賊首侯公山。遂夷其黨。平之。先是武靖州知州岑邦佐不能鎮輯其下。諸不率者。且墨其駱。多曲庇之。故峽以北賊復漸猖獗。其酋侯勝海以衆居弩灘爲亂。指揮潘翰臣。過聽土目黃貴章香言。誘殺之。勝海弟公丁。忿貴香等實利己田廬。遂糾其黨大噪。行殺城下。十五年丙申夏五月。僉事鄒閱言。以都御史潘旦誅之。沈希儀沮曰。滑賊未易取。須春漲。以數千人從武宣順流下撲之。乃可不聽。遂以千人道潯州擊之。賊先遁去。斬一病者而還。閱等稱賊已斂迹。請立堡戍。

旦從之。希儀又言：賊未大創，兵威不振，立堡難守。旦又不聽。六月堡成，令黃貴、韋香以三百兵戍。且許以取勝，海田廬不禁。於是諸徭大憤，恚邦佐又陰佑之。未幾，公丁集衆夜襲堡，殺戍兵，貴、香僅以身免。旦聞，悔曰：果如沈子所料。閔等以起釁罷，巡按御史諸演疏其事於朝。且請討賊，制曰：可。乃以經往代。旦、戊戌春正月，經集諸司度用兵可幾何。時總兵張經對以不過萬人。沈希儀曰：非八萬人不可。蔡經嫌其太多，翁萬達言於經曰：賊爲備久矣，輕進無功。從沈言，便會朝廷有事安南，暫寢。公丁等益橫，時出殺掠，潯人苦之。是冬，萬達以爲言，御史鄒堯臣立贊之。經乃會安遠侯柳珣定計，以兵屬萬達監之。萬達廉得百戶許雄，素通賊狀，導之曰：汝法死，能擒公丁，卽貸汝不抵於法。雄懼，願效自贖。萬達又佯謂公丁：讎家誣之耳。乃捕繫奸訟公丁者數人，責其首禍。公丁果遣人自列。萬達亦佯許之，又令雄假稱貨爲賄。公丁喜，益信雄。會萬達巡他郡，以其事屬參議田汝成。汝成負雄申飭之。雄乃給公丁曰：潯人久以爾爲口實，幸不中於上人。今田公新來守，何不自訴寇保事。公丁然之。隨雄來見汝成，復列冤狀。汝成曰：聞讎家誣汝，已逮治之矣。慰遣之。乃密授意城中居民被賊害者，家出歐公丁一市，皆譁遊擊，并逮入繫獄。遣雄論其黨曰：寇保事，公丁委罪諸徭，須物實坐之。若等誠謂公丁冤，須罪人得釋之。萬一事自公丁，當共棄之。勿以一公丁而自遭滅亡也。諸徭翕謂事由公丁聽諭，汝成遂械公丁詣軍門斬之。汝成因言之首惡，既戮，賊黨震怖。我兵乘此時加之，必成擒矣。蔡經曰：然。遂糾兵分左右進。時張經議欲仍以少兵勦之，勿深入。又欲舍紫荆等賊，藪勿擊。萬達持不可，謂勦之必無功，且損威令。諸徭恣肆，久不重懲之，不足攝其心。汝成

亦同萬達議。蔡經曰：「峽南亦劇賊，但分兵力不能併，姑緩之。」遂格張經議。己亥春二月，以兵三萬五千爲左軍，命張經統之，以萬達監軍，分六道進。經部下指揮王良輔，由牛渚灣越武靖，攻紫荊姜老鼠諸巢。朱昇由三等村渡蔘水，攻石門黃泥嶺諸巢。柳溥由白沙灣攻道袍梅嶺諸巢。凌溥由白沙灣攻大昂小梅嶺諸巢。周維新由白沙灣攻藤沖錄水沖諸巢。孫文炳由藤峽攻大坑巢。又以兵一萬六千爲右軍，命都指揮僉事高乾將之，以副使梁廷振監軍，分四道進。乾部下指揮馬文傑，由武宣攻碧灘綠水諸巢。王俊由武宣入山，攻羅錄上洞。戚振攻中洞。吳同章攻下洞，以參政林士元、田汝成督餉，以副使蕭晚紀。功是月，兩軍翼擊之，賊大窘，遂擁衆奔林洞而東。王良輔以兵擊之中斷，賊復西奔。遇官軍諸路畢至，斬獲無算。其東奔入羅連山，萬達等移兵攻之，而亦多斬獲。賊益窘，賊黨有巧黠者，號於衆曰：「往年據險結巢，被官兵殲之，今日不可再聚。於是賊皆漫走山谷間，令官兵疲於追逐，且持日久糧盡，必速退。會有言羅連山古所未至者，賊遁深入，不復窮追云。」時平安縣有小田羅應古、陶古思諸徭，亦據險弗靖。萬達等又移勦之。三月，班師，招賊黨二百黨人，挾之峽南。胡姓諸徭歸順者，亦千餘人。藤峽遂平。翁萬達等條處徭七事獻督府：一曰論保甲以處新民，二曰立營堡以通江道，三曰設督備以控上遊，四曰改州治以建屯所，五曰清狼田以正疆界，六曰處款兵以慎邊防，七曰權商稅以資公費。其所陳州治者，緣王守仁先平峽，奏宥岑猛子邦佐罪，令復武靖州知州。後邦佐不率命，殘虐部民爲甚，又令提調三縣狼民亦被其害。今邦佐部下多離心，請改州爲武靖，千戶所擇人任之，卽以三縣良民家之族隸焉。蔡經多探請於上行之。

捷奏朝廷晉蔡經職一級柳珣加宮保督將帥守臣等皆賞賚有差

劉通河南人荆襄流民也荆襄之上遊爲鄖陽地界湖廣河南陝西三省間山深地廣易爲屯聚洪武初中國公鄧愈既平安陸襄陽卽進兵驅剿之禁革山場人無敢入永樂宣德間流民漸集其中正統二年漢中府守臣以聞且言不卽誅恐遺後患上以小民爲飢寒所迫奈何遽用兵誅之命御史金敬往撫輯敬陛辭敕諭曰彼亡命者皆朕赤子比因徭役頻繁飢寒迫切遂至轉徙爾往視之其願回故鄉者令有司善加撫綏蠲其逋租願占籍於所寓者復其徭役二歲果有梗化按治鋤其首惡毋及不辜敬至摘數人遣戍餘撫卹編戶伴聽命僅及百一經制未定界限不明而大奸皆潛伏不出敬還受撫者復縱如故潛伏者起而收之勢益滋蔓其魁點隨遠近雄長因部伍役使之縣互數千里中無慮百萬三省官又多諉非己境遂日因循時劉通少負膂力縣門有石獅重千斤通手舉之因號劉千斤習妖言嘗寓房縣與妖僧尹天峯謀亂時有石和尚名龍合劉子龍及苗龍苗虎四散劫掠通密約子龍共作亂成化元年四月乃於房縣大木廠立黃旗聚衆萬餘據梅溪寺稱王僞號漢建元德勝進據南漳時王恕以副都出撫治懸榜曉諭而未受征討之命賊猖爲故常終不肯散聞於朝曰民可撫也而奸民好亂者非兵不滅十二月命撫甯伯朱永爲靖將軍總兵都督同知喜信僉事鮑政爲左右參將工部尙書白圭提督軍務內官唐慎林貴監軍合湖廣總兵李震討之衆謂賊巢在萬山中豆沙河之境於是決策深入先破南漳永適有疾因留居鎮之圭與唐慎李震湖廣巡撫王儉進兵潭頭坪林貴鮑政自遠安進兵馬良坪喜信

都指揮王信自房縣進兵浪口河。王恕都指揮劉清自穀城進兵洞庭廟。賊見師逼，通移居壽陽。欲出陝西，苗龍移住大市，欲出安遠，卽調兵往壽陽截其奔路。通退保大市，與苗龍合。二年閏三月，都指揮田廣進至厲坪，遇賊擊之，追及於古口山。明日廣與諸軍皆會進攻，卽陣斬通子聰。及僞都司苗虎等一百餘人，至路兜山，賊家屬退保後巖山，據險以抗官兵。圭與震儉等攻其右，喜信等擊其左。鮑政等銜其中，劉濟等襲其後，四面夾攻，賊大敗，追之破其巢，生擒通等二千八百餘人，斬首二千五百餘級，獲賊屬子女一萬一千六百餘人，牛馬驢騾一萬有奇。其黨首劉長子石和尚遁去，會永病愈，更帥兵搜餘賊。九月，石和尚等燒劫巫山大昌縣，殺夔州通判王禎，喜信等隨賊所向剿殺，賊力屈，食盡乞降。指揮張英誘之，劉長子縛石和尚送喜信營，既而併千斤妻連氏，僞官常通等三十人，僞千百戶張剛等六百餘人，皆就擒。逢班師，通等磔於襄市，論功加圭太子太保，進永撫寧侯，封震與寧伯，餘將士陞賞有差。時寇雖平，諸郡邑控制戍守皆未設，未幾餘孽李鬍子復煽衆作亂，鬍子名原，新鄭人，寓居葉縣，始與石和尚等嘯聚爲逆。通等就擒，原與其黨蔣虎等遁免，糾合殘黨，往來南漳、內鄉、渭南等縣劫掠，衆至數萬人，僞稱太平王，署其黨爲僞總兵、先鋒等名，又立一條蛇坐山虎等號。官軍累捕不獲，襄荆、南陽諸郡大震。六年十一月，命右都御史項忠會李震討之。既至，見兵寡弱，請調永順等處土兵從之。諸將請速進兵，忠曰：「流民逃聚山谷，始豈甘心爲寇，勢多脅從，民去官府遠，卽陷盜中，遂不能自脫耳。」乃駐軍列兵，分布山口，截其要路，遣人持榜招諭，有能去賊自歸者，禁勿殺。於是民多攜老弱纍纍來歸，會蔣虎引數十人覘軍，且攔阻歸。

者出不意擒之。兵尙書白圭等言虎已就擒。餘黨多困於飢寒。出於逼脅。宜令項忠相度機宜。會彼處撫鎮等官。計議撫捕長策。不必調兵以滋騷擾。忠奏賊在萬山。據險爲亂。復有流民從之。患將不測。而分哨官兵不親行陣。已行保靖土官及河南諸路兵。刻期俱會南陽。且以詔旨諭其生路。流民攜扶老幼出山。晝夜不絕。計四十餘萬。今若中止。士兵恐民聞之。仍懷貳心。其蔣虎雖授首。而元兇李鬍子等。烏伏鼠竄。設復再聚。重調爲難。事下兵部。白圭議征剿流賊。必須宥其脅從。毋使玉石俱焚。今賊首已得。又招撫四十餘萬。則李鬍子雖未卽誅。計亦無能爲矣。宜行項忠等。如士兵已到。嚴約不得擾民。其流民在山。眷戀生業。不至爲非。從宜區處。詔曰。可。中原主撫散益宣德意。歸者愈衆。原等勢孤。潛伏山寨。伺隙出劫。至是遣副使余洵都指揮李震率兵追原於竹山。擒之。其黨小王洪尙有衆五百。屯鈞州龍潭。未被擒之報。凡出山復業者。共九十三萬八千餘人。餘混處賊巢四散者。莫知其數。前後斬千餘級。俘獲脅附黨與族屬。共二萬八千七百餘人。戶選壯丁一人。充戍湖廣邊衛。得軍五千。并其族屬附籍。給田屯種。奏上。命降敕獎諭。忠等仍上便宜十事行之。加忠左副都御史。亡何歲復饑。民逐去復至。有司懲前事。以逐流民爲靖亂策。至十二年。流民集復如前。朝廷雖申禁。不能止也。左都御史李賓恐逐之生他變。條其事。乃陞左副都御史原傑往任其事。傑徧歷諸郡縣。深山窮谷。無不涉履。宣上德意。延問諸流民所欲。無不忻然。願附版籍爲土著者。於是大會三省撫按藩臬。籍流民得十一萬三千餘戶。遣歸故土者一萬六千餘戶。餘皆願流。乃許各占曠土。官爲計丁力限給之。令自墾爲永業。以供賦。於是湖廣割竹山地。分置竹溪縣。割鄖

縣地分置鄆西縣。河南割汝州唐縣地分置桐柏南召伊陽三縣。陝西析商縣地爲商陽山陽二縣。而陸商縣爲商州。又卽湖廣鄆縣設鄆陽府。以統鄆房竹山竹溪鄆西上津六縣。立鄆陽行都司及鄆陽衛。控制之。俾流民土相錯。經畫既定。又以地界三省無統紀。於鄆陽開府。設都御史兼制三省。撫治八邑。上悉從之。傑進右都御史。遷南京兵部尙書。



明書卷一百六十二

列傳二十

亂賊傳二

滿四係北達降把丹孫也。國初平陝西，把丹率衆歸附。太祖命爲平涼衛萬戶，散其屬住開城等縣爲民。號土達，仍簡其壯者充平涼衛卒，使自耕食，得仍虜射獵。寡徭役，以故家積富，畜牛羊駝馬孔繁。然其出北達一族，正統己巳虜也。先寇大同宣府，脫脫卜花王寇遼東，阿樂出寇陝西。土達漸遭殘掠，天順庚辰，北達字來，毛里孩，統也先餘衆，寇固原。而土達生畜被掠者十八九，日見凋瘵。至成化丙戌，各達大舉入犯。土達有李俊者，獨攜羊酒出遊，李來，字來喜，賜之馬。俊陰有北從意，其把丹孫滿四亦以貲力雄諸俗。成化丁亥春，滿四受渭縣避役民張通匿之，不輸縣捕。縣上其事於巡撫都御史陳介，會有土達張把腰者，亦縱部下侵掠，致仕都督張泰家畜牧，泰亦令家人狀把腰擄掠事於介。介以事行僉事蘇爨，逮勸滿四等聞之，心危懼。時有新任靖邊參將劉清至固原，守備指揮馮傑門斂諸土達賄以餽清，苛諸土達不堪。滿四等得聞，遂以其黨李俊謀爲亂。俊以言激滿四，時四之從子滿璿初襲祖職，後以功稍遷平涼衛指揮僉事，有司以介爨捕撤遷文璿，捕滿四及把腰等甚急。璿素性戇，不覺滿四等與俊有謀，乃率其家

衆往捕滿四等知之。先約其黨匿他處。俟璿至。佯許詣有司伏罪。給璿遣其家衆各家就食。盡收之。遂劫璿。號集諸土達。四年戊子夏。滿四據石城山。去平涼千里。山四面皆石壁。峭絕不可登。前有小山如牆。山罅可二三丈許。如門。僅用單騎入。西山一頂稍平曠。可容千餘人。城中無水。有數石池。由棧道入。蓋昔人造之以避亂者。人莫知之。峻巖難入也。滿四等平日以獵射深入熟知。至是往據焉。土達撒馮傑之追迫。滿四一諱卽千餘人。參將劉清聞變。亟領兵自靖□來擊。不利。報至陝。都御史陳介鎮守太監黃泌總兵官寧遠伯任璿議遣指揮邢瑞申澄統諸衛兵往捕。與賊戰城下。澄死於陣。瑞遁歸。賊勢大振。遠邇亡賴者多往從之。事聞。朝廷敕陳介任璿會甯夏總兵官吳琮延綏都御史王銳參將胡愷督諸鎮兵往討。時甯夏兵先至。陳介任璿吳琮等不候延綏兵。自固原急趨蔡祥堡。時夜二鼓。比曉抵石城十里許。士卒已疫且渴。賊率衆佯出迎請降。有卒馮信者頗知兵。言於介等曰。賊雖降。誠僞叵測。然我師夜進不少暇。且乏水飲。難驅之戰。姑聽彼。我得徐議攻討。吳琮叱之曰。賊計欺我兵至此。豈可退。遂麾兵進。賊又佯遁去。至城。賊驅牛羊前。精兵尾之。時我尙乏器械。遂執木挺迎鬪。官兵大敗。任璿吳琮進保東山。陳介急欲自刃。左右救免。遣軍資器仗甚衆。兵有受圍在山者盡殲焉。賊益猖獗。遂截甯靜州道。掠奪糧運及遞送甘州冬衣布花萬餘。傳言欲窺陝。事聞。朝廷逮陳介吳琮馮傑等至京。八月。命右副都御史項忠總督軍務。擢大理卿馬文昇爲都御史。巡撫陝西。及鎮守陝西太監劉祥爲監督。涼州副總兵劉玉爲總兵官。都督僉事夏正爲參將。都指揮劉清爲右參將。監察御史鄧本端監軍。兵部武選郎中劉洪紀功。率京營兵五

千調甘涼延綏甯夏陝西官軍五萬人往討冬十一月朔項忠馬文昇等先後至固原夜三鼓聞營外一里許礮聲迫營中皆驚視之無寇明日乃於營外得賊遺書乞宥許居石城獨其徭役馬文昇曰此不過欲緩我兵何足信第宜整兵以俟進討遂置之忠等議進兵方略衆懲前兩失利頗難之多言石城險不可攻忠等乃令畫工圖其山形度之遂分六路兵以進項忠劉玉劉祥馬文昇及巡按御史任佐姜孟偏布政使余子駿參政龐勝屯中路延綏鎮守太監秦綱都御史王銳參將胡愷副使鄭安屯酸東溝伏羌伯毛忠都督白圭御史鄧本端屯木頭溝參將劉清夏正參議嚴憲屯打刺赤甯夏副總兵林勝參議崔忠屯紅城子陝西都指揮張英鞏昌府同知羅豫屯羊毛堡期三日各少出精兵嘗賊且探地勢迺大舉比至城賊擁衆來戰時延綏兵奮前迎賊少卻陣亡二十餘人賊被死傷者亦多然官軍氣亦少阻十三日復會兵往賊出陣佯敗去官軍追至城下時賊尙多居城外者官軍乃貪取賊物賊遂得斂入城毛忠曰賊能有幾亟進兵剿之於是督諸路兵攻城賊極力拒守毛忠麾兵攻其東山路險隘不能進官軍多墜崖死者毛亦斃流矢賊被鎗斃死者亦多斬首數百級馬文昇在中軍亟領兵五百持草束欲往燒賊柵見官兵卻不果進劉玉被圍城中衆潰玉亦中流矢家丁陣亡者數人項忠斬退縮之丁千戶以徇衆始懼復登山玉得出圍時項忠以兵敗有憂色馬文昇曰勝敗兵家常事況賊亦多戰死勢已奪值今黃河未冰賊不能北無可深慮當徐圖之遣舍人陶珍等詣京以捷報仍令發言賊當就平以安中外先是朝廷聞毛忠敗死又是月卦出西方衆遂言西師不利時兵部尙書程信定襄伯郭登等議恐賊北連遼

衆。奏遣撫甯侯朱永統京兵四萬往益師。永卽張大其事。請定賞格乃行。事下閣議。大學士彭時知賊可平。擬旨令永飭戎裝待報啓行。會忠報至。上召兵部與時等計。時曰。賊四旁掠。信可慮。今八保山。我師圍之甚固。賊將困有必擒之形。何庸京兵再出。大學士商輅亦言忠等佈置得算。可無虞也。程信執請出師。衆亦尤時輕敵。朝廷乃詔問項忠等當益兵否。忠請於上。命永領宣大精兵五千沿途西候。得賊報不必來。未平則西來。戮力攻之。忠等日督兵城下挑戰。賊堅壁不出。文昇謀於項忠曰。賊城中原少水。聞芻粟亦漸乏。須邀其芻汲。則坐令自斃。忠然之。遂令軍士焚其近地之草。及填塞城外水泉。候賊夜汲者。設伏掩捕之。多被獲。知城中正艱於水。文昇曰。此賊窮蹙已甚。不足慮矣。攻之益急。賊嬰險固守。未幾甘州都指揮劉晟帥兵三千亦至。十八日復會兵攻城。賊亦自危。遣人詐請降。忠等亦佯許之。賊要忠與玉二人詣城下與語。二人遂單騎往。賊出數百人環甲冑馳繞門外示武。文昇曰。賊窮蹙無信義。萬一二公被遮留。損軍威。亟邀還。已而賊亦堅訴。要巡撫大人來。文昇曰。不往。是示以怯。乃從數十騎往。厲聲罵曰。賊徒無禮。天朝將官咸在此。尋出精兵四掠之。賊遂入城。滿四亦歸。時滿璿等遂爲劉參將馮指揮所苦。以至今日。乞宥死願出降。文昇諭以此二人。朝廷以械至京下獄矣。爾速降。朝廷必詰亂始。汝等脅從。恩在罔治也。初滿璿被劫不爲。至是乞命。文昇受之。撫歸營。明日賊又設木柵備戰。不復言降。未幾賊衆因飢渴自相叛。一日夜五鼓。城內李旗等走入營。報昨夜賊自相仇殺。可乘機剿之。項忠曰。此固不可深信。又以理度之。恐不虛。遂令諸營兵會山下。果聞亂。用大將礮擊城中。賊死傷者甚衆。猶負險不下。官軍日攻城。

會天寒士卒頗怨。時賊首尙未獲。文昇聞之。言於忠等曰。師老矣。卽今黃河凍。敵入套。我師豈能久駐。倘賊乘間突出與敵合。患有不可言者。須急破城爲上策。衆議難之。石城外有濠深丈餘。格人馬不得至城下。文昇令軍士數百人。每人負土一囊以填。頃之濠平。文昇又取各城上圍竿數千。縛成大橋。置之廂車軸上。欲用以攻城。賊聞之益懼。漸有出降者。忠等皆給票縱之歸。有楊虎狸者。羣賊中稱驍悍。滿四以爲羽翼。至是亦來降。懷疑懼。忠等極力諭慰之。劉玉削刀與誓曰。爾生擒滿四。或殺以獻。朝廷賞格賞銀五百兩。金百兩。官指揮。遂示之銀虎狸諾。以誘滿四出戰。擒之。遂送出帳房外。屏人語曰。何日可戰。虎狸曰。只在明日。又語曰。何處可戰。虎狸曰。只於東山口。且令彼出其精兵山下爲信。遂遣之。明日忠等整兵至山下。又東山口係延綏兵信地。忠等恐其泄。乃給延綏將胡愷曰。爾轉休矣。今日中軍代爾等。乃令人登高視之。見一人乘白馬出城。卽滿四也。旣而果有甲冑精銳數百立東山上。忠等始信虎狸約不謬。遂伏兵東山口。而王銳等漸覺之。遂督部下兵悉前戰。良久殺傷相當。我軍伏起奮擊之。賊大敗。已而郭迺擒滿四以歸。忠等遂命露布報諸郡邑。及各邊以安人心。明日賊馬驥南斗俱驍勇過人。率衆出城。敗擒之。賊勢益蹙。城中乃復立舊達官火敬爲主。而賊黨漸無固志。劉玉欲撤兵。令賊自解散。忠曰。賊逆叛殺我。一伯三都指揮。官軍死者數千人。今縱之逸。他日必爲陝西憂。乃屯兵至十一月下旬。賊度不支。夜潰出。四散去。忠等乃發兵分捕之。執火敬。擒斬數千級。旣而於山岡獲其家屬百餘口。山谷中又獲賊五百餘人。惟贖養楊虎狸家。遂夷石城之險。墮其城垣。葬諸軍士陣亡骸骨。立石紀平賊歲月於山。時賊殘衆百

餘人走據替箬山。會套賊報急。乃留精兵三千。仍剿餘賊。忠等回固原。時生擒千餘人。惟滿四、馬驥、南斗、火敬、并各罪大者二百人械京。餘卽營中皆斬之。明年正月。替箬山賊首毛哈喇亦被誅。傳首京師。餘賊許各歸農。卽石城迤北古西安州。增設千戶所一。改固原千戶所爲固原衛。設官防守。忠等班師。論功增太監劉祥祿米歲二十石。劉玉陞右都督。項忠陞右都御史。馬文昇、王銳皆左都御史。餘皆陞賞有差。劉六、劉七、齊彥名等皆霸州文安人。俱任俠善騎射。初挾弓矢。行劫諸路。號河北鬻馬賊。正德初。劉瑾用事。以入賂遷徙入官。故中外冀遷官者多貪墨克賂。民重病之。又連歲值水旱。瑾併徵數年積逋。使者所至慘逼。百姓不堪。多思亂。會太監谷大用、馬永成、張忠皆原籍文安。劉六等以鄉曲往來。諸中貴家因浸涉禁闕。至豹房縱觀。遂懷輕朝廷心。未幾。行劫事頗洩。都御史甯果捕之。劉六等遂聚衆拒捕。其黨有楊虎、劉惠、邢老虎等皆俠徒。結爲盜。後瑾誅。果亦罷。乃正德六年辛未秋七月。兵部檄有司捕盜。時獲齊彥名繫安肅獄。劉七等劫之去。遂反。諸思亂者多應之。旬日間衆至數千人。官兵出擊。屢爲所敗。遂流劫山東州縣。橫不可制。還入畿內。薄京師亦戒嚴。詔都御史張中錫督戎務。惠安伯張偉總兵討之。時承平久。戎政廢弛。兵率溺惰。市井者中錫書生。偉出執袴裔。素未試行陣。中錫治龔。遂化渤海事。欲效之。乃榜示所在。有司賊至不殺者。勿捕殺。降者待以不死。皆仍給飲食。劉六等聞示。遂不殺掠。至德州謁中錫。中錫推誠撫之。劉六欲降。劉七不可。曰。今政在中官。馬都堂豈能行其言乎。潛使人入京探朝廷無撫意。又以所掠金帛輦至京。饋諸中官乞赦。不得。劉七等遂不聽撫。仍大肆掠。還攻文安。有趙風子名鏗。縣學生。

借家屬避賊。賊劫其妻。將汚之。鏹不勝忿。手刺殺二賊。爲劉七等所擒。因降爲盜。以通文義。推爲渠魁。無何賊已聚至萬數人。因相約曰。且勿薄京師。須先得河北河南。直抵金陵。可就彼封侯拜將。於是分其黨爲二。劉六、劉七、齊彥名等爲一黨。推劉六爲主。楊虎、劉惠、趙鏹等爲一黨。推楊虎爲主。各行劫。劉六等攻破青縣。往山東。復令劉七還兵攻棗強。破之。知縣段彥死焉。遂略景州、獻縣、阜城、靜海、滄州等處。劫漕。以資食。楊虎等攻破濟興縣。亦向滄州劫糧運。遂略南皮、東光、南宮、棗強等處。九月亦會於景州。總兵馮安督衆擊之。殺賊千餘人。楊虎等奔小灘。都指揮田某統兵遇賊。死者七千餘人。虎等亦往山東。劫蒙山等處。副總兵李瑾出戰。敗績。虎等遂掠濟南、東昌、兗州、登萊等府。勢甚猖獗。官兵莫與當也。初賊臨故城縣。馬中錫家在焉。賊帥戒其黨勿焚掠馬都御史家。傳者遂訛云中錫欲庇其家。故縱賊。中外喧騰。時偉亦無擒賊功。朝廷逮二人至京。俱詔獄論死。中錫竟死獄中。偉貸死奪爵。是冬又大發京營兵討之。以太監谷大用總督軍務。兵部侍郎陸完提督。伏羌伯毛銳爲總兵官。時劉六等既分爲二。聲援劫掠往來。山東郡縣多被殘破。或合或分。出沒不可爲互。時巡撫真定都御史蕭翀。巡撫山東都御史邊憲。皆逮下獄爲民。又著爲令。州縣官失陷城守者。如邊將失機例論死。先是馬中錫等無功。諸閣成曰。此事非書生所能辦。故大用遂有是行。大用等居中。於臨清駐劄。檄宣府遊擊許泰、邵永、大同副總兵張復、遊擊江彬各領邊兵入征。山東惟樂陵賊不敢近。時許達爲樂陵令。有備。齊彥名分兵南略。至婁子岩。爲遊擊許泰所敗。殺者甚衆。泰乘勝追至大名府。又斬首一千餘。彥名脫逃。十一月楊虎等自破靈山衛。日照等縣。過徐

州抵宿遷。高郵衛兵出禦，敗績。楊虎乘小舟渡河，官兵追之，覆其舟，虎溺死。衆又推劉惠爲主，趙鏐副之。攻高郵，執指揮陳朋，轉向靈璧。縣令陳伯安出戰被執，伯安不屈。惠欲加害，鏐勸釋，遂破虹縣、永成、夏邑、虞城等縣，及歸德州至亳州。指揮石某帥衆及僧兵三百禦之，敗績。僧兵死者七十餘人。是時劉六等寇山東、北直隸等處，爲河北害。被官軍擊敗，勢稍微。衆尙五六萬人。劉惠、趙鏐寇河南，勢猖獗。有陳翰者，降賊，用事爲謀主。劉惠自稱奉天征討大元帥，趙鏐爲副元帥，翰爲元帥府長史，分其賊首爲二十八營。以應二十八宿。賊衆號至三十萬有奇。於是河南賊稱獨勅，僉事孫某遣人賄黃榜招之。賊具乞恩疏達朝廷，以誅奸臣爲言。是年十二月，攻陷裕州。同知郁采死焉。殺御史任某，都指揮詹某，又破上蔡。知縣霍恩死之。朝廷報無甯日。是冬，又命副都御史彭澤、總延綏、甯夏兵專討河南。而陸完等專經略河北。是月，劉惠、趙鏐陷泌陽。原大學士焦芳走免。賊盡發其先世塚，取芳衣冠被庭樹，劍斫之曰：「吾手誅此賊，以謝天下。」先是，賊攻鈞州不下，欲屠之。帥以尙書馬文昇家在焉，去之。太史氏曰：鈞州以一文昇得不屠，而焦芳一家乃酷烈如此。然則善善惡惡之良心，雖盜賊亦未嘗泯也。七年壬申春正月，卽軍中陞提督軍務陸完爲右都御史。已而劉惠、趙鏐過南陽，有備去之。攻唐縣，知縣劉定率民城守，晝夜拒戰。凡二十八日，不克。賊引去，掠泌陽、鈞州、固始、潁州等處。時惠賊甚衆，分遣南略襄陽、樊城、棗陽、隨州等處。時諸閣以陸完等討賊久未成功，請別置監軍。上命廷臣皆憚中官不敢可否，獨禮部尙書傅珪以爲不然。奮前曰：「今兵老民疲，直以冒功者多，致失士心。賊勢方熾，民譁然思亂，禍且不測。吾儕死不償責，諸公唯唯，將何待乎？」

不報。明日有旨以太監陸開爲監鎗。傅珪令致仕。未幾彭澤至。督河南、鄖陽及延綏。甯夏兵湖廣土兵分路擊賊。屢敗之。多所斬獲。渡河溺死者五千餘人。賊黨亦沿途逃散。惠等僅領殘衆。被追急。奔光山。六安山中。又破舒城。復還商城。僉事郭詔督羅田、油河兵。擒獲三百餘人。焚死者又二百餘。會天大雨。山水驟。溺死者千餘人。是時官軍所在嚴整。以俟。賊徒陳翰詣總兵仇鉞乞降。餘賊各奔掠。王等三百餘人奔湖廣界。遇參議白金李源。擒斬百餘人。又賊三百餘人往掠桐柏。知縣李聚迎戰。斬十人。又復奔泌陽。爲知縣劉機擊敗。劉惠、趙鏐率餘賊萬人至應山。僉事郭詔等復督追。及於二郎畷。擊敗之。斬首百餘級。墮崖溺水死者千餘人。衆遂潰。劉惠不知所終。趙鏐與其黨邢守道等逃入應山縣東化山。削髮鬚。奪僧人真安度牒爲僧。鏐遊至江夏縣。是年夏四月。軍人趙成讖獲詔碟於市。楊虎等賊一黨遂滅。時劉六、劉七、齊彥名等未平。劫山東滕縣。爲總兵劉暉戰敗之。斬賊千餘人。賊奔登州海套。又被圍。遂潰圍奔。官兵又追敗之。賊衆大潰。餘數百人仍奔香河、寶坻、玉田等處。招集餘黨稍衆。至武靖。參將王杲出戰而死。是年春。銳與賊遇於真定。敗績。喪軍資殆盡。會宣府遊擊許秦兵來救。銳僅以身免。失去所佩將印。銳衰老怯懦。非大將才。又屬京兵。久未經戰。谷大用監軍。運無勝算。恃中貴可驕。反擁自衛。高據堅城。一時王師挫劫。國威重損。乃徵銳至京。以與大用同事。遂置不問。僅罷歸第耳。時劉六等屢敗。衆亦潰。真黨不過千人。每掠膏良民。號數萬。遇官兵迎戰。卽驅脅從者當之。閏五月。劉六等敗走湖廣黃州。至團風鎮。爲土兵所扼。劉六與其子劉仲淮。勢窮赴水死。其劉七、齊彥名。奪舟入江。奔南通州。至蕪湖。走鎮江。道淮安。欲還山東。

梗揚州兵守不能過。復自通州泝流至九江。率亡命江上。凡三往來。官兵莫與禦者。七月。劉七、齊彥名帥陰賊欲登狼山。官兵追之。劉七中流矢。復奔入舟。會大風作。舟覆。劉七溺死。齊彥名遂爲亂兵所殺。賊衆盡潰。時劉六等賊一黨平。九月。大封賞平流賊功。封太監谷大用。弟大寬。陸開弟陸永。俱伯。咸甯伯仇鉞。進封侯。右都御史陸完。加太子少保。入掌院事。廢一子錦衣衛百戶。餘各陞賞有差。中官勳戚子弟。以奏名從軍。得冒功授都督。都指揮千百戶。大學士李東陽等固辭。餘安受之。無作色。

藍廷瑞、鄒本恕、廖惠、劉烈俱保甯人。曹甫、江津人。於正德四年冬反。遂稱王。先是廷瑞行山中。得古印。既而又得一劍。自謂有天授。適同郡入劉烈。聚衆亂。僭稱王。廷瑞遂糾其黨。鄒本恕、廖惠往應之。因出所得印劍煽惑民。時陝西官兵擊之。烈敗遁。不知所終。廷瑞等勢漸猖獗。遂稱順天王。刮地王。掃地王。衆至數萬人。流劫湖廣、鄖陽等處。官兵不能討。五年春正月。以尙書洪鐘總制軍務。督四川、陝西、湖廣等處兵討之。時廷瑞等已破通江縣。秋七月。四川巡撫都御史林俊調官兵及僱回石砮等處土兵擊廷瑞。敗之。又敗之於門枕城峽。及鎮平茅壩。殺衆六千餘人。擒其黨首廖惠斬之。廷瑞走紅口。合鄒本恕入陝。越漢中三十六盤至大巴山。俊督兵追破之。賊棄輜重遁去。七年夏六月。鐘始會俊及陝西巡撫藍章等兵擒藍廷瑞。鄒本恕等平之。先是鐘以總制軍務至當臨。俊負知材不肖。下兩相格議。進止不速。致廷瑞等得招集散亡。勢復大振。攻燒營山縣治。殺僉事王源。於是鐘乃謂俊檄參政曹俊參議錢朝鳳副使公勉仁。僉事李恕等督四川兵。陝西巡撫都御史藍章檄副使來球副總兵閻綱等督陝西兵。鐘又檄湖廣參議

方璘都指揮李玉、樊燮督漢土兵。檄河南都指揮徐節、鮑威等。各督兵至。分道進勦。鐘及俊親監督之。先是鐘等帥湖廣兵追賊至於陝西石泉縣熨斗鎮。賊急遣人乞撫。時官兵未盡集。鐘乃以計款之。令於賊曰。赴四川東鄉縣金寶寺聽撫。賊亦令其黨十數人稱小老人者。隨各將校詣軍門陳告。然實無降意。計緩我師。得延秋登略食耳。五月初六日。鐘乃檄廷瑞等約日出降。仍給榜令諸路兵進。兼防守諸關隘。已而賊果違約。乃六月十四日始至。賊依山駐營。且使人挾求營縣治臨江布駐其衆。鐘等許之。廷瑞及本恕二人方出見。訖回營。賊衆猶四掠。計欲脫走。見官兵分七哨防守甚密。不得間。賊勢窘。衆亦漸潰。十五日廷瑞以所攜女子詐其女嫁領兵士舍彭世麟爲妾以結歡。世麟白軍門受之。遂邀諸賊首至營宴會。鐘令廷瑞所親鮮于金說廷瑞及本恕於十六日帥諸賊首二十八人同至世麟營赴宴。伏起盡擒之。賊衆聞變。遂大潰。奔軼山谷。鐘等遣諸路兵分道追勦之。擒斬溺死并俘獲婦女老弱驛馬兵仗甚衆。仍出榜諭招撫者聽。時唯從首廖麻子未獲。捷聞。洪鐘加太子太保。林俊陞右都御史。藍章陞右副都御史。太監章興加祿米十二石。俱賜金幣。餘將士各陞賞有差。時曹甫又聚衆攻破江津縣。殺僉事吳景。僭號稱王。是年春正月。俊調兵擒甫誅之。甫黨方四任鬍子率餘衆遁去。夏六月。賊黨方四任鬍子等復出作亂。俊又會兵屢敗之。未幾罷林俊。先是方四等擁甫餘衆走綦江。入思南石阡等府。數月間會俊等專調兵勦滅。藍鄺二賊方四等得乘間復大聚。衆至數萬人。方四自稱總兵。任鬍子稱御史。餘賊首二十餘人稱評事等。六月寇思南府。貴州兵擊敗之。走播州。播州兵敗賊於三跳等處。賊仍入四川。聲言欲向江津復

八月賊攻南川等關官兵禦之敗績百戶柳芳等戰死賊遂越關入南川綦江境江津重慶瀘州敘州成都等處遠近大震俊於是會洪鐘及巡撫松潘都御史高崇熙檄諸路兵討之俊乃分兵扼其要路俊駐江津崇熙駐瀘州太監章興駐成都御史王綸駐重慶又檄副使何瑄都指揮鄒慶帥兵由合江進副使李鉞知府曹恕帥兵由江津進夾攻之以參政邵養知府劉思賢督餉九月十四日賊攻江津俊督兵擊敗之追至合山坪又破賊四營十八日賊又攻江津俊遣李鉞曹恕督西陽播州石柱兵三道迎擊之追至高觀山斬獲甚衆乘勝追之賊望官兵未盛還擊我副使李鉞被圍窘適借戰吏何士昂奮力射之西陽等土兵亦至同擊賊又斬獲二百餘人賊退據高下礪石復擁衆勢甚銳俊等下令勿與戰以怠之遂徵各路兵至又撫其所獲周大富入營招之十月十三日方四令其黨李廷茂來告撫俊許約日且待以不死賊竟不至二十一日李鉞督諸將校分兵爲六哨由大啞小啞各關並進直衝高梁遂斬任鬍子等追殺三十餘里斬首一千八百餘級墜崖溺死者甚衆俘獲男女三千四百餘人及驛驢馬四千五百有奇時方四妻妾亦被擒賊遁走既而土兵欲尾賊滅之亦殺賊二百餘不退賊又見官兵少遂擁衆反衝殺千戶田瑄冉廷盾等所獲方四妻妾并驛馬等復奪去自是賊氣亦喪斂殘衆尙二千餘人走思南境捷聞賞俊等有差俊尋致仕時俊與洪鐘議多不合又時在朝中貴多以子弟冒軍功受封賞俊皆不許權倖忌之俊自度不可爲賊敗俊以疾乞休內批允之由中貴也臺諫屢疏留俊再蕩平蜀寇不報俊去蜀人號泣送之餘黨遂熾七年冬林俊既去方四復統衆出寇并賊麻六兒喻思倖等先後猖獗內江

崇慶之境。隳年民不帖席。鐘等不能定。四川巡撫都御史王綸勸鐘玩寇殃民。罷之。正德九年。以右都御史彭澤總制四川軍務。澤至。法令嚴明。賞罰公信。時諸賊雖蜂起。視藍鄂方任四大寇。差弱澤。乃以兵先討麻六兒及喻思俸。次內江駱松祥。又次崇慶州范藻。悉擒斬之。蜀遂平。

江西各賊渠魁姓名不甚著。時公移惟以某地賊呼之。正德六年夏四月。江西盜四起。曰華林寨。碼礮寨。賊起贛州南安二府。東鄉賊起撫州府。桃源洞賊起饒州府。諸賊始行劫村落爲盜。官府捕之急。遂匿山谷間糾黨。一時無賴者多歸之。因各據險立寨。爲聲援煽亂。時贛州賊執參政趙賢。以贖入得還。華林寨賊又攻破瑞州府。江西大震。事聞。時右都御史陳金。以憂家居。詔奪情起復。總制江西等處戎務。以右副都御史俞諫統兵討之。金至。乃檄副使周憲以兵擊華林寨。憲分兵三路。約爲掎角。且期齊進。憲親帥一兵進。遇賊迎戰。頗有斬獲。其二路兵失期。憲勢薄。賊所不得已。遂深入。山路險峻。賊憑高下礮石。官兵死者頗衆。憲奮擊。被執死之。賊磔其尸。子幹見父危。躍馬前救。亦中流矢死。賊勢遂大振。明年壬申冬。金復檄按察使王秩。南昌知府李承勳等。督兵勦華林寨賊。遂平之。移兵碼礮及東鄉等寨。皆平之。先是。憲死。金乃檄大同儲邊兵討賊。時小有勝。竟不敢抵賊巢。一窺。又檄廣西田州等狼兵。素猛悍。其土酋岑猛等多驕。不節制本兵。金欲藉其死力。稍姑息。狼兵遂無忌憚。肆掠良民。至有殺傷者。人心洶洶。謂金不能平賊。更致殺戮無辜。且云狼兵驕甚。恐乘亂生他變。朝廷遣給事中黎奭往勸金功罪。其實密使散處狼兵也。金無誰何。第厚犒賞諸土酋。令其稍嚴約束用之。金出榜招脅從。且勸且撫。其來降者。號曰新民。慰籍

之置部下俾爲鄉導。與我兵協。時賊保險。無一人敢近壘者。至是金檄秩及承勳等。會有降賊黃奇。承勳察其智略可用。厚遇之。人謂承勳宜防不測。承勳彌加親信。令侍宿帳中。奇感承勳遇。已以死誓。承勳每令奇入賊寨。說其黨各有來降者。承勳欲得降者爲用。又令奇與降者約爲內應。攻賊。候奇約定。承勳召土酋岑猛至。以言激之曰。破寨在今夕。君能效功。與賫皆君有也。猛問計。承勳猛選精兵五百人。夜與俱至山下。猛尙不知所爲。承勳始告之。於是令黃奇密入寨。誘所與約降者來。既見。復縱之去。得爲內應。至夜漏三下。承勳乃與猛師五百人。銜枚登山。奇引數人前導。抵壘。羣賊方鼾睡。時漏下已三。奇拔柵帥衆入。五百人奮力擊之。降賊亦合勢夾擊。賊倉惶無措。又釋甲伏寢。猝爾求之。皆不得。遂斬首三千級。殘賊越壘乘夜逃匿山谷。時尙未曉。明日搜諸山。又斬獲千餘人。餘黨悉潰。華林平。乃移兵擊碼礮東鄉賊。皆蕩平。蓋諸降賊號新民者。金又令官給贖產。仍禁平民毋得報害新民。以故感恩思報。多藉力以破賊。云。惟時桃源洞賊尙負固如初。參政胡廷舉往撫。爲賊所執。劫以威。廷舉不爲動。日賦詩自娛。且時反覆譬曉之。賊不敢加害。廷舉因察左右有謀通者。聞得其情。賄誘之。或執其黨來降。廷舉亦獲免。金等見賊不聽撫。遂督兵進討。時諸寨既平。華林賊已奪氣。又聞狼兵悍賊且畏之。欲來乞降。按察使王秩許之。納款者相屬詣軍門。旣而有謂賊四發時。故納降以攜其黨。今破者已盡。惟華林賊勢孤援絕。將安之。況賊無信。他日必爲患。不如乘勝撲滅之。於是盡殺降者。賊復大亂。潰圍出饒信。入徽衢等處。大行劫掠。初賊據險。官兵卒難擾。及乘險奔軼無所恃。金等追殺之。又會浙東兵爲應。遂所在擒殺殆盡。餘衆亦降。金

等旋於華林等平其寨壘分置巡司控制之散狼兵歸廣乃班師金始以言官論其多殺平民革宮保秩至是賊平論功仍舊職云

李福達山西崞縣人正德初與妖賊王良李鉞謀反事發戍山丹衛逃還改名李五清軍御史勾發山海衛復逃還寓陝西洛川縣倡彌勒佛教其徒惠慶邵進祿等互相煽惑驅誘鄉民福達用是費日起誑進祿等言我宜掌教天下今暫歸若等聚衆俟我因還山西二人遂作亂殺巡捕指揮陳正陷洛川城進祿尋死正德七年慶攻宜川及白水等處榆林都指揮李良敗之於爛柯山分界屯指揮崔嵩敗之於三塚圍都督楊英都御史藍章禦之於白衝寨指揮關鍵張潛爲所殺副使張益兵追擊於麻線嶺破之慶遁去嘉靖初五復竄居五臺縣易姓名曰張寅往來大同府徐溝縣之同戈鎮已又挾重費入京竄入匠籍輸粟爲山西太原衛指揮使其子大仁大義大禮俱補匠役以燒煉術往來武定侯郭勛所有寵久之復往同戈鎮其讎薛良首發之福達懼亡入京官捕得大義大禮案繫福達寤乃自詣獄實對先後鞫訊者代州知州杜蕙胡偉證之者李景全韓良相石文舉等凡三十人具獄上布政使李璋按察使徐文華等復上巡按御史張英英如訊成獄矣英既去巡撫畢昭獨謂福達非張寅讎家誣證之也反其獄以居民戚廣等爲證坐良罪擬發口外爲民獄未竟昭乞侍養去五年御史馬錄按山西復窮治之傳爰書如前勛爲貽書錄囑免錄不從竟擬福達謀反妻子緣坐上其事於法司并助書於朝於是左都御史聶賢等言福達挾妖術煽亂宜重辟而郭勛交通逆賊納賄行囑法宜並坐已報允福達論死沒入其財產妻

子爲奴。助令對狀。助具服謝罪。上特宥之。給事中程輅、劉琦、王科、鄭自璧、張遠、南京御史姚鳴鳳、潘壯、戚雄等先後劾助請正罪。助亦累自訴。且以議禮觸衆怒爲言。上實不問也。是年十月。錄與巡撫江湖疏論助。給事中常泰、秦祐、御史邵函及自璧、遠復各疏言助罪惡貫盈。乞逮問如律。助故以議禮與張璠、桂萼等爲上所向上。恨廷臣堅執。雖貶竄意猶未愜。助與璠、萼因合謀爲蜚語。謂廷臣內外交結。借事陷助。漸及議禮諸臣。逞志自快。上恚甚。將大有處分。而人不知也。方謂歷案明確。中外協力持之。必不動。上乃謂李福達事情重大。錦衣衛差官逮繫來京。問六年正月。福達等逮至。詔會三法司於京畿道間。戒毋循私酷拷。三月癸卯。刑部尙書顏頤壽等奉詔於午門會訊。時告者薛良。衆證李景全、韓良相、石文舉等。共指福達。福達語塞。而證中有戚廣。乃巡撫畢昭所引。以證薛良之誣者。訊之則曰。我曩未就吏。訊安得此言。頤壽等以其詞上。上怒曰。頤壽等徇情偏護。扶同入人重罪。豈朕欽恤慎刑之意。且畢昭先勘良誣。今又勘實。何也。俟齋祀畢。朕將親鞫於廷。大學士楊一清言。君主要。臣主詳。今案牘具明。詞證咸在。第令諸司虛心鞫審。則真情自得。何至勞黼袞之尊。親獄訟之事。上乃已。仍囑勘官會廷臣訊之。刑部主事唐樞言。福達罪狀甚明。擬死不枉。上怒。黜爲民。頤壽等懼。乃雜引前後讞詞。指爲疑獄。上切責頤壽等。令戴罪辦事。仍械繫馬錄。下鎮撫司掠治。御史蕭一中請以錄付有司。太僕寺卿汪元錫、光祿寺少卿徐才亦訟錄非辜。上怒。皆令逮繫。於是頤壽等復更議出福達。獨以薛良抵罪。而不及錄。上怒益甚。遂并逮頤壽等。下獄。八月。命吏部左侍郎桂萼署刑部事。兵部左侍郎張璠署都察院事。少詹事方獻夫署大理寺事。雜治

之。等搜馬錄篋中。有大學士賈詠。御史張英。都御史張仲賢。大理寺丞汪淵。工部侍郎閔楷私書。及郭勛。勳書。凡八紙上之。詠書別以檢次。知縣尹倫。指揮王龍爲託。英等頗及福達事。上責詠對狀。詠引罪。得致仕去。而逮問仲賢等。英書詞連及侍郎孟春。春亦并逮。助事已前決。置不問。其私書未獲者。令追索之。等又上言。薛良始誣張寅。業已得白。而馬錄以按部至。郭勛爲之救解。錄素憾勛。乃窮治寅事。給事中常泰。劉琦。員外郎劉仕咸。佐成之。遂以寅卽福達。今考其年歲名字。皆不倫。此皆錄欲陷助。泰等黨附錄。所在問官。阿意承指。遂成大獄。臣等謂泰琦。佐使錄殺人。罪實難貸。給事中王科。鄭一鵬。秦祐。沈漢。程格。右評事杜鸞。南京御史姚鳴鳳。潘壯。戚雄等。皆評織成獄。而給事中張達。御史高世魁。同聲嫁禍。郎中司馬相。增。減文卷。誣上行私。此數人締黨求勝。內則奴隸公卿。外則草芥司屬。恣意橫行。殆非一日。請大奮乾剛。以彰國法。上以爲然。乃逮科等。并訊命南京刑部繫潘壯。戚雄於獄。等既已廷鞫。乃言於上曰。臣等奉詔欽明大獄。且得張寅被誣之狀。寅本五臺縣人。工部漏籍匠戶。僑居徐溝。嘗出錢貸薛良。良素無賴。欲殺寅以逋債。因妄指寅爲崞縣逆黨李福達。密囑寅父子怨家周儀。石文舉等。誣證入寅罪。後儀等懼罪吐實。良罪發口外爲民。獄已成矣。會寅子大仁客京。久不聞里中信耗。抵武定侯郭勛。求解。爲致書御史馬錄。錄故怨助。欲乘機中以危法。因傳會薛良本謀。以惑亂朝聽。而一時奸黨甘心于助。寅者籍籍起矣。以天之道。賴陛下仁明。具得其情。各犯請坐重如律。有旨。各犯朋謀害人。釀成大獄。薛良誣告論死。石文舉等誣證。布政使今陸都御史李璋。按察使今陸大理少卿徐文華。阿附巡按殺人媚人。俱發戍。

極邊遇赦不宥。給事中劉琦、御史程啓充、盧瓊挾私彈劾，亦發戍邊衛。給事中王科、張遼、秦祐、沈漢、鄭一鵬、程輅扶同妄奏，俱爲民刑部尙書顏頤壽、侍郎劉玉、王啓、都御史江湖、劉文莊、大理寺卿湯沐、少卿顧泌、寺丞汪淵畏避言官，推勘不實。太僕寺卿汪元錫、光祿寺少卿余才、選忿橫議。吏部侍郎孟春、工部侍郎閔楷、都御史張仲賢交通私劄，各擬職閒住。其出差未至，如都御史張潤、御史任崧、逮捕未至，如給事中常泰、郎中劉仕、行提未至，如給事中張遠、高世魁、御史姚鳴鳳、張英、評事杜鸞、郎中司馬相俱候至京。定擬風聞失實。南道御史潘壯、戚雄、下南京法司。死亡案牘，副使周宣給驛送囚。副使王昂指引證佐。知州杜蕙聞朝鎮撫鮑玉下該省巡撫。勘汪偉、毛伯混命差官代還。馬錄以故入人死罪未決。擬徒。獨巡撫畢昭以嘗歸罪薛良與張寅父子俱免罪還職役。上覽之至再。處分畢。因命都察院刊布詔條。使中外知之。然猶深惡馬錄。下法司另議。欲坐以奸黨律。侍郎桂萼等謂張寅未決。而馬錄代之受死。恐天下不服。宜發煙瘴充軍。令緣及子孫以示至公。錄乃譎戍廣西南丹衛。遇赦不宥。旣而復論楊一清等曰：馬錄首事害人罪有所歸。與其僂及後世。不若誅止其身。以從舜典罰弗及嗣之意。一清等曰：祖宗制律俱有成法。今錄無當死之罪。律無可擬之條。若法外用刑。吏將蚤緣以法爲市。人無所措手足矣。上不得已從之。隨召璉、萼、獻夫於文華殿勞諭之。仍賜二品服色。金帶銀幣。給與三代誥命。而方士陶乘真亦以明獄元贊得晉宮保。後璉以先後獄詞。及上所裁定。并所賜敕諭。輯錄成書爲上下二卷。鈔梓進呈。名曰欽明大獄錄。請頒布內外諸司。上曰：大獄賴卿等間明。輯錄刊印頒布。尤足以廣朝廷欽恤之意。如奏行。後張潤

張英閒住。餘皆爲民。南御史吳彥疏乞宥頤壽等。失入之罪。謫外。助與璉、粵等。氣勢益張。自是廷臣逮杖爲常。再莫敢梗矣。至嘉靖四十五年。穆宗卽位。四川妖寇蔡伯貫反。已而就擒。鞠得以山西李同爲師。四川撫按官移文山西。捕同下獄。自吐爲季午孫。大禮之子。世習白蓮教。假稱唐裔。當出御世。惑民結衆。倡亂。與大獄錄姓名無異。撫按官論同坐斬。奉旨誅之。都御史龐尙鵬上言。據李同之獄。福達之罪益彰。而當時流毒搢紳。至四十餘人。衣冠之禍。可謂烈矣。郭助世受國恩。乃黨逆寇。陷搢紳。而樞要之人。悉頤指氣使。一至於此。萬一陰蓄異謀。人人聽命。爲禍可忍言哉。乞將助等追奪官爵。以垂鑑戒。馬錄等特加優異。以伸忠良之氣。穆宗從之。凡當時死事謫戍者。皆得敘錄。是獄始明。太史氏曰。張居正總裁實錄。爲璉傳。則曰。奉詔鞠勘重獄。獨違衆議。脫張寅之死。蓋二人專復相似。曲護如此。然不獨居正。後人不查。沿習舊聞。謂璉、粵議禮未必是。繼獄平反。最得古人欽恤之意。夫議禮自父子起見。貴爲天子。誰敢與抗。且理各有當。途之尤可原也。卽極於入廟稱宗。猶曰流弊。非其本心。乃極明極久之獄。敢挾主翻案。但欲洩憤。廷臣遂爾甘黨逆賊。此心此行。何以對天日。死而有知。其難免枉法之條矣。

汪直號五峯。徽州人。自少落魄任俠。母夢大星入懷。傍有峨冠者。詫曰。此弧矢星也。旣旦。大雪。草木皆冰。遂生。旣壯。饒智略。性喜施。以故一時惡少。若葉宗滿、徐惟學、謝和、方廷助等。皆與遊。直因懷異志。謂其黨曰。中國法度森嚴。動輒觴禁。孰於海外乎。逍遙哉。退而詢其母。生兒時有異兆否。母告之夢。直喜曰。天將命我。以武勝乎。遂萌邪謀。國初海禁少解。有一二家從廣東、福建地方買賣。陸往。舡回。潛泊關外。或賄把

關官及投託鄉官，得以小紅蚤夜進貨，屬承平之日，封守弗慎，奸人遂緣爲利，各結鯨，推雄強者一人爲紅頭，或五十隻，或一百隻，成羣分黨，占泊各港，紛然往來海上，入日本暹羅諸國行貨，遂誘帶日本各島貧倭，藉其強悍爲羽翼，亦有糾合富貴倭奴，出本附搭買賣，公爲雄長，先是徽人許二住雙嶼，號海寇，最強，又有陳思盼住橫港，與二相倚，直投二部下管櫃，直沈機有勇略，人服之，未幾巡撫福建朱都御史遣都司盧鏜領兵擊許二，遂破其巢穴，焚其舟艦，擒斬殆盡，將雙嶼港築截，許二遁去，餘黨因推直爲主，住滬港，特陳思盼聲壓直，直心恚之，適一王紅卒領番紅二十隻，思盼邀爲一夥，思盼因而謀殺王紅主，遂奪其紅，其黨不平，潛與直通欲害思盼，直乘機潛約慈谿貫通番柴德美，發家丁數百人助己，又佯報甯波府及海道衙門，發官兵若干，乃伺思盼生日，爲酒不設備，遂內外夾擊，殺思盼，擒其姪陳四，并賊數十人赴官，餘黨悉歸直，又有一二新發番紅，俱請直旗號，是時米都御史差義官吳美幹取福清，紅亦一半從，直勢益張，海上遂無二賊矣，或曰：特因其隙而用賊攻賊，亦兵家之常，未爲失策，然養成直之孽者，此舉也，直以所部紅多，乃令鄞縣人毛海峯、徐碧溪、徐元亮、葉宗滿等分領裝載硝磺絲絳，違禁諸物，抵日本暹羅西洋諸國互市，又四散海上，劫掠番紅，入關無盤阻，公然紛錯蘇杭之境，凡五六年間，致富不貲，夷人信服，皆稱爲五峯紅主，直又招聚亡命徐海、陳東、葉明等爲之收領，領費旬引倭門，多郎次郎四助四郎等爲之部落，又有從子汪汝賢、義子汪激爲之腹心，威望大著，人共奔走之，或餽時鮮，或餽酒米，或獻子女，甚至透衛官，有投以紅袍玉帶者，是時有把總張四維，因與柴德美交厚，得達直，遂拜伏叩頭，甘

爲臣僕。法禁蕩然無餘矣。直欲示威諸夷。會五島夷爲亂。直素憾之。欲藉以報。遂請於海防將官。出兵勦滅之。且宣言我有功朝廷。希重賞。時將官與之米百石。直詬曰。我何以此爲哉。投海中去。且怨之。遂頻侵盜內地。嘗以扁舟泊列表岸。參將俞大猷率舟師數千圍之。直以火箭迎戰。大猷敗績。直益驕。遂易官軍。乃更造巨艦。聯舫方一百二十步。容二千人。以木爲城。爲樓櫓四門。其上可馳馬往來。遂據薩摩洲之松蒲津。號曰京。自稱徽王。部署官屬。控制要害。凡三十六島之夷。俱從指揮。時夷漢兵十餘道。流劫海濱。嘉靖三十一年壬子春。遂破黃巖府。焚殺官民甚慘。官軍莫之誰何。直乃緋袍玉帶。金頂五簷黃傘。其頭目人等。俱大帽袍帶。銀頂青傘。侍衛五十人。俱金甲銀盔。出鞘明刀。坐定海擡江亭。稱淨海王。居數日。如履無人境。然是時直隱身坐遣諸寇。每殘破處。必詭云某島夷所爲也。以故諸司奏亂。止云倭寇。未云首惡。汪直勢猖獗。歷癸丑甲寅乙卯數歲間。不時攻掠餘姚。觀海。樂清。瑞安等處。塗毒不可言。識者曰。東南雖知汪直之叛。而不知受禍之慘。皆由直者。初浙江未有開府。至是朝廷擢御史胡宗憲爲都御史。總督杭州討賊。時直黨葉宗滿。汪澈等十餘人。俱在軍門用。先是我兵破倭。其殘衆有百餘人。遂據舟山爲亂。宗憲遣宗滿等協官軍往勦。遂殲焉。宗憲上其功次。賞犒有差。汪澈笑曰。此何足賞。若吾父至。當取金印如斗大。然諸司統兵海上。俱未得其要領。宗憲前按浙江。見賊進退縱橫。皆按兵法。知必有坐遣者。且賊會來者。皆直部落也。而不聞直來。宗憲曰。其爲直坐遣無疑。先是徽州府收直母妻及子。繫金華獄。至是出之。且待之厚。使直聞。知其無他。宗憲又疏請。移諭日本。禁戢部夷爲名。其實伺直也。朝廷從之。宗憲遣生

員蔣洲、陳可願、充正副使往。密授洲意曰：汪直越在海外，難以角勝於舟楫之間，要須誘而出之，使虎失負隅之勢，乃可成擒耳。又曰：汪直南面稱孤，身不履戰陣，而時遣偏裨雜種，侵軼邊圉，是直常操其逸矣。洲等往直巢，直謂宗憲誠樸可欺，且欲遣會以脫親屬，遂決意渡海。三十五年丙辰春三月，遣黨徐海等擁衆十萬餘，寇松江嘉興諸郡甚急，破城池，殺縣官，聲言欲下杭城，取金陵，震於遠邇。宗憲謀之汪激等，以觀其意。初，激等欲小試慙慙，故甘心於舟山之寇。若海等正其所倚以圖大事者，且欲速直來，乃辭曰：是非吾所能辨，須吾父來乃可耳。遂留夏正童華邵輔王汝賢在軍門，自以招直爲名。遂及葉宗滿等開洋去，未幾，海等爲官軍所敗，就擒。宗憲恐驚直黨，乃撫摩夏正等如子然。葉宗滿兄弟待之倍平日，嘗對將吏等曰：直非反賊，故倔強不一見我，我當有處也。直時未知海等敗沒，意來與之應援，可得志。遂先遣蔣洲等還，次遣汪激、葉宗滿等，率銳卒千餘，執無印表文，詐稱豐洲王入竄泊岑港，據形勢，分兵以定。直乃督謝和等，慷慨就舟，醜酒誓衆，且曰：俞大猷吾嘗破之，須謹備之。先宗憲已度其有隙，遂以總兵盧鏜代大猷，鏜舊與汪激等從事舟山，同領兵，撫循倭夷備至，以故直不疑。惟日聚倭，礮兵刃，伐竹木爲開市計，且索母妻子弟求官封。宗憲亦漫爲之列狀上請，以安其志。有旨：汪直既稱投順，卻挾惡同來，以市買爲詞，胡宗憲可相機設謀擒勦，不許疎虞，致墮賊計。宗憲祕詔不宜，遂往甯波府畫方略，密調參將戚繼光、張四維等分兵伏諸要害，乃以夏正等爲死間，諭直曰：汝欲保全家屬，開市求官，可以不降而得之乎？帶甲陳兵而稱降，又誰汝信？汝有大兵於此，卽往見軍門，敢留汝邪？直猶豫。宗憲又飲其所遣最親信汪

激、葉宗滿等盡歡。遂與對榻。因佯露諸將請戰書於几案。激等窺視大驚。宗憲又作醉夢中語云。吾欲活汝。故今不進兵。汝不來。休怨我也。明日激等因洩之。直直頗疑之。宗憲又開心與其子澄。澄亦嚙指血寓書父。書云。軍門數年因養我輩。惟願汝一見。使軍門有辭於朝廷。卽許眷屬相聚。汝來。軍門決不留汝。藉令不來。能保必勝乎。空害一家人耳。又使邵岳董華等往來遊說。直不決。宗憲曰。此賊執戀岑港踰五旬。察其心神。終屬觀望。遂令諸將開關揚帆。示欲進兵狀。直度不可脫。因嘆曰。昔漢高祖見項羽鴻門。當王者不死。縱胡公誘我。其奈我何。且曰。部兵無統。欲得汪激攝之。宗憲曰。諸賊維直多智。且習兵。餘皆鼠子輩。今請激。是以犬易虎。不可失也。遂遣之。丁巳冬十二月。直詣軍門。比至。宗憲命其下將直付按察司獄。遂列直狀。始以射利之心。遠明禁而下海。繼以中華之義。入番國以爲奸。句引倭夷。比年攻劫。今悔罪以來歸。仍挾倭以求市。上干國禁。下毒生靈。疏入。得旨論如法。其汪激統餘衆出洋。爲颶風所覆。賊盡潰。沿海諸郡始甯。明年庚申。論功。宗憲加太子太保。右都御史。兼兵部左侍郎。廕一子錦衣衛副千戶。餘陞賞有差。



明書卷一百六十三

列傳二十

亂賊傳三

大同兵素通虜桀。於嘉靖三年甲申時。都御史張文錦巡撫大同。先是文錦視大同地多平漫。不甚泥塞。如紅唐溝鐵果門。皆爲邊衝。乃議鎮北九十里許。築五堡以藩大同。及成。徙鎮卒二千五百家居焉。堡每五百家。時卒中私相告曰。去城不二十里。猶苦敵來爲掠。無甯日。今五堡孤懸百里。敵突入。誰爲救援者。卽死不願往。往訴之。文錦不許。仍嚴爲令。趣之。又所遣董役。參將賈鑑。乘錦風旨。繼以竣法繩下。復白文錦。杖其隊長。且罪之。衆大怒。遂謀爲變。於七月下旬。鎮卒郭鑑。柳忠。暨諸驍勇者。倡亂。執賈鑑殺之。裂其屍。結聚塞下焦山。文錦大恐。下令招撫。不聽。二十七日。遂焚大同府。劫獄。轉焚都察院。文錦倉惶踰垣走。匿宗室博野王府。諸兵遂入掠其家。尋向博野王府。脅出文錦殺之。遂發武庫兵仗。盡甲而馳。執總兵江桓殺之。掠其家。乃出原。逮總兵朱振於獄。脅爲謀主。振度不免。告於衆曰。爾等欲吾舉事。吾與衆有約三。一勿犯宗室。一勿犯倉庫。一勿縱火殺人。能從我則可不從。甯死無與衆對。曰。惟命。旣而衆稍戢。乃脅鎮巡爲奏乞赦。朝議遣兵部侍郎李昆齎敕往諭。殺之。遂以太監武忠出鎮守。都督桂勇爲總兵官。擢山

西按察使蔡天祐爲巡撫。自錦之遇害也。諸亂卒公然行劫。振令亦不盡聽。振尋誅殺二十餘人。竟不能
鎮。及天祐至。乃會武忠、桂勇、朱振等集亂卒。反復諭以朝廷恩威。衆亦向前伏罪。皆暫解甲。然益懷危疑。
尋被奸人乘隙誘劫居民。都督桂勇擒殺五十餘人。收葛鑑、柳忠諸首亂者。杖而釋之。以安衆。而人心亦
洶洶有訛言。會守鎮參將李賢以兵自陝征賊回。道經大同境。頗侵擾。鄉人詈之。其部下詭曰。爾大同軍
爲亂。朝廷有命。我軍便道誅之。尙何怪畜牧也。由是轉相與訛。流爲徒城之說。且曰。京營暨諸鎮兵已馳
近地。剿大同矣。時京差戶部進士李枝轉餉至鎮。諸亂卒謂密旨也。衆夜集枝門。詢故。枝由門隙出。公移
示之。始信。頃之。傳謂知縣王文昌曾向巡撫以誅卒者。遂往執王殺之。又縱火焚居民百餘家。亂復大作。
明日。兵薄代府索賄。謂其請兵也。代王曲應之。解去。王懼害。以是月三十日。率子弟數百人。潛行宣府避
之。天祐等以聞。世宗命戶部侍郎胡瓚督兵往討。以都督魯綱總其兵。瓚行。上降制曰。誅首惡。脇從者不
問。及瓚至。陽和密檄桂勇督城中兵。計擒其首惡者。文移日數至。故鎮卒懼誅。向天祐祈生全。天祐傳制
諭之。且曰。汝輩勿助惡。卽良民無事矣。以故衆與首事者攜心。時桂勇督兵急。有徐氍兒等。復倡亂。脇諸
亂卒。盡甲閉城。圍桂勇第。掠其貲。殺家衆數人。磔屍於市。有啖其肉。遂擁桂真葉總兵宅。天祐及武忠聞
之。亟馳諭。至則反覆譬曉。衆復少定。勇得不遇害。勇向天祐泣求止兵。天祐曰。汝等自作孽至此。奈何。若
能擒獻首惡。吾爲轉達。兵猶可及止也。衆乃擒徐氍兒等四人。天祐斬之。函首詣瓚。因以書貽瓚曰。首惡
既誅。餘黨釜魚耳。易處也。其郭疤子及諸首惡亦已逃匿。天祐乃疏上請班師。上召瓚還。時御史蕭一中

給事中鄭一鵬等劾瓊受命誅逆師不隨城而返。濫承功賞。請治其欺罔罪。別遣大臣督兵討亂。不報。惟
敕天祐等。蒐黨惡。仍宥所脇者。遣使諭代王還國。四年乙酉春正月。天祐等令城中兵民各復業。凡先所
劫軍器首官者聽。衆心稍安。未幾。郭疤子。胡雄潛住城中。自度終不容。復誘聚餘黨數十人。於二月二十
七日夜。焚總兵王振第。思亂諸卒奔告天祐。天祐曰。曉當治之。詰旦集諸卒。諭以不屠城之恩。且詰亂由
衆指。曰。夜倡亂者皆知。請閉諸城門戶索之。遂得郭疤子。胡雄等四十人。斬之。人稱快焉。事聞。上優詔答
之。賞天祐等有差。天祐自是。間因事捕誅逆黨數百人。大同始定。後數年。天祐遷兵部侍郎。言官追論其
費財。竟去位。人多枉之。越數年。至十一年癸巳。先是報北虜渡河入犯。兵部尙書王憲曰。非設總制重臣
不可。朝廷從之。遂命兵部侍郎劉源清總制大同。以都督郤永爲總兵官禦之。初大同總兵李瑾。議於天
城之左。浚濠四十里。以遏敵騎。源清以爲然。遂以委瑾。且期三日竣事。瑾素馭下嚴刻。少恩。及是督成尤
酷。是冬十月十下。季富子王寶等六七十人。倡亂立諱六七十人。遂執瑾殺之。震於代。王充耀出奔宣府。時
巡撫大同都御史潘倣奏。變起鎮將苛刻。請置勿問。源清執法不可廢。請討之。上以疏示兵部議。憲言於
上曰。兵未必悉變。脇從者宥。渠魁必殲。朝廷璽書責總制巡撫二臣。相事撫剿。源清承制往駐陽和。乃榜
示大同城中曰。五堡之變。朝廷處太寬。乃念稔惡戕生。主帥天討所宜加者。時五堡遺孽。見榜輒偶語不
自安。謂追理甲申事也。潘倣及僉事孫允中。計擒首惡若干人。囚詣軍門。請緩師徐圖之。則逆黨可悉索。
又言五堡事已處分。不必又宣。源清皆駁之。乃以所獻囚屬御史蘇佑訊。而別遣參將趙剛等。率甲士三

百捕亂黨時所捕名內多捕賊有功人爲諸囚所讎誣者諸鎮卒疑懼遂生變衆噪諱寒巷拒捕源清亟遣孫允中入城諭意不能止至夜譌言大典兵來屠城矣遂羣起爲亂允中暨諸裨將擒斬二十餘人餘稍解散明日源清以兵集城下斬關而入大肆殺掠城外死者枕藉五堡遺孽益驚聚勢悍橫不可制亡何郤永師至城中亂兵開門迎敵執參將某殺之潘傲偕允中亟往諭衆不聽二人計曰亂不可遏始亂者責也乃列將士貪功妄殺激變鎮兵問道奏之源清亦疏奏巡撫諸臣黨逆卒至抗王師言官亦遂劾傲罷去獨孫允中猶對源清力言將士妄殺故源清斥其說遂留允中居懷仁置廟中禮部侍郎顧鼎臣黃綰皆言用兵之非綰又懇言之忤輔臣意噤吏部以他事出綰參政綰發憤上疏自列且指斥用兵之失世宗大悟命復其官王憲謂非大發兵剿之不可乃擢參政樊繼祖爲大同巡撫以江桓爲總兵官繼祖至陽和與源清議大忤繼祖遂疏請假金牌單騎入城諭之可立致且云恐賊計無聊得北連番貽患不小疏入不報源清遂於諸關設卒遏城中章疏又連疏奏宗室諸文武悉已從賊天實欲棄此城矣兵部然之力以爲請有命趨攻之源清承制益進兵命部下百道攻城又令郎中李文芝主事楚書穴城水灌之諸叛卒城守益堅乃大掠城中遣人誘北番大舉入犯約爲內應郤永帥師迎敵騎戰失利諸叛卒鼓噪應敵誘引數千人入城叛卒指代府餌敵曰兵退以此謝虜敵分遣部下散掠潭應朔懷諸郡數月乃去羽檄達京師中外危懼廷議請調九邊兵益之源清又疏請再設總制禦敵自專事攻城輔臣議請從之上不許批曰叛卒謀殺主將法不可赦然非舉城所爲郤永信與劉源清貪功嗜殺訛傳洗城以致

逆卒劫囚句虜。既云脇從不問。何又引水灌城。大同北門要地。祖宗所遺。源清必欲城破入誅。縱使成功。何由興復。若二人不用。豈有今日之患。今可罪出二人。別遣大臣備敵。密擒逆賊之魁。庶免老師傷財云。旨出。中外始知用兵非天子意。源清聞之。亟詣城下。索首惡。時郎中唐榮與都指揮紀振遊擊戴廉俱陷城中。相與謀曰。總制城索首惡。當謀以應之。時指揮馬昇爲賊所擁戴。威令行城中。榮等激以大義。昇悉心焉。遂歃血盟。令鎮撫王甯出告繼祖。繼祖深加獎慰。告源清。源清佯許之。令人於穴城詐給票。乃水灌之。穴者死焉。昇大悲恨。將大利於榮等。事遂已。源清知不可爲。乃謝病乞解任。上大怒。繫源清獄。削籍去。乃以張瓚往代。瓚至。下令曰。毋攻城。吾將有請也。遂招允中於懷仁與議。又密遣使往城中。時主事楚書觀兵城下。城中登陴請曰。吾輩非殺將者。爲自活計耳。請書入。書遂入諭慰之。且言用兵非朝廷意。衆皆望闕呼萬歲。仍進馬昇等。陳朝廷德威。曉以禍福。令獻首惡。是夜即斬倡亂者黃鎮等二十四人。獻軍門。繼祖聞之。卽馳入城。以鎮撫人人心。郤永猶倡言繼祖伏兵爲應。衆果夜驚。繼祖堅臥不起。乃安。明日榜諭城中。大發倉廩以賑之。稍一繩以法。將士稍縱恣者。槌殺一二人以徇。衆遂甯。瓚馳至城下。退諸路兵二舍外。復遣允中入城宣慰之。明日張鼓吹以御史蘇自南門入。置酒高會。犒勞將士。城中途大定。敵聞之亦遠遁。報至上。悅。張瓚樊繼祖楚書詹榮等各賞賚有差。潘傲孫允中復原職。上遣禮部侍郎黃綰以璽書慰宗室。撫傷殘。掩骼骸。賑窮乏。令守臣捕誅遺惡。慮誣罔。時郤永猶欲沮敗事。綰先疏永罷之。永降級立功贖罪。

師尙詔柘城人初以販鹽作奸結山東鬻馬賊攻剽官府不能制由是黨與漸盛人皆知必爲亂河南巡撫謝存儒苟幸無事假以總保長得督諸鎮民訟由是肆行威虐殺人取財無敢忤者而竊竊懼官府掩捕正罪遂廣納諸不逞謀爲不軌其黨凡數百千人剋日舉兵嘉靖三十二年七月適府中遣二邏卒至所居鎮落追攝他有罪者尙詔黨見之疑來偵己白而執之昇二卒至關侯祠斬首以祭率衆馳薄府城夜及城下府衛官知變倉卒乘城而其黨先布爲中詞者已開門納之矣先是賊令其黨勿犯學宮勿毀辱生儒以故城破知府尹一仁等多避匿學宮得不死簡校董綸出拒戰衆散見殺仍劫獄囚掠帑藏捆載出城去巡按霍冀以聞新任巡撫楊宜發兵討之初尙詔未叛時剽奪傍近富人家已巨萬金買一娼女爲姬至舉兵窺府城委其家不復備念無有犯我者而縣人某素狡譎聞尙詔出卽率俠客數十人掠其家傾所蓄淫其娼姬而去尙詔歸聞故大恚恨詢姬所由姬頗譏某舉以對遂率衆圍柘城索其人縣官不卽予守又無策城遂破搜其人支解之執舉人陳聞詩協爲主曰不從且屠城佯許出境自縊大掠公私庾藏而去復圍太康亦索所索讎一二人署事楊通判懼不能守執其人縋城予之卽城下斬首示威都司尙允詔指揮李璿率兵來援戰於鄆陵敗績賊益猖獗聚且萬人八月辛丑諸軍擊賊於霍山毛葫蘆吳峪二軍犯其鋒賊縱騎圍之後兵無敢進副使曹邦輔挺刃驅之誅其最後者士卒乃競赴敵賊不能支潰走斬四百餘級生擒百餘人遂奔臨潁西華等境敗者稍集比至太康其勢復振九月自永城而東攻掠宿州督漕吳鵬以謁陵駐其中得不潰僣乘虛犯鳳陽取高牆罪宗奉之爲主官軍急追及於

五河縣賊奪舟分其衆爲水陸營以待。允詔督衆四面環擊。須臾水陸營皆破。賊遂四散奔潰。不復能軍。於是指揮袁燦擊之於蒙城。張國彥擊之於商邱。各有斬獲。諸有名賊首多被俘馘。尙詔乃棄車械。變服散其徒而遁。十月庚子。獲之於莘縣。楊宜被賞。謝存儒以養寇貽患。械入京治罪。尋釋之。尹一仁爲民賊。起且四十餘日。凡破府城一州。縣城入屠。燬鄉鎮。殺數十萬餘人。三省爲之震動。至是乃平。

葉槐。安遠縣人。先是南贛自王守仁搜討後。招撫者爲新民。嘉靖三十九年。楊伊志爲巡撫。安遠縣新民葉槐。岑岡李文彪。結黨固壘自如。安遠知縣章彬之僭。從其巢回。死。疑中毒。用奸民王昭等之策。矯軍門檄。集兵攻之。反爲所敗。岑岡之賊。激於指揮李種。輕聽王本之誑。奪文彪妻弟之婦。判歸王本。示摧抑起。釁取之爲利。文彪怒。發兵圍龍南縣。焚掠甚慘。蓋南贛諸巢。惟槐最盛。文彪最久。所部各不下萬餘人。從此益肆。近巢居民。無敢不附。自軍門而下。一切公役。皆有奸宄竄迹。其中大者充千百長。悉爲之用。透漏機密。雖曾會廣兵。討平馮天爵。餘孽益滋。旣二寇相繼激變。諸賊競起。進寇石城。瑞金。南安。建昌。而吉撫諸郡紛紛多事。掠南康贛縣。進及太和。副使汪一中。僉事王應時。督軍禦於鸛朝鎮。而賊先已交通各軍。俱委仗奔走。賊五路掩至。一中及指揮王應鵬。千戶陳策。唐鼎。俱被殺。應時爲賊所執。置之營中。數日。贖還。御史段顯言奏聞。伊志坐革任。陞布政陸穆代。又陞布政胡松撫江西。俱兼理軍務。浙直總督尙書胡宗憲兼節制江西。發兵應援。松議設三營於省城。南豐。萬安。又於守巡兵備常駐之地。各練千餘人。翼之。視賊所犯。策應守禦。而諸縣邑村鎮。則行保甲之法。命曰守望。爲官兵助。奏以都司劉錡爲遊擊。將軍統

之宗憲亦遣參將戚繼光自浙引兵赴援。兵部尙書楊博請申飭督撫諸臣。剋期蕩平。仍令照邊方事例。半月一馳奏。薦御史段顧言生長邊陲。素閑輜略。可就委以兵事。居憂副使譚綸嘗練土兵。足稱智勇。桑梓多故之時。宜令墨衰效用。以靖地方。且閩廣之賊。所倚重者。數巢穴耳。使以勁兵。乘虛搗瑕。攻其必救。賊必牽於內顧。亂乃可平。報允。賊已入玉山縣。攻破永豐崇仁。繼光破賊於上坊。擄斬甚衆。賊奔建甯。還攻宜黃。爲南贛兵所敗。而繼光尋以征倭入閩。大要巨寇三輩。其一秦和。殺汪副使。其一攻新淦清江。其一陷崇仁。而餘聞風迭出於湖之東西者。復不下數十種。其時賊入江西界者甚衆。自秦和外。廣昌宜黃崇仁之寇。由甯化石城入。會瑞零贛興國永豐等縣之寇。由福建武平入。龍泉萬安泰和吉水等處之寇。由崇義縣入。官軍與戰於河塢。大敗之。玉山永豐之寇。推袁三等爲渠帥。臨安東鄉金谿之寇。由長汀轉掠石城而入。皆多殺官民。不下數萬。被擄者頗多。劉顯敗之。零都盧陵等處之寇。亦由福建武平循羊角水堡入。殺守備任鑾及居民。副使陳柯引兵擊走之。南豐等處之寇。分三道入。殺掠。遇官軍敗走。貴谿鉛山弋陽之寇。由火燒嶺入。浙兵擊敗之。於是諸寇略平。獨程鄉巨寇梁甯林朝曦。徐東州等。出沒贛吉間。久之。陸穩檄參將俞大猷。引兵夜襲甯巢。甯懼。先遁東州。走武平。官軍設伏擒之。朝曦復約河源賊首黃積山謀大舉。我兵乘積山無備。攻巢克之。斬積山首。惟朝曦未擒。御史類奏功次加賞。有廣賊張連者。狂恣日甚。連饒平縣之烏石村人。毆死族長懼誅。亡命入窩。賊鄭八蕭晚黨陰刻石曰。飛龍傳國之寶。投諸池。僞泗水得之以出。衆視之大驚。以爲帝王符也。相與歃血推爲長。後鄭八死。連與晚分部其衆。而連

爲最強。知縣林叢槐嘗親至其巢約降。給寇帶。連益橫。與晚兵合縱。掠汀漳延津。及江西之甯都。連城瑞金等處。攻陷雲霄鎮海衛南靖等城。稱號改元。開科造歷。僞部署王侯丞相總兵等官。所居黃屋。朱城二重。諸賊蜂起。推爲盟主。三省騷動。先是守臣以連巢介三饒之間。四面皆山。未敢訟言剿之。連雖叛。猶揚言聽撫以緩我。至是兩廣總督張臬疏至。始議大征。連乘間率衆攻福建平和縣。爲署印知事胡亨與典史談蘊率鄉兵出城迎戰。鼓行甚銳。賊驚潰。蘊疾擊擒五人。斬首三十二級。廣東兵亦擒程鄉賊首王子雲。陳福寶等二十五人。時上深以南寇爲患。聞報大喜。諭兵部曰。勦賊功殊。荷上元感應。效勞人員。通查請賚。以勵衆心。於是自臬。稔而下。賞賚有差。福建都御史游震得檄指揮王豪。帥三衛軍先嘗失利。震得執豪笞之。斬隊長以下四人。三衛軍不服。遂大譁。格殺鄉兵。求殺登瀛不得。屯城南。久之乃散。於是張臬兵十萬分五哨駐於潮。游震得以詔安哨駐於漳。江撫松駐建昌。稔兵可六萬駐於汀。刻期並進。劉顯總兵俞大猷副之。大猷言連每離巢出劫。其妻子財寶乃在巢。若我以大軍迫其巢。彼必悉衆自救。譬之虎方捕鹿。熊據穴搏其子。虎安得不置鹿而還。還則奔命氣竭。因而蹙之。似拉朽矣。且三省會擊。其期已定。豈可以數萬之師。從一夫圍走哉。於是以兵萬五千人疾趨柏嵩嶺。連果奔還。我兵連破數巢。賊且守且歎。稔獨與江西兵逼賊壘而軍。止隔四五里許。望其城柵甚麗。週遭小巢無慮數百。每戰輒勝。會頒賞格。誅止首惡。無論官兵賊黨。能獲連者。予萬金。授指揮使。獲晚者千金。授千戶。餘皆不問。能殺別隊來降者。并賞。咸與惟新。賊黨郭玉鏡投總兵俞大猷。願爲內應。五月十四日。誘連出巢戰。斬獲二百餘。卽陣上生。

擒連并擒蕭晚及斬獲偽封丞相都督蕭樂等首七十餘級。朝曦遁入廣東。從銀場坑間道出攻程鄉。知縣徐甫宰嚴兵待之。遣招安因而說散其黨。朝曦窮急。官軍追擒於陰那山。并弟朝敬等。其流劫江西。福建。陽聽招而陰結賊者。巡撫松合浙兵從建甯擊之。賊由崇安大掠而西。松以千人伏杉關。伺其入。逆擊之。賊敗走靈湖。遇伏北奔。夜脫服釋兵。佯爲賈人裝。奪船欲入鄱湖。出江水兵先已扼險。盡就縛。捷聞。兵部請以賊首送京師。獻俘正罪。餘黨未平者。亟撫勦。并令巡按官詳覈功罪以聞。上諭內閣。免獻俘。餘如擬。穆奏設平遠縣於程鄉之太平營。復於興甯。程鄉。安遠。武平。四縣間。設伸威營。俞大猷行總兵事。敘功陞賞。穆改南兵部侍郎。吳百朋代督軍。前先葉槐已就撫。李文彪與江西龍南縣高沙保賊謝允樟。下麻賊賴清規。相與結黨。搆亂。號三巢。時出沒攻城殺將。前後奏請大勦。至是。文彪已死。其子珍與謝賴二賊。勢益猖獗。衆且數萬。近巢百姓畏威。反運糧給之。根盤深固。僭擬稱王。逞其故智。播弄官府。尋招尋叛。督撫曲加慰諭。終不悛。相近諸縣版圖。業已蠶食過半。應徵錢糧。有司皆不敢問。間議征討。兩省官民。積威所劫。皆爲咋舌。卽老將知兵者。亦以爲積年巨寇。必須合四省夾攻。兵非十萬。銀非百萬。不可。百朋既至。訓習將士。決計討之。先說謝允樟等。質妻子。帖然聽命。李珍等亦畏威。俛喙。不敢妄動。惟賴清規同熱水。賊徐仁標。紋龍賊王鳳陽。胡坑賊胡應川。小石堡賊吳柵。大石堡賊楊明甫。洪堡賊劉喬嵩。信豐賊袁尙信。廣東龍川賊李世柏。饒鉞寨賊宋伯顏等。跨據江廣六縣。恃衆負固。逆命如故。於是議用兵。必先自下。麻始移鎮信壘。部署將士。專委嶺北守巡蔡文佑。同知李多祚等。監督。分搗其巢。破之。又合廣東兵擊山。

賊李亞元等分五哨。命大猷督之。搗巢擒斬一萬四百餘級。俘一千餘人。奪歸八萬餘人。降一千二百餘人。聽撫四千餘人。賊巢一空。惟程鄉盜余大春范繼祖尙未下。既而大春與賊藍松山衆合。流劫漳延興泉諸郡。官軍追散。奔永春與香寮賊蘇阿普等。連兵犯德化。爲都司耿守元等所敗。還趨漳平。聲言聽撫。緩我師。欲漸歸程鄉。百朋知其詐。檄各道罷兵納降。而誘賊黨爲內應。因率官軍四面擊之。賊遂大潰。松山大春皆爲官軍所擒。繼祖勢窮。率其黨束身來歸。蘇阿普逃去。尋爲龍巖人所擒。漳平人欲要以爲功。相競途中。爲其黨乘間奪去。阿普因結巢西溪。以拒官軍。久之勢窮來降。尋復叛。約三關賊葛鼎榮等分寇江閩二省。平遠知縣王化先其未發。寄妻子於會昌縣。身自帥鄉兵擊之。賊乃繼反。問於會昌。言化已戰沒。化妻計氏自刎。化聞大慟。未及發喪。急追破擒之。而田坑賊梁石子。廣平賊邱萬里等。下水賊葛鼎堯等。皆爲官軍所擒。其黨遞入程鄉。與賊溫鑑等合。勢甚盛。出巢窺伺。官兵遮擊之。賊敗趨瑞金。遇嶺北道副使李佑兵。三戰皆敗。鑑等窮迫。乃歸程鄉故巢。廣東僉事徐甫宰乘其營壘未定。急擊擒之。餘皆遞入廣東。廣有卓文昌。何子愛。李富三。賊衆約二千餘人。占峒凡二十九所。又有大小羅山賊數百。突攻曲江。其勢不見衰滅。而張臬被劾罷。代以吳桂芳。又以兩省地遠。不便兼轄。罷總督。止以提督撫廣東。三十四年。廣東巡撫鮑象賢有勳徐紘之功。兩廣總督侍郎譚愷有勳陳以明之功。三十六年。廣東提督侍郎王鈞有勳馮天恩之功。三十八年。總督侍郎王崇有勳金龍老大之功。遞起遞撲。小者不勝書。大者韋銀豹。黃中。吳平。曾一本。先後並梗。而賊伍端雖撫。恃有功。入城耀甲馳馬。揚揚自稱總兵。一出郊關。且行且

掠良民捍禦反坐激變之罪其黨葉丹樓王西橋賴時清互相煽結各占密峒皆類征討久之漸平
哮拜達黃毛種也拜得罪其酋長父兄皆見殺拜伏水草中得免投降守備鄭印隸麾下驍勇多武藝常
擊達大青山斬其酋九人拜與土谷赤阿木高鄭鳴虎卜亥五人稱五虎將再搆達花馬池有功麻都指
揮使萬曆五年爲遊擊將軍請專敕總督侍郎石茂華巡撫都御史羅鳳翔以請於是擅一軍尋擢參將
妻施氏孕將產拜夢空中大響天裂出火焰一妖物如虎入施脇下不見拜急手劍之覺產子虎貌鼻啼
名曰承恩妾又生子曰承寵又有義子哮塞哮雲哮洪大皆勇悍難制自馬市開首酋功益少邊餉漸損
上以此輩爲虛糜恨不卽革去拜等袂望會土谷赤死其子文秀襲職陞指揮共要結酋通貢市套酋切
近黃台吉者力免打正各台吉并松鹵賓免台吉等入市夷凡二十八枝鄭鳴方爲撫夷遊擊病死十四
年丙戌巡撫都御史梁問孟以文秀曉邊事咨陞守備協撫時拜推擇當入銜例以降夷不得與甚請
告加副總兵致仕承恩襲所部既多且善戰見邊兵孱弱心輕之後二年黨馨爲巡撫都御史先爲西安
知府以猛鷲驟至顯位既視事益嚴刻衆心不附其秋火落亦入青海經略尙書鄭洛檄調甯夏兵馨遣
文秀率千騎西援拜驚曰文秀雖經戰陣豈堪獨將乃見洛願以所部三千人與子承恩從征洛壯而許
之馨惡其自薦齎發甚簡馬羸當易者亦不許拜不敢爭而心恨至金城戰有功取徑鹵地馳歸鹵辟易
不敢逼益驕恣所部多冒糧其把總王徹等撫拜諸不法上狀洛以降夷實不問馨獨究冒糧事拜以賂
求免藏金於瓜種中以進馨大怒窮治之執拜近侍數人治如律拜自念效力西陲五十年受寵秩乃以

哀遲見侮辱。不勝怨望。承思念父不平。又強娶民女爲妾。馨箠之二十。益憤。文秀避遊擊入謝。無加禮。竝怨之。故事。市馬給士伍。倒亡者當追朋合朋頭肉贖銀。馨皆嚴併未完者。卽於月糧扣之。丁卒咸怨。未敢發。壬辰正月。冬衣布花草價銀久不給。而馨查冒糧事愈急。拜等益懼。始與承恩謀。欲挾衆復歸虜。承恩見文秀告以意。文秀阻之。不果。劉東陽者。靖□衛兵。素梟桀。夸誕。每以馨凌削。欲爲亂。至是遂勸承恩糾黨八十人。封羊敵血盟。期二十八日。鎮巡官宴演武臺發難。反形大露。菴市洵洵。遊擊江廷輔上變。請發前銀安衆心。馨曰。此有挾而求。漸不可長。鹵不畏族乎。二月十五日。衆復催前銀及月糧。不許。承恩復糾東陽黨申盟。亂遂決。十八日己酉。衆議聚入帥府白事。總兵張維忠素懦。知狀。驚悸不敢出。遂分執副使石繼芳及馨。繼芳與馨故姻家。多阿意。並殺之。益合許朝何應時等。盡焚公署。收印符。釋囚。略城中。劫維忠以扣餉激變奏。時河東僉事隋府以他事至。通政程來輔奉使歸。併劫請招安。東陽下令禁搶掠。殺犯令者二人。二十日。總督尙書魏學會聞變。遣張雲等諭降。二十五日。索維忠敕印。與之自縊。東陽遂於翌日。自稱總兵。刑馬牛盟。僞授承恩許朝左右副總兵。文秀哮雲左右參將。其黨爲官校者數十人。因挾慶王代請赦。勒兵據城堡。聲言挾大寇取長安。擄潼關。會張雲等至。東陽曰。必欲我降。依我所自署授官。世守甯夏。不者馳而南下。誰能禦我。時河西諸堡皆陷。諸將非降卽走。惟平虜參將蕭如薰堅守不下。逆黨王虎等隨略鳴沙洲。將趨河東。全陝震動。前是學會撤副總兵李响。攝總兵進勦。乃於三月四日。統遊擊吳顯起靈州。別遣遊擊趙武趨鳴沙洲。張奇兵沿河扼賊南渡。學會駐下馬關徵調。以副使楊汝甯監軍。

攝兩河道務參政顧其志督餉時靈州有土官都司吳世顯黨逆約爲內應惟參將來保誓死守賊齎書詐門拒卻之响聞兼程馳至謀不得行賊始遁去翌日進兵橫城而趙武兵亦至鳴沙洲轉戰獲賊于正等八人舟十八艘賊遣人奉金帛句著宰等會拒我師當是時榆林誠明安台吉□切齒套酋十失免傳調東西台吉著力免莊禿賴等議暫封賊爲訥悶那顏不令出邊稍俟五六月馬肥大舉來援獨切近妣吉止弗往著力免唱賊金帛與打正先引衆盜邊時延綏蘭靖兵稍集响乃分發渡河復各營堡二十日鹵千餘騎圍邵剛堡千總汪汝漢三矢殪三鹵乃解凡先後收復營堡四十七後三日總督學曾移師小鹽池拜聞鹵著力免打正等控弦三千入屯鎮城之演武場賊括城中子女媚鹵至奉河東西地圖鹵聲言已與哮王子爲一家拜文秀並辮髮胡服糾鹵攻玉泉趙武等悉力禦之响至圍解二十九日哮雲引著力免攻平鹵堡參將蕭如勳伏兵南關佯敗誘鹵入伏射雲死方蕭抗賊時奉御座中門諭諸將士以君臣大義諸將士咸涕泣願效死妻總督尙書楊兆之女謂蕭若能爲忠臣妾何難爲忠臣婦盡脫簪珥出嬰士士益感奮鹵遁走因掠糧道聲犯花馬池諸處四月二日總督學曾移師花馬池因撫諭切近妣吉無助逆响等六路進兵抵鎮城時兵部尙書石星請獎死事梁琦馬承光誅棄城熊國臣以激忠義并發問金二十萬兩輜士設招降一營解脇從起麻貴自譎戍代皆從之又命朱正色巡撫贊軍响等既抵鎮城時延綏兵爲前鋒賊出梟騎博戰步卒列火車爲營五日大戰多斬獲奪火車百輛追奔入湖溺死賊無算延綏副總兵王通督其家丁乘勝先登殺入北門繼援不至通重傷還翌日賊脇慶王至南門城

樓乞暫罷兵。願縛獻首惡。謾語支吾。願投詔救城下。示無所畏。拜妻施時。時諫不聽。又覆瓿而立。謂拜曰。此何來。悻德不祥。奈何自取奇禍。承恩等推跌去之。益出抗戰。衆以糧不繼。因賊求撫。請暫假此休士。學曾許之。於是諸軍皆退。上初聞軍勝。賞學曾麒麟服。銀五十兩。餘賞有差。比退。詰責學曾。乃促飛輓調兵。運神器進兵。而著力免先於初四日。擁衆從定邊擾我。以揀東渡本兵。疏請密遣通事往諭松鹵。毋貪賊賄。自失常年市賞之利。又請懸賞格。擒噶氏父子。封伯。予萬金。餘五千金。都指揮賊黨得相擒斬除罪。給軍門空劄百。會順義正方擒史。曾求款。請諭令約松套鹵出邊。厚加給賞。上竝報可。令軍中五日一奏聞。發問金五萬兩佐資金。御史梅國禎疏薦前遼東總兵李成梁子如松等。負大將之才。家丁既多。先聲尤重。用之赴戰。必有成功。或言李素有異志。不可遣。梅復疏辯。請與李俱馳甯夏。身戎服督戰。功成即日還朝。倘中途事平。聞報即返。若其不效。則有軍法在。於是命如松總兵。國禎監軍紀功。給符驗。抽宣大山西精兵五千人往甘肅。都御史葉夢熊上書願討賊。詔嘉夢熊慷慨。令同督撫併力滅賊。是時學曾逼花馬池。俟軍至移靈州。而石星恐賊據下馬關。窺固原。疏請陝西撫臣沈思孝移下馬關爲聲援。因移保定。山西河南各撫臣備潼關。從之。會曾妻使使來。願要說著打二曾。令無從逆。敗市賞。失中國意。而蕭如薰先擒獲五酋長。中有爲著曾所亟者。願以金易。蕭故持之以要鹵。兩頗悔恨。與賊稍中離。賊日恣淫虐。城中婦女寶貨。已經搜括。尙恨索不已。死者甚衆。有闔門無噍類者。禁偶語。犯者輒死。至迫脇慶府甚急。妃方氏死土窖中。賊取其金帛及他宮人去。學曾凡用兵兩月無成功。憂之。或謂噶父子皆高爵。反推劉許意。

視緩急取二人首乞恩朝廷爲脫罪計。否則逃鹵還其故。若招劉許陰授意。哮土無不應者。學曾然其謀。遣葉得新往見朝東陽。俱授參將。餘陞三級。因密諭拜文秀殺二人立功贖罪。時四人方約共死生。不可間。暴其謀。執得新折脛下獄。學曾聞失計。復檄賊開門放農牧。不應。時平鹵被圍已久。巡撫朱正色發援兵。道爲鹵梗不得達。密簡元甲數千。夜循賀蘭山。獠附而度。抵平鹵。蕭如薰得援。出奇兵直擣鹵巢。斬獲頗衆。鹵咋指恨。要哮拜同攻平鹵。雪恥。賊緣是復與鹵合。未幾。延綏甘州兵及麻貴俱至。乃以二十一日。進兵抵城下。塹濠夾攻。賊迎戰多殺傷。賊句鹵擾橫城。焚芻茭。浮河掠秦壩。而以延綏榆林兵調空虛。益賄酋黃台吉妻。縱男捨達大等。掠舊安邊甌井。以圖牽制。二十七日。麻貴等結四營。從西北東北夾攻。賊以步兵執挾牌遮護。騎兵乘之馳突。從未至中。頗有斬獲。學曾從花馬池將趨靈州。亦被圍。賴援至得解。二十九夜。麻貴等乘大風。縱火復攻城。傷者千數。賊亦出兵截餉道。時巡撫朱正色等。與學曾咸集。決策謂城西面可擊。多採柳稍蒲草及土。修墊馬道。賊覺來戰。牛秉忠中流矢幾死。承恩因率鹵從唐渠攻總兵董一奎營。芻不戒火。一奎遣還。拜率鹵攻平口堡。急麻貴往援。卻之。十九日。朱正色渡河督戰。以上命。願將士賞賊詭請降。先後送劉川等十餘人。邀張傑入城。盟聽撫。傑故與拜共事。青海相善。乃議遣往。賊鼓吹道傑入。約後三日開門迎朱巡撫。傑至。諭曰。事起迫脇。奈何縱殺掠。拒官軍。朝謝曰。無可奈何。且屢乞招不得。當盡殺王官吏北走。可逃死耳。傑曰。督府累次招安。何云不得。朝乃述得新用間謀殺害。傑未信。卽昇至使吐實。得新大罵曰。死狗奴。計不得行。命也。天且夕磔汝。何喋喋爲朝怒。攢刀殺之。傑亦被繫。

二十八日。學會遣人撫鹵於橫城。朝恐黨與日落。好謂著力免曰。幸爲我主招撫。後往受賞。未晚也。時鹵兵已久。賊陽請撫。陰句鹵抗命。平賊無期。衆皆患之。本兵疏請宣諭鹵王。能縛獻呼拜父子。賞二萬金。封龍虎將軍。縛獻劉東鳴。許朝。土文秀。賞萬金。封都指揮使。發帑金十萬兩。聽宣大督臣蕭大亨。驛購御史蔣春芳。亦疏請厚市。賞糜鹵。決黃河大壩。水灌城。城可立破。上乃賜總督劍。申令遠者斬。以徇。六月六日。夢熊至靈州。帶火器四百車。至更約法。益徵苗兵。浙江巡撫常居正。以參將楊文率兵五千來濟。詔嘉居正忠義。於是分五軍逼城下。拜等自北門出。盪欲親往。句鹵麻貴先登。卻敵。遂拜入城。擒斬頗多。拜既與鹵相結。日夜從著會帳中便調。至是入城。不敢復出。鹵不得拜。亦不敢復渡河深入。時梅國禎。李如松。兵皆至。二十五日。都司李如松。李如樟。夜半以雲梯暗上南城。爲礮箭擊。卻是夜。指擯趙承光。葛臣。戚卿。百戶姚欽。武生張遐齡。請內應。約夜半舉火爲號。城下兵趨上。而樵樓火過蚤。南火未起。城中鼓噪大呼。殺賊。欽使遐齡縋城。召城下兵。不至。承光被執。欽急跳下城得免。臣等皆死。城中益攜。許朝因欲開小南門。逸見門外兵整嚴。復返。自後惟嬰城守。多以矢石狙擊。歸黨石家口。詭招安。望鹵救。然日久乏食。消耗甚矣。七月三日。定議水攻。甯夏城西北卑下。且與金波三塔諸湖水相近。東南逼觀音湖。新渠紅花渠形如底。遂透城築隄。十七日隄成。長千七百丈。決水以灌。先是拜使養子克力蓋往招著力免。如松調知狀。使裨將李甯追及斬首。獲印符令箭。而賊別使。竟與著會。奉黃金蟒繡。致十失免。曰。事急幸佐我。徇靈州。先逼下馬關。阻饑道。鹵故貧。惟利賄。無意決戰。時時應和。隨卽去。招之復來。至是鹵莊禿賴與十失免合。

部落三萬。先使土味糾鐵雷等。犯定邊小鹽池。而打正以萬騎從花馬池西沙渰入。學會分遣擊鹵。鹵解散。賊援絕。乃益決大壩水。八月朔。城外水深八九尺。是夜賊挖隄洩水。如松斬首十六級。生得一人。爲言城中乏穀。士盡食馬。民食樹皮敗靴。死相屬。翌日城東西崩百餘丈。都司吳世顯治隄。崩二十丈。水頓減。學會斬以徇。補隄。賊數出兵。多被斬獲。城中饑民擁賊求招安。會上念師老無功。給事中許子偉等。劾學會惑於招撫。緹騎往逮。以夢熊代。賜劍如之。十七日。夢熊任事。中令益肅。諜知賊重賄句鹵。且馮城鳴礮。俟鹵衝突。嚴兵待之。二十一日。著會果分部渡河。如松往遇鹵搏戰。自卯至巳。會麻貴。李如樟等兵皆會。張左右翼夾攻。鹵遂卻。追奔至賀蘭山。盡走出塞。斬獲甚衆。乃移鹵級示賊。賊始震懼。九月三日。浙兵及苗兵。莊浪兵皆至。隄亦補完。大治臨衝船筏。刻日攻城。懸賞有能先登以城下者。萬金。後五日。水浸北關。城崩。南關驛卒夏之時等。爲賊所逼。符出米給軍。遠則立刻梟首。因聚謀曰。顆粒難得。死賊何如殺賊。且主將暫往北關。圖之易耳。遂殺守關賊五十餘人。報行營。如松遣姚欽覘之。信猶恐賊來。并力。陽調舟筏。擊北關。承恩等盡趨北。應戰。而我潛以銳卒往南關。雲梯攀緣而上。賊皆驚散。擒斬無算。夢熊馳入。勞百姓。承恩見南關已下。大恐。急繩張傑。下城懇貸死。夢熊陽諾。益治攻。且逼大城。數日不破。國禎謂如松曰。賊今勢窮。悉力憑堅。攻之死傷必多。若乘機行間。庶力省事易集。且可保一城生靈。如松曰。善。而內外久不通。莫肯往者。有販油李登。跋而眇。應募。執原給劄許。啞氏殺劉許。自贖。十三日。縛木渡至東門。先見承恩諭意。卽趨而出。賊心動。十六日圍愈迫。東鳴歎曰。遂至是耶。先士文秀有疾。東鳴等三分其衆。至是少

瘞。強起聚飲殺之。曰：好頭顱，毋爲他人所砍。拜父子聞之，愈疑懼。百戶石棟、王英、冠帶官周國柱三人素與哮交，然度其必敗，間以賊中動息輸官。承恩勢既蹙，來詢石棟。棟曰：周國柱見事審而決，彼雖事東陽，然與朝有怨，盡呼謀之。既至，語之故，曰：始勸爾勿爲此，不肯從。今將奈何？不得已有計，但可全爾一家，不得顧人也。承恩曰：幸甚。遂定計殺許朝父子。國柱走北樓，殺東陽，皆懸首城上，釋諸被囚者出迎。於是如松、楊文等先登，如薰、麻貴、承嗣等繼之。拜承恩青衣蒲伏道左。大城悉定，方北樓火起。李如樟馳往，搜獲甯夏巡撫關防，并征西將軍印各一，而哮氏尙擁家丁自衛。是夕，總督下令，旦日不滅哮氏，以賜劍從事。十七日晨，承恩方馳南門，謁梅御史，許以不死。出楊文奉總督令報之。如松等急提兵圍拜家，拜方與牛秉忠飲，聞承恩已擒，秉忠趨出，拜衆猶欲拒敵。如松給箭令卸甲，拜倉皇縊。闔室自焚。如樟步卒李世恩從火中斬拜首，生得承寵、哮洪、大文、秀弟文德等。總督夢熊巡撫正色、御史國禎隨入城，問慰宗室士庶。甯夏平捷奏，前總督學曾免逮爲民，未幾以原官致仕。檻致承恩等獻俘，磔承恩，斬承寵等，頒示天下。及四夷君長，母施以勸，子不聽，反，得免死。慰慶藩復甯夏今年租，王妃方氏特詔褒異，發五千金賑宗室。葉夢熊、朱正色、梅國禎、李如松皆陞。餘陞賞贈賚有差。穆來輔、隋府陷賊，依遠緹騎，逮問戍邊，久之，鹵著力免宰僧，亦縛送叛人馬世傑、張放、霸等請市，宰僧卽打正也。

明書卷一百六十四

列傳二十

亂賊傳四

楊應龍播州土官。其先傳已八百年。州名始於唐。以處遷客。所謂非人所居者是也。楊之始祖曰端。先太原人。仕會稽爲望族。徙京兆家焉。唐末南詔叛。陷播州。僖宗乾符三年。詔募兵往討。端得異夢。應募至瀘州合江。直入白錦軍高逸山立誓。結土豪與蔣黃三族爲久駐計。伺蠻入寇。出奇兵擊破之。授武略將軍。遂有其地。唐祚移後。梁端憂憤。疽發背死。子牧南嗣。四傳爲昭。二弟各擁兵。其一據白錦東遵義軍。一據南近邑揚州。討走之入滇。無子。會莫州防禦使楊延朗子貴遷。持符至廣西。與昭通譜。卽留爲嗣。蓋宋贈太史中書令業之裔孫。自是有播州者。皆貴遷之後也。十四傳至鑑。則明太祖方平湖湘。諸谿洞酋長皆歸附。洪武五年。鑑入朝貢方物。納元所授金牌及銀印。賜綺幣衣物。設播州宣慰使司。以鑑爲宣慰使。播州廣袤千里。古夜郎且蘭地。漢始受羈縻。屬牂牁郡。唐貞觀初。分牂牁北界置郎州。領六縣。已改爲播州。介川湖貴竹間。西北鰲山爲關。東南俯江爲池。蒙茸巖削。世受封爵。外統八司爲藩衛。內倚七姓爲羽翼。居然奧區。八司者。黃平草塘二安撫司。眞播白泥餘慶重安容山六長官司。雖楊氏所轄。而賦稅皆納貴

州設通判駐黃平主之。七姓者田張袁盧譚羅吳世爲目把大事。謫決焉。永樂七年楊昇奉所轄當科篤雍等十一寨蠻人梗化不服。聚衆劫掠。請發兵勦之。上敕昇撫輯。遂皆歸化。宣德時楊欽正統時楊燭楊綱景泰天順時楊輝成化時楊愛宏治時楊賦普安香爐山之捷。賜蟒衣玉帶。嘉靖時楊相子楊烈嗣。應龍烈之子也。生而雄猜。阻兵嗜殺。隆慶六年襲職。從征喇麻諸番。先登多斬獲。又征九絲膩。乃楊柳溝卻敵。氣蓋軍中。先後賜金幣萬麻十三年。賜大紅飛魚服。加職級。應龍窺蜀兵弱。每征討。止調土司。而蜀將或從借級。漸驕。蹇輕漢法。於是往洪江。洪江先墳墓所處也。修起祠堂。置守塚戶。而所居僭飾龍鳳。擅用閹侍。雙小妻。田鷓鳳疑嫡妻。張奸別嫁。已飲田氏兄所乘醉封刃。取張并母首。屠其家。蓋萬麻十五年也。既酷殺樹威。人人惶恐。初惑七姓。虐所屬黃平等五司。久而覺其欺。稍奪之權。七姓怨反。詰應龍疑衆不附。益結關外生苗爲翼。肆劫掠。至十七年。黃平安撫羅承恩草塘安撫宋世臣等。及張氏叔時照。飛文告龍反。黔撫葉夢熊請大征。而蜀三面鄰播。士大夫率謂播僻處西南隅。屬夷以千百數。皆其彈壓。兵驍勇。世恭順。數赴川貴軍門調。有微勳。翦除未爲長策。以故蜀撫按艾穆等。並主撫。與黔異議。有旨兩省會勦。應龍願赴蜀不赴黔。乃就彭水縣適中處聽勦。二十年。蜀以應龍難制。逮詣重慶對簿。法當斬。請以二萬金贖。御史張鶴鳴方駁問。會倭大入朝鮮。羽檄徵天下兵。應龍因懇辯。願自將五千兵報效。詔可。釋回播治行。尋報罷。蜀撫王繼光至。嚴提勘。結往者皆被殺。詰之。則曰關外苗爲之。我不知也。方勘時。委官多所需索。得重賄。既淹繫。獄吏得挫辱之。索厚贖。不可堪。應龍又自謂前後屢立功。七姓實隸我。例得生殺。亦

何至助若屬急持。與我爲難也。以是一脫縲。輒颺去。不復反顧。繼光力請與黔撫林喬會勦。上戒以勿貪功。妄殺。二十二年正月。繼光至重慶。與總兵劉承嗣議分三軍。都司王之翰一軍。軍川南。由黃平涪潭入。副總兵曹希彬一軍。軍川北。由永甯緝麻入。參將郭成一軍。軍川東。由安穩松坎入。三道並進。前指婁山等關。屯白石口。應龍佯約降。因統苗兵據關衝殺之。翰軍覆。殺傷大半。承嗣頗有斬獲。會繼光以他事勅罷。卽撤兵。委乘輻重略。盡黔兵亦退。御史薛繼茂乃旋主撫。應龍因上書自白。上謂本酋朝廷原無意必誅。大兵一至。應自縛軍門請死。今御史報與本酋奏辯。何順逆懸殊也。嚴查之。而蜀新撫臣譚希思至。與承嗣同黔撫鎮合勦。頃承嗣以疾歸。兩省議未決。詔遣兵部侍郎邢玠總督。以車駕郎張國璽主事劉一相贊畫。時上下皆主勦。二十三年乙未正月。蜀御史王慎德上書謂贊畫可罷。報已有旨。旣邢玠至。察永甯西陽暨馬千斛皆與龍通姻媾。而黃平白泥諸司久爲仇讎。計先翦其枝黨。然後以檄曉譬。應龍可以坐致。大略稱引哮劉王。某事宣國威。龍來當待以不死。不者國家懸萬金購而頭。立致麾下。若早爲計。吾不而欺也。當是時。七姓唯恐龍出得除罪。而四方亡命。閹匿其間。又幸龍反。因以爲利。院道文移。輒從中阻。玠復使詣龍所問狀。檄撤葑江烏江兵。諭奏民勿擾。龍漸有悔心矣。會水西宣慰安瓏臣請父國亨卹典。兵部尙書石星手札示瓏臣。趨應龍就吏得贖罪。御史吳禮嘉以水西與龍世好。心疑之。瓏臣益自厲。奉札至播。招應龍。低回久之。乃上書言。奏民伏兵伺殺。往有明鑑。誠恐中計不敢出。有如辱一介。臨播而問。甘心軍法無恨。玠許之。成都知府王士琦有膽略。調重慶。奉檄詣葑江。趨應龍安穩聽勸。士琦屬葑江。

令同遊擊吳文傑前往宣諭。應龍乃令兆龍等至安穩。治郵傳。儲神郊迎。叩頭致饋。資餼甚盛。曰。應龍久縛渠魁。待罪松坎。所不敢至安穩。以安穩故多奏民也。使君幸枉車騎。臨貺松坎。敬布腹心。綦江令具言。士琦。士琦曰。松坎亦曩奏勘地也。卽以五月八日。軍騎往松坎。應龍果面縛道旁。泣請死罪。膝行而前。叩頭請得比安國。亨國。曩亦被訐。懼罪不出界。今安穩乃綦江所部。地廣大。請治公館。執罪人及罰金。獻庭中。士琦爲請。玠許之。於是委兩贊畫及道府。並詣安穩。應龍囚服遠迎。滿伏縛獻。黃元。阿羔。阿苗等十二人案驗。抵應龍斬。以夷法得論贖。輸四萬金。助探木補舊欠糧稅。不許侵擾地方。非刑害人。仍革職。子朝棟以土舍受事。次子可棟。羈府追贖。黃元等梟斬重慶市。玠以聞。是時倭氛未靖。大司馬欲緩應龍專事東方。上亦念應龍向積勞。可其奏。論功。賜總督邢玠以下金。加玠右都御史。歸朝。士琦陞兵備使。彈治之。應龍再及寬政。乃益怙終不悛。日求其子出獄不得。愈忿。五司七姓。奴輩窘我。若非盡殺。恨終不滅。且自恃兵強。官兵終無奈我何。而可棟尋死重慶。則益心痛。促取屍棺。以勘報未完。不肯發。趣其完贖。大言曰。吾子活。銀卽至矣。擁兵驅千餘。招魂而去。分夷目置關據險。僭立巡警。江內七牌。江外四牌。搜戮奏民。劫掠屯堡無虛日。厚撫諸苗。用以摧鋒。名梗手。州人稍殷厚者。因事誅之。沒其家。以養苗。皆顯出死力。是時有黃七爲應龍謀。士進言曰。某何能爲。惟孫時泰。智囊也。今在長安。得爲軍師。方可以成功。乃使陰聘之。旣至。謂欲圖大事。必先取重慶。次及成都。以蜀王爲質。割一隅而守之。徐觀天下形勢。應龍曰。不守近穴而取遠地。誰謂汝知晉者。謝遣之。丙申秋。劈餘慶土吏毛乘雲棺。磔其屍。已又掠石阡大都壩。焚劫。

餘慶草塘二司。徧及興隆。偏鎮都旬各衛。已又遣兆龍引兵圍黃平。戮重安司長官張熹家。明年丁酉春三月。流劫江津南川。七月。臨合江。索其讎袁子升。縋城下。樹割之。十一月。石砭宣撫司士舍馬千驪入播。先是千驪母覃與應龍私。覃寵千驪。謀奪長子千乘爵。於是聘應龍次女爲繫。援因緣朋奸。詭謀益甚。明年戊戌。王士琦調征倭。應龍益統苗兵。大掠貴州洪頭高坪新村諸屯。已又侵湖廣四十八屯。阻塞驛站。調原秦讎民宋世臣父鑾及羅承恩等。挈家匿偏橋衛城。提兵迹且至。襲執指揮陳天寵等。大索城中。得鑾承恩及子女。慘戮以殉。令諸苗對父奸女。而夫淫妻。或裸體坐木叢射笑樂。或燒蛇從陰入腹。人蛇俱斃。又掘墳墓焚屍。黔撫江東之疏請防禦。而蜀撫譚希思請於合江綦江各置遊擊一員。募兵千二百名。扼閬門安穩。部覆如議。而經厯潘汝資好談兵。黔東之其意明年己亥二月。令同都司楊國柱等。部兵三千往勦。應龍遣朝棟等迎敵於飛棟堡。我師奪獲三百落。賊佯走天邦圍。誘罷我師。全軍覆沒。楊國柱罵賊不屈。與汝資等俱死。於是東之坐罷。以郭子章代。而蜀巡撫改總督。特起前都御史李化龍兼兵部侍郎。節制川湖貴三省兵事。是時東征業已完局。因移劉綎督兵還蜀。議大征。化龍五月終。馳至蜀。卽益調募浙閩滇粵將士。先檄總兵萬整移重慶。并調集鎮雄永甯各漢土兵設防。六月初。應龍乘我師未集。大勒兵犯綦江。分兵一犯南川。一犯江津。守沙溪。防永甯。宣撫與貴州。二十一日。應龍陷綦江。縱囚取庫金。索縣印貲財子女一空。老弱者殺之。投屍蔽江。下水爲赤。退屯三溪。以綦江之三溪。南川之東鄉壩。立石爲播界。號宣慰官莊。聲言江津合江皆播故土。統兵清理。化龍乃日夜調征漢土各兵。分戍南川合

江瀘勢漸張。賊亦遷延不進。益結九股苗。及紅黑脚等苗。負險弄兵。然猶時冀我如往局曲救。未敢鼓行深入。止言爭界給葬。并索奸奴。而化龍因援師未集。蜀人懦怯。成都兵甫出門。卽欲投錦江。不肯東。無可奈何。時移文詰責。示無違絕意。計以緩賊。賊果具文求撫。不復西向。化龍亦謬作好語。糜之以破葦江上。聞追褫譚希思江東之爲民。於是賜劍懸賞。嚴旨進勦。而化龍亦調南北兵。及武岡麻陽兵。移粵西總兵陳璘。改湖廣駐偏橋。貴州總兵董元鎮駐平越。候大舉。已將軍劉綎以十月至。綎素有威名。其家丁良馬。皆可決勝。方以赴師渝期。充爲事官。又素與應龍昵。人皆疑之。於是化龍延入臥內。輸心腹。且以危言激之。引其父九絲功爲比。綎大慟。願誓死報效。化龍乃騰書於朝。謂蜀人皆言可用。今細察本末。非綎無以制賊。策勵使之。必有成功。方事亟。朝議無敢異同。遂委綎專制。而化龍治軍益有次第。賊窺上無意肆赦。廣結生苗。大治扼塞。以黔兵弱。時偵黃平。平越間。化龍乃檄水西兵三萬守黔省。斷招苗路。十一月。應龍屯官壩。聲窺蜀。已遂焚東坡爛橋。楚黔路梗。又出掠偏橋興隆鎮。遠諸衝。接取九股生苗。平越新添王平龍泉所在告急。化龍以偏隆間東坡爛橋重安。實楚黔漢要害。一爲賊據。則楚不得入黔。漢不得出楚。無黔且無滇。請每處置勁兵萬餘。通道因疏。參黔帥董元鎮。擁兵銅仁不前。上怒逗遛。革職立功。以李應祥代。而故總兵沈尙文且提騎逮治。上以楚地遼闊。撫臣遠不相及。偏橋旣設總兵。仍以文臣特開府視師。廷推江鐸往。化龍頗賞格。爲論苗雜言廣招慰。明年庚子正月。應龍勒兵數萬。五道並出攻龍泉。龍泉係思南石阡咽喉。一失則婺州孤懸。賊方移兵進攻。聞蜀金竹官壩警。檄回兵。金竹官壩。南川信地也。正月

二日石砮宜撫馬千乘軍鄧坎賊乘懈於三更時衝劫我軍堅壁至黎明奮擊連破金竹青岡芻龍跳關七寨十四日酉陽宜撫冉御龍進攻官壩斬關直上復擒斬三百有奇賊棄龍泉遁蓋二捷有以牽之矣自冬至二月所調延寧四鎮河南山東天津滇浙粵西兵皆集土司如酉陽石砮永寧天全鎮維平茶邑梅水西久在防守烏蒙施州散毛容美永順保靖烏羅獨山等先後報至化龍分八路蜀分四路一綦江總兵劉綎將參遊麻鎮等隸之督以參政張文燿一南川總兵馬孔英將參遊周國柱宜撫冉御龍等隸之督以僉事徐仲佳一合江總兵吳廣將遊擊余世威等隸之督以參議劉一相一永寧副將曹希彬將受吳廣節制參將吳文傑宜撫奢世續等隸之督以參議史旌賢而中軍率標下遊兵策應川東總監以參政張棟川南總監以參政謝詔楚黔亦分四路總兵童元鎮統七知府瀧澄知州岑紹勳等由烏江參將朱鶴齡受元鎮節制統宣慰安彊臣等由沙溪總兵李應祥統宣慰彭元瑞等由興隆而偏橋分兩翼總兵陳璘統宣慰彭養正等由白泥副總兵陳良玘受璘節制統宜撫覃宜等由龍泉以偏橋江外爲四旂江內爲七旂五司遺種及九股惡苗盤據故也督餉紀功烏江則參議梅國樓沙溪則副使洪澄源總監以按察使楊寅秋興隆則副使尤錫類監以參議張存意而白泥督餉以參議詹啓東紀功以副使王應霖龍泉督餉以副使陳興相紀功以副使路雲龍監以按察使胡桂芳參議魏義蒙其黔楚巡撫郭子章駐貴陽支可大移沅州部署已定總督大集文武盟神作軍誓登壇慷慨期二月十二日分道並發每路兵約三萬人官兵三之士司七之苗見驚曰今番真天兵與昔不同化龍諭諸將以抵婁山等關爲期

移鎮重慶節制。且曰關外且戰。且招降多。不可勝誅也。關內疾戰。勿受降。師不可久。老賊詐。決不可信也。先是蜀玉壘山忽裂。僉謂昔年平九絲地數動。殆播平前兆云。未幾碁江捷至。碁江自東溪入潘。並峻嶺茂箐。楠木山羊間臺等峒。奇險爲賊目穆照等盤據。勢最重。劉綎獨當之。十五日進兵。連戰破三峒。三月朔。楊朝棟等統苗數萬。分三路來戰。鋒銳甚。我師夾攻。綎身自陷陣。苗大驚曰。劉大刀至矣。奔潰。朝棟墮馬。幾爲我獲。始碁江諸苗。分往屠城。罪不赦。又賊忌綎威名。冀首挫其鋒。屬親子悉勁兵。問道相角。曰。爾破碁江。馳南川。盡焚積聚。渠無能爲也。及朝棟敗。賊膽破。益爲守禦計。而諸路捷音相繼。南川則酋石二司先登。初八日。剋桑木關。烏江則壩陽永順兵先登。十一日。剋烏江關。翌日。剋河渡關。陳璘及副將陳寅擊四牌。賊各披靡。奪天都三百落。諸圍賊連敗。乃乘隙出奇兵。前突烏江。詐水西瀧澄會哨。益誘永順兵斷橋。淹死我師無算。上怒童元鎮失律。逮至京。或飛語水西賊者。化龍檄詰。水西不自安。會賊殺其頭目。澄大恨。二十六日。賊託田氏脩好。賄澄。澄斬其使。治兵相攻。安疆臣亦執賊二十餘人。明不肯漢。自是二氏交絕。劉綎戰九盤。以二十九日入婁山關。是爲賊前門。萬峯插天。中通一線。我師從間道。攀藤魚貫。毀柵入。四月朔。屯白石。應龍身率各苗決死戰。陰令楊珠等抄後山奪關。四面合圍。都司王芬中流矢死。劉綎親勒騎衝堅。遊擊周敦守備周以德。分兩翼追奔至養馬城。與南川永寧路協攻。連破龍爪海雲險。圍且壓海龍岡。而壘海龍圍賊所依天險。飛鳥鷹猿不能踰者也。時偏沅巡撫江鐸已抵任。陳璘急攻。以十三日破青蛇圍。安疆臣亦以十六日奪落濛關。至大水田。焚桃溪莊。賊勢急。父子相哭。上聞死守。每路

遞降文誘我師。化龍檄賊詭降。卽斬使焚書。無爲所給。虞綖與應龍奮檄無通賊。綖械其人軍門自明。而吳廣以朔三日入崖門關。營水牛塘。與賊力戰三日卻之。檄利欲受降。弛攻。賊詭令婦人於圍上拜表痛哭。云田氏且降。復詐爲應龍仰藥死報廣。廣輕信。按兵不動。已覘知田氏詐降。緩攻。而所云應龍死。乃川兵攻圍。以火破擊死。所謂楊珠也。珠勇善戰。旣死。賊慟如失一手。廣覺詐。益厲兵協攻。焚二關。奪三山。絕賊樵汲。八路兵大集圍下。從十八日始築長圍。更番迭攻。自是賊坐困窮崖待死矣。會化龍聞計。跌而草檄愈治軍。念賊圍前陡絕。勢難飛越。令馬孔英以勁兵壁其前。餘併力攻後圍。營中或言水西通賊。因移令退劄。水西懼曰。吾不爲亡播續也。與鎮雄引嫌。先以五月二十八日拔營去。時久雨。士苦馳淖。中六月四日。天忽開朗。五日。劉綖破土月二城。應龍窘。是夜散數千金。募死士拒戰。諸苗皆駭散。無應者。起提刀自巡其壘。見四圍營火燭天。徬徨長歎。泣謂妻子曰。若等自爲計。吾不能復顧若矣。翌日凌晨。我師登圍。破大城。各將爭奪首功。應龍倉皇同愛妾二闔室縊。且自焚。吳廣獲曾子朝棟及妻田氏。急覓屍烙中。廣中火毒。失聲幾絕。頃而甦。總計出師至滅賊。百十有四日。八路共斬級二萬餘。生擒朝棟兆龍等百餘人。檻車傳致。以六月二十一日解俘重慶。則賊去歲破葦江日也。化龍露布以聞。疏首入。劉綖功冠軍。而推官高折枝以書生請自將士漢兵爲川南將士先。入關最蚤。尤雄偉不羣。十二月獻俘闕下。對應龍屍。磔朝棟兆龍等。梟示各夷。并戮田氏馬千驪。其宋承恩以先絕姻。釋勿誅。卽其地分爲二郡。屬蜀者曰遵義。屬黔者曰平越。遵義領州一。眞州改眞安州。卽古珍州。縣四。遵義綏陽。並故縣桐梓。舊爲夜郎縣。仁懷舊

爲懷陽縣。平越領州一。黃平爲川貴要區。改置州縣三。涇潭餘慶。而甕水重安合爲雍安縣。龍泉所改縣屬石阡。又專設播州兵備使駐遵義。置威遠衛。建學增驛。其地西南左接水西。右逼永寧。犬牙相錯。水西向侵播州。水烟天旺及它甌脫頗衆。黔撫郭子章許畀水西。川撫力阻。久之與而復奪。亦屢生變。而不至大作亂。



明書卷一百六十五

列傳二十一

四國傳一

史官論曰。從來帝王受命。必豔稱大一統之模。以昭臨函載。詩歌王享。書紀成賓。古昔然矣。若止赤縣星羅。雄州碁麗。鷲崖銘於醫石。採珠璣於瓊池。海岱誇日觀之奇。玉關謝天方之路。而殊鄉絕域。阻樹風聲。乃云空制幽遐。謬矜混一。考古君子。所以撫籍而增嗟也。明興。洪永間。新德聿昭。萬方慕義。朝多金符之使。驛街載玉之轅。自古皇未通華夏之邦。接踵而至。煩譯譯者數百國。卽有仁禮久積。武勇雲蒸。足爲天下雄。猶利盟篤信。三百年如一日焉。亦可謂坐收無外。安享矢鏃者矣。辨方固域。王道伸焉。以至寶龍綸藏。龜紐者。有光三王。夷四王。番五王。稽古所未有也。不亦休哉。嗚呼。至於末季。琛獻未絕於梯航。王章尙赫於海澨。一米脂操馬箠之豎。夢嚙弄兵。竊窺神器。轉瞬之頃。玉步已移。所謂成賓王享者。猶未改也。豈非天哉。豈非天哉。因詳載四國。以志大盛。使後世勤兵於遠者。可以鑒矣。

安南

安南。古南交也。秦爲象郡。漢爲南越。所據武帝平南越。置交趾。九真。日南三郡。朱梁時。始土豪曲承美據

之已而并於劉隱未幾管內大亂衆推豪會丁部爲州帥部子連繼立宋旣平嶺表連遂內附黎桓篡丁氏李公蘊又篡黎氏陳日煚又篡李氏宋以遠夷故置不問相繼皆封爲交趾郡王元朝兼有華夷至憲宗遣將破其國而日煚窟居海島弱不能支始歸附元封其子光昺爲安南國王光昺死子日烜自立元發兵破之日烜卒子日煒遣使朝貢元末天下大亂安南不至明興削平羣盜驅逐□元洪武元年登極詔諭天下日煒大懼又聞征南將軍廖永忠副將軍朱亮祖帥師逾嶺降何真定廣東西日煒欲納款又以梁王尙在雲南持兩端二年始遣其少中大夫同時敏等來朝貢請封遣侍讀學士張以甯等封日煒爲安南國王賜駝紐塗金銀印以甯等至安南界日煒已卒其弟日煒嗣立遣阮汝亮迎請誥印以甯等不從日煒遣杜舜欽等請命於朝以甯駐安南候命詔封日煒爲王是年遣翰林編修羅復仁兵部主事張福詔諭安南占城國王各罷兵息民皆聽命三年日煒卒封其子日鑑嗣王五年陳叔明遣人朝貢卻不受明年又遣人納貢謝罪請封當是時煒嗣王叔明者煒兄也專國政十二年煒遣使來貢上惡其強悍數侵占城詔諭叔明二十年煒遣使貢賀聖壽二十一年國相黎季犛廢其主煒幽大陽坊尋弑煒立叔明子日煨主國事二十二年又弑日煨假煒名遣人來貢二十六年遣禮部尙書任亨太監察御史嚴震直諭令出兵討龍州趙宗壽二十七年遣人朝貢卻不受二十九年遣行人陳誠呂讓諭令還思明五縣不聽陳氏傳十二世至日煨而黎氏篡立僭稱皇帝國號大虞紀元天聖永樂初季犛上表竄姓名爲胡一元子蒼易名查詐稱陳氏絕查爲陳氏甥求權署國事朝廷從其請逾年陳王孫添平走至京言季

鞏殺篡。季鞏詐上表請迎添平歸。還以國上遣行人聶聰送添平歸國。敕征南副將軍黃中呂毅率兵禦之。季鞏伏兵芹站。殺添平及明使人。上怒。永樂四年七月辛卯。以成國公能爲征夷將軍總兵官。西平侯晟。新城侯輔。左右副將軍豐城侯彬。雲陽伯旭。左右參將大將軍率右副將軍右參將及清遠伯友。統神機將軍程寬。朱貴。遊擊將軍毛八丹。朱廣。王恕等。橫海將軍魯麟。王玉。商鵬。鷹揚將軍呂毅。朱定。江浩。方政。驃騎將軍朱榮。金銘。吳旺。劉劄。出二十五將軍。以兩京畿荆湖閩浙廣東西兵。出廣西憑祥。左副將軍左參將。統都指揮陳容。盧旺等。以巴蜀建昌雲貴兵。出雲南蒙自。兵部尙書劉儁。參贊戎務。尙書黃福。大理寺卿陳治。轉餉。是日上幸龍江。禱祭誓衆曰。黎賊父子。必獲無赦。脅從必釋。毋養亂。毋玩寇。毋毀廬墓。毋害稼穡。毋恣取貨財。毋掠人妻。父母殺降。有乙於此。雖功不宥。毋冒險肆行。毋貪利輕進。罪人旣得。卽擇立陳氏子孫賢者。撫治一方。班師告廟。揚功名於無窮。其往勉之。時晟鎮雲南。先遣彬以征夷副將軍印制受晟。十月。輔兵度坡壘關。傳檄數黎賊二十罪。遂入鶴陵關。晟兵至白鶴江。賊拒守富良江。能卒以輔爲征夷將軍代能。十二月。敕行人朱勸諭黎賊。晟兵奪宣江。進次滄江。輔兵渡沱江。合兵渡富良江。進克多邦城。焚賊西都。賊走入海。輔駐兵交州。晟追賊至木九江。五年正月。輔晟合兵破籌江柵。賊走閩海口。敗之富良江。五月。賊走乂安。都督僉事柳升率舟師追賊敗之。得賊船三百。賊遁且入海。輔晟乘勝追之。引兵出奇羅海口。賊敗。卒王柴胡等七人。擒季鞏李保等十人。擒其子澄。安南人武如卿等。僞大虞皇帝蒼。僞太子芮。僞將相王侯柱國黎季龍等。詔求陳氏後。復立爲安南國王。國人言黎賊殘。陳氏無後。

乃郡縣其地。立交趾布政使司。都指揮使司。按察司。分十七府。曰交州。北江。諒江。三江。建平。新安。建昌。奉化。清化。宣化。大原。鎮蠻。諒山。新平。乂安。順化。升華。四十七州。一百五十七縣。衛十一所。三市。舶司一。改鷄陵關爲鎮夷關。安撫人民三百二十萬。獲蠻人二百八萬七千五百。糧儲一千三百六十萬石。象馬牛十三萬五千九百。紅八千七百。軍器二千五十三萬九千。敕尙書黃福兼掌布按二司事。敕輔晟。僞交趾應有懷才抱德。山林隱逸。明經能文。博學有才。賢良方正。孝弟力田。聰明正直。廉能幹濟。練達吏事。精通書算。明習兵法。武藝智謀。容貌魁偉。言語便利。膂力勇敢。陰陽術數。藥醫方技之人。悉心訪求。禮送京師。擢用。九月。輔遣升露布獻俘。季黎蒼及僞將相下獄。赦澄茵等。令有司衣食之。陸柴胡等指揮使僉事千戶。是冬。贈故安南國王陳氏子孫七人官。六年七月。進封輔爲英國公。晟黔國公。封升安遠伯。八月。交人簡定。鄧悉反。以晟爲征夷將軍。帥師討之。備仍參贊。十二月。晟與賊簡定戰於生厥江。敗績。僞都督呂毅。交趾參政劉昱。皆沒。七年二月。敕輔總兵討賊。言晟出師失律。致賊猖獗。今聞鄧悉死。而八百媳婦。老媪。猶供餽者何人。賊云有象五萬。又謂我將帥皆易與。宜戒慎。同心協力。早滅此賊。五月。簡定稱上皇。立陳季獷爲大越皇帝。改元重光。八月。輔敗賊於鹹子關。九月。又敗之太平海口。十月。季獷稱故王。後請封。輔不聽。進兵至清化。十一月。輔獲簡定及其僞將相。八年正月。召輔還。令晟節制諸軍。簡定檻於京。伏誅。十二月。季獷人上表請降。遣方通政諭季獷。以爲交趾右布政使。又以其黨陳原樽爲參政。胡其澄。景異。鄧銘。都指揮。潘季祐。按察副使。是月。季獷景異復反。九年正月。以輔爲征南副將軍總兵。會征夷將軍晟。率師

討之。二月，詔敕交趾。七月，輔晟敗賊於常江。十一月，輔率舟師破賊於海上。十年八月，又破賊於神投海口。十月，又破賊西心江。十一年十二月，輔晟會兵，敗賊於愛子江。擒季獮。十二年八月，檻至京，伏誅。十三年四月，以輔爲征夷將軍，總兵鎮交趾。十四年十一月，召輔還。豐城侯彬代輔。十六年正月，清化土官巡檢黎利反。侯彬遣都督朱廣往剿之。利初從季獮爲金吾將軍，已而來降，令爲土巡檢。輔還，遂反。稱平定王。以弟黎石爲相國，段莽都督，聚賊衆范柳、范晏等，肆出劫掠。廣兵至，斬首六百，擒晏、利遁去。彬請就交趾戮晏等以徇。七月，交趾右布政使莫助及交州知府杜希望，令縣丞黎獻率家人五百力役北京。十七年，巡按御史黃宗載言交趾新入版圖，勞來尤在得人。今府州縣多兩廣雲南歲貢生，及下第舉人，未入國學，乞仕遠方，遂授以職。既乏大學教養之素，又非諸司歷試之才，以故牧民者不知撫字，理刑者不諳法律。若候九年黜陟，廢弛益多。宜令到任二年以上者，從巡按御史及布按二司嚴覈其廉汙能否。上狀黜陟。從之。十八年五月，敕侯彬言叛寇黎利、潘倭、車三農、文歷等，迄今未獲。未審兵何時得息，民何時得安。宜盡心畫方略，早滅此賊。交趾參政侯保馮貴討賊戰死。十九年五月，彬請屯田。九月，彬言利奔老撾，我進兵討捕。老撾輒遣頭目覽者郎阻我兵勿入境。云卽發兵象大索利，送軍門。久之，竟不獲利。上曰：老撾匿賊持兩端，令彬遣頭目出京詰之。是冬，敕利以爲清化知府。遣內官山壽諭利。二十二年，仁宗卽位，召福還。以洽爲兵部尙書代福。是冬，交趾參將保定侯瑛、榮昌伯智言壽未至，利復反。改大理寺卿楊時習爲按察使，以弋謙爲布政使。內官馬騏自交趾召還，未幾矯旨下內閣書敕，復往交趾，開辦金銀珠香。

內閣覆請上正色曰朕安得有此言此奴彘在交趾荼毒軍民卿等獨不聞乎自朕召還交人如解倒懸豈可再遣然亦不誅馭也洪熙元年二月以智爲征夷副將軍總兵討利六月宣宗卽位七月命行在兵部侍郎戴綸副治贊理智軍務八月賊阮可郎等伏誅十一月敕智及安平伯安都督方政及三司言賊利包藏禍心已非一日始若易取誤信人言惟事招撫迄今八年終不聽命忠臣罹害良民被毒其誰之過智等其急進兵務協和成功來春不捷論罪是月上欲棄交趾問英國公輔尙書義原吉皆曰不可棄問大學士士奇榮皆頓首稱善宣德元年三月智政兵討利進至茶籠州敗績四月以成山侯通爲征夷將軍總兵都督馬瑛參將討賊尙書治仍參贊軍務安平伯安掌交趾都司事削智政官爵五月敕交趾十一月通擊賊敗績十二月賊攻清化州不利引去以安遠侯陞爲征南副將軍總兵保定伯銘左副總兵都督崔聚右參將由廣西黔國公晟爲征南將軍總兵興安伯亨左副總兵新甯伯忠右副總兵由雲南率兵兩道討賊兵部尙書李慶參贊軍務工部尙書兼詹事黃福仍掌交趾布按二司事敕通守城練兵侯陞等至進兵二年正月上念久用兵勞費又問大臣士奇榮力贊上止兵棄交趾便利攻交趾城通等出戰敗之斬僞司徒司空太尉少尉太監黎笏等四月利陷昌江通斂兵不出賊書與通請和通遂許清化諸州地與賊遣指揮關忠與利所遣人上表貢方物七月賊破隘留關圍邱溫鎮遠侯興祖擁兵甯甯不肯援城陷逮興祖九月陞等師至隘留關利遣人詣軍門上書言窮迫乞罷兵立陳氏後陞易賊賊伏四起陞中鏢死是日銘病卒明日慶亦卒聚兵亦敗諸將兵皆阻賊不得進十月通出下哨河立壇與

利盟約退師。且宴利。遣利金織文綺。利亦以重寶謝通。是月。忠及利所遣人至京。表以陳名實出利。上覽表。示羣臣曰。賊表乞復立陳氏後。從之便。抑不從便。羣臣以內閣主議。故皆曰從之便。上曰。然。十一月。以行在禮部侍郎李琦。工部侍郎羅汝敬。充正使。通政黃驥。鴻臚卿徐永達。副使。詔諭安南。言利表言。前國王遣副使。尙在老揭。國人乞封嵩王。永奉職貢。頭目耆老。其以實對。朕卽遣使授封。朝貢如洪武故事。又軟通等。卽日班師。內外鎮守三司。衛所府州縣文武吏士。攜家來歸。三年正月。通馳奉僞王陳嵩。遣黎少穎。表貢代身金銀入謝罪。并送我叛人。都督都指揮蔡福等。還京。乞班師。臣兵寡援絕。人情警懼。賊控據水陸。陷奪城池。臣與衆議。不如因其納貢請降。全師出境。再圖後舉。臣已率將士還至南甯。俟命。上覽奏。敕通虧損臣節。遺笑疊方。如國體何。三月。少穎至京。表稱安南國先陳王臣。曠三世嫡孫。臣嵩及頭目臣黎利云。四月。通至京。羣臣勅通及瑛。智安政。布政使弋謙。內官山壽馬騏等。下廷鞫。言通等失律。喪師棄地。壽曲護叛賊。騏激變藩方。論死繫詔獄。籍其家。瑛等坐罪有差。興祖亦下詔獄。五月。琦汝敬等還。利遣人表謝。言嵩會病卒。族人並絕。國中推利守國。候命。汝敬永達。復奉詔諭。利及耆老訪陳後。聞羣臣又勅。晟亨忠奉命。與升犄角進兵。顧逗遛逾時。方臨賊境。與升等聲聞斷絕。賊得專力拒我。及聞升陷沒。又不進援。通等輒狼狽引退。爲賊所乘。殺傷吏士。委鎧杖。賊勢益橫。城池失守。乞亟正邦刑。上曲赦晟。令臺中減勅。章示晟。亨忠。俟還京。論罪。贈交趾死節都指揮李任。指揮顧福。劉順。徐騏。周安。千戶蔡顯。桂勝。知府劉子輔。易先。知州何忠。內官馮智等官。武官世職。文官復其家。誅叛臣蔡福等。籍其家。四年二月。汝敬等

還。利遣人貢方物。三月。遣琦、永、遠行人張聰、敕諭利。三月。琦等還。利遣人貢金銀貢物。并上國人奏言。陳氏無後。利撫綏有方。得民心。乞令管攝。永爲藩臣。奉職貢。六年五月。利遣人陳情謝罪。貢方物。六月。遣行在禮部侍郎章敝、通政徐琦、詔利權署安南國事。七年二月。敝等還。利遣人貢謝。八年八月。利遣人入貢。九年三月。廣西總兵山雲言利死。長子狂妄。次子幼弱。姦臣黎問黎察搆相讎殺。夷民警懼。諒山土官阮世甯、七源土官阮公廷率衆避難來歸。願居廣西龍州及太平府土下凍州。敕雲、利本起微賤。因奏立。嵩從人望。朕志在息民。遂詔罷兵。徐議立。嵩利違奏。嵩死。嵩之死。利所爲也。朝廷卽欲問罪。不忍毒民。令權署國事。多行不義。爲天所殛。爾戒飭邊兵。嚴謹守備。勿忽。世甯公廷可善撫之。四月。琦等還。言利死。利子麟遣人告喪。獻金入方物。五月。遣行人郭濟、朱弼祭利。十月。麟令人上表請命。遣行人侯璫諭麟。仍權署安南國事。十二月。欽州貼浪如昔人叛降麟。正統中。麟卒。子濬嗣。天順中。濬被篡。弟灑嗣。宏治中。灑卒。長子暉先卒。子誼嗣。正德初。誼被篡。國人請以灑庶子暉嗣。朝廷登極。改元。遣使詔諭。交會亦數。遣使朝貢。然時時南侵占城。占城上聞。諭禁之。輒陽聽命。侵盜如故。已而中國人多潛入交南。至有受僞命者。教之窺伺雲南。太監錢能貪殘。令京衛指揮郭景。矯奉敕旨。往來交南。猎夷奸闖出入。莫敢誰何。遂誘遁逃。覘虛實。鎮南關外。類多華人。而臨安諸郡。所在有夷賊矣。於是撫臣屢請增置文武吏士。控制彈壓。然交人僥倖。欽州里社。中國官亦不能禁。是時。暉弱懦無爲。境內盜起。羣下專權。虐政暴征。人不堪命。正德十年。暉遣阮仲達朝貢。是年。陳暉作亂。殺暉。奸會莫登庸及其子方瀛。結黎義昭等。共推暉從子諱嗣。而討殺

陳嵩嘉靖改元遣使詔諭。嵩且死七年。諱不請封。輒改元。光紹嵩父子亦據諒山等府稱王。改元天應。莫登庸妻灑妻逼諱走海濱。使命不能達而還。當是時。登庸遂與陳氏分據交地。杜溫閏鄭綏不肯從。登庸已而諱死。登庸又曰灑有子應。諱弟也。矯立應相拒。交人曰灑死久矣。應本登庸子。諱同母弟也。嘉靖初。田州岑猛叛。兩廣總督姚鏐計鴆殺之。謂岑氏可遂滅。疏請設流官治田州。而盧蘇王受諸孽。輒通交南。流言搖惑。嶺間人。鏐被論落職。桂萼初嚮用。言提督兩廣。非新建伯王守仁不可。遂起王守仁兼兵部尚書。總制兩廣江湖諸省軍務。守仁至嶺南。始知流官不可設。請復官。猛子邦相爲田州判官。盧蘇亦與土巡檢羈縻之。尋守仁病。謂翁萬達曰。田州事非我本心。後世誰諒我者。當守仁初起。皆用萼之力。萼以議禮致位。卿輔。欲立奇功。會安南有亂。冀可傳檄取之。乃陰以意寓書授守仁。若專爲思田者。使密探安南要領。而守仁不答。直於奏尾稍及之。萼遂悉憾。會守仁卒。竟中傷。革世爵。及卹典云。嘉靖十五年。哀沖太子生。頒詔諸夷。禮官言安南久不廷。不必遣使。請發兵討之。下廷議。諸大臣不可。敕錦衣衛官使安南察之。已而又遣禮部尚書黃綰。翰林學士張治。使安南。時上幸承天。綰治行有日。又復止。兩廣守臣言安南莫氏篡逆。國內大亂。時出侵掠。遂命兵部尚書毛伯溫至廣東議方略。進兵討莫氏。會莫氏請命。嶺南知府廉州張岳。梧州翁萬達。廣州鄒守愚。又巡撫諸臣亦不欲用兵。騷動數省。條議上。伯溫請赦莫氏。以爲安南都統使。會登庸死。伯溫請以制命授其孫福海。嘉靖二十年六月。班師論功進秩。賞費有差。未幾。福海復爲黎寧所逐。黎氏仍據國。莫氏竄居南海島上。朝廷置不問。終明之世。朝貢不絕。交趾東起。欽

州西歷左江北至臨安元江龍州其孔道憑祥其要害也由臨安經蒙自河蓮花灘至其東都可四五日其俗夷獠雜居不知禮義獷悍喜鬪不解耕種椎髻翦髮好浴善水平居不冠惟交愛人個儻好謀驢演人淳秀好學其山川佛迹句漏海富良江爲大產金珠珊瑚玳瑁丹珠諸香蘇合油胡椒羚羊角犀象咒白鹿猩猩狒狒白雉翡翠蝻蛇蟻子鹽鹽波羅密烏木蘇木境內有越王城天使館浪泊柱銅鼓

兀良哈

兀良哈在烏龍江南漁陽塞北春秋時山戎地元爲大寧路戶四萬六千口四十四萬八千國初割錦義建利諸州隸遼東設都司於惠州領營興會二十餘衛所謂北平行都司也洪武十四年封子權於大寧爲寧王二十二年分兀良哈爲三衛於橫水之北曰朵顏曰福餘曰大寧處降□以脫魯忽察兒海撤男奚阿扎失里爲三衛指揮使同知並邊以爲藩籬燕兵起首劫大寧兵及召兀良哈諸酋率部落從行有功遂以大寧界三衛寧府移南昌徙行都司於保定爲大寧都司令三衛歲二貢貢衛百人東起廣寧前屯歷喜峯近宣府爲朵顏自黃泥窪逾瀋陽鐵嶺至開原爲福餘由錦義渡遼河至白雲山爲大寧皆逐水草無恆居三衛朵顏最強分地又最險永樂中最親附宣德時常入漁陽塞上率諸將出喜峯關敗之於寬河誅其大會自後稍馴順正統中又叛侵盜東北關諸塞索鹽米賞賜以故喜峯密雲間有都指揮都督鎮守驗貢夷己已福餘大寧結也先爲也先鄉道朵顏獨扼險不肯從也先至不能入塞不得利大掠福餘大寧人畜去始敕都御史鄒來學經略已而設太監參將又設總兵景泰四年守臣言兀良哈

賈人往來不絕。爲瓦剌間諜。詔自後使至。伴二三人入京。餘不得輒入關。成化四年。與北鹵毛里孩通。侵天城。遣都督李鐸詰之。十二年。通口加思蘭謀寇遼東。敕邊臣備之。然亦未敢大爲寇盜。宏治中。守臣楊友張瓊燒荒。出塞掩殺。邊釁遂起。正德初。部落旣蕃。陽順陰逆。累肆侵盜。朵顏都督花當求添貢。其子把兒孫深入擄掠。動稱結親。迤北恐中國。革蘭台者。花當孫也。兀良哈。朵顏爲大部。朵顏。花當爲貴種。花當長子革列。李羅早死。其弟把兒孫驍勇。十年。把兒孫入馬蘭谷塞。殺參將陳乾。遣都督桂勇討之。把兒孫遣扯禿等來言。請入貢。且獻馬贖殺乾罪。又謾言射林。李羅幹兒路阿刺忽。旦夕且糾諸部。大舉入寇。令小失台呼扯禿等去中國。亦幸無事。奏鹵退班師。未幾入寇。參將魏祥全軍覆沒。時把兒孫狡劣。屢謀奪適。諸適諸酋惡之。不相附。尋亦死。花當種人。皆附革蘭台。革蘭台貢馬。遲之未請。嗣番官也。邊臣言上。兵部令譯部落後許貢。革蘭台遂入寇。漁陽諸小關堡皆殘破。嘉靖十一年九月。巡撫王大用欲通朵顏與厚賂。城其霧靈山。不果。是時酋阿堆哈利赤。數入建昌。喜峯。太平諸寨。殺掠人畜。革蘭台又乞陞官。兵部言大用喜事。請以毛伯溫代。大用出漁陽。巡撫伯溫至鎮。敵益盜邊。邊人不得耕牧。二十年。革蘭台挾北口求添貢。貢衛三百人。不許。請衛二百人。又不許。時時出沒塞下。輒云結小王子。旦夕大舉入塞。會俺答話囊自大同深入太原。不得已。許其補前貢。失期者衛二百人。二十一年。內批胡守中侍郎兼都御史督軍務。撫勦守中儉儉嗜利。乾沒內帑金多。又擅出塞。盡伐遼金以來松木百萬。自撤藩籬。徧索富人舊將領金錢。言官劾守中論死。西市。巡撫徐嵩阿事守中削籍。已而有發嵩乾沒庫金者。逮嵩。成二十二年。叛

人白通事導虜數侵邊塞。巡撫論伏兵斬白通事。論進官副都御史。請告去。朱方代論。以請撤防秋兵太早。爲敵所掠。逮至京。杖死闕下。職方郎中韓勛亦杖死。方清勁。勛端諒。皆有才識。死非其罪也。二十五年。敵大入塞。明年北口道兀良哈入寇。遼東西塞下。隆慶後數入塞。萬厯中。賞費無算。以故稍馴順。天啓崇禎時。附他部落。不復自樹。遑兵矣。

朝鮮

朝鮮。周封箕子國也。秦遼東外徼。漢初爲燕衛滿所據。武帝取爲真番臨屯樂浪元菟四郡。漢末爲公孫氏所據。魏滅公孫。晉并於高麗。高麗本扶餘別種。王高連居平壤。卽樂浪。已而東徙鴨綠江。東南千餘里。後唐時。王建代高氏。并有新羅百濟。又徙東松岳。以平壤爲西京。子孫遣使朝貢。宋遼金歷四百餘年。元至元中。西京內屬。置東寧總管府。洪武二年。王王顥表賀卽位。遣符寶郎俛斯賜金印。詔命大統。歷金綺封爲高麗國王。并賜王母妃相國諸陪臣文幣。五年。王顥遣其禮部尙書吳季南。民部尙書子溫。表貢方物。表言暹羅國恃其險遠。不奉朝貢。蒙古人留居其國。宜徙之。蘭秀山。逋逃所聚。亦恐爲寇患。乞發兵討之。賜璽書言暹羅隸爾。蒙古亦人類。蘭秀山。逋寇。示以朕詔。一呼可至。勿用兵。使十年。以高麗貢使煩數。遣故元樞密使延安答里諭意。顯遣門下贊成事姜仁裕表謝貢方物。上令賀正。且使金潛。及仁裕偕還。諭王藥餌。又諭中書省曰。曩因爲高麗貢獻煩數。遣延安答里往諭朕意。今一歲迭至。困罷其民。涉海險遠。如渠往使。洪師範歸國覆溺。幸有脫歸者。言其故。否且致疑。古諸侯事天子。比年一小聘。三年一大聘。

若九州外遠番。世一見而已。貢物亦無過侈。高麗去中國稍近。人知經史。文物禮樂。略似中國。非他邦比。宣令三年一聘。或比一年一聘。貢物產布十匹足矣。丞相其以朕意諭王。諸新附遠邦來朝。亦明告以朕意。中書因使者還。咨諭之。十六年。遣使張伯崔泊來貢。以違命卻之。令禮部諭王。十七年。諭遼東守臣絕高麗。十八年。國人立王禡爲王。禡貢布萬匹。馬千匹。謝是秋。封禡爲高麗國王。賜其故王顯謚恭愍。十九年。請易冠服不許。二十二年。國相李仁人劫囚禡而立其子昌爲王。遣使姜伯淮朝貢。是年仁人子成桂廢昌而立定國院君王瑤主國事。二十四年。瑤遣使朝貢。又令其子爽朝明年正月。詔位尙書下。是年令市高麗馬萬匹。索闖人二百。二十五年。成桂囚瑤及爽於其私第。自主國事。是年知密直司事趙胖等以其國都評議司奏至。奏言恭愍王薨無嗣。李仁人以他人子禡主國事。昏暴好殺。謀侵遼東。大將李成桂力阻乃已。禡自知負罪。遜位於子昌。國人弗順。啓恭愍王妃安氏。擇立宗親。定昌國院君王瑤權國事。及今四年。昏迷聽讒。其子爽亦癡。縱酒色。與禍黨元禹實等。謀復禡位。守門下侍中鄭夢周曲附王瑤。謀害成桂及趙俊。鄭道傳南闖等。今年七月。國中臣民以安妃之命。退瑤於私第。擇於宗親。無可立者。衆推門下侍郎李成桂主國事。上曰。朕中國綱常所在。列聖相傳。守而不失。高麗限山隔海。僻處東夷。非我中國所治。且事多隱曲。不可據信。令禮部移文。從其自爲聲教。成桂更名旦。徙居漢城。遣使請更國號。詔更國號朝鮮。旦遣使請印誥。上覽表。怪旦不遜。詰使者言表。鄭集撰。上盡卻方物。索集。旦懼。送集至京。安置雲南。二十七年。令遼東絕朝鮮。尋請印誥不許。後府部請發兵討朝鮮。亦不許。旦老。請子芳遠嗣。旦卒。諡

康獻太宗卽位。賜金印。誥命。冕服九章。圭玉佩玉。列女傳。春秋會通。大學衍義。通鑑綱目諸書。十七年。芳遠老。請子禔嗣。芳遠卒。諡恭定。宣德初。賜禔五經四書性理大全通鑑綱目。五年。禔遣使獻海青鷹。使還。賜王瓷器。諭禔王國中多珍禽異獸。然朕所欲不在此。後勿獻。自後聖旦元旦。皆使朝貢。王請封慶弔。謝使來無常期。朝廷有大政。頒詔其國。及王請嗣。封皆遣使。正統間。賜王遠遊冠。絳紗袍。翼善冠。龍袞玉帶。景泰元年。禔卒。命子瑄嗣。瑄卒。賜諡恭順。子宏暉嗣。宏暉幼。叔瑛以讓位。請七年。封瑛爲王。瑛後不知幾。傳而娶立。娶卒。諡康靖。子懌立。踰年。而世子顛卒。懌病風。遜其弟擇。擇立二十二年卒。子皓立。未踰年卒。皓弟頊立。世宗中。封長子顛濟爲世子。頊疏乞改大明會典中所載成桂篡逆事從之。萬曆中。日本來侵。王遣使乞兵。於是發五將軍李如松等兵五萬助之。日本遁去。還後立鎮於東江。大帥毛文龍鎮焉。國人每苦需索多怨言。崇禎中。東江兵撤。而朝鮮陰旁附。陽尊中國。終明世無逆形。其國東西南濱海。北鄰女直。西北至鴨綠江。東西相距二千里。南北四千里。分八道。統府州縣。俗柔謹。知文字。喜讀書。崇釋尙鬼惡殺。戴折風巾。服大袖衫。男女相悅爲婚。死三年始葬。飲食用俎豆。官吏閉威儀。居多茅茨。衣多苧麻。以田制俸。以秬醴酒。法無苛條。刑不慘毒。山川九都神嵩北岳海鴨綠江爲大。產金銀鐵水晶鹽。紬苧布白礬紙。狼尾筆。果下馬。長尾鷄。貂。豹。海豹皮。八梢魚。昆布。秬黍。麻。榛。松人參。茯苓。

琉球

琉球在海東南。自福建梅花所開洋。順颶利泊。七日可至。漢魏至唐宋。不通中國。隋常遣兵擄其男女五

千元遣使招諭。竟不從。洪武初。國分中山、山南、山北。稱三王。遣使朝貢。十五年。賜中山王察度。山南王承宗。鍍金銀印金幣。使還。言三王爭雄相攻。賜詔諭之。并諭山北王怕死芝。十六年。賜山北王印文綺。王妃姪相塞官各有差。二十五年。中山王遣子姪及其陪臣子弟入國學。上喜。禮遇獨優。賜閩人三十六姓善操舟者。令往來朝貢。永樂二年。察度卒。詔封其世子武寧嗣王。是年。山南王承察度卒。無子。令其從弟汪應祖攝國事。應祖使來請命。如山北王故事。諭尙書塞義。遣使賜應祖冠服。嗣山南王。九年。中山王思紹令坤宜琪彌貢馬及方物。以其長史程復來見。表言長史王茂輔導有年。乞陞國相兼長史事。又言復本中國饒州人。輔臣祖察度四十餘年。不解於職。今年八十有一。乞令致仕還其鄉。上從之。陞復琉球國相兼左長史。致仕還饒。茂國相兼右長史。景泰元年。中山王尙思達遣人朝貢。三王嗣封。皆請於朝。已而山南山北皆爲中山所并。中山遣使朝貢。令三年一貢。貢無過百五十人。察度後五傳至尙圓嗣王卒。子尙眞嗣。尙眞卒。子尙清嗣。遣給事中陳侃等賜王及妃冠服。侃等疏言。宏治正德時。修撰羅倫等常使安南。安南乞留詔敕爲鎮國之寶。爲請得留。卽琉球請留如安南。海外遠不得卽請。乞下禮官議。議請如安南。使至國授封。王拜曰。天朝詔敕藏金匱者。八葉於茲矣。請留使許之。比還。遣其王親寧吉。長史蔡瀚。上表謝。侃等歸。上使琉球錄言大明一統志。載琉球有落漈王居壁下。聚燭骸。非實事。杜氏通典集事。淵海。羸錄。星槎勝覽諸書。所傳者亦妄。乞下史館改正。從之。其俗以盈虛爲晦朔。以草木爲冬夏。人皆去髯。黥手。羽冠。毛衣。無禮節。好標掠。旣遣人學於國學。夷習稍變。奉正朔。設官職。被服冠裳。陳奏章表。著作篇什。

有華風焉。今其國中王下有王親，不與政。次法司官，次察度官，司刑名，次那霸港官，司錢穀，次耳目官，司訪問，皆土官爲武職。以上世及所轄地爲姓名。其大夫長史通事官，司朝貢，有定員，爲文職，皆三十六姓人。及學於國學者爲之。王并日視朝，旦中及凡三朝，羣臣拱手膜拜，尊且親者入殿坐飲酒，卑疏者移時長跪階下。歲元旦，聖節長至，君臣冠服拜龍亭祝慶。子爲親喪，數月不肉食。人死，以中元前後日，浴尸溪水，去腐肉，取骨髓於布帛，裹葦草埋土中。王及諸臣家，匣骨藏山穴。竅木爲小龕，歲時祭掃啓視之。地無貨殖，不通商賈。朝貢乘大航，海上漁鹽泛小艇，無竹筏。信鬼畏神，神以婦人爲尸，號女巫。女巫之魁稱女君，白日呼嘯，聚輒數百人，攜枝載草，騎步縱橫。時入王宮，耍遊狎戲，一唱百和，音聲淒慘，倏忽往來，莫可蹤跡。馮附淫昏，矯誣禍福。王及世子陪臣，皆頓首拜跪。王居山巔，國門名獻會府門，漏刻殿門，奉神樸素，無金碧之飾。賦法略如井田。王臣民各分土爲祿食，上下無征斂。有事一取諸民，事已卽已。用刑甚嚴，盜竊卽刑。家富貴者，瓦屋不過二三楹，餘皆茅土。風雨飄搖，以螺殼爲無釜，飯耕無鐵。婦人嚼米爲酒，男子煮海爲鹽，市用日本錢，當一如宋季。鵝眼綫貫人無貴賤，皆曉健耐勞苦，饑寒不知醫藥，而無疾疫。兵甲堅利，射可至二百步。進止有金鼓，鄰國視爲勍，然好爭很鬪，輒刃殺人，度不能脫，卽剖腹自斃。其山川壘巖嶼，澎湖島爲大國，西古米山有礁，甚險，舟至輒敗，卽落溲也。產馬海巴牛皮，磨刀石，硫黃，銅錫，扇山無猛獸，多野馬牛豕。至鬪鑊木蘇木胡椒諸香，非其產也。又有小琉球，近泉州，閩人嘗霽日登鼓山而見，入國朝未常朝貢，後并入琉球。琉球旁有毘舍那者，島中小夷，鳥語鬼形，袒裸盱睢，殆非人類，不通中國。

使琉球嘗過而見之。

奴兒干

奴兒干卽女直古肅慎氏之地。在混同江東。東瀕海。西接兀良哈。南鄰朝鮮。北至荒徼。其地有長白山。綿亘千里。最高巔上有潭。周八十里。南流爲鴨綠江。北流爲混同江。又有黑龍江。皆在開原之北。二千里。皆南入於松花江。元設府路。領混同江南北部落人民。明興。遣人招諭。永樂九年春。遣將將水軍駕巨艦至江上。召集諸豪長。予官賞。於是次第率衆歸降。乃設奴兒干都司。以其長爲都指揮。賜敕印。又置衛所三百八十二。官諸小頭目爲指揮。千百戶。鎮撫。又有地面五十八站。七寨。一著令三歲朝貢。又置馬市於開原城。通交易。給鹽米布帛。贖諸部使保塞。不爲邊患。其部落最夥。不能徧悉。兼之居無定方。互相吞併。曰建州。曰毛鄰。曰海西野人。曰兀者。曰山夷。曰江夷。曰熟女直。完顏餘種。亦曰山寨夷。曰生女直。諸夷皆善射馳獵。男善耕種。女能紡績。飲食衣服。頗有華風。或有室廬。或逐水草者不一。又有阿哈婁得。悍狡自相雄長。永樂間。皆款塞求內附。日益強盛。其時專事撫綏。或漸爲邊患。正統末。附也先。八寨至遼東西。景泰中。諸酋多死也。先之亂。盡失賜敕。諸子不得請官。以舍人入貢。賞宴頗減。以故多怨忿。成化二年。其長董山。遂糾衆入犯。朝廷以武靖伯趙輔充總兵。都督王瑛封忠爲副。左都御史李秉督軍。率漢番京邊官軍五萬討之。山降。送京師。放歸廣寧。輔乘曰。山不可宥。九月。分左軍出潭河。柴河。越石門。土木河。至分水嶺。右軍由鴉鶻關。喜昌口。過鳳凰城。黑松林。摩天嶺。至潑豬江。中軍自撫順。經薄刀山。鮎魚嶺。過五嶺。度

蘇子河至虎城。期日會兵進勦。朝鮮亦遣中樞府知事康純等率兵萬人來會。擒斬俘獲指揮若女等千人。班師。指揮張額的里率妻子降。朝廷憐而釋之。明年留韓斌爲副總兵防守。築撫順清河雙陽諸堡。未幾諸夷憤欲報山讎。相約來犯邊。十四年入塞。殺掠人畜無算。巡撫陳越掩降寇爲功。又附太監汪直開邊隙。出塞撲殺諸夷。諸夷益恨。大入塞。殺掠吏民。遣兵部侍郎馬文升及直撫勦。直幸用事。幸功陰爲越地。要文升偕行。文升弗聽。疾馳至鎮。撫已定。比直至。解散矣。直大怒。文升還奏。文升安啓邊釁。謂諸夷皆以文升曩在鎮。禁不與易農器。故屢入塞。上遣直及刑部尙書林聰卽訊遼東。報上盡如直言。下文升詔獄。文升言實禁鐵器。非農器。不聽。竟謫戍重慶。已而直敗。賊亦敗。下詔獄。文升得雪。復官。嘉靖中。巡撫於敖。滅賞物。夷人大譁。不能拊。顧詐殺諸譯者。羣夷大恨。數入塞。胡宗明代敖不能禦。降浙江參議。其後屢入塞。督撫屢易。不能平究。不明其部落果何屬。憤憤以終。產楮矢石。斲赤玉。眞珠。金麻布。鹽。馬。虎。熊。狐狸。海豹。驢。豬。羊。狗。野豬。牛。驢。貂。鼠。青鼠。失刺。孫好刺。殊角。魴。鬚。鯨。睛。海東青。鷹。鶴。鶻。兔。鷓。鴒。牛。魚。粟。麥。糝。其物甚衆。

三佛齊

三佛齊卽舊港。又名淳淋。在東南海中。本南蠻別種。初隸瓜哇。有地十五州。東距瓜哇。西距滿刺加。南距大山。西北濱海。番舶輻輳。多廣東漳泉人。土沃宜稼穡。人好賭博。習水戰。服藥刀不傷。遇敵敢死。鄰國畏之。水多士少。將領得居陸。民率架筏水中。架梁柱。語言如瓜哇。市用錢布。字用梵書。其屬有單馬令。凌牙。

斯蓬豐登牙儂細蘭諸國。洪武初。王恆麻沙阿稱臣入貢。四年遣玉的力馬罕亦里麻思奉金字表朝貢。賜大統歷文幣。六年使來貢。八年使從招諭拂秣。十年恆麻沙阿卒。諭王子麻那者巫里三佛齊國王。駝鈕鍍金銀印。是時廣東有陳祖義者。脫罪避居其國。久之得爲將領。暴掠過客。永樂中。太監鄭和統海船下西洋至其地。有施進者。祖義鄉人也。訴於和。和擒殺祖義。承制官進。仍留舊港爲將領。進沒。女嗣官。後朝貢不絕。產鶴頂火鷄。神鹿。金銀水晶珠。琉璃珊瑚犀象龍腦。諸香。貓睛石。薔薇水。阿魏。沒藥。血結。鶴頂鳥。大於鴨。腦骨厚寸餘。外黃內赤。鮮麗可愛。火鷄大於鶴。頸足亦似鶴。梗紅冠。銳鬚。毛如青羊色。爪甚利。傷人腹致死。食熾炭。神鹿大如巨豕。高可三尺。短毛豕。喙蹄三趾。

占城

占城。古越裳。秦林邑。漢象林。漢末區連殺縣令。自稱林邑王。遂不入版圖。唐元和初。改號占城。宋淳熙中。襲破真臘。慶元中。真臘復讐。俘殺幾盡。更立真臘人爲主。洪武二年。遣吳用等使占城。瓜哇等國。賜王璽書。是年遣使朝貢。言安南侵境。上遣使招諭安南罷兵。是年。國主阿答阿者遣虎都蠻來朝。貢虎象。遣中書省管勾甘桓。會同館副使路賈賢。封阿答阿者爲占城國王。賜大統歷金綺。四年。阿答阿者遣使奉金葉表朝貢。言安南數侵境。乞賜兵器樂人。俾安南知我乃聲教所被。輸貢之地。不敢輒欺負。上憐之。命中書省咨王。言交鄰有道。事上以誠。占城安南。旣皆臣事朝廷。豈可擅兵相毒。卽咨安南。令其罷兵。兵器不爾吝。但以安南故。賜爾是助爾搆兵也。樂器有聲律。華夷方言本異。中國人不可遣。遣爾國人能習華音。

者來習肄。十六年遣子來賀聖節。賜勘合文冊。二十四年使至。以臣弑君。故絕之。永樂四年王占巴鎮里人。敕王的賴得黎賊父子及其黨惡。卽械送京。尙書陳洽在南交軍中。馳奏占城國王占巴的賴奉命出兵討安南。陰懷二心。愆期不進。及進至化州。輒肆擄掠。又以金帛戰象資季擴。季擴亦以黎蒼女遺之。復約季擴舅陳翁挺等三萬餘人。復侵升華府隸四州十一縣地。驅掠人民。罪下季擴一等耳。請發兵討之。上以交趾初平。不欲窮兵遠夷。遣使諭王歸侵地。永樂後遣人朝貢。令三年一貢。正統六年國人請封其嗣王。遣使冊封。成化中遣使冊封。正使卒海上。副使論罪戍邊。其國在大海南。南距真臘。西距交趾。東北際海。自閩長樂五虎門西南行。順風可十日至。東北百里。海口立石塔爲標。舟至是繫焉。俗獷悍。果於戰鬪。尙釋教。王冠三山金花玲瓏冠。衣白。跣足乘象。或黃犢車。臣莖葉冠。男蓬頭。女後結。所居茅茨。不得踰三尺。衣紫衣。衣元黃罪死。出入乘象馬。粒食。亦鮮食。殺牛祭鬼。驅象逐邪。市用金銀。焚衣祭天。釀酒甕中。俟熟。賓主纒甕坐筒而吸。且吸且注水。味盡而止。文書用羊皮及黑木皮。無閏月。晝夜各分五十刻。王當賀日。沐人膽汁。將領獻人膽爲賀。在位三十年。卽入山茹素受戒。令子攝國政。居一歲。籲天矢日。我不道。當充虎狼食。或病死。某年得無恙。復入爲王。於是國人呼爲芳嚙馬哈喇扎云。有號屍致魚者。婦人也。目無瞳。夜飛頭入人家。食小兒穢氣。侵兒腹。兒卽死。頭返合。體若失。其體不得合卽死。夫不聞者罪之。產金銀錫鐵。獅象犀牛瑇瑁。諸香朝霞。大火珠。菩薩石。薔薇水。猛火油。檳榔。諸文異木。胡椒。白藤。吉貝。絲絨。白氈布。孔雀山雉。伽南香。唯此地有之。價亦高。觀晉竹如藤。長丈八尺許。色黑如鐵。寸二三節。犀角象牙最

多犀如水牛。大者八百斤。體黑無毛。蹄有三趾。獨角在鼻端。長者可尺五寸。馬小於驢。波羅密形如東瓜。最甘。





明書卷一百六十六

列傳二十一

四國傳二

日本

日本古倭奴國海中諸夷倭奴最大西南至海東北大山國主世以王爲姓羣臣亦世官地分五畿七道三島又有附庸國百餘拘邪韓最大其國小者百里大不過五百里戶少者千多止一二萬皆倭種也漢滅朝鮮通使稱王者三十餘國倭王最雄長者居邪馬臺卽邪摩維歷漢魏晉宋隋皆朝貢稍習華晉唐咸亨初惡倭名更號日本國朝洪武二年倭寇山東並海郡縣又寇淮安三年寇山東轉掠浙東福建旁海諸郡是年遣萊州府同知趙秩賜璽書諭其王良懷言倭寇海上書至日如臣我奉表來庭不臣則修兵自固秩至諭王中國聖主威德責其入貢王曰吾國未嘗不慕中國顧蒙古戎狄蒞華以小國視我乃使趙良弼誅我好語初不知其覘我國也旣而發舟數千襲我比至一時風霆漂覆幾無遺類自是不與通者數十年爾得非良弼後乎將刃之秩徐曰聖天子生華帝華非蒙古比我亦非良弼後爾殺我禍不旋踵王氣沮禮秩具物遣僧隨秩奉表稱臣入貢使未至又掠温州五年上諭劉基曰東夷尙禪教始遣

明州天甯僧祖闡。南京瓦官僧無逸。開諭之。良懷欲留二僧。力辭。王遣使同二僧入貢。是年寇海鹽。澈浦。溫州。初令浙江福建造海舟防倭。而倭又寇福建海上諸郡。六年。以於顯爲總兵官。出海巡倭。倭寇登萊。七年寇膠州。是年遣僧來貢。無表文。卻之。其臣亦遣僧貢馬。茶布刀扇。上曰。此私交也。亦不受。令中書省移文責王。九年。遣僧歸廷用等。奉表貢馬及方物謝罪。賜王及使文綺有差。已而上覽表曰。良懷不誠。詔責之。十二年。來貢。無表文。安置使人於陝西番寺。十三年。遣使詔諭。良懷遣僧如瑤貢馬。令禮部移書責王。數掠我海上。復卻之。諸僧皆安置川陝番寺。十四年。遣僧入貢。乞還安置諸僧使。上曰。日本既謝罪。還其召至京。宴賞遣歸。十五年。歸廷用又來貢。於是有林賢之獄。曰。故丞相胡惟庸通日本。蓋祖訓所謂日本雖朝實詐。暗通奸臣。胡惟庸謀爲不軌。故絕之也。是時惟庸死。且三年矣。十六年。寇金鄉。平陽。十七年。如瑤又來貢。坐通惟庸。發雲南守禦。是年。信國公和致仕居鳳陽。上召至京。諭曰。日本小夷。屢擾東海上。卿雖老。強爲朕行視要地。築城防此賊。和因築登萊至浙沿海五十九城。民丁四調一爲戍兵。二十年。置浙東西防倭衛所。是年。遣江夏侯周德興築福建海上十六城。設衛所。遂塚福建漳泉人爲兵。戍並海衛所。二十六年。寇金鄉。二十七年二月。遣都督僉事劉德商。巡視兩浙防倭。三月。又敕都督楊文。尋又敕魏國公徐輝祖。安陸侯吳傑。練浙江海上兵防倭。二十八年。寇金州。太宗立。太監鄭和等率舟師三萬下西洋。日本遣人來貢。并擒獻犯邊賊二十餘人。卽付使人治之。縛置甌中。蒸死。永樂二年。使還。遣通政趙居任。賜王冠服文綺金銀古器書畫。又給勘合百道。令十年一貢。每貢。正副使等毋過二百人。若貢非期。

人船踰數。夾帶刀槍。並以寇論。居任還。不受王餽。上喜。厚賜之。尋命僉都御史俞士吉。賜王印誥。册封爲日本國王。詔名其國之鎮山曰壽安鎮國山。上爲文勒石。久之。嗣王道義卒。子源道義嗣。益奸狡。時時令各島人掠海上。九年。寇盤石。十五年。寇松門金鄉平陽。是年。遣禮部員外郎呂淵。諭王所掠海上人。十六年。遣使謝罪。當是時。數入金。蓋都督劉榮。總兵守遼東。繕海上墩堡。伏兵伺之。十七年。倭船入王家山島。傳烽杳至。榮率精兵疾馳入望海塢。賊數千人。分乘二十舟。直抵馬雄島。進圍望海塢。榮發伏出戰。遣奇兵布伏諸山下。斷其歸路。賊奔入櫻桃園。榮合兵圍而攻之。斬首七百四十二。捕生八百五十七。召榮至京。封廣甯伯。自此不敢窺遼東者二十年。初。方國珍據溫台處。張士誠據甯紹杭嘉蘇松泰。諸郡皆在海上方。張旣降滅。諸賊強豪者。悉航海糾島倭入寇。以故洪武中。倭數掠海上。太祖旣遣使命將築城增戍。又命南雄侯趙庸。招蠻戶島人。漁丁賈豎。自淮浙至閩廣。凡人盡籍爲兵。分十千戶所。於是海上惡少。皆得衣食縣官。洪武末。海中方張諸逋賊。壯者老。老者死。以故旁海郡縣得休息。永樂初。西洋之役。雖伸威海表。而華人習知海夷金寶之饒。夷人來貢。亦知我海道。奸闖出入。華夷相糾。以故寇盜復起。宣德初。遣人來貢。人舡刀劍。不奉我約束。上諭使臣。自後貢毋過三舟。使人毋過三百。刀劍毋過三十。否不受。七年。遣人來貢。如約束。受之。八年。源道義卒。命太監雷春。少卿潘賜等弔祭。十年。嗣王遣使貢謝。倭自得我勘合。方物戎器滿載而來。遇官兵。矯云入貢。貢卽不如期。守臣幸無事。輒請俯順夷情。主客者爲畫可條奏。卽復許貢。云不爲例。嗣後再至。亦復如之。伺無備。卽肆出殺掠。滿載而歸。宣德末。海防益備。賊不得間。貢。

稍如約。遂許夷至京師。宴賞市易。已而備禦漸疎。正統四年。寇大嵩入桃渚。官庾民舍焚劫一空。驅掠少壯。發掘冢墓。束嬰孩竿柱上。沃之沸湯。視其啼號。拍手笑樂。捕得孕婦。付度男女。列視之中。否爲勝負。飲酒荒淫穢惡。至有不可言者。於是朝廷下詔備倭。命重帥守要地。增城堡。謹斧楨。修戰艦。合兵分番。屯駐海上。寇患稍息。七年來貢。十一年寇海甯乍浦。成化初。忽至甯波。知有備。矯稱進貢。守臣爲請於朝。且欲遣之至京。楊守陳貽書禮部。力言不可許。二十年遣周瑋等來貢。宏治八年壽芝來貢。正德六年宋素卿源永壽來貢。求祀孔子儀注。不許。鄞人朱澄告言。素卿本澄從子。叛附夷人。守臣以聞。主客以素卿正使釋之。令諭王效順無侵邊。八年僧桂梧等來貢。嘉靖元年王源義植無道。國人不膜。諸道爭貢。大內藝興。遣僧宗設。細川高遣僧瑞佐及素卿。先後至甯波。故事凡番貢至者。閱貨宴席。並以先後爲序。時瑞佐後至。素卿奸狡。通市舶太監。饋寶賄萬計。太監令先閱瑞佐貨宴。又令坐宗設上。宗設席間。與瑞佐忿爭相讎。殺太監。又以素卿故。陰助佐。授之兵器。殺總督備倭都指揮劉錦。大掠甯波旁海鄉鎮。素卿坐叛論死。宗設瑞佐皆釋還。給事中夏言奏。以爲禍起於市舶。禮部遂請罷市舶。而不知所當罷者。市舶太監。非市舶也。夷中百貨。皆中國不可缺者。夷必欲售。中國必欲得之。以故祖訓雖絕日本。而三市舶司不廢。市舶初設在太倉黃渡。尋以近京師。改設於福建浙江廣東。七年罷。未幾復設。蓋東夷有馬市。西夷有茶市。江南海夷有市舶。所以通華夷之情。邊有無之貨。收徵稅之利。減戍守之費。又以禁海賈。抑奸商。使利權在上。罷市舶而利孔在下。奸豪外交內訶。海上無甯日矣。番貨至。輒除奸商。久之奸商欺負。多者萬金。少不

下千金轉展不肯償。乃投貴官家。久之貴官家又欺負不肯償。貪戾甚於奸商。番人泊近島。遣人坐索。久竟不肯償。番人乏食。出沒海上爲盜。貴官家欲其亟去。輒以危言憾官府。云番人據近島殺掠人。奈何不出一兵備倭。當如是。及官府出兵。輒齎糧漏師。好語啗番人。利他日貨至。且復賒我。如是者久之。番人大恨諸貴官家。言我貨本倭王物。爾價不我償。我何以復倭王。不掠爾金寶殺爾。倭王必殺我。盤據海洋不肯去。近年龍賂公行。上下相蒙。官邪政亂。小民迫於貪酷。苦於徭賦。困於飢寒。相率入海從之。凶徒逸囚。罷吏黠僧。及衣冠失職。書生不得志。羣不逞者。皆爲之奸細。爲之鄉導。人情忿恨。不可堪忍。弱者圖飽煖。旦夕強者奮臂欲洩其怒。於是王忤瘋。徐必欺。毛醮瘋之徒。皆我華人。金冠龍袍。稱王海島。攻城略邑。劫庫縱囚。遇文武官。發憤斫殺。卽伏地叩頭乞餘生。不聽而去。其妻子宗族。田廬金穀。公然富厚。莫敢誰何。浙東大壞。二十五年。以朱統爲浙江巡撫都御史。兼領興福漳泉。治兵捕賊。統請諒方勤任勞。嚴戢閩浙諸貴官家。常言去外夷之盜易。去中國之盜難。去中國之盜易。去中國衣冠之盜難。上章劾暴貴官通番。二三渠魁。於是聲勢相倚者大譁。切齒抵誣。惑亂視聽。改統爲巡視。未幾言官論劾。又遣言官卽訊。甘心燬煉。必欲殺統。統憤悶卒。統所任福建有功海道副使柯喬。都指揮盧鏡。殺賊有功。皆論死繫獄。於是華夷羣盜唾手肆起。三十一年。殘黃岩。掠定海。浙東騷動。遣都御史王忬。巡視兩浙。兼領漳泉興福四郡。以都指揮俞大猷。湯克寬。爲浙閩參將。剿賊。顧兵政久弛。將士耗鈍。水寨戰艦。所在廢壞。忬經略未幾。羣盜總至。柵寨列港。外約諸島。內招亡命。勢益猖獗。三十二年。大猷冒險出洋。焚蕩巢穴。首賊遁去。羣偷流散。

乘風奔突，倏忽千里。溫台寧紹杭嘉蘇松揚淮十郡，並受其害。克寬統領步兵，往來海壖，護城捕賊，斬獲亦多。忬不肯隱敗冒功，擒治奸豪，破解支黨，大猷克寬兩參將，皆知勇可任，徒以江南人素柔輒，賊未登岸，望風奔潰。文武大吏，未能以軍法繩下，而有司往往以軍法脅持富人，巧索橫斂，指一科百，師行城守，餉犒百物，類多乾沒，十不給一。廉謹之士，又謂南人善謗，低頭束手，不敢動一錢，於是公私坐困，戰守無策。治釋柯喬，起盧鏜，而賊船聯翩滿海，破昌國臨山霏巒乍浦青村南匯吳松江諸衛所，圍海鹽太倉嘉定，入上海掠華亭海寧平湖餘姚定海諸州縣，焚劫殺戰污辱，慘於正統時，而通番奸豪，又言忬大猷擄巢非計，且搖動忬，忬薦鏜起爲閩參將，代克寬。克寬以副總兵將屯金山，閩人故忌鏜，勦鏜凶險不可用。南京言官，又復薦鏜。三十三年，遂犯江北，海門如臯通州，皆被殺掠。是時復用盧鏜爲參將，而以俞大猷爲浙直總兵，未幾工部侍郎趙文華以海賊猖獗，請禱海神，遂遣文華行禱，公私勞費不貲，皆歸囊橐，比忬改大同巡撫，徐州兵備，李天寵代忬，南兵尙書張經提督浙閩江南北軍務，有王江涇之捷。文華素忌經，天寵遂奏經天寵逮詔獄，論死西市，而以浙江巡按胡宗憲代天寵。南戶部侍郎楊宜代經，自後賊益熾，縱橫出入二十六郡，文華還朝未幾，又出監督諸軍，搜括官庫富豪金寶書畫數百萬計，交通蒙蔽，以敗爲功，以功爲罪，雖有沈莊梁莊之戰，竟莫救荼毒之慘。兩浙江淮閩廣所在徵兵集餉，提編均徭，加派稅糧，截留漕粟，扣除市帑，請給饅課，迫脇富民，釋脫凶惡，濫授官職，浪費無經，其爲軍旅之用，幾十之一。征發漢土官兵，川湖貴廣山東西河南北靡不受害，臨賊驅之不前，賊退遣之不去，散爲賊盜，行者居者。

成受其害。於是外寇未寧。而內憂益甚矣。宗憲計擒賊首王直。浙江西。江東稍得安靖。浙東溫台。江北淮揚。閩中嶺表。尤被其毒。已而俞大猷被中傷。盧鏜代之。賴朝廷聖明。大猷得不死。江北巡撫李遂有廟灣之捷。入南兵部爲侍郎。唐順之代遂。而福建巡撫王詢數有功。畏纒引疾去。宗憲以擒直功。陞右都御史。加太子太保。敍子錦衣千戶。先是文華陞工部尙書。以論吏部尙書李默。卽加太子太保。又以征倭功。加少保。子廕錦衣千戶。不數月。文華削籍。千戶譎戍榆林。自壬子。倭奴入黃岩後。十年閩浙江南北廣東人皆從倭。大抵賊中多華人。倭奴直十之一二。久之。奸頑者嗜利。貧窘者避徭賦。往往喜賊至。而貪殘之吏。又從而驅之。封疆之臣。輒請添官。當事者不敢阻。於是添設都御史三人。總兵一人。副總兵二人。參將十三人。兵備副使十一人。諸將校近百人。田賦倍於常科。徵徭溢於甲式矣。二十八年。日本遣使周良等入貢。三十一年。入寇浙東。三十二年。入寇上海。三十三年。犯嘉興。指揮周應登等戰死。陷嘉善。薄通州。夜至崇明。知縣唐一岑死之。三十四年。寇江陰。知縣錢錕戰死之。七月。突入歙縣。流劫績溪。至蕪湖。犯南京。江南大擾。三十五年。寇浙江。破慈谿。殺掠甚慘。九月。胡宗憲以計誘通倭逆賊徐海。不可得。未幾。圍倭。海死。獲其衆。十一月。獻俘。三十七年。三月。寇福建。犯浙江沿海諸邑。三十九年。陷永寧。寧德。倭寇興漳泉三府。患最酷烈。將帥皆飾僞捷。賄嚴嵩。父子得賞賚。四十一年。寇興化。四十二年。總兵戚繼光。俞大猷等破倭於平海衛。倭患始息。四十四年。復入寇。副總兵郭成擊於海中。沈其舟。斬獲甚衆。自後。絕倭跡矣。至萬曆二十年。倭中有平秀吉者。號關白。起人奴。雄長六十六州。善用兵。向與朝鮮往來互市。窺朝鮮弛備。於四

月間分遣巨酉行長等擁倭舟數百艘。猝至朝鮮。破尙慶道。分陷諸郡。鮮朝望風潰。王倉卒奔王京。令次子瑄攝國事。奔平壤。復走義州。願內屬。是時八道幾盡沒。王子就獲。旦暮欲犯中國。請援兵急。廷議先遣行人薛藩諭其王。匡復而聲言大兵卽至。五月遼陽副總兵祖承訓等至安定。攻平壤。全軍覆沒。惟訓僅以身免。報至。朝議震動。於是瀕海天津至淮陽咸戍守。命兵尙書石星往度。時有游客沈惟敬者。請走倭營。宣諭星惑之。以爲遊擊。乃以數騎往。歸報情形。繼命兵侍郎宋應昌爲經略。遼東總兵李如松爲大將。軍至朝鮮。而惟敬適歸。謂倭行長等願退平壤。以西如松知其詐。遂渡大同江。二十一年正月。至平壤。倭并據戰。倭遂遁。得級千餘。而參將李寧等復追殺。斬獲頗多。而朝鮮平安黃海等四道盡復。王歸平壤。倭并據王京。如松等進兵。去王京九十里。至碧蹄館。猝遇倭大戰。天雨。地多稻畦。我兵不利。退駐開城。時倭在王京者幾二十萬。且聲關白揚帆入犯。於是水陸濟師。奪龍山。焚其積粟數十萬。天暑師頓絕域。瘟疫盛作。石星急圖休息結局。於是又用惟敬議款。於是封貢之議起矣。請於朝。如奏。乃以遊擊周宏謨同惟敬往諭倭。獻王京。返王子。倭果棄王京。如松等入王京。朝鮮王還王京。中國兵久疲。以次撤歸。而石星以倭據釜山。請留兵防守。俟倭盡歸。乃撤。於是以三千戍王京。而沈惟敬歸。自釜山。同倭酋小西飛等來請款。而犯咸安等處。如故。兵科都給事中張輔之謂倭聚釜山。本伴退誘撤兵。圖漸逞。無故請款。非人情。今犯咸安。情形已露。宜節制征剿。七月。倭送王子陪臣歸。而我師勢難久羈。是時石星一意主款。而經略侍郎宋應昌亦欲借倭退弛擔。因謬依違其間。然策倭多詐。每陳兵難盡撤狀。前後奏多異詞。大兵渡江。歸各鎮。

而上旨許封不許貢。應昌復遣沈惟敬入倭營，促謝表急完局。而部議諸兵盡撤，止留總兵劉綎一軍。惟敬歸，又請封貢並行，且言和親事。於是禮部郎中何喬遠等忿請罷封，給事中林材等疏叅督臣朋欺。而遼東都御史韓取善請封貢並絕。九月，朝鮮請許貢保國。上怒，切責羣臣阻撓封貢。擬御史郭實等詔小西飛入朝決計。於是以前都督李宗成充正使，都指揮楊方亨同惟敬往。然取封之名尙未定。時禮部謂日本原有王，未審存亡。而有文祿三年歷可證，或謂易關白二字，以所居島封之。上竟封日本，而行長以下封都督有差。而遼東總督李化龍力言不可。於是封秀吉爲順化王。時報倭船東移，石星遂謂封事必可行矣。二十四年，正使未抵釜山，惟敬詭云先往演禮。私奉秀吉冠服不成禮。朝議方圖戰守，廷臣交章請罷封。上怒責其抗違，仍以方亨充正使，加惟敬官爲副。而惟敬愈舞智。二十五年二月，方亨徒手歸。惟敬徐持表來，案驗潦草用圖書，不奉正朔。而方亨乃始吐頰末。上怒，惟敬辱國，石星彌縫，罪伏皆論如律。而倭又大舉。於是以前書邢玠爲經略，總兵麻貴爲備倭大將軍。如朝鮮，自惟敬死，倭無嚮導。九月，大戰於青山，斬獲甚多。十二月，攻石城不利，爲倭所乘，敗績。二十六年九月，始大進兵。屢獲全勝。十月，抵其塞。會平秀吉死，各倭歸心。於是水陸進兵。至十一月，而南海蕩平。倭遁錦山，殲焉。捷聞，兵盡撤。賞賚有差。朝鮮國王李昫上表謝。自是日本不復通中國矣。其俗男子魁頭斷髮，黠而文身。婦人被髮屈紉，皆跣足間用屨。其喜盜，輕生好殺。天性然也。物產金、銀、琥珀、水晶、硫黃、水銀、銅、錢、白珠、青玉、蘇木、胡椒、細絹、花布、螺、蚶、漆器、扇、犀象、刀、劍、鎧、甲、馬、交、市。華人喜得童男女，錦綺、絲、絳、瓷、針。

真臘

真臘本扶南屬國。一名占臘。在東海中。隋始通中國。唐神龍中。并扶南而國分爲二。其南近海。多陂澤。爲水真臘。北多山阜。爲陸真臘。後復合爲一。宋宣和初。封爲真臘國王。慶元中。破占城。立其國人爲占城王。占城遂爲屬國。又有參半真里。登流眉。蒲甘等國。皆屬真臘。聚落頗衆。地亦廣。洪武六年。國王忽兒那遣素亦吉郎表獻方物。賜歷文綺。朝貢至明季不絕。其俗尙華侈。東向爲上。右手爲潔。縣鎮風習。大類占城。王三日一視朝。婚娶燃燈不息。急耕稼。產銅金。諸香象。翠羽嘉樹異魚。

暹羅

暹羅本暹與羅斛二國。在南海中。暹土瘠。不宜耕稼。羅斛土平衍。種多穫。暹仰給焉。元至正間。暹降羅斛。洪武四年。暹羅斛王參烈昭毘牙。遣素思俱儕刺識悉替奉金葉表朝貢。賜大統歷。十年。遣子昭祿羣齋奉金葉表貢象及方物。遣使賜詔及暹羅國王之印。十六年。給勘合文冊。令如期朝貢。永樂元年。稱暹羅國。十五年。瑣里人昭綠羣膺哆囉誦刺爲王。遣素必上表貢方物。乞量衡式。賜古今烈女傳。金綺量衡。令三年一朝貢。宣德中。稍減賜物。著爲令。後貢不絕。其國方千餘里。羣山環繞。峭拔崎嶇。地下溼。土疎惡。氣候嵐熱不齊。自占城西南舟行七晝夜至其國。王宮壯麗。民樓居。其樓密聯。檳榔片藤。繫之甚固。藉以藤蓆竹簟。寢處於中。王白布纏首。腰束嵌絲帨。加錦綺。跨象或乘肩輿。尙釋教。國人效之。好爲僧尼。婦人多智。夫聽於妻。妻與中國人私。不爲怪。男陽嵌珠玉富貴者。範金盛珠。行有聲。婚則羣僧迎婿至女家。僧取

女紅貼男額。稱利市。喪禮貴者灌水銀葬。民間鳥葬。言語大類廣東。俗澆浮。水戰好鬪。喜寇掠。市用海肥。袁海爲鹽。釀秫爲酒。產寶石奇香異木。翠羽獅犀角白象白鼠。蘇木賤如薪。色絕勝六足龜珊瑚。

蘇門答刺

蘇門答刺。卽古蘇文達那。西洋之要會也。東南大山。西北距海。連阿魯那孤兒黎伐三國。自滿刺加西南行。順風五晝夜。至答魯蠻村。舍舟陸行十里。至其國。無城郭。有大溪入海。海口大灣。船至此往往沒溺。洪武中國王遣人奉金葉表貢馬及方物。永樂三年。國主鎖丹罕難阿必鎮。遣阿里來朝貢。封爲蘇門答刺國王。賜印誥金幣。五年來貢。已而王與花面王戰。敗。中矢死。子弱不能復讎。其妻發憤。令其國曰。能復此讎者。我以爲夫。與共國事。有漁翁聞之。率衆敗殺花面王。王妻遂從漁翁。永樂七年。漁父遣使來貢。上喜。厚賜之。十年。遣使至其國。故王假子率部衆殺漁翁王。王子蘇幹利率衆奔於崙山。時時相侵。欲復讎。十一年。太監鄭和擒送京。伏法。漁翁王子感激。貢方物甚夥。宣德中。貢使數至。用金葉表。十年。封其子嗣王。皆有賜。後朝貢不絕。風俗淳厚。言語和媚。室廬婚喪衣服物產。類滿刺加。田磽穀少熟。番舶往來。財貨充。物人饒富。市用金錫錢。惟酋長好殺。殺人輒取血浴身。花面王者。卽那孤兒王也。國小僅比大村。祇千餘家人。皆聲面。以故號花面。風俗語言。類蘇門答刺。

瓜哇

瓜哇古閩婆國。又名莆家龍。元稱瓜哇。其國分東西二王。所屬有蘇吉丹打板打網底勿諸國。洪武三年。

王昔里八達刺八的占必奉金葉表貢方物及黑奴三百人納元所授宣敕已而明使至三佛齊瓜哇要而殺之十三年王八達那巴那務遣使奉金葉表朝貢上遣其使還詔諭責王遂絕其使永樂二年其國東王遣使朝貢請印與之五年西王都馬板與東王戰滅東王時我舟過東王城西王殺我百七十人西王懼遣亞烈加恩謝罪敕詰責西王令償死者黃金六萬兩已而遣人貢萬兩禮官請索如數上曰朕利金耶令遠人知畏耳獨其金賜鈔幣諭之十六年西王楊惟西沙遣人獻白鸚鵡正統八年令三年一貢後如期至其國四鄉初至杜板僅千家二酋主之流寓多廣東漳泉人又東行半日至屬村中國人客此成聚落遂名新村約千餘家村主廣東人番舶至此互市金寶充溢人富饒又南水行可半日至淡水港乘小艇行二十餘里至蘇魯馬益亦有千餘家半中國人港傍大洲林木蔚茂有長尾猿數萬又水行八十里至漳沽登岸西南陸行半日至王所居滿者伯夷僅二三百家總領七八人王宮甌墉高三丈方三十餘里屋高四丈地覆板蒙藤花蓆跣趺而坐民居茅茨甌庫坐臥於內王蓬頭頂金葉冠胛繫嵌絲帨腰束錦綺佩短刀跣足跨象或乘牛民男蓬頭女椎髻上衣下帨男必腰刀刀極精巧刑無鞭撻罪不問輕重藤繫刃殺之市用中國古錢衡量倍於中國盜磨綺帛國人大抵三種西番賈胡居久者服食皆雅潔中國流寓者尙回回教持齋受戒曰唐人土人有名無姓尙氣好鬪顏色黝黑猿頭赤腳信鬼坐臥無椅榻飲食無匙箸啖蛇蟻蟲蛆與犬同寢食不爲穢也婚男造女家後五日迎婦金鼓刀盾前後甚都婦裸被髮跣足繫嵌絲帨戴被金珠綵飾寶妝喪有水葬火葬大葬惟死者所欲產金珠銀犀角象牙玳瑁

青鹽檳榔椒香蘇木枕榔木吉貝倒掛烏綵鳩綠鳩紅綠白鸚鵡白鹿白猿猴。

古俚

古俚大國。西洋諸番之會。去中國十萬里。西瀕海。南距柯枝。自柯枝海行可三日。至永樂元年。王馬那必加刺滿。遣使朝貢。五年。遣太監鄭和。賜王誥幣。陞賞其將領。有差。王好浮屠。敬象牛。老死傳外孫。否則傳弟。無外孫弟。傳善行人。族類分五種。如柯枝王。南毘人。不食牛。將領回回人。不食豬犬。家晨起用牛糞塗地。煨牛糞爲糞。佩之。每旦水調抹額及股。國事皆決於二將領。士宜麥。多馬。俗尚信義。行者讓路。道不拾遺。海濱爲市。通諸番。用金銀錢。以葫蘆爲樂器。紅銅絲爲絃。歌聲相協。鏗鏘可聽。刑無鞭笞。輕斷手足。重罰金。誅戮沒產。夷其族。有西洋布曰摵黎。本出鄰國坎夷巴。匹闊四尺五寸。色絲間花。帔闊五尺。產孔雀。白鳩。馬無餘鳥。諸香。常貢金絲寶帶。金絲細如髮。結花綴八寶珍珠。鴉滑石。

淳泥

淳泥本閩婆屬國。在西南大海中。統十四州。洪武四年。王馬漢沙遣使奉金表銀箋。貢方物。賜金綺。永樂三年。遣使封其國主麻邪惹加那。乃爲淳泥國王。賜印符誥幣。六年。王率其妃及子來朝。遣使迎勞之。福建至南京。王上金表獻珍物。妃箋獻中宮。東宮上宴。王奉天門。是年王卒於會同館。諡恭順。葬石子岡。樹碑立祠。有司春秋祀。封其子遐旺嗣。賜玉帶金銀綺幣器皿。使送歸國。遐旺請封其國後山。賜名長寧鎮。國上爲文刻石。後不時入貢。俗以板爲城。以銅鑄甲。煮海爲鹽。釀秫爲酒。喪葬有棺盛。無器室。宇宏敞。

原田豐利習尙奢侈愛敬華人王服頗效中國產片腦諸香象牙吉貝玳瑁鶴頂

滿刺加

滿刺加永樂三年王西利八兒速刺遣使奉金葉表朝貢言願內附爲屬郡效職貢七年太監鄭和充册封使賜印誥錦綺封爲滿刺加國王九年嗣王拜里迷蘇刺率其妃及子五百四十人來朝上御奉天門宴王賜玉帶羽儀鞍馬金銀錢鈔錦綺王妃冠服子姪從人賞各有差十年遣使送還國十二年王母來朝貢厚賜之二十二年宣德九年王復來朝貢賜亦厚正統十年後數遣使來朝貢天順三年王無答佛哪沙卒子舟茫速沙請封遣使册立爲王成化末給事中林榮行人王乾亨奉使溺海死磨子入監讀書後不時入貢其國舊名五嶼東南距海西北皆山地瘠鹵故未稱國隸暹羅歲輸金五千兩既奉我正朔始不隸暹羅王白帛纏首衣青花袍躡皮屨乘輪俗澆樸尙回回教民舍如暹羅婚喪大類瓜哇聯榻跣坐列木爲舟泛海而漁旁海人畏龜龍龜龍高四尺四足身負鱗甲露長牙遇人卽嚙嚙卽死山有黑虎墓小或變人形白晝羣入市覺者擒殺之

歐邏巴

歐邏巴居中國之最西自古未通中國明朝嘉靖間始有西商循小西洋東來貿易於廣東之香山懸嗣後其國名道侶者每附其舶而來以人非一國故計其里有八萬九萬亦有近十萬者皆以海程計勢迂迴若有陸路可通不過五萬餘里其山川則南起地中海北至水海徑一萬一千二百五十里西起西海

福島東至阿北河徑二萬三千里共七十餘國大國計十有一其地中海則有甘的亞諸島西海則有意而蘭大諳厄利亞諸島云入中國者類皆學道之人出遊四方傳宣其國之天主教瀕行亦拜辭國主然非奉命來修貢事初有國儒利瑪竇齋獻天主像西琴自鳴鍾諸方物於萬曆中入都朝見神宗嘉悅納其所獻方物敕光祿日給廩餼一時搢紳皆與之遊瑪竇聰慧數年通中國典籍病卒賜葬於阜城門外二里溝曰利泰西墓嗣有龍華民等接踵而至內有旁通歷學者幾人崇禎初年上諭日食不合推數恐大統歷法差訛於時禮尙書徐光啓疏薦湯若望鄧玉函羅雅谷三人修正歷法召取入京朝見闕局於東長安街作觀星臺使修歷日給廩餼遂推測著書每月又各賜卓兒銀兩未幾玉函雅谷相繼卒若望乃以新法製進黃赤全儀地平日晷及星球測天儀器新法歷書內庭親測屢旨褒嘉敕禮部議行之崇禎十一年賜若望欽寢天學扁額尋若望進天主像及方物懷宗命供像於宮中十五年傳兵部尙書陳新甲至東閣密述上傳內言西洋礮乃中國長技聞有無間大將軍名號命若望商確鑄造工部辦料又命若望傳習兵仗局內監習法若望共鑄造無間大小銃二十餘位大者重一萬二千餘斤次者三千餘斤小亦不下數百斤又命若望教放銃法及條礮火藥城守書進覽十六年正月命若望同恭順侯吳惟英於都城講究火器法以資演鍊十六年四月大學士周延儒出督師請諸火器并命若望隨往十六年五月命若望爲空心礮臺式懷宗覽大悅褒嘉之十六年八月命若望造望遠鏡二具於是每月給費用銀三十二兩賚子稠疊十六年十月命若望赴薊督軍前調度及傳習採法火器水利等項教授完日來

京十六年十二月。欽賜扁額曰旌忠。十七年正月。賊渡河急。特遣大學士李建泰。出山西勦撫。題薦若望。而晉王審烜。亦疏請命若望前往山西。指授火攻。及屯田水利開採諸事。方至真定。而賊度居庸關逼都城。微若望還。其風俗歐邏巴大小諸國。自國王以及庶民。皆奉天主耶穌教。諸異學不容竄入。國主互相結媼。世爲和好。財用百物。有無相通。不私封殖。其婚娶。男女大約三十。女子至二十外。臨時議婚。不預聘。皆一夫一婦。無敢有二色者。君臣冠服。各有差等。賤見貴。少見長。以免冠爲禮。男子二十已上。概衣青色。兵士勿論。女人以金寶爲飾。服御羅綺。佩帶諸香。至四十或未四十而寡者。卽屏去衣素衣。酒悉以葡萄釀成。不雜他物。其酒可積至數十年。當生子之年。釀酒。至兒年三十娶婦用之。酒味愈美。無葡萄處。則用牟麥釀。會客不以勸醉爲禮。有犯醉者。終身以爲詬辱。飲食用金銀玻璃及瓷器。議會用椅桌。如中國制。其屋有三等。最上者。純以石砌。其次輒爲牆。木爲梁柱。石屋輒屋。築基最深。可上累六七層。高十餘丈。地中亦有一層。既用窖藏。又以除濕。瓦或用鉛。或輕石板。或陶瓦。凡輒石屋皆歷千年不壞。牆厚而實。外氣難通。冬既不寒。夏亦不溽。祭葬之禮。與中國同。異參半。喪服尙黑。取幽冥之意。棺用木石或鉛。鉛取在水無朽壞。人子追念祖先。爲之誦祭。天主求福。不焚燒楮錢鏤錠。醫分內外二科。內科又爲二。有專以草木爲藥者。有兼用金石煅煉之藥者。其用草木。又有專蒸露以爲藥者。其學藝則有字。以二十三字母互配而成。人物之名。凡萬國語言風雨鳥獸之聲。皆可寫出。蓋隨音成字。不以字命音。國王廣設學校。一國一郡。有大學中學。一邑一鄉。有小學。小學選學行之士爲師。中學大學。又選學行最優之士爲師。生徒多者。

至數萬人。其小學曰文科。有四種。一古賢名訓。一各國史書。一各種詩文。一文章議論。學者自七八歲學至十七八。學成而本學之師儒試之。優者進於中學。曰理科。初年學落日加譯言辨。是非之法。二年學費西加譯言察性理之道。三年學默達費西加譯言祭性理以上之學。總名斐錄所費。亞學成而本學師儒又試之。優者進於大學。乃分四科。聽人自擇。一曰醫科。主療病疾。一曰治科。主習政事。一曰教科。主守教法。一曰道科。主興教化。皆學數年而後成。學成師儒又嚴考閱之。取中方許任事。學道者專務化民。不與國事。治民者秩滿後。國王遣官察其政績。詳訪於民間。審其功罪之實。以告於王。而黜陟之。其諸國所讀書籍。皆聖賢撰著。從古相傳。而一以天主經典爲宗。若後人有作。必合於正道。有益人心。乃許流傳。又四科大學之外。別有度數之學。曰瑪得瑪第加。亦屬斐錄所科內。此專究物形之度與數。度其完者以爲幾何大。數其截者以爲幾何多。二者或脫物而空論之。則數者立算法家。度者立量法家。或體物而借論之。則數者在音相濟。爲和音律。呂家度者在天透運。爲時立歷法家。此學亦設學立師。但不以之取士。百工匠作。皆明度數之學。其製造備極精巧。土產五穀六畜。與中國同。日用以麥爲主。其五金晶石瓊瑤玻璃。尤多用造宮室精器。至於蠶絲棉花花草果品。大率多同中國。所異者如絨緞之類。有鎖鞞多羅絨。有金銀絲緞。布則以利諾草爲之。視棉更堅潔。此布用壞。又可擠爛爲紙。有火浣布。古人火化人屍。以此布包之。其骸燼灰存布內不散。便貯罐中。以葬於高塔之上。果以葡萄爲上。大如中國桃李。別有阿利機孟桃。果類皆中國所無者。花以香爲美。其名玫瑰者最貴。與中國花不同。取蒸爲露。可當香。亦可當藥。

榜葛刺

西天有五印度國。榜葛者東印度也。永樂六年王嚮牙思丁遣人朝貢。九年至太倉。命行人往宴勞之。十二年王塞弗丁遣人奉金葉表獻麒麟。國最大。自蘇門答刺海行過翠藍島至浙地港。更小舟行五百里至鎖納兒港。登陸行三十五里至其國。地廣人稠。財物豐衍。甲於諸鄰國。國有城郭。王及諸官皆回回人。男祝髮。白布纏頭。圓領長衣。束綵帨。踴皮屨。市用銀錢。海肥五領山最高大。氣候常熱如夏。賦十二刑。笞杖徒流。官有印章。行移軍有糧。陰陽醫卜。百工技藝。大類中國。有衣黑白花彩。綵帨佩珊瑚琥珀。纓絡繫臂。硝子鐳歌。舞侑酒者。曰根肖。速魯。奈奈。蓋優人也。能作百戲。以鐵索繫虎。行市中入人家。解索坐虎於庭。裸而搏虎。虎怒交撲。撲虎數回乃已。或手投入虎喉。虎亦不傷。戲已仍繫之。家人爭以肉啖虎。勞戲者錢。歷有十二月。無間。風俗樸厚。人好耕殖。一年二熟。產檳鐵。翠羽。琉璃。蛇馬。桑漆樹。絲繇尤多。鎗。箭最巧。利布數種。有關四五尺者。蔘黑蔘。勒闊四尺。背面皆毳絨。厚可五分。卽兜羅錦也。白樹皮布。膩滑光潤。如鹿皮。椰菱爲酒。檳榔當茶。

錫蘭山

錫蘭山在大海。海中有翠藍山。最高大。自山東南乘風可三日。至赤卯塢。塢人穴居。男女皆裸。若野獸。不粒食。食芭蕉子。波羅密魚蝦。又西海行可十日。至佛堂山。泊舟虎濱海。山麓有臥佛寺。佛榻寶飾極華麗。又西北陸行五十里至王居。王尙釋。重象牛。煨牛糞。灰塗體。飲牛乳。不食其肉。殺牛者罪死。王宮民居。

且必調牛糞塗地而禮佛。國富饒。地廣人稠。亞於瓜哇。民上裸。下纏。輓加壓腰。去髮毫。留髮布纏之。女椎髻於後。下縈白布。飲食不令人見。產青紅黃鴉忽石水晶。海洲有珠池。日映光浮起。閃閃射日間。歲一淘珠。諸番賈爭來市珠。土宜稻不宜麥。市用金錢。重麝香綺絹青瓷器銅錢樟腦。永樂九年。王亞烈若奈兒鎖里人絕我使途。太監鄭和俘至京。十年封耶巴乃那爲王。赦亞烈若奈兒還國。耶巴乃那故王族人。一名不刺葛麻把思刺查。國人以爲賢。故封之。遣使送歸。詔諭其國。正統十年。遣使來朝。貢珠寶石。後貢使不絕。

蘇祿

蘇祿在東南海中。人鮮粒食。食魚蝦螺蛤。短髮纏卓纒。煮海爲鹽。釀蔗爲酒。織竹布爲業。氣候常熱。永樂十五年。其國東王巴都葛叭答刺。西王巴都葛叭蘇哩。嗣王叭都葛巴刺卜。各率其妻子頭目來朝。貢珍珠玳瑁諸物。賜王冠服玉金帶蟒龍金銀錢鈔錦幣器皿。王妃王子女嬭咸頭目賜物各有差。三王者。東王爲尊。西嗣二王副之。東王歸次德州卒。命有司營葬。爲文樹碑墓道。留其妃妾及僕從十人守墓。三年還國。遣使封其長子都麻合爲蘇祿國東王。十九年遣使來貢。後間入貢無常期。

柯枝

柯枝一名阿枝。東連大山。西南北皆海。自葛蘭山海西北行。一晝夜可至。永樂二年。王可亦里遣入朝。貢請封其國大山。詔封爲鎮國山賜碑文。是時太監鄭和使至其國。國王鎖里人也。首纏黃白布。上衣下

縵絲帔束綵壓腰。綴楓木葉苦室。國人五種。曰南昆。與王同類。祝髮。線懸脛。爲貴族。次回回人。次富有財者。曰哲地。次牙僧。曰革全。又次卑賤者。曰木瓜。木瓜濱海而居。業漁樵。屋簷不得過三尺。上衣不過膝。途遇南昆。哲地。卽伏。候過乃起。王尙浮屠。敬象牛。建寺。範金爲佛。每旦鳴鐘鼓。汲泉灌佛。頂數回。已乃禮之。有曰濁脫者。蓋優婆夷。娶妻不剃胎髮。髮縷縷垂後。牛糞灰塗體。行吹大螺。妻隨之。乞錢。氣候常熱。多雨。市用金銀錢。銀者十五當金錢一。產珠象牙蘇木。

祖法兒

祖法兒亦名左法兒。東南皆海。西北重山。自古徂西北。海行十晝夜可至。無城郭。俗尙回回教。體幹修碩。語言樸實。王白布纏頭。衣青花絲帔。或金錦袍。靴履乘轎跨馬。前後列象。駝馬鼓吹。氣候常如秋。市用金銀銅錢。文人形永樂中。王亞里遣人來朝貢。宣德中。又來朝貢。產西馬。駝鶴頂。駝難。福鹿片。腦沈。乳香。乳香卽樹脂。諸奇藥。以易中國紵絲瓷器。駝雞如鶴。長三四尺。脚二指。毛如駝。行亦如之。駝單峯或雙峯。皆可乘。

溜山

溜山四面濱海如洲。在西海中。有石門如城關。土瘠。無城郭。依山聚居。八村稍大。皆以溜名。可通舟楫。餘小溜無慮三千。土人曰。此北弱水三千也。人巢居穴處。不識菽粟。啖魚蝦。無衣草葉。蔽前後。舟行遇風。失入溜卽溺。溜山傍有牒幹國。皆回回人。俗淳厚。業漁。好種椰樹。氣候常熱如夏。市用銀錢。產龍涎香。海肥。

椰皮結繩可貫板成舟。塗瀝青堅如鐵釘。鮫魚一名溜漁。織絲帔甚精緻。亦有織金帔。永樂中國王亦速。遣使來朝貢。

南泥里

南泥里又曰南巫里。隸浮泥。自蘇門答刺舟行三晝夜可至。東距黎代。西北距海。南連大山。山南際海僅千餘家。皆回回人。俗樸實。王居類樓。高廣嚴整幽潔。市用銅錢。少穀食。食魚蝦。西北大海卽西洋。中有帽山平頂。土人稱爲那沒黎。番船皆以此山爲指南。山下淺水有珊瑚樹。大者二三尺。分枝婆娑可愛。依山居人二三千家。所謂阿孤植者。華言王也。

黎代

黎代小國。南連大山。北際海。西距南泥里。東南連那孤兒。居民一二千家。推一人爲首。隸蘇門答刺。言語服用與蘇門答刺同。山多野犀。

明書卷一百六十七

列傳二十一

四國傳三

哈密

哈密本古伊吾廬地在燉煌北大磧外西北羌胡往來要路也元封忽納失里爲威武王已而改封肅王卒弟安克帖木兒嗣國初置甘州五衛於張掖肅州衛於酒泉涼州衛於武威西寧衛於湟中又置山丹永昌鎮番莊浪四衛高臺鎮夷古浪三千戶所自陝西蘭州渡河千五百里至肅州肅州西七十里爲嘉峪關太宗初設關外七衛曰哈密曰安定曰阿端曰赤斤蒙古曰曲先曰罕東曰罕東左七衛皆在嘉峪關西哈密又在六衛西東去肅州西去吐魯番各千五百里北至瓦剌數百里永樂二年改封安克帖木兒爲忠順王以頭目馬哈麻火只等爲指揮等官分其衆居苦峪城三年忠順王卒無子兄子脫脫先是俘蠻夷邸朝議哈密爲西域入貢孔道宜釋脫脫令嗣王乃賜金印誥命玉帶文綺遣使送還令察諸番向背凡諸番貢物表文譯上四年賜王及其祖母速哥失里母妃從母綺幣有差是年速哥失里遂脫脫敕諸酋復立脫脫爲王六年脫脫暨祖母各遣使朝貢九年脫脫卒敕都指揮哈納爲都督僉事守哈密

是年封力帖木兒爲忠義王。賜印誥玉帶守哈密。卒。從父子李羅帖木兒嗣。仍封忠順王。賜誥印。十二年。行在驗封員外郎陳誠使西域。還言哈密城在平川。可三四里。東北二門。王稱速壇。人僅數百戶。顯非一種。多蒙古回回人。習俗各異。產馬。駝。玉石。鑛鐵。大尾羊。陰牙角。城北大山。西南東皆平曠。地多醜鹵。宜稼麥。豌豆。農耕亦用糞壤。人獷悍好利。西域三十八國。入貢經哈密者。輒攔出入。索道路錢。洪熙元年。貢硫黃。上詰邊臣。哈密何以有硫黃。正統四年。貢玉。求紵絲。與四表裏。天順四年。貢紙。金箔。薑桂。茶礬。成化元年。令歲一貢。貢不過三百人。至京不過三十人。貢物馬。駝。玉石。鐵器。諸獸皮。三年。以忠順王外孫爲都督。賜銅印金幣。八年。都督赴京。嗣官。貢馬。駝。加賞。時酋者林。秋。李。羅。帖。木。兒。無子。王母努溫答力理國事。九年。吐魯番速壇阿力。欲以哈密掠赤斤諸夷。王母不從。酋王母金印去。遣番離散。王母外孫都督把他木兒子罕慎。避居苦峪。其奸狡者。陰附阿力。窺伺塞下。上遣高陽伯李文。通政使劉文。討阿力。調罕東赤斤番兵數千。駐苦峪。不敢進。阿力遂輕中國。文等謬言不見吐魯番。遂還。王金印竟爲阿力所留。益侵掠諸城郭及屬夷。十四年。阿力死。子阿黑麻稱速壇。未壯。二十年。守臣乘間請封罕慎。嗣忠順王。入哈密。罕慎貪殘。國人怨恨。西域諸夷。貢使往來者。苦罕慎要索。亦怨恨。二十三年。罕慎言。瓦剌有克捨太師。革捨太師。克捨死。其弟阿沙亦爲太師。革捨弟阿力阿古多兀王。與阿沙亦讎殺。西走據哈密。瓦剌尋退去。宏治元年。阿黑麻強曰罕慎。非脫脫族。安得王哈密。哈密我當王。欲殺罕慎。畏我不敢發。好語罕慎曰。吾爲若聯姻。若爲王。益安無外侮。罕慎喜。許阿黑麻。阿黑麻至哈密。誘罕慎預經結盟。遂殺罕慎。亦未敢顯言。

據哈密即遣使入貢言罕慎病死國亂乞遣大通事和番立我爲王居哈密領西域職貢兵部尙書馬文升言外夷北狄最強屢入貢乞通事不聽阿黑麻小夷且與哈密各有分地不可輒通使亦不得王哈密彼入若貢我亦不拒請敕阿黑麻諭令還王母及金印還我哈密時王母已死四年遣哈密頭目寫亦虎仙齋敕諭阿黑麻以金印地池來歸遣使朝貢厚賞之陞寫亦虎仙爲都督僉事文升言哈密有回回畏兀兒哈刺灰三種共居一城種類不貴不相下北山又有小列禿野也克力數種強悍時擾哈密必得元遺孽嗣封理國事庶可攝服諸番與復哈密不然未得休息乃立安定王族孫陝巴爲忠順王安定王者本脫脫種落令頭目奄克孛刺阿木郎輔陝巴至哈密六年諸番索陝巴犒賜不得阿黑麻又恨阿木郎剋賜物掠其牛馬遂入哈密殺阿木郎擄陝巴及金印去大學士邱濬謂文升曰哈密事重須公一行文升曰方隅有事臣子豈可辭勞但西域賈胡賈窺利不善騎射古未有西域能爲中國大患者徐當靜之濬曰有識言不可不慮文升請行諸大臣不可請敕兵部侍郎張海都督繼謙行視經略時阿黑麻貢使寫亦滿速兒等在京師令海至河西遣使使二三人與邊通事致敕諭阿黑麻歸陝巴金印諸夷使爭欲去海不可乃遣哈密夷人以敕往阿黑麻竟留不報海不得已修嘉峪關捕哈密奸回通阿黑麻者二十餘人戍廣西請絕西域貢七年春海謙不俟命輒還逮下獄降海山西參政謙奪俸閑住文升言吐魯番恃其強悍哈密奸回又反復欺負中國不懲創彼益輕中國請安置寫亦滿速兒等於閩廣閉嘉峪關絕西域貢令諸夷歸怨阿黑麻當是時西域諸夷皆言成化間我入貢皇帝先遣中貴人逐我河南至京宴

賜甚夥。今不撫我。我泛海萬里。貢獅子。謂我開海道。卻不受。即從河西貢者。宴賞亦薄。天朝棄絕我。相率從阿黑麻。且拒命。中國能奈我何。哈密奸回。又附阿黑麻。阿黑麻遂復入哈密。自稱可汗。大掠罕東諸夷。諜言糾夷數萬。用雲梯攻肅州。其蹂甘州報至。文升曰。彼虛聲挾我也。吐魯番至哈密十數程。中經黑風川。哈密至苦峪。又數程。皆無水草。貢使往返。皆馱水行。使我謹烽火。明斧候。整兵以俟。彼至肅州。我以逸待勞。縱兵出奇一擊。必使彼匹馬不返。已而阿黑麻西去。令頭目牙蘭以二百餘人據哈密。文升曰。非用陳湯故事。此曾終不畏。文升召肅州撫夷指揮楊焄至京。撫其背曰。汝諳夷情。知西域道路。朝廷今欲擒斬牙蘭。汝計安出。焄曰。此賊點非襲之不可。罕東哈密有捷徑可進兵。兵可不十日至。文升曰。余欲選罕東番兵三千爲前鋒。我兵三千殿後。各持數日熟食。兼程襲之。何如。焄曰。善。八年。令河西巡撫許進調兵。寧清率兵至肅州。久駐關外。候罕東兵不至。乃出大路。乏水草。行不能疾。牙蘭諷知遁去。我兵入哈密。斬首六十。得陝巴妻女。獲牛羊三千。哈密脅從者八百餘人。皆不殺。攜歸住四徽。師還糧乏。士馬亦多物。故然。西域自是知畏中國。文升言兵雖抵哈密。然未獲牙蘭。首功亦少。進寧及太監陸開不遵節制。徒取空城。無益邊事。獨軍士遠征勞苦。宜陞賞。上念邊臣出塞有功。闡歲祿二千石。寧陞左都督。加俸百石。進左副都御史。清都督僉事。九年。阿黑麻又襲破哈密。令撤他兒及奄克孛刺住刺木城。奄克孛刺密結瓦剌小列禿。襲斬撤他兒。奄克孛刺還守哈密。阿黑麻人圍哈密。哈密人舉火。小利禿見之來援。退走。守臣奏

乞令羈留貢使。往諭阿黑麻納款。文升曰：阿黑麻未見遣使上款書，不許。是秋進改陝西巡撫。十年秋，阿黑麻令人送陝巴還哈密。其兄馬黑上書言：西域諸國不得貢，怨阿黑麻。今悔過，乞許與黑婁諸國入貢。及還，寫亦滿速兒等文升言：此賊挾詐，俟陝巴金印至甘州，取寫亦滿速兒等於闐廣。是冬，起王越爲太子太保，左都御史總制甘涼等處邊務，經略吐魯番哈密。十一年，越出河西取陝巴。至甘州，令哈密三種都督回回、寫亦虎仙、畏兀兒、奄克孛刺、灰拜迭力迷失、佐陝巴、奄克孛刺、罕慎弟也、恨吐魯番亦與陝巴不協，越以罕慎女也。先主刺妻，陝巴結好，奄克孛刺未幾越卒。是秋，賜陝巴大帽蟒衣，玉帶象笏，復封爲忠順王。於寫亦滿速兒等西歸時，哈密三種人久苦吐魯番，不願還。文升請許半留肅州，往來自便。十二年春，陝巴至肅州，畏番衆不肯出關，守臣遣參將率兵護行。又賞赤斤蒙古諸番，令逐程防護至哈密。是夏，寫亦虎仙致賞賜於吐魯番，遂與吐魯番諸夷使入京朝貢。十三年，阿黑麻及黑婁諸國皆遣人朝貢。十七年春，陝巴嗜酒，拈剋國人，頭目者力克哈等，迎阿黑麻次子真帖木兒守哈密。陝巴棄城走沙州。真帖木兒罕慎外孫也。年十三，不肯來哈密。哈密人曰：陝巴走，哈密城空，恐爲野也。克力達子所據。真帖木兒始至刺木城，其兄滿刺兒乞守臣令人來守哈密。真帖木兒自刺木城入哈密，守臣令官舍董傑及奄克孛刺往哈密，密撫夷衆，諭迎陝巴還。頭目阿孛刺不聽，必欲立真帖木兒爲王。奄克孛刺與傑等擒殺阿不刺等六人，餘黨畏服。守臣令都指揮朱瑄率兵送陝巴入哈密，撫送真帖木兒還吐魯番。時阿黑麻死，諸兄讎殺真帖木兒，懼不肯還。曰：奄克孛刺我外祖，願依之。瑄慮陝巴疑貳，攜真帖木兒居甘州。正德元

年陝巴死其子拜牙卽嗣封幼弱守臣恐真帖木兒還來侵哈密留不遣三年滿速兒稱速壇遣人朝貢乞還真帖木兒兵部尙書劉宇曰是謂質其所親愛不許四年滿速兒與拜牙卽乞還真帖木兒下守臣議五年真帖木兒走出城追而獲之六年守臣請歸真帖木兒下兵部會請敕宴賜真帖木兒及滿速兒拜牙卽并其親目七年冬令哈密三都督奄克孛刺寫亦虎仙滿刺哈三送真帖木兒西還八年春至哈密奄克孛刺不肯去寫亦虎仙滿刺哈三送至吐魯番八月拜牙卽淫暴欲與奄克孛刺叛中國往吐魯番奄克孛刺不從自哈密奔肅州拜牙卽棄城走入吐魯番滿速兒令頭目火者他只丁與寫亦虎仙滿刺哈三入哈密取金印火者他只丁又令哈密都指揮火者馬黑木等至甘州索賞哈密諸酋譯書言拜牙卽棄國從番乞卽差人守哈密巡撫趙鑑謬謂滿速兒忠義令火者他只丁寫亦虎仙滿刺哈三守城勤勞差撫夷官送吐魯番金幣二百明年正月撫夷官纔至哈密滿速兒率衆亦至分據刺木等城真帖木兒又言河西大饑窘人死亡且半甘州城南黑河可引灌城於是滿速兒及火者他只丁牙木蘭虎力奶翁寫亦虎仙滿刺哈三日夜聚謀侵甘肅番文索金幣萬萬還我哈密否卽插旗甘州門牙木蘭者本我曲先人與寫亦虎仙等專伺我虛實外挾強番內要厚賞自京師至甘肅徧置奸細巧爲交結肆行反間然亦專與哈密爲讎未敢窺嘉峪關也時總制諸御史鄧璋請專敕大臣一人經略哈密大將督兵戰守特敕四川討賊都御史彭澤總督甘肅軍務統延安固原諸鎮兵防遏吐魯番夷勿使內侵遂勸西海卜亦刺敕寫亦虎仙等共守哈密敕責滿速兒送回拜牙卽十年春澤至甘州火者他只丁牙木蘭侵赤

斤王子莊澤以段布銀器并敕令通事與三都督送吐魯番奄克李刺時在甘州言我與番世讎不肯去吐魯番得賞物以金印與寫亦虎仙以哈密付滿刺哈三澤召還掌院事巡按馮時雍又言吐魯番未聞請罪尙數侵邊下兵部尙書王瓊議乞留澤河西不允是冬寫亦虎仙等入京朝貢當是時吐魯番四出侵掠關外諸衛及苦峪諸城殘破河西藩籬又結瓦剌窺河西十一年李昆代鑑巡撫請敕滿速兒送還拜牙卽滿速兒不聽令火者他只丁牙木蘭復據哈密滿速至沙州脇土巴部落入嘉峪關令肅州奸回斬巴思高彥名等內應攻肅州遊擊芮寧參將蔣存禮禦之敗績兵備副使陳九疇發憤捶死諸奸回及通賊都督失拜烟答馮城拒戰卻之又急調屬夷兵劫其老營遣人結瓦剌擣巢穴破其三城吐魯番大創又盡發寫亦虎仙數十年傾陷哈密奸罪坐謀叛論死時失拜烟答子米兒馬黑麻入貢在京巧賄權奸突入長安左門稱冤下錦衣衛會兵部三法司奏行河西訊報十三年逮昆九疇至瓊請廷拘獲殺澤九疇昆降浙江副使澤九疇削籍是秋吐魯番貢使至京兵部請繫獄輔臣梁儲不可乃已十四年刑部會訊脫寫亦虎仙死會上幸會同館寫亦虎仙米兒馬黑麻因權倖得見上賜國姓隨上南征嘉靖改元詔逮寫亦虎仙復論斬死獄中瓊謫戍澤起爲兵部尙書九疇僉都御史巡撫甘肅明年失拜烟答子米兒馬黑木寫亦虎仙子米兒馬黑麻皆論死三年滿速兒大舉入寇至甘州九疇先登力戰旣解甘州圍又夜率衆間道兼行抵肅州內外夾擊敗番兵殺火者他只丁慮退去關中守臣奏河西危急遣兵部尙書金獻民都督杭雄率師西討獻民至蘭州諸番已爲九疇所敗出嘉峪關獻民用九疇議請遷發夷使

閉關絕貢。四年，牙木蘭復據哈密，侵肅州。牙木蘭又入沙州。五年，起故輔臣楊一清提督軍務。一清言：「我既不能制其命，又無以服其心，徒絕彼之貢使，不能阻彼之犯邊。」乞還九疇，議遷烟瘴夷，使解驪息兵。未幾，一清召入內閣，尚書王憲代一清，盡出平涼，羈留夷使，往諭吐魯番，令悔過服罪，歸我哈密。六年，諸議禮臣桂萼、方獻夫、霍輅、張璠先後上言：「哈密不靖，本由彭澤澤得召用，楊廷和曲庇澤也。」乞急用王瓊以寧西鄙。七年，滿速兒令牙木蘭據沙州，索羈留貢使，否且率帖木哥士巴攻肅州。牙木蘭不肯，欲殺牙木蘭。牙木蘭懼，棄菽麥數萬，率老稚萬人奔肅州，乞白城山金塔寺住牧。守臣議留肅州，是春起瓊，兵部尚書兼右都御史憲代瓊至河西，反澤所行事。是秋，天方撒馬兒罕哈密頭目各朝貢，滿速兒亦乞通貢。瓊爲奏上，乞還羈留使朝貢夷，未報。吐魯番酋虎力納咱兒糾瓦剌侵肅州，遊擊將軍彭澤兵備副使趙載禦之。退去時，璠萼必欲論九疇死，并罪廷和。刑部尚書胡世寧力爭九疇忠勇，再保全河西，得不殺。謫戍邊。澤獻民間住八年，吐魯番貢獅子夷人，至乞歸哈密通貢。瓊又奏言：「吐魯番歸我哈密，乞令失拜烟答子米兒馬黑木守哈密，貢使二十人，遣入京放歸，羈各番貢使男婦凡千人，安插沙州。」上巴帖木哥部夷五千四百人於白城山，哈密都督亂吉孛刺部夷在肅州東關，赤斤都督掌卜達兒子瑣南東在肅州北山金塔寺，罕東都指揮枝丹在甘州南山。下兵部議：「當是時，世寧爲兵部尚書，欲專守河西，謝哈密無煩憊中國，輒上議，必欲復哈密。」寧下兵部議，世寧言：「昔太祖建北平行都司，去境四百里，而文皇昇之兀良哈，文皇郡縣交趾，而宣宗棄之安南，哈密非大寧交趾比，况其初封忠順王，爲我外藩者，乃元遺孽。」永樂二年

封三年卽故立其兄子。未幾卽絕。而強立非其子孫者。嗣之。蓋常三立。三爲吐魯番所擄。乃叛我卽戎。及勞中國。臣竊以爲此與國初所封元孽爲和寧王。順寧王。安定王者等耳。安定王又在哈密之內。近我甘肅。今亦不知其存亡。何獨以一忠順王故。耗我金幣。疲我士馬。窳我財力。瓊等不聽。竟從瓊言。牙木蘭以世寧言本歸正人。非叛鹵者。唐悉怛謀事可鑒。遂留不遣。是時瓊言滿速兒歸我哈密。奉約束朝貢。然哈密竟爲吐魯番所據。安插諸衛夷落。皆爲吐魯番所逐。失其故土。住牧河西塞上。北鹵盤窟西海。瓦剌結巢北山。河西三面皆有寇盜矣。明年滿速兒遣虎力奶翁及天方諸夷使貢方物。又索牙木蘭。諜言諸番要約。俟虎力奶翁歸。復侵肅州。會虎力奶翁歸。道病死。瓦剌又攻吐魯番。我亦有備。稍得休息。而來降人哈六刺言。番酋欲以哈密城與都督米兒馬黑木管理。兵部因請許其通貢。著令三年或五年爲期。夷使雖多。十二入京。餘留塞上。是後哈密竟爲吐魯番所據。河西守臣防禦。不暇及西鄙事。史官曰。要之哈密守與否。固不足爲中國利害也。聞之秦中老人曰。吐魯番哈密。屢勤經略。我義未直。兵則何畏。彼求方棘。予則何恩。况染指貢獻。不足以示信。侵漁宴賜。不足以示廉。而一時士習文。皆重聲譽。而略綜核。騰口說。而賤實事。不知中國之於夷狄。固不可過撫以納侮。亦不可深拒以窮兵。唯順則撫。故賞斯恩。唯逆則拒。故威斯畏。况西域賈胡。倚玉石。易以射利。藉黃麩以厚生。苟取之有備。又何患焉。

赤斤蒙古

赤斤蒙古。周西戎。戰國月氏。秦漢屬匈奴。武帝取爲酒泉。燉煌二郡。唐末沒於吐番。宋入西夏。永樂二年。

故韃靼丞相苦尤之子塔力尼爲千戶。賜誥印。尋陞爲衛。塔力尼爲指揮僉事。十一年。遣頭目鎖南吉利刺獻叛酋老的罕。陞指揮使。厚賜之。塔力尼卒。子且旺失加嗣。宣德後。朝貢不絕。國內白山最大。多草木禽獸。產金駝馬。肉菴容。自吐魯番陷哈密。種人遂散亂。不能通貢。使成禮矣。

安定阿端

安定。韃靼別部也。地廣袤千里。無城郭。其俗馬乳釀酒。毡帳爲廬。產馬蛇玉石。洪武七年。撒里畏兀兒安定王卜烟帖木兒。遣使貢鎧甲刀劍。賜金綺。令分其酋長爲阿端阿真苦先帖里四部。賜卜烟帖木兒銀印。稱安定王。八年。設安定阿端二衛。分統四部。卜烟帖木兒卒。遣使諭祭。賜嗣王敕誥金綺。王遣使貢謝。宣德初。與曲先叛。討平之。天順三年。安定王遣使來貢。自後朝貢不絕。成化中。爲吐魯番殘破。遂服屬吐魯。安定王苗裔。不可考矣。

曲先

曲先。古西戎部落。永樂四年。設曲先衛。以土酋散西思爲指揮同知。宣德元年。叛。討平之。論功加國師禪師秩。已而遣人入貢。正統二年。頭目黑麻亂。遣指揮火丁貢方物。嘉靖中。衛人牙木蘭爲吐魯番所劫。牙木蘭驍勇。吐魯番時時令率衆侵哈密。擾甘肅。已而與魯番疑貳。擁衆來歸。吐魯番請還哈密。牙木蘭欲殺牙木蘭。警動諸屬夷。兵部尙書胡世寧以爲不可。遂止。自後大抵嘉峪關西諸衛。皆爲吐魯番侵擾。不復能爲中國藩蔽云。

罕東

罕東本西戎部落。洪武二十五年，侵塞涼國。公玉討之，會哈咎遁去。三十年入貢，立罕東罕東左二衛。官其酋長，鎮南吉刺思爲指揮僉事。永樂二年，鎮南吉刺思與其兄答力斐等十六人貢馬，陸鎮南吉刺思爲指揮使，以塔力斐爲指揮同知。頭目奴奴指揮僉事，賜冠帶鈔幣有差，自是歲貢不絕。二罕東皆在沙州城。沙州古墩煌地，嘉峪關外諸衛。二罕東最弱，成化後，吐魯番迭入哈密。二罕東不能支，流散各城。正德中，陳九疇擊退吐魯番，沙州人稍得生聚，復歸耕牧。比牙木蘭再入沙州，益殘破，其酋土巴等叛附吐魯番。嘉靖中，王瓊撫住白城山，肅州餉粟歲且萬石，徒損邊儲而已。

撒馬兒罕

撒馬兒罕，漢屬賓也。在哈烈東北三千里，東去嘉峪關九千九百里，東西相距千里，地平，山川鐵門峽，阿尤河最大，風景偉麗，土田膏腴，宜五穀，頗類中原，獨勝諸國。城依平原，濠深險，北有子城，王居高廣，在北隅，王白帽，城中遠巷縱橫，肆市稠密，西南番賈多聚於此，市易用銀錢，禁酒，尙回回教，有拜天屋，青石雕鏤極精巧，以羊皮裹經文，文字泥金書，人物秀美多藝能，尤善作室，國東有養夷沙鹿，海牙塞藍達失干，西有渴石迭里迷，諸城皆隸焉。洪武二十年，國主帖木兒遣使貢駝馬，詔厚賜之。二十二年貢馬，二十四年貢海青，賜敕賚予之。二十七年，帖木兒遣使迭力必失表貢馬二百匹，表曰：恭維大明大皇帝受天明命，統一四海，仁德宏布，恩養庶類，萬國欣仰，咸知上天欲平治天下，特命皇帝出膺運數，爲億兆之主。

光明廣大昭然天鏡。無有遠近咸昭臨之。臣帖木兒僻在萬里之外。恭聞聖德寬大。超越萬古。自古所無之福。皇帝皆有之。所未服之國皆服之。遠方絕域昏暗之地。皆清明之。老者無不安樂。少者無不長遂。善者無不蒙恩。惡者無不知懼。今又施恩遠國。凡商賈之入中國者。使觀覽都邑城池。富貴雄壯。如出昏暗之中。忽覩白日。何幸如之。又承敕書。恩撫勞問。使站相通。道路無壅。遠國之人。咸得其濟。欽仰聖心。如照世之杯。使臣心中。豁然光明。臣國中部落。聞茲德音。惟知歡舞感戴。臣無以報恩德。惟仰天祝頌。聖壽福祿。如天地達大。永永無極。照世杯者。其國舊傳有杯。光明洞徹。照之可知世事。故云。二十八年。敕遣給事中傅安等使西域。留撤馬兒罕。永樂五年。頭目哈里。令虎反達送安等還。且貢方物。厚賜之。賜安等衣。安等言帖木兒本元駙馬。卒孫哈里嗣。上遣人祭帖木兒。賜哈里爾書銀幣。已而兀魯伯貢馬。復遣安報使。兀魯伯即哈里也。洪熙元年。安始還國。請敕命吏部言。安歷年雖久。未經考覈。例不得授。宣宗曰。安使遠夷。留二十餘年。良苦。何例爲。與敕。正統十二年。又貢馬玉石。四年。又貢成化十九年。阿黑麻王貢二獅子。光祿日給酒飯。二十三年。廣東布政司陳選言。撤馬兒罕使臣怕六灣貢獅子。欲於廣南浮海。從滿刺加更市獅子入貢。不可。貴異物。開海道利賈。胡貽笑安南諸夷。宏治三年。由南海貢獅子。禮官倪岳言。南海非西域貢道。請卻之。自後貢皆從嘉略關入。嘉靖中。其國稱王者五十三人。皆遣人朝貢。產金銀玉銅錢。珊瑚琥珀琉璃。麝苾思檀。水晶鹽花。葵布名馬。獨峯駝。大尾羊。狻猊。

天方

天方古篤沖地。舊名天堂。又名西城。宣德中其王遣沙喇來朝貢。俗用回回歷。風景融和。四時皆如春田。沃稻饒。居民樂業。男女辨髮。馬乳拌飯。產馬金琥珀玉石珊瑚犀角。貢從嘉峪關入。

迭里迷

迭里迷在撒馬兒罕西南。去哈烈二千餘里。新舊二城。相去十餘里。王居新城。東距阿木河。河廣。非舟不可渡。城內外居民僅數百家。牲畜蕃息。多魚。河東地隸撒馬兒罕。河西有蘆林。多獅子。宣宗時入貢。

渴石

渴石在撒馬罕西南二百六十里。城據大村。周十餘里。四面水田。東南近山。中有園林。故元駙馬帖木兒居也。規模極宏壯。堂四隅白石柱如玉。牆壁雕鏤。盡飾金碧。綴琉璃。西行十數里皆委曲。山多奇樹。又西去三百里。大山屹立。中有石峽。兩壁懸崖。宛如斧劈。行二三里出峽。口有門。夷人曰。此鐵門關也。間遣使入貢。

養夷

養夷在賽藍。撒馬兒罕亦力把力蒙古諸部落間。數相侵擾。以故人無寧居。惟戍卒數百人。處孤城中。城四面皆亂山。東北有大溪。西流長數百里。溪旁頽垣破廬。蕭然草莽。宣宗時入貢。

遼失干

遼失干在賽藍西。去撒馬兒罕七百里。城據平原。甚狹小。四面平岡。多林木。溪流蜿蜒。土宜五穀。人稠密。質樸饒衣食。太宗時入貢。

卜花兒

卜花兒在撒馬兒罕西七百里。城居平川。周十餘里。民物富庶。市里繁華。戶口萬計。地平衍宜五穀桑麻。天氣溫和。冬不付火。蔬菜不絕。產絲繅布帛六畜。大類中國。太宗時入貢。

吐魯番

吐魯番一名吐爾番。在火州西百里。古交河縣安樂地也。城方一二里。地平。四面皆山。氣候多暖。少雨雪。土宜麻麥。有瓜果羊馬之利。人皆屋居。信佛法。多僧寺。城西二十里有崖兒城。城僅二里。居民百餘家。相傳故交河縣治。又云古車師國。永樂十二年。行在驗封員外郎陳誠使至其國。誠言城西北百里有靈山。最大。夷人言此十萬羅漢涅槃處也。近山有高臺。臺旁有僧寺。寺下皆石泉林木。從此入山。行二十里至一峽。峽南有小土屋。屋南登山坡。坡有石屋。屋中小佛像五。前有池。池東有山。山石青黑。遠望紛如毛髮。夷人言此十萬羅漢洗頭削髮處也。循峽東南行六七里。登高崖。崖下小山疊疊。巒巒秀麗。羅列成行。峯下白石城堆似玉。輕脆不可握。堆中有若人骨狀者。甚堅。如石。文縷明析。顏色光潤。夷人言此十萬羅漢靈骨也。又東下石崖。崖上石筍如人手足。稍南至山坡。坡石瑩潔如玉。夷人言此辟支佛涅槃處也。周行羣山約二十餘里。悉五色砂石。光焰灼人。四面峻壑窮崖。天巧奇絕。草木不生。鳥獸鮮少。云甘肅大抵無

北寇患專鎮防西夷種中吐魯番最好狡宣德五年始遣使來貢正統以後亦常來貢成化宏治間番酋阿力阿黑麻父子擾西鄙鹵哈密忠順王罕慎陝巴拜牙卽是時專伺哈密至正德遂數犯甘肅語在哈密傳中嘉靖十一年西域貢稱王者七十五人貢使至二百九十人禮官夏言請國稱一人王大學士張孚敬言西域稱王者多恐彼自封授或部落相稱先年入貢稱王亦有三四十人者答敕並稱王今盡裁奪恐夷情觴望下禮兵部議言言西域諸國稱王者唯吐魯番天方撒馬兒罕三國如日落諸國名甚多朝貢絕少且與吐魯番諸國不相統宏治正德間吐魯番十三人貢天方正德間四人貢稱王者率一人或二人三人餘稱頭目親屬嘉靖二年八年稱王者天方至六七人吐魯番至十一二人此兩年間撒馬兒罕至二十七人內閣言先年亦有稱王至三四十人者併數三國耳乃今吐魯番十五王天方二十七王撒馬兒罕五十三王併數則百五六十王前此所未有况所稱王號原非舊文卽有同者地面又異宏治時回敕書圖稱一王若循撒馬兒罕往年故事類答王號人與一敕恐非所以尊中國而嚴外夷也自後各執賜敕率其部落貢不如期使不如數任意往來勢難阻絕驛傳勞煩宴賜頻數徒竭財力以役遠夷計亦左矣上從言言當是時吐魯番強殘破嘉峪關外七衛及城郭諸國地大人衆非復陳誠奉使時矣

黑婁

黑婁在嘉峪關西近吐魯番世結好黑婁夷入中國道經吐魯番其地山水草木禽獸皆黑男女亦然宣

德七年始遣使朝貢。

鹽澤

鹽澤在崖兒城西南去吐魯番三千餘里。在平川中廣不二里。居民百家。黑的兒火者稱王居鹽澤。既死。土酋強者統之。產石鹽。堅如白石。可琢爲器。以盛肉食。不鹽而鹹。附西域諸國入貢。

哈烈

哈烈一名黑魯。在撒馬兒罕西南。去嘉峪關萬三千里。元駙馬帖木兒之子沙哈魯居其地。國人稱爲速魯檀。猶華言君王也。東有俺都淮。八刺黑諸城。皆隸焉。洪武二十五年遣使詔諭。會長內附。賜金綺。永樂七年。頭目麼賚等朝貢。十二年遣行在吏部員外郎陳誠使其國。正統二年。指揮哈只等貢馬。玉石城方十里。居平川。川廣百里。四面大山。王居東北山。壘石爲屋。屋若高臺。無棟梁。牆壁牕牖。皆金碧琉璃。門扉雕刻嵌骨。屋角屋旁。設綵繡帳。房爲燕寢所。金牀重茵。衣冠大類。亦力把力。民土房。或氈帳。以文少。故上下相與直呼名。雖王亦然。相見稍屈躬。道撒力馬力。一語握手。或相抱爲禮。致意於人。則云撒籃少炊爨。飯食就肆。無匕箸。交易用銀錢。錢三等。無正朔。時日月亦無斗斛。用權衡爲量。稅十二。國用賚焉。男髡首。衣尙白。及喪。易青黑。無棺槨。不祀鬼神。祭先於墓所。人多善走。日行可三百里。氣候常煖。市中流水。四時不斷。多水磨風磨。瓷器尤精巧。產巴旦。查鎖。伏花。毯。金銀銅。珊瑚。琥珀。水晶。珠翠。名馬。獅子。黑白文獸。白鹽如鹽澤者。多桑宜蠶。爲絨綺細密。逾中國。農不甚勞。然多獲。田美而每歲更休。地力得完也。餽贈賜予。

宴會極豐厚。男女瀆亂無恥。大抵西域城郭諸國。哈烈最鄙陋。然有學舍。聚生徒講習。諸習義省刑罰。薄賦斂。寡爭訟。好施予。務農桑。諸國又不及也。在王城中極宏偉。

默德那

默德那卽回回祖國。初國王謨罕蔘德。生而聖靈。臣服西域諸國。諸國尊爲別諳拔爾。華言天使也。國中有佛經三十藏。凡三千六百餘卷。書篆篆草楷。西洋諸國皆用之。隋開皇中國人撒叭撒阿的幹葛思始傳其教入中國。其地接天方。有地池宮室。田園市肆。大類江淮間。寒暑應候。民物繁庶。種五穀。亦有陰陽星歷藥。音樂諸技藝。人俗重殺。非同類殺不食。不食豕肉。織文雕鏤器皿最精巧。宣德中國王遣人隨天方朝貢。

俺都淮

俺都淮隸哈烈。西南去哈烈千三百里。東北去撒馬兒罕亦如之。城在大村中。村廣百里。城居十一。平曠無險峻。地沃人繁。庶稱樂土。宣德中入貢。

八刺黑

八刺黑一名八黑。在俺都淮東北。城居平川。周十餘里。南近山。無險阨。地平廣。食物豐饒。西南諸番賈聚焉。永樂中入貢。後哈烈沙哈魯各遣其子守之。而其地如郡縣矣。

于闐

于闐大國在葱嶺北二百里東西五千里南北千里漢唐皆入貢中國石晉時王李聖天自稱唐宗遣人入貢封爲大寶于闐國王宋末南遷朝貢不絕永樂六年頭目打魯哇亦不刺金遣人貢玉璞十二年吏部員外郎陳誠至其國國主微弱鄰國交侵人民僅萬計皆避居山谷間境內惟火州魯陳哈失哈力阿力稍有城邑餘皆荒垣敗屋生理蕭索永樂以後西戎奉職貢不敢輒相攻始得休息行賈諸番遂富饒桑麻禾黍宛如中土人機巧喜浮屠法好歌舞工紡織相見輒跪得問遺書戴於首乃發之稍知尊卑禮節狀貌亦似華人其山葱嶺爲大嶺下有白玉河綠玉河黑玉河產玉胡錦雙峯駝諸香珠珊瑚翡翠琥珀花藥布名馬膾膾膾金星石水銀獅子阿魏後間入貢

火州

火州在嘉峪關外行可一月至本漢車師前後王地前王治交河城卽唐交河縣去長安八千里後王治務塗谷卽唐蒲數縣去長安九千里漢元帝時置戊己校尉屯田於前王庭以其地勢高廠名高昌壘後魏初有關伯周者自稱高昌王唐太宗平高昌置西州及都督府後陷於吐番其地有回鶻雜居故又名回鶻宋時屢遣使貢元號畏元兒隸馬哈木入明號火州其東七十里有柳陳西百里有吐魯番火州城近北地卑下山色如火天氣多熱城方十餘里永樂七年土酋遣人朝貢十二年吏部員外郎陳誠言其國風物蕭條市里民居僧堂過半亦皆零落東有荒城故址云古高昌國治漢西域長史戊己校尉並居焉宣德五年火州王哈散吐魯番萬戶賽因帖木兒柳陳萬戶瓦赤刺俱遣人貢馬及玉璞後入貢不絕

俗類匈奴爲孫。事天神。信佛法。貴食馬。好騎射。時節潑水爲戲。其山川靈山蒲類海。交河爲大。產馬蛇鹽。白氈布。鑛鐵。陰牙角阿魏。

別失八里

別失八里。在西域。永樂三年。其王沙迷查干。遣人言哈密忠順王安克帖木兒。爲北鹵鬼力赤毒死。願率兵討之。上喜。遣使賜綵幣。敕令與嗣忠順王脫脫相往還。每歲輒入貢。

魯陳

魯陳一名柳城。古柳中縣地。去哈密千里。經大川砂磧。無水草。馬牛過此輒死。大風倏起。人馬相失。道傍多骸骨。有鬼魅。行人失侶。白日迷亡。夷人謂之旱海。出川西行至流沙河。河上有小岡。云風捲浮沙所積。道北火焰山。山色如火。城方二三里。四面多田園。流水還繞。樹林陰翳。土宜稂麥麻豆。有小葡萄。甘甜無核。名鎖子葡萄。氣候和煖。風俗醇樸。人二種。回回男子削髮。戴小罩刺。婦女白布裹頭。畏兀兒男子椎髻。婦人蒙阜巾。垂髻於額。大抵皆胡服。永樂宣德間皆入貢。

沙鹿海牙

沙鹿海牙。在撒馬兒罕東五百里。城據小岡。西河臨河。河名水站。勢衝急。有浮梁。其地南近山。三面皆平川。人繁庶。依崖谷而居。園廣茂。西有大沙洲。可二百里。無水。卽有水人不可飲。飲牛馬亦輒死。有臭草。根株獨立。高尺許。枝葉如蓋。春生秋死。臭氣逼人。取生汁熬膏爲阿魏。亦有細草可熬膏。味如蜜。宣德中其

會遣使入貢。

賽藍

賽藍在達失干東西去撒馬兒罕千里。城周三里。四面平原。草木長茂。流水環繞。五穀蕃殖。秋夏間草生黑蜘蛛甚小。毒甚。嚙人徧身痛楚。土人讓詛者口誦呪。以薄荷枝拂中毒處。又以鮮羊肚徧擦其體。經一晝夜痛方息。愈後皮膚如蛻脫。牛馬被傷輒死。行人宿必近水避之。宣德時入貢玉璞。

哈失哈力

哈失哈力。宣德間遣十四人來朝貢。或曰卽阿力馬力。

亦力把力

亦力把力在沙漠間。或曰焉耆。或曰龜茲。元時名別失八里。馬哈木封於此。洪武二十四年。國王黑的兒火者遣人貢馬。永樂四年。王沙迷查干遣人貢玉璞。十二年。陳誠使其國。十六年。頭目速哥克刺滿刺來朝。言歪思弒其從兄王納黑失只罕自立爲王。徙其國西去。更號亦力把力。正統二年。王也先不花遣人貢玉璞。駝馬。景泰三年。遣人朝貢。天順以來。入貢不絕。其國無城郭宮室。逐水草住牧。設帳房毼。寒暑坐臥於地。其王戴小罩刺簪。薏翎衣。禿袖衫。削髮貫耳。飲食肉酪。或食糜麥。爲毛布。多雪霜。平曠之地。夏秋略暖。深山大谷。六月飛雪。俗鬻戾。服用污穢。上下無紀律。其山白山葱嶺爲大。有熱海。然氣候常寒。產銅鐵鉛錐。黃胡粉。馬蛇。犛牛。孔雀。氍毹。阿魏。白氍布。

阿丹

阿丹近古俚。瀕海可舟行。國中富饒。有馬步勝兵七八千。鄰國畏之。永樂九年。詔中使鄭和賜命互市。遣人入貢。

白葛達

白葛達海中。小國。土瘠。俗尚佛教。宣德七年。國王遣和者里一思等朝貢。

阿哇

阿哇居海島。永樂中。王昌吉刺遣人來朝貢。

瑣里

瑣里西海中。小國。物產甚微。有撒哈刺諸異布。洪武五年。國王卜納的遣人奉金字表朝貢。圖上其土地山川。賜大統歷金幣。永樂元年。復遣人朝貢。

西洋瑣里

西洋瑣里近瑣里。視瑣里差大。物產大類瑣里。洪武三年。遣使來以金葉表文貢方物。上喜其王恭敬。涉海道遠。賜費甚厚。永樂元年。復遣人朝貢。上曰。海外遠夷。附載番貨。勿征。二十一年。西洋十六國。遣使千二百人。貢方物至京師。西洋瑣里貢獨豐美。上費予亦甚厚。

彭亨

彭亨在東南海島中並山山傍多平原禽獸稀少草樹繁茂沃土宜穀饒蔬果洪武十一年遣人奉金葉表朝貢賜綵幣永樂十二年遣人來朝貢其俗上下親狎無寇盜男女椎髻好誦佛經煮海爲鹽釀椰爲酒產片腦諸香花錫

百花

百花在海中依山爲國國中有奇花嘉樹民俗饒富尙釋教洪武十一年國王刺丁刺者望沙亦遣人奉金葉表朝貢其地產紅猴龜筒玳瑁孔雀倒掛鳥胡椒

婆羅

婆羅負山面海人多敬佛素食惡殺喜施永樂四年國王遣人來朝貢真珠玳瑁珊瑚車瑠賜王及妃文綺

阿魯

阿魯一名啞魯在西南海中土廣人稀物產亦薄永樂五年國王速魯唐忽先遣滿刺哈三附古里諸國來朝貢令內臣至其國賜王文綺後屢入貢

小葛蘭

小葛蘭小國也東連大山西南北皆海永樂中太監鄭和至其國王鎮里八遣人入貢俗尙浮屠重象牛飯和酥酪市用金錢婚喪巾服大類錫蘭山自錫蘭山別那里西別海行六晝夜可至

拂菻

拂菻在嘉峪關外萬餘里。洪武四年遣其國故民捏古倫齋詔諭之。尋遣人來朝貢。其俗土屋無瓦。貴臣如王服不尙鬪戰。鑄金銀錢。產金銀珠西錦。千年棗馬獨峯駝。巴攬。

古里班卒

古里班卒在海中。永樂三年國王遣人來朝貢。其俗土瘠。穀少。登氣候不齊。夏多雨。雨卽寒。俗質樸。男女被短髮。假錦纏頭。紅油布繫身。物產甚薄。

呂宋

呂宋在海中。其國甚小。願產黃金。以故亦富厚。人頗質樸。不喜爭訟。永樂三年國王遣使隔察老來朝貢。

合猫里

合猫里地小土瘠。國中多山。山外大海。海饒魚蟲。人知耕稼。永樂三年國王遣人來朝貢。產蘇木烏木胡椒。

碟里

碟里國在東南海中。大洲上。洲有諸港通海。人淳少訟。尙佛。物產甚薄。永樂三年國王遣使馬黑木來朝貢。

打回

打回海外小國。數爲鄰國所苦。已乃治兵器與鄰國戰。戰勝。稍得自立。永樂三年。遣人來朝貢。

日羅夏治

日羅夏治海中。小國。無他奇產。產蘇木胡椒。人頗知種藝。無盜賊。崇佛教。永樂三年。國王遣文那打時鎮來朝貢。

忽魯母恩

忽魯母恩在東南海中。國小。土瘠。物產薄。永樂三年。國王遣已卽丁朝貢。

忽魯謨斯

忽魯謨斯在西南海中。東連大山。國中土厚宜耕種。人質直。狀貌偉碩。喜作佛事。常歌舞。惡殺。永樂三年。國王遣人來朝貢。產大馬。西洋布。獅子。蛇。鷄。福祿。靈羊。馬。哈獸。

甘巴里

甘巴里在南海中大島上。人多織錦。粒食亦鮮食。永樂十二年。國王兜哇刺查遣人來朝貢。方物。

麻林

麻林居海島中。永樂十三年。王遣人獻麒麟。上喜。厚賜之。

古麻刺

古麻刺在東南海中。永樂時。王哇來頃本率其臣來朝。至福州卒。賜諡康靖。敕葬閩縣。有司歲時祭。而厚

遣其臣歸封其子爲王入貢不絕。

沼納樸兒

沼納樸兒在印度之中古所謂佛國也永樂中遣使詔諭國王一不刺金玉遣人來朝貢。

加異勒

加異勒西戎小種居人不及千家貧窶乏食常備鄰國永樂中王者麻里森那遣使來貢方物宣德間遣使朝貢。

異葛達

葛達國小民貧平川廣野草木暢茂禽獸鮮少尙佛畏刑市肆多牛羊交易用鐵錢宣德中國王常遣使十人來朝貢方物。

敏真誠

敏真誠國亦大多高山流水日中爲市諸賈皆集見中國瓷漆器爭欲得之不惜價產異香駝馬永樂中國王遣使四十人來朝貢。

八答黑商

八答黑商永樂間其王遣人來朝貢方物織皮絨鬪香木其國山川特秀人俗樸實奉佛有浮屠數區壯麗如王宮西洋西域皆商販於此大抵皆羽毛織文玉石香木之類凡布帛銀錢皆可交易。

覽邦

覽邦。洪武九年遣人來朝貢。永樂宣德中常附鄰國貢方物。其國去西域遠甚。無市買。地多沙磧。麻麥之外無他穀。山坡坳無峯巒。水亦淺濁。俗好佛。勤賽祀。有駝馬牛羊。市亦用錢。無他奇物。

火刺札

火刺札。國徼人弱。物產涼薄。四圍皆山。山鮮草木。水流曲折。亦無魚蝦。城僅里許。皆土屋板屋。王居亦陋。俗尙佛。重僧。喜中國瓷器針線。永樂十四年常遣人朝貢。

討來思

討來思。在海中。周徑不百里。城近山。山下有水赤色。望之如火。然俗尙佛。婦人主家事。市中多駝羊馬牛。亦有布縷毛褐。交易用錢。土宜麥稌。無稻穀。宣德六年常遣人朝貢。

吃力麻兒

吃力麻兒。永樂中遣使十一人來朝。貢方物。惟獸皮鳥羽罽褐之類。其俗不事耕農。喜射獵。山卑水淺。西南傍海。東北林葬深密。多猛獸毒蟲。得中國雄黃麝香瓷器甚喜。有途巷。無市肆。交易無期。用鐵錢。

失刺思

失刺思。永樂間遣人來朝貢。時遣內外官以綺幣瓷器市馬於迤西撒馬兒罕。失刺思諸國。仁宗卽位。詔諸使至十日內。就所在還京。無得託故稽留。宣德中遣使八人來朝貢。

納失者罕

納失者罕東去失利思數日程。皆舟行海中。其國山林川澤。有林木魚蟲。城東平原饒水草。可牧馬。馬有數種。最小者高不過三尺。俗敬事僧。僧所至必飲食之。願尙氣健鬪。鬪不勝者衆共噬之。永樂間遣使十人來朝貢。亦無他異產。

亦思把罕

亦思把罕於西南海中爲大國。廣袤近千里。四面皆海。西北多山。東南皆平沙。國有城堅壯。王居亦侈麗。物產豐厚。風俗樸厚。尙佛畏刑。喜施惡奪。亦有中國人僑寓者。時時出買撒馬兒罕。市多馬駝。少布帛。有珠珀而無稻黍。日食惟麥稗。粒粗壯甘美。永樂中遣使四十四人來朝貢。

淡巴

淡巴在西南海中。洪武十年國王遣人來貢。賜之金幣。其國風景秀贍。土地廣衍。泉甘而水清。草木暢茂。畜產甚夥。城以石築。屋以瓦覆。王乘輿官跨馬。頗有威儀。國人勤生種藝。織縷抱布。男女咸務常業。市有交易。野無寇盜。頗稱樂土。

甘把里

甘把里永樂間遣六人附西大國來朝貢。自言其國小。介西南海中。與諸鄰國不通交易。物產又薄。山無長林。田無宿麥。以故國用常乏。人民艱窘。然奉佛善。不求積聚。無乞丐者。

白松虎兒

白松虎兒。舊名速麻里兒。國中無大山。山卑小者亦鮮。林木無猛獸毒蟲之害。先時常有白虎出松林。遇獸不食。遇人不傷。旬月後竟不見。國人稱爲神虎。父老又曰。此西方白虎降精。以是更其國爲白松虎兒。永樂中遣使十六人來朝貢。

答兒密

答兒密。永樂間遣使十八人來朝貢方物。賜大統歷文綺藥茶。國在海中不百里。人不滿千家。有牆壘而無城郭。屋以板覆。田以牛耕。王居官舍不甚差別。產馬駝羊牛毛褐布縷。交易兼用銀錢。刑專用箠。撲屬撒馬兒罕。

阿速

阿速在西南海中爲大國。多撒馬兒罕。天方諸國人。有城倚山面川。南流入海。海有魚鹽之市。野有耕牧之利。敬佛畏鬼。好布施。惡爭鬪。物產饒。俗涼暄適節。人無饑寒。夜無寇盜。永樂中遣百十二人來朝貢。後屢入貢。

沙哈魯

沙哈魯。永樂間遣七十七人來朝貢。國在阿速西南海島中。人民醇直。恥鬪好佛。交易海中諸國。西域賈胡來市海中奇物。不惜高價。亦有價廉而得奇貨去者。沙哈魯人不識也。王及酋長居城中。有瓦屋。庶人

旅處城外田野中。村落相聚。山川環抱。畜產豐利。

西蕃

西蕃卽吐蕃。本羌屬。凡百餘種。散處河湟洮岷間。元世祖始爲郡縣。以吐蕃僧八思巴爲大寶法王帝師。領之。嗣世弟子。號司空司徒國公。佩金玉印。明興洪武六年。令諸酋舉故官授職。以攝帝師。喃加巴藏卜爲熾盛佛寶國師。元國公南哥思丹八亦監藏等爲都指揮同知。宣慰使元帥招討等官。自是番僧有封灌頂國師及贊善王。闡化王。正覺大乘法王。如來大寶法王者。俱賜印誥。令比歲或間歲朝貢。今其地爲都指揮使司二。曰烏思藏。曰朵甘。指揮使司一。曰隴答。宣慰使司三。曰朵甘。曰董卜。韓胡。曰長河西魚通寧遠。招討使司六。曰朵甘思。曰朵甘瓏答。曰朵甘丹。曰朵甘滄渡。曰朵甘川。曰磨兒勘。萬戶府四。曰沙兒可。曰乃竹。曰羅思端。曰別思麻。千戶所十七。闡化闡教輔教三王。貢使自四川入。贊化王自陝西入。每貢百人。多不過百五十人。大乘大寶二法王。貢無。每貢僧徒十人。凡諸王嗣封。賜誥製袈僧帽數珠鈴杵。以大慈恩寺刺麻僧二人充正副使。四川自黎州或天全。陝西自洮州出境。宣德元年。封大寶大乘闡教闡化贊善五王。九年。闡化王貢使亂藏等。還以賜物易茶。至臨洮沒入茶。并留亂藏等。聞上命釋之。還其茶。成化五年。封闡教輔教二王。十六年。封闡化王。皆厚賞。長河西魚通寧遠。歲一貢。貢止五六十人。多不過百人。自雅州入。正統初來貢。賞甚厚。五年。刺麻僧貢馬。十年。番僧亦貢馬。景泰四年。入貢。賞稍減。天順元年。貢賞如故。三年。尊勝寺清修翊善大國師。獲印。遣人貢舍利。成化初。番僧入貢。十二年。貢使九百人。賞

少誠。宏治二年。貢使千三百人。減賞。朵甘思。洪武十八年。令歲一貢。自雅州入。天順七年。宣慰使來貢。厚賞。董卜韓胡。亦一貢。如朵甘思。四川威茂松潘金川雜谷思達蠻諸番僧。皆三歲一貢。貢百人。多不過百五十人。或歲一貢。貢三十人。多不過五十人。洮泯番寺。歲一貢。貢一寺四五人。番簇二年一貢。大簇四五人。小簇一二人。至京。餘留塞上。洪武四年。置洮州衛軍民指揮使司。永樂九年。置洮州茶馬司。火把藏思曩日諸簇。歲納馬三千五百匹。洪武初。置河州衛。改河州衛軍民指揮使司。七年。置河州茶馬司。必里衛二州七站。西番二十九簇。歲納馬七千七百五匹。洪武十一年。置岷州衛軍民指揮使司。又置西寧衛。西寧茶馬司。歲納馬三千五百匹。市法上馬茶百二十斤。中馬七十斤。下馬五十斤。五王諸僧番簇在四川。西寧洮岷河在陝西。西寧在黃河北。洮泯河在黃河南。陝西諸番。畏宋將軍晟。四川諸番。敬信丁大夫玉。國初。爲御史大夫。出鎮四川最久。威惠並行。夷民安輯。宋晟。洪武永樂中。久鎮西陲。積功封西寧侯。丁宋皆克平羌將軍。成化十九年。西番滿松反。侵內地。巡撫都御史馬文升討定之。正德初。北狄徙居西南。蠶食諸番。勢漸吞併。識者慮其結句深入。如前代吐番吐谷渾事。當是時。狄在西海。言官言前代有屯兵青海。以絕羌狄連和內侵者。然徵輸調發。民力大困。正德十年。調朔方勁兵。逐勦寇。避走松潘。旋歸故巢。費以萬計。竟無成功。嘉靖元年。西番反。鎮守都督鄭卿討之。不能克。班師。自是歲入境。殺掠人畜。八年。洮岷番賊數至鞏昌。殺吏士。掠人畜。焚廬舍。隴右騷動。尙書王瓊請凡賊入官軍。襲至賊巢。殺之。番人畏焉。已而兵至塞防秋。套酋番賊。遂乘虛深入。臨洮鞏昌。殺掠大慘。尙書李承勛言。西番土地。被西海狡酋亦卜。

刺侵占。日益內徙。將來番湖交通。益肆猖獗。何以善後。昔漢趙充國不戰而服羌。段熲殺羌百萬。爲費以億計。內地虛耗。是知用勇將者。雖可取快目前。任老成者。必能獲萬全之策。乞廣宣帝之明。專克國之任。制馭西番事宜。悉令瓊從長區處。上從之。瓊曰。欲撫罕。必勦先令。遣遊擊將軍彭斌。鎮守都督劉文。統兵自固原進。至洮岷。分據要害。且撫且勦。撫定六十。五簇。特險拒戰者十六簇。斬首三百七十。嗣是稍帖伏。間一入貢。西番風俗。大抵皆質直樸魯。上下一心。君臣爲友。吏治無文。音樂尙琴瑟。食酪衣氈。居毳帳。務耕牧。好很鬪。貴壯賤弱。懷恩重利。尊釋信誼。其山川。崑崙山。可跋海。黃河。折支。湟水。爲大產。金銀銅錫。犂牛。名馬。天鼠皮。獨峯。駝。青稞。麥。蠶豆。獐。羊。貢物多。畫佛。銅佛。銅塔。舍利。足力。麻。鐵力。麻。瓊。瓊。珊瑚。犀角。左鬣。毛。櫻。明。盃。甲。刀。劍。遮。甲。麻。衣。馬。青。鹽。史。官。曰。西。戎。亦。能。爲。中。國。患。從。中。侯。逼。遷。西。周。附。隗。器。族。拒。東。漢。唐。連。吐。番。直。入。長。安。宋。失。熙。河。併。於。西。夏。爲。禍。不。小。中。國。以。官。賞。貢。市。羈。縻。之。西。鄙。稍。寧。止。德。以。厚。邊。防。大。弛。戎。心。遂。啓。瓊。議。欲。於。洮。岷。河。蘭。間。繕。城。堡。遠。斥。墩。廣。儲。蓄。謹。備。海。賊。勿。使。得。連。西。番。卽。有。侵。侮。請。發。精。兵。駐。臨。洮。羣。昌。扼。要。之。地。拒。之。斯。亦。良。策。哉。



明書卷一百六十八

列傳二十一

四國傳四

韃靼

韃靼北□也。卽夏獯鬻。周獵狄。秦漢匈奴。唐突厥。宋契丹。漢時匈奴最強。匈奴弱而烏桓遂盛。漢末鮮卑滅烏桓。鮮卑既衰。蠕蠕強大。與魏爲敵。蠕蠕滅而突厥起。盡有西北地。唐李靖滅突厥。五代及宋。契丹爲盛。女真滅契丹。號金。入中國稱皇帝。其別小部曰蒙古。曰太赤烏。曰塔塔兒。曰克烈。各有分地。蒙古并諸部。滅女真。及宋。國號元。入主中國。洪武元年八月。克元都。元主遁出塞。二年十月。貽書元主。三年五月。曹國公克應昌。獲元主后妃。孫買的里八剌。其太子愛猷識里達剌遁去。始知元主殂於應昌。證爲順帝。遣使致祭。封買的里八剌爲崇禮侯。愛猷識里達剌稱帝於□中。遂取□東勝興和。敗王保保。是年都督孫興祖戰歿。四年六月。納哈出侵遼東。五年正月。大將軍達等三道出塞。討王保保。三月。敗王保保於土剌河。遁去。四月。又敗敵於阿魯渾河。十一月。納哈出寇遼東。十二月。書諭元幼主曰。皇天無親。惟德是輔。君其思之。自古國家必有興廢。以小事大。理勢之常。昔我中國。趙宋將衰。爲金所逼。遷都於杭。納以歲幣。君

家亦遣使於宋。約納歲幣如金。時雖疆界有南北之分。而前後延祚百五十年。此小事大之明驗也。朕親前代。獲他君子孫。必獻俘廟社。誇示國中。其初亦有待之以恩。受之以爵者。及其後也。非煇卽殺。雖君家亦爾。宋之幼主。削髮爲僧。終不免於死。朕則不然。君之子至京。已三年。禮待有加。君宜遣使取歸。朕本布衣。生長君朝。自辛卯盜起汝潁。黃閒君家天運已去。人心已離。四海土崩。朕與師救民。一時羣雄僭稱名號者。盡爲朕所俘獲。雖君父子亦不能守其廟社。北遁沙漠。此天命非人力也。自古有識之君。孰不畏天。故特致書以達朕意。君其察焉。又書與元臣劉重德。朱彥德。言至正之君。蒙塵而崩。幼主初立。大臣無不叛去。獨二生竭力守護。今特遣使諭君。令取其子買的里八剌歸。二生宜察之。毋教入絕父子之道。六年六月。敵犯武朔州。八月犯大同。七年九月。遣崇禮侯買的里八剌北歸。八年十二月。敵犯遼東。十一年五月。寇陝西。十三年。脫火赤屯和林。沐將軍英討擒之。十二月。入犯永平。十四年正月。乃兒不花寇塞上。四月。魏國公達率諸將出塞襲。大獲。十九年冬。納哈出據金山。二十年。宋國公勝率師出大甯。永昌侯玉襲破敵。六月。宋國公勝至金山。臨江侯陳德迷失道。戰死。玉降納哈出。閏六月。敵追殺殿帥都督濮英。二十一年。玉充大將軍。出大甯至慶州。主脫古思帖木兒遁去。獲其子地保奴。及后妃以歸。脫古思帖木兒者。卽愛猷識里達剌子也。地保奴有怨言。遣使致之琉球。脫古思帖木兒爲其下也。速迭兒所殺。部落潰散。大臣立坤帖木兒爲可汗。二十二年六月。上敕禮部曰。朕削平禍亂。以一天下。二十餘年。而朔漠尙未清近。命永昌侯藍玉等率師直度大漠。俘獲其衆。主脫古思帖木兒逃竄北歸。未達和林。爲也。

速迭兒所害。惟知院捏怯來丞相失烈門等擁兵自固。既而去逆効順。率衆來歸。朕遣使授印與武官。而失烈門數稱疾。不與使者相見。爾禮部可移諭捏怯來。若失烈門有意南來。可令入朝。決意北嚮。從其所欲。古之人有殺身忘家而立名者。有保身全家而求生者。人之志固有不同。不可強也。時捏怯來等皆降。是冬。上以元兀納失里大王居和林西。命來降太子八即鎮撫。都帖木兒往招之。諭曰。昔中國大宋皇帝。主天下三百餘年。後其子孫不能敬天愛民。故天生元太祖。起漠北。混一天下。百年之間。其恩德孰不思慕。號令孰不畏懼。是時四方無虞。民康物阜。自脫歡帖木兒皇帝即位。政出權臣。法度廢弛。是以上天降亂。民墜塗炭。草野開豪傑並起。朕時在淮甸。見生民靡甯。乃與鄉黨豪傑起兵除亂。不四五年。羣雄悉定。故元番將降附者接踵而至。凡兩遣兵直抵漠北。時稱帝者。脫古思帖木兒。奔往也速迭兒之地。遂遇害。其餘士馬爲知院捏怯來。國公老撒。丞相失烈門三人所有。今已悉來降附。朕處於美水草蕃畜牧之所。俾樂生安業。朕今主宰天下。遣使諭爾。如有所言。使還以聞。朕有以處之。二十三年。丞相咬住。太尉乃兒不花。知院阿魯帖木兒。伏塞下。三月。燕王率諸侯兵出古北口降之。二十四年四月。燕王督穎國公友德諸軍出塞。捕阿失里。八月。都督劉貞。朱晟出塞。征哈梅里兀納失里。遁去。攻入其城。斬其王酋千人。二十三年。燕王巡塞。捕寇。二十六年二月。敕晉王大出塞。集諸兵敗敵。三月。敕燕王防河魯帖木兒。乃兒不花。二十九年。燕王出大甯塞。周世子有燉出北平塞。捕寇。三十一年。敕塞上諸王備寇。建文二年二月。韃靼國公趙脫力干。司徒趙灰隣帖木兒。司徒劉哈刺帖木兒。率衆歸北平。謀報寇侵邊。燕王諭韃靼可汗。

坤帖木兒并諭瓦剌王猛哥帖木兒等。三年冬。可汗使人歸款北平。寇犯鐵嶺。坤帖木兒死。鬼力赤立爲可汗。永樂元年二月。上諭鬼力赤書曰。元運旣衰。我皇考太祖皇帝受天命。撫有天下。朕以嫡子奉藩於燕。忝承天眷。入繼大統。嘉與萬邦同臻安樂。比聞北地推奉可汗正位。特遣指揮朵兒只恍惚等持金綺往致朕意。今天下大定。薄海內外皆來朝貢。可汗能遣使往來通好爲一家。使邊城萬里烽堠無警。彼此熙然共享太平之福。豈不美哉。并敕其太師右丞相馬兒哈泊。太傅左丞相也孫台。太保樞密知院阿魯台等。以遣使往來意。各賜文綺二。敵入遼東塞掠懿路。七月。又書諭鬼力赤。十月寇犯永平。是月鬼力赤阿魯台與瓦剌馬哈木戰。大敗。已而馬哈木阿魯台皆遣人入貢。閏十一月。寇灰溝村黃甫川。三年正月。阿魯台部落掃口兒來歸。曰。鬼力赤聞兀良哈密內附。遂相猜防。數遣人伺塞下。令謹備之。四年三月。書諭韃靼可汗鬼力赤。朕嗣天位。撫天下。體天心以爲治。惟欲萬方咸得其所。今海內外萬國臣順。安享太平。常遣致書可汗。謂宜通好往來。共爲一家。而可汗不悟。拘我使臣。掠我邊境。自阻聲教。夫天之所與。孰能違之。天之所廢。孰能舉之。昔者天命宋主天下。立十餘世。天厭其德。命元世祖代之。元數世之後。天又厭之。命我太祖皇帝君主天下。此皆天命。豈人力所能也。不然。元之後世。自愛猷識里達剌北徙以來。至今可汗更七主矣。土地人民。曾有增益毫末者否。古稱順天者昌。逆天者亡。爾衆甲冑不離身。弓刀不釋手。東遷西徙。老者不得終其年。少者不得安其居。今數十年矣。是何罪也。可汗聰明特達。宜敬天命。恤民窮。還前所遣使者。及掠去邊人。相與和好。用寧息爾衆。同享太平之福。願不偉哉。若果負倔強之性。

天命人窮。有所不顧。必欲力較勝負。朕亦不得獨已。中國士馬精強。長驅迅掃。恐非可汗所能支也。可汗其審度行之。文綺二表。裏致遠意。不報。五月。敕可汗部酋阿魯台。六年三月。書諭本雅失理曰。鴻臚寺丞劉帖木兒不花等。自撒馬兒罕。脫身居別失八里。鬼力赤等迎爾北行。朕計鬼力赤與也孫台。久結肺腑。爲固。未必能棄親就疎。況手握重兵。雖下有附爾者。安敢異志。爾與鬼力赤。勢不兩立矣。夫元運旣訖。自順帝後。傳愛猷識里達剌。至坤帖木兒。凡六代。瞬息間。未聞一人遂善終者。此可以驗天道。爾之保身。誠不易也。去就之道。宜詳察古帝王。如周封舜後。胡公滿於陳。夏後東樓公於杞。商後箕子於朝鮮。微子於宋。漢唐宋來。皆封前代後。我皇考太祖。於元氏子孫。存恤保全。有來歸者。皆令還。如遣脫古思帖木兒。還後爲可汗。統率其衆。承宗祀。南北人所共知也。朕之心。卽皇考與前古帝王之心。爾元氏宗嫡。當奉世祀。吉凶二途。蕃思之。如能幡然來歸。加以封爵。厚以賜賚。俾於近塞。擇善地以居。惟爾所欲。無爲下人所惑。徒擁虛名。禍機在前。有不暇顧。亦惟爾所欲。朕愛人之誠。同於曠日。今再遣劉帖木兒不花等。諭意。并賜織金文綺衣二襲。綵幣肆端。爾其審之。是冬。鬼力赤殘破。立本雅失里。叛負不相統。都督僉事吳允誠。子荅蘭柴。乘誠子別立哥等。請出塞自效。從之。七年四月。遣都指揮金塔卜歹。給事中郭驥。齎書諭本雅失里曰。邊將得爾部下完者帖木兒等二十二人來。具言衆已推立爾爲可汗。爾欲遣使南來通好。朕心甚喜。今遣都指揮金塔卜歹。給事中郭驥等。齎書諭意。可汗誠能上順天心。下察人事。使命往來。相與和好。朕主中國。可汗主漠北。彼此永遠相安於無事。豈不美哉。綵幣六表。裏用致朕意。完者帖木兒等。

朕念其有父母妻子均給賜賚。就令使臣送歸。可汗其體朕至意。并賜其臣阿魯台等綵幣。寇殺驥。五月。封瓦剌馬哈木爲順甯王。太平賢義王。把秃孛羅安樂王。賜之誥印。七月。淇國公邱福。武城侯王聰。同安侯火真。靖安侯王忠。安平侯李遠。五將軍出塞討本雅失里。阿魯台。八月。諸將盡敗沒於臚胸河。上大怒。諭諸將明年征敵。八年。上出塞至幹難河。敗本雅失里。遁去。又敗阿魯台。十一年。上巡北京。敕阿魯台。無以邱福事懷慮。漢呼韓。卽唐阿史那社爾。受享顯爵。福及子孫。爾宜效焉。特賜爾母子上幣。諭意。十月。阿魯台降。封和甯王。十二年春。上北征瓦剌馬哈木。再出塞。阿魯台時遣使至上營。言馬哈木動靜。且覘我。我兵大敗馬哈木。太平把秃孛羅於忽蘭。忽失溫。退奔至土刺河。上使諭阿魯台。阿魯台大懼。二十年三月。寇攻圍興和。守禦都指揮王祥戰歿。先是阿魯台爲瓦剌攻敗。窮蹙。以其妻孥部落奔竄而南。保息塞外。遣使奉表稱臣。貢駝馬。上以寇性黠詐。勢窮來歸。非其本心。然天地覆育。豈有所擇。納其貢使。封爲和甯王。母妻皆封夫人。賜金帛。俾仍居漠北。阿魯台感上恩。屢遣使貢馬。又遣子來朝。數年生聚畜牧。益蕃富。遂兇悻桀。使還就途劫掠。朝使至。又輒慢侮。或拘留苦之。時時遣部落出沒塞下爲寇。上常諭其使。還語阿魯台。竟不悛。至是大舉圍興和。邊將以聞。上遂決議親征。五月。上至獨石。大閱將士。六月。次威遠川。敵進攻萬全。七月。次殺胡原。獲言阿魯台部下聞兵出塞。皆憂懼叛散。繼聞上親征。阿魯台大懼。其母妻亦恨阿魯台反。時時罵阿魯台。逆天負恩。自取喪敗。阿魯台惶恐。盡棄其馬駝牛羊。輻重於闕。樂海旁北走。上遂班師。還征兀良哈。十二月。阿魯台殺其主本雅失里。而自立。本雅失里妻。率其屬來朝。乞居內

地避之。二十一年七月降胡言阿魯台將入寇。上又出塞征之。八月次萬全。□知院阿失帖木兒右納台等率妻子來降。言阿魯台今夏爲瓦剌順甯王之子脫歡所敗。掠去人畜無算。部屬潰散無統。若聞天兵復出。疾走遠避。不暇敢南向耶。上以二人爲正千戶。十月先鋒將軍陳懋至飲馬河北。遇薩裡王子也先土干率其妻子部落來歸。封爲忠勇王。賜姓名金忠。二十二年正月大同開平守將奏阿魯台部落侵塞上。初忠勇王金忠來歸。屢言阿魯台弑主虐人。遠天逆命。數爲邊患。請發兵討之。願爲前鋒自效。上曰。兵豈堪數動。朕固厭之。況下人乎。忠曰。如邊人茶毒何。上曰。卿意甚善。但事須有名。文帝常言漢過不先姑待之。比邊報至。召文武大臣議。羣臣遂請上北征。六月。上駐哈蘭納木兒河上。不見敵。遂班師。七月。至榆木川。上崩。仁宗卽位。給本雅失里妻及其外母米月各五石。洪熙元年七月。瓦喇部脫脫來歸。是年馬哈木破阿魯台。欲自立。衆心不附。乃立脫脫不花爲主。居漠北。宣德元年正月。使敕瓦剌王子捏烈忽。嗣父太平賢義王。是年馬哈木子脫歡遣人進馬。令嗣父王二年。和甯王阿魯台。瓦剌順甯王脫歡。亦力把力歪思。各遣人進貢。三年正月。遣指揮曹者赤帖木兒奉璽書諭阿魯台。四月。脫歡歪思各遣人進貢。賜之金綺。加賜歪思弓刀甲冑。四年六月。寇犯赤城。七月。寇宣府。十月。寇鵬鷄。五年。寇中諸酋相構。往來戰塞下。六年二月。上敕大同總兵武安侯亨。聞阿魯台與瓦剌脫歡戰。阿魯台敗北。部曲離散。假息近邊。卽欲來降。嚴爲警備。歸正人至。傳食至京。寇多咋舌。云受降如受敵。慎哉。八月。上遣使賜敕撫諭阿魯台。七年九月。阿魯台殺敗兀良哈。遂住牧近塞。明年二月。阿魯台遣人自遼東入貢。上敕總兵巫凱。往年敵使自

大同宣府入。今乃迂路從東協來。謹防之。七月寇入大同塞。九月阿魯台部落寇涼州。九年正月寧夏總兵史昭言。韃靼也。先帖木兒等款塞。上敕昭。寇誘詐未可輒信。或僞降怠我。慎防之。毋墮賊計。肆月阿魯台爲瓦剌所敗。遣人告難。上敕賜綺羅撫諭。八月阿魯台死。部落盡離散。瓦剌脫歡遣人朝貢。告殺阿魯台。請獻前元王璽。九月阿魯台子阿卜只俺。遣人乞歸附。上遣使撫納。以爲中府左都督。是月。朵兒只伯寇涼州。又入寧夏塞。殺掠人畜。十二月直入開平塞。千戶楊洪禦之。敵退去。是年甘肅總兵劉廣言。脫歡襲殺阿魯台。完者帖木兒。遂南寇塞上。千戶王敬禦之。擒完者帖木兒。正統元年。敵圍鎮蕃。復寇山丹。又入大同塞。是年脫歡與朵兒只伯。警殺相併。成國公勇言。兩敵合一。勢益強盛。乞敕緣邊謹備之。敵數入山丹寧夏甘肅莊浪塞。脫歡遣人貢馬。瓦剌既敗阿魯台。通兀良哈。伺塞下。二年脫歡不花遣人貢馬。厚賜之。時朵兒只伯數入塞。掠甘涼。兵部尙書王驥總諸軍禦之。出塞搗其巢。敵退。四年冬。貢馬。五年秋冬。驟貢馬。陸年冬。脫歡不花及其太師也先。遣人貢馬。賜物。王與大師等。八年也先阿魯骨遣人貢馬。也先者。脫歡之子也。當是時。脫歡不花弱而也先強盛也。先又以其姊妻脫歡不花。數年間。挾脫歡不花遣人並入貢馬。得賜金帛無算。使人皆館京師。逾春始遣還。遂桀驁不恭。時時殺掠道路。我往來通事人。變詐出好語。告以中國虛實也。先因與通事人言語。有子請婚南朝公主。通事人謾曰。爲若奏皇帝。皇帝許爾矣。也先大喜。誇諸酋曰。吾且進聘禮。十四年春。遣貳千人貢馬。曰。此聘禮也。朝廷初不知。荅詔不及和親事也。先大愧怒。七月大舉入塞。分寇大同宣府。塞上諸城堡多陷沒。羽書紛至。遣驢馬都尉井源。

等四將軍統兵四萬出禦敵。太監王振力勸上親征。從之。命郕王留守。英國公輔。成國公勇。率師從。戶部尚書王佐。兵部尚書鄺莖。學士曹鼐等扈行。官軍僅從五十餘萬人。出居庸抵宣府。連日惡風雨。源等戰敗。尸橫原野。上至大同。敵引避。誘我深入。大同太監郭敬力阻振。振始懼。請班師。又連日夜雷雨。敵輕騎逼我。八月上至狼山。朱勇兵三萬戰敗。烏兒嶺。上遂至土木。欲入懷來。振顧私。重留行。遂駐土木。旁無水泉。又當敵衝。大臣勸上行。敵騎逼我。兵不敢動。饑渴甚。壬戌。敵使來議和。召鼐草敕。與和。遣兩通事與敵使偕行。上遂移營。頃之陣動。敵乘之。我師大潰。死傷無算。張輔。曹鼐等皆死。上乘馬呼親兵突圍。不得出。遂爲敵所得。兵車衣糧盡爲敵有。癸亥。上在塞營。手書與懷來守將。索金帛犒敵。令遣人告京師。是日三更入西長安門。明日百官集闕下。是日遣人以黃金珠玉。袞龍紵絲饋也。先請還車駕。上至大同。守將劉安。給事中孫祥。知府霍瑄。出見上。獻蟒袍。上賜酋長伯顏帖木兒。諭安等曰。急獲勿資。酋又曰。酋云歸朕。情僞叵測。慎備之。安瑄等獻酒。上酌地飲。酋索城中犒軍錢。括郭敬等金銀萬餘兩饋酋。請還車駕。酋笑不應。上自大同出塞。至野松林也。先營也。先進酒。出妻妾歌舞。遂奉上居。伯顏帖木兒營。兩營相距十里。許伯顏帖木兒見上。甚恭謹。九月也。先貽書悻慢。答書言中國立皇帝。兵強食足。行當決戰。十月也。先使人來議和。還車駕。賜也。先金銀綵幣。使去數日。敵入犯。至大同廣昌。破紫荊關。殺指揮韓清等。都御史孫祥走死。遂犯京師。是時遙尊英宗爲太上皇。上皇居土城廟。敵掠北西門外。石亨于謙等營城北。都督孫鏜營城西。刑部侍郎江淵參軍事。敕交趾敗將故成山侯王通爲都督。鴻臚卿楊善爲副都御史。守京師。

漠北西城。我兵與戰。殺傷相當。敵擁上皇至城下。索大臣王直。胡濙于謙出迎。衆知敵詐。不出。以通政司參議王復爲禮部侍郎。中書舍人趙榮爲鴻臚寺卿。出見上皇也。先伯顏帖木兒擐甲。屬弓矢侍上皇。復等見上皇進書敕。上皇視漢字書。敵視番字敕也。先曰。爾皆小官。急令胡濙王直于謙石亨楊善來。上皇諭復榮曰。彼無善意。汝等宜急去。二人辭歸。敵益四面探掠。焚三陵殿寢祭器。逼宣武門。南逾蘆溝橋。散掠下邑。謙督諸軍出德勝門力戰。發大礮擊敵死無算。殺其酋鐵額元帥。石亨戰彰義門。又大捷。孫鏜王通內外夾擊。又捷。敵勢少阻。陳循于謙請召各邊精騎入援。又請下榜數道。諭回達番漢。能擒斬也。先來獻者。賞萬金。封國公也。先疑懼。而勤王兵亦稍集。是月既望也。先出居庸。伯顏帖木兒以上皇出紫荆。瓦剌可汗普化。卽脫脫不花。遣使貢馬。尋和。上不許。胡濙王直言。普化也。先君臣素不睦。宜因以聞之。上曰。善。厚賞來使。總兵昌平伯楊洪。都督孫鏜。范廣。石彪。帥兵二萬。擊零寇未去者。十一月。京師解嚴。未旬日也。先又遣使索大臣迎車駕。言使不至。來月月生時。入塞攻京城。京師戒嚴。十二月。閣喜寧誘敵。以車駕至甘州。入陝西。直趨南京。不果。而普化寇遼東。不樂出寇寧夏。深入陝西。景泰元年正月。敵入大同塞。總兵郭登擊卻之。閏五月。敵報沓至。京師譏言諸大臣潛遣家歸。民益驚懼。是月。參將許貴敗敵於黃土嶺。二月。懸賞格。殺也先賞銀五萬兩。金萬兩。封公。官太師。殺伯顏帖木兒喜寧。銀二萬兩。金千兩。封侯。是月募兵至京者九萬五千人。八月。敵入蕎麥川。偏頭關。都督杜忠擊敗之。敵入萬全。又入寧夏。至慶陽。是月車駕至大同。敵大掠蔚朔。分寇宣府諸城。時獲敵諜。言田達于導也。先與賽罕王大同王答兒不花王鐵

歌不花王鐵歌平章脫不花王分道入犯。四月許貴言敵請和。乞答使緩兵。下兵部議。謙言曩遣都指揮季鐸。指揮岳謙。往使財賂。方入穹廬。敵騎已至關口。繼遣少卿王榮。通政王復。又往。不得要領而還。今日之事。理與勢皆不可和。何者。中國與外寇。有不共戴天之讐。和則背君父而違大義。此理不可和也。敵狡貪而多詐。萬一和議既行。而彼有無厭之求。非分之望。從之則不可。違之則速變。此勢不可和也。移文詰責貴。敵入鴈門關。遣五將率兵三萬分屯真保易涿通州。以寧遠伯任禮爲總兵官。率兵五千。巡守各城。禮辭老。以都督同知劉安代之。五月。敵入河曲圍代州。賜阿剌知院敕。先是阿剌遣人貢馬。請和。邊臣留之懷來。聞上文武大臣請遣太常少卿許彬。錦衣衛都指揮同知馬政。譯敵使情。偽彬等言。敵果欲議和。罷兵。且奉還上皇。奏至。召陳循等對文華殿。諭曰。也先背逆天道。庶留上皇。讐不共天。奈何言和。循等頓首請賞。邊使且好語諭阿剌。緩其詐謀。京營邊塞。嚴爲防禦。上曰。善。敕阿剌曰。我朝與爾。瓦剌和好。也先違天犯順。朕兄太上皇帝。與師問罪。也先又輒遮留。奪我生靈。殘我邊徼。朕嗣承大統。宗室臣民咸請興兵討罪。復讐。朕念也先屢請送大駕回京。以故遣人賜書授賞。乃也先誘詐反覆。今阿剌使至。亦奏云云。朕欲從爾。但聞也先尙聚衆塞上。意在脇挾。義不可從。卽阿剌必欲和好。待瓦剌諸部落北歸。議和未晚。不然。朕不惜戰也。先凶傲不悛。悔禍恐無及。使回。朕加恩賚。厚賜阿剌答來意。六月丙戌。上皇至大同。敵屢掠大同宣府。京師戒嚴。阿剌遣人入貢。至京也。先使亦至居庸關。詔附賞物。我使與偕往。勿遣入京。七月癸卯。遣禮部侍郎李實。大理少卿羅綺。指揮馬顯。偕阿剌使人使瓦剌。遣書可汗曰。我國家

與可汗自祖宗來和好往來。恩意甚厚。往年奸臣專滅使臣賞賜。遂失大義。遮留朕兄。今各邊奏報。可汗尙留塞上。殺掠人民。朕欲命將出師往討。念彼此人民。上天赤子。付朕與可汗管攝。可汗殺朕人。朕亦殺可汗人。與自殺之何異。逆天莫大焉。朕不敢恃中國之大。人民之衆。輕於戰鬪。恐逆天理。近得阿刺使奏言。已將各家軍馬約束回營。是有畏天之意。深合朕心。特遣使齎書幣達可汗。其益體朕意。副天心。敕也。先曰。自爾祖父至爾。我國家待遇甚厚。曩因小隙連兵。將臣弗戒。大駕淹留。昨已遣人重齎金帛奉迎。至三至四。爾不發不報。以故使命不通。此非朝廷之過。乃者縱兵四出。殺掠人民。皆天赤子。欲其飲啖著衣。長養生息。若殘害其生。逆天無道。天之讐也。近阿刺使來言。遣還各家兵馬。仍議和好。是能畏天愛民。真丈夫矣。而近邊時聞劫掠。是情與詞異。朕固不惜大戰。但恐害天赤子。遠天意。故特命使臣往諭此意。太師其念舊恩。順上天愛民之意。罷兵息戰。圖永遠之福。又敕諭阿刺知院。遣可汗及也先阿刺。各白金百兩。金織文綺。八普化。亦遣皮兒馬黑麻入貢。至懷來。守將楊信以聞。敕護至京。右都御史楊善。工部右侍郎趙榮。都指揮同知王息。正千戶湯允勳。偕皮兒馬黑麻使邊。禮部尙書胡濙言。太上皇帝蒙塵已久。宜卽附善等進服食。不報。癸亥。禮部右侍郎李實。及也先使人把禿等。至自瓦利。甯陽侯陳懋。吏部尙書王直等言。實至自塞中。言敵欲和。且還大駕。又引實至上皇所。上皇諭。敵請和非。僞。慎勿疑阻。朕需少物作人事。汝歸爲朕取來。朕得南還。卽令朕守祖陵。或爲庶人。朕亦甘心。乞再遣實奉衣物禮幣。迎復上皇。上不聽。曰。敵譎叵測。實歸善復去。不必更使。卽以迎上皇意。敕也先。附其使去。便。丙寅。懋直等再上言。往者

普化阿剌遣人議和。皇上不吝一价。今也先悔禍。專使行成。竟不一報。適啓戎心。後患無已。上亦不聽。下大臣再議。丁卯。李實言。臣自瓦剌還時。也先與臣約。八月五日。來迎上皇。臣言需歸朝請旨。未敢竊定期約也。先言正使卽未遣。須先遣一二人。同我使來報。不然。勿謂吾失信。遂令諸小酋。借少卿羅綺。收還大同宣府。塞上部落。臣過懷來。見官軍出郊。芻牧收禾。轉餉敵言可信。臣復命日。蒙召對。詳述敵情。近在廷大臣。累疏未允。臣將命講和。其欲遣人迎復。定約日期。臣特傳也先口語。伏望俯從羣言。別遣材智大臣。往迎上皇。雖敵情變詐不測。亦可塞彼無詞。不然。直在彼曲在我。猶豫趙趙。過期失約。復欲遣使。或又以命臣。臣自揣愆期。決不敢往。彼此相疑。和議不成。則上皇終不可復。干戈終不可息。邊鄙終不可寧。疏入。復下大臣再議。是日把禿等還。諭也先。把禿等至。悉議和之意。願前已遣楊善。趙榮。齋書幣。至可汗及太師。專爲迎朕。兄太上皇帝。朕念朝廷自祖宗來。待瓦剌甚厚。一旦因嫌。構隙連兵。太師卽能復修舊好。朕亦當勉從所請。繼今益宜上順天意。下順民心。休兵息民。以實前言。把禿等回。特頒賞給。至可領也。所言欲送還大駕。實朕至願。果出誠心。卽令楊善等奉迎還京。朕當永保和好。太師其深省之。是日懋直等復請再遣實奉迎上皇。上曰。俟善還時。御史畢鸞等翰林檢討邢讓。皆疏乞迎駕。不聽。己巳。楊善至邊營。語在善傳。庚午也先引善見上皇。是日也先奉錢上皇。辛未。伯顏帖木兒奉錢。八月癸酉。上皇過迤北。丙戌。至京。入居南宮。癸巳。上宴瓦剌使人於奉天門。明日上皇宴之南宮。乙未。陞賞瓦剌使人有差。九月。普化遣皮兒馬黑麻貢馬。十月也先使人逾八千。出五軍神機營。官軍萬五千屯列居庸關。十一月也先使還。

敕也先。爾瓦刺都總兵答刺罕。太師淮王大頭目中書右丞相也。先遣使來貢。并覽奏具悉。太師敬順天道。尊事朝廷。保守兩國祖宗來和好之意。甚善。自今宜安分循理。勿聽惑浮言。否則利歸於下。怨歸於上。太師察之。朕與朕兄太上皇帝骨肉至親。毋勞太師念所貢馬匹鼠皮。賜賞并奏求物。討回人口。悉付來使。假金三兩。坐罪論發。太師知之。是月敵入寧夏塞。二年也。先強盛。欲爲可汗。輒又劫掠。普化大寤。是年也。先遣人貢馬。三年正月。貽瓦刺可汗書。我國家自祖宗來。與可汗無嫌。已因使臣往來。閒搆生隙。除前事不必留意。可汗能敬順天道。復遣使皮兒馬黑麻等。遠來朝貢。厚意良善。朕優與陞賞。宴勞。酬貢馬直。可汗索器附去。但云答使事。往有報書。恐小人有短長。言語傷和好。徒使利歸於下。怨結於上。但瓦刺人朝貢者聽。然亦須人少。賞待可得厚。中國人民男女在瓦刺者。後使與偕來。重賞不吝。尙書謙侯亨言。普化也先。誓殺乞統兵出宜府大同討之。復誓上不許。二月。瓦刺同牟撒來王子遣人貢馬。是年也。先遣人來獻捷。言其故父得阿魯台部落。以可汗虛位。乃立普化正室也。先姊也。有子不得爲太子。而以他妻子爲太子也。先諫之不從。願攻也先也。先不得已。與戰敗之。普化率十餘騎遁去也。先盡收其妻妾。太子人畜。獻良馬二匹。奏捷。命宴。其使賜鈔幣。十月也。先遣人來朝貢馬。請命使往來。上曰。正統中。緣使臣往來。搆隙。幾危宗社。令聽邊使朝貢。優其賞宴。便。遂敕邊鎮。練兵防邊。十一月。宴瓦刺使臣大尉察占。平章哈只阿力等三千人於禮部。令人得買瓦刺使臣馬。瓦刺使臣攜囊。中國男女百餘人。至會同館。詔諭使臣人。輿贖綵幣二表裏。使臣初詐言普化并也先。令攜還中國人。已乃匿不發。贖纔十二三。十二月。少傅

王直請答使瓦剌。下兵部。謙言臣職兵戎。知戰而已。若賊渝盟。敢爲悖逆。當肅將天威。往正其罪。遣使事不敢預議。制曰。使勿遣。是冬也。先及其諸酋。乞黃紫織金九龍紵絲。及金酒器藥材顏料藥器佩刀諸物。禮部言龍袍金器。非所宜用。乞勿與。與藥材諸物。當是時也。先使每至京。幾千人。出入驕恣。毆守衛。掠人財物。至欲騎入長安。稍稍約束。卽彎弓持刀。言奪馬殺人。通事都督昌英。每好語阻之。不聽。輒侮罵。使貢在朝時。入塞捕掠人畜。將官將勦。又以通好故。恐貪功啓隙。不欲與戰。敵益驕。東結朵顏。西交哈密。脇結赤斤蒙古。往往窺塞下。四年正月。宴瓦剌使臣察古等二千八百餘人於禮部。敕瓦剌。太師淮王也先。太師求答使。朕恐使交搆。彼此懷疑。以故不遣。太師遣人多。二次三千餘人。邊將堅請謝肥。朕念太師忠義。姑聽使人入京。自後可少遣。遣時與總數文書。否守關者閉不納。太師并各頭目。差正副使二十二。人陞都督都指揮。指揮千戶等官。賞金廂犀帶九。鍍花金帶九。素金帶三。花銀帶三。其三千餘人。貢馬貂鼠皮。賞織金綵表紵絲二萬六千四百三十二。絹九萬一百二十七。衣靴帽萬。諭太師知之。七月也。先攻敗普化。奔兀良哈。依沙不舟。沙不舟殺普化也。先遂自立爲可汗。盡殺故頭目苗裔。殺白馬九黑牛五祭天。期八月入蕃寇我甘涼。十月也。先遣哈只貢馬貂鼠銀鼠皮。書稱大元田盛大可汗。田盛華言天聖也。未書。添元元年。中書往元受天命。今得元位。盡有其國土人民。傳國玉寶。宜順天道。遣使和好。庶兩家共享太平。又致殷勤。太上皇帝。上以書示禮官。會議答書。吏科都給事中林聰言也。先不敢輒稱可汗。使覘中國。若輒從其稱。長縱逆賊。仍其故號。激怒犬羊。乞敕其來使。歸語也。先以華彝之分。順逆吉凶之道。庶不失。

國體便刑科給事中徐正乞賜也先敕。曉以天命禍福成敗之理。如其稔惡不悛。我乃聲罪致討。安遠侯柳溥言也。先殺篡。所謂亂臣賊子。人人得而誅者。若從其僞稱。是與其弑主也。答書宜仍稱瓦剌太師。否絕其使。彼犯我邊塞。卽興師致討。并下廷議。議言自古王者不治彝翟也。先備大元田盛大可汗。固不可從。若可汗乃隋唐以來北翟酋長之常稱。非中國所禁。朝廷答賜敕書。宜稱爲瓦剌可汗。稍示羈縻。便上又下禮部議。議制郎中章綸言。可汗二字在中國固爲戎翟酋長之常稱。在戎翟則爲皇帝之位號。觀其稱唐太宗爲天可汗。元世祖爲成吉思可汗。可見矣。向者脫脫不花爲可汗。乃其世傳所稱。名猶近正也。先殺主僭稱名實大舛。今若因而稱之。彼以爲中國天子。亦稱我爲可汗。誇示羣酋。羣酋畏服。無復攜二益窺中原。後禍未測。仍其故稱。彼必慚怨。益肆侵擾。均爲不可。莫若賜宜封爲敬順王。或稱爲瓦剌王。使下廷議。言臣等請稱也。先爲瓦剌可汗。詔令再議。臣等以爲便。給事中盧祥李鈞路壁等以爲不便。欲仍太師。乞聖裁。上曰。也先雖桀傲。亦能敬順朝廷。宜如議稱瓦剌可汗。上遂敕文武督兵大臣也先。擅易名號。其所遣使從大同來。或從宣府甘肅來。奸計叵測。京師備禦。不敢不嚴。爾等其選兵訓練。條上長策。聽便敕行事。并敕沿邊城守戒嚴。十一月。瓦剌使臣火只爾阿麻回回進玉石九千九百斤。卻令自售也。先弟賽因孛羅魯玉諸酋。並遣人貢馬。自是稍出入東西塞上。爲寇不復深入也。先新立。恐諸部不從。亦欲與中朝通好。貢市往來。然數年賞賜邊費。亦不下百萬計。天順初也先有平章哈刺者。欲繼也先爲太師。言於也先曰。主人衣新衣。幸以故衣賜臣也。先不許。而以其弟平章阿失帖木兒爲太師。哈刺怒。欲叛也。

先也。先荒於酒色，又殘忍，諸部不悅，稍解散也。先益忌哈刺，聞哈刺且叛，益怒，欲攻哈刺，恐不勝，乃召哈刺子飲酒，酒中飲之鴆，哈刺子嘔吐，覺走出，不能行，嚙指血染箭，令其僕持告哈刺。哈刺陽不知，益敬順也。先也先以哈刺畏己，防稍解，哈刺伏衆伺也。先出獵，襲也先也。先倉皇戰敗走，從數十騎遁。又恐此數十騎通哈刺，半夜棄此數十騎，與二親信走。道中饑窘，至一婦人所乞漿，婦人飲之酪，遂去。夫歸，婦言狀，夫疑其爲也。先急追及之，果也先，殺之。諸部遂分散。兩季來，痲王子爲雄，季來，痲王子又弑其主小王子，入寇陝西。天順二年正月，季來大舉寇陝西，安遠侯溥統兵禦之，輒敗。御史劉濬劾溥，溥行賄得釋。濬議官已而敵大熾，關中震動，召溥奪太傅。四月，復邊鎮巡撫，而以陳璘、芮鈞、徐瑄爲都御史，巡撫寧夏、甘肅。延綏三年八月，季來寇大同，總兵高陽伯李文選不敢出，敵直抵鴈門，忻代殺掠人畜，烽火達京師。民大擾，遣都督顏彪等統兵屯紫荊，倒馬，敵旣大獲利，又不見兵，去而復來。敕彪等提兵出鴈門，敵始退。是年敵又入宣府。五年六月，季來寇河西，總兵仇廉禦之，敗績。敵遂過河大掠，關隴震動。懷寧伯孫鏜兵部尙書馬昂、京營兵萬七千、河南、山東兵六萬西征，會曹欽反，闕下鏜昂討賊有功，不果行。羽書紛至，八月，大學士李賢薦都御史王竑、侍郎白圭禦敵，未至，敵大得利去。陝西諸屯兵尙不敢退。六年三月，罷陝西屯兵各還鎮。當是時，季來稍衰，其大酋毛里孩、阿羅出、少師猛可與季來相讐殺，而立脫思爲王。敵中言脫思故可王子從兄也。於是毛里孩、阿羅出、李羅忽三酋始入套，爭水草，不相能，以故不敢深入爲寇。時遣人貢馬，然亦通朵顏諸戎竊邊郡。成化初，阿羅出結亂，加思蘭、李羅忽結毛里孩，各爲黨，出入河套，漢

人被擄去。及罪人走塞外者。又爲之鄉導。遂攻堡圍墩。深入內郡。殺掠人畜。元年九月。大入榆林塞。寧遠伯任禮都御史項忠禦之。會李來興毛里孩相讐殺。退去。二年十月。毛里孩寇陝西。忠及彰武伯禦之。去三年七月。敵大入榆林塞。殺孤山守將湯允勳。是年。亂加思蘭入大同塞。以撫寧侯永爲平湖將軍。統兵出禦之。敵去。亂加思蘭故居哈密北山。至是殺阿羅出併其衆。而結滿魯都。入河套。滿魯都僭稱可汗。以亂加思蘭爲太師。五年九月。李羅忽亂。加思蘭入榆林塞。又入寧夏塞。大掠環慶。至固原。六年七月。李羅忽又入榆林塞。以撫寧侯永爲平□將軍禦之。稍擊退之。十二月。毛里孩也烈忽屢入陝西塞。總兵劉聚擊敗之。八年。延綏巡撫都御史余子俊。徒鎮榆林。大繕營堡牆。自敵據河套。邊人大擾。敕都御史王越總關中軍務。議搜河套。復東勝。越等奏言。河套水草甘肥。易於駐劄。腹裏之地。道路曠遠。難於守禦。陝西□酋李羅忽亂。加思蘭等。糾率醜類。居套分掠。出入數年。雖常沮於我師。然未經挫衄。終不肯退。近日據河曲。擾延綏寧夏。深入平鞏固原。近又覘大同。逼萬全。聞在廷咸議。欲得一爵位。崇重威望。素著者。統制諸軍。往圖大舉。朝廷從其議。以武靖侯趙輔充總兵官。總制各路軍馬。搜套未幾。輔以疾還。搜套亦不復舉。又遣吏部侍郎葉盛行。邊上方略。盛請增兵守險。河套東勝之役。未可輕議。是年九月。陝西巡撫馬文升。敗敵黑水口。湯洋嶺。斬首功二百。九年十月。敵遣人貢馬。是月。敵犯廣甯。十年。屢入大同宣府塞。寇甘涼。亦遣人貢馬。十月。亂加思蘭大掠莊浪。深入至鞏昌。平涼總兵劉聚。巡撫馬文升禦之。無功。遣給事中韓文覈功罪。是月。滿魯都寇宣府。十二年三月。亂加思蘭寇宣府。十三年。滿魯都亂加思蘭。遣桶哈阿忽。

刺千七百五十人。貢馬駝五千。當是時。敵中相猜。亂加思蘭女。妻滿魯都。欲代滿魯都爲可汗。恐衆不己服。又欲殺滿魯都而立幹赤來爲可汗。滿魯都知之。殺幹赤來。亂加思蘭匿不與。遂相讐殺。十五年。滿魯都殺亂加思蘭併其衆。十六年二月。滿魯都部落寇榆林塞。三月。太監汪直。總兵保國公永。提督尙書王越。率兵出塞捕寇。至威寧海。斬首四百三十七級。十七年。馬亦思因寇大同。永出禦之。戰海東山。十八年。又入大同塞。十九年四月。敵入陽和。六月。入大同諸堡。殺掠人畜數萬。守臣邊鏞許寧來告捷。是年敵驩入宣府大同。烽火至圻內。二十年二月。戶部尙書余子俊。總督宣府大同偏頭三關軍務。兼督糧餉。定西侯琬。總兵保國公永。新寧伯祐。禦敵大同宣府。侍郎李衍何喬新。經理東西邊關。二十二年春。敵數入開原塞。二十三年。西番罕慎言瓦剌有克捨太師。革捨太師。克捨死。其弟阿沙赤爲太師。革捨弟阿力阿古多兀。與阿沙赤相讐殺。遂西走據哈密。成化間。北敵大抵瓦剌爲強。小王子次之。二種反復相殘。並陰結朵顏。伺我塞下。卽貢馬。二種亦相繼往來。恐中國左右。以故雖深入。彼自相猜忌。不能久留內地。未幾滿魯都衰弱。不知所終。而把禿猛可王。太師亦思馬。因知院脫羅千。屢遣人貢馬。宏治初。把禿猛可死。阿歹立其弟伯顏猛可爲王。翟中以太師官最尊。王幼。恐太師專權。遂不復設太師。伯顏猛可及其酋長。與瓦剌酋亦遣人貢馬。時馬文升在兵部。許進巡撫大同。進數條邊事。戎政修明。中朝大臣。知進。進疏至。輒久下。進常貽書小王子言通貢之利。小王子瓦剌二種。聞進威名。遣其酋長哈桶察少保等貢馬。三年三貢。每貢至多三千人。少不下二千。皆貓兒庄入。北至塞。皆下馬脫弓矢入館。進亦嚴兵待之。諸敵留塞外者。

亦時與酒肉華人盜敵馬請斬徇大同宣府河曲皆無邊患四年正月刑部尚書何喬新乞禁湖服湖語七年敵大舉寇陝西十年十一月敵犯甘涼是年鹵火篩強結諸部落迭寇大同宣府歸正人言敵謀深入敕侍郎許進督軍劉大夏轉餉禦敵又召王越總制陝西軍務經略哈密是年敵入貢十二年敵迭入榆林大同寧夏塞殺掠吏民瓦剌亦遣人貢馬有餘馬官爲市之十三年正月敵殘神木堡五月火篩入大同宣府塞火篩本小王子部落強悍既屢寇邊獲財畜日強盛跋扈與小王子爭雄長數寇近邊京師戒嚴命都督李澄守潮河川張晟居庸關襄城伯鄺紫荊關侍郎李介經略宣大王宗彝黃花鎮天壽山及居庸白羊關史琳紫荊倒馬關七月又掠榆林平江伯銳禦之無功罷還保國公暉代銳十一月敵入偏頭關十四年正月敵入榆林塞八月火篩入花馬池塞至固原大掠人畜殺吏民總民恭順侯鑑罷還京武安侯英代鑑侍郎李燧督餉關中乞運邊城八郡大困自後敵犯關隴輒由花馬池矣是年諸將校陳璘瑾馬昇奏恭皆論死宥戍邊張璫總兵禦敵大入大同塞是年絃總制陝西軍務劉大夏爲兵部尚書十六年鹵入榆林塞千戶湯驪力戰死十七年六月閒兀良哈結小王子寇邊小王子遂稱求貢否且深入諜言敵諸酋期分道並犯黃裏黃裏者華言京城也上召見大學士劉健等議兵事內批副都御史閻仲宇督餉宣府大同通政司參議熊偉督餉居庸諸關是月敵入大同塞殺掠人畜上銳意討敵大監苗遼力請出師大夏力言不可遂止十月鹵入花馬池清水營殺掠人畜無算十八年九月敵入花馬池攻陷清水營起楊一清經略陝西邊務兼巡撫正德元年改一清總制邊務一清請復守東勝據河套水

草之利。東勝者。古東受降城也。洪武二十七年三月。城東勝。因河爲固。敵卽入寇。後顧我兵不敢久。自失東勝。退守延綏。卽城榆林。敵遂有河套。河套本漢衛青所取。河南地。開朔方郡者。是時因杆將軍出朔方。北築受降城。至唐韓國爲朔方大總管。遂築三受降城。中城南直朔方。東直榆林。四直靈武。各相去四百里。一人憑山望敵。匹馬一人不能隱。蓋城北平沙漠漠。無山巖林木。障蔽敵輒望城。慟哭遁去。宏治末。朝廷清明。內外大臣。脇心體國。爲經久計。以故議復河套。一清才略足任。遂上經略三疏。一議守。守。守。所必入。一議戰。戰。敵所必敗。一議攻。攻。敵所必救。會孝宗崩。閣瑾專政。一清得罪去。無敢言及河套者。卽有建白。輒云。修邊。或曰。進。幾里。扞。或又曰。退。幾里。固我邊防。日退。套。日進。是年大夏致仕。四年十月。鹵入花馬池塞。殺總制尙書才寬。八年十月。鹵入宣府塞。十年閏四月。朱顏通小王子部落。入馬蘭谷塞。殺參將陳乾。八月。敵深入固原平涼。殺掠吏民。十一年二月。鹵入榆林塞。七月。入宣府。是年敵入清水社。殺掠人畜。十三年六月。敵入寧夏塞。是年敵入花馬池。深入大掠秦隴。正德閒。小王子三子。長阿爾倫。次阿著。次滿官。太師亦不刺。弒阿爾倫。遜入河西。西海之有。自亦不刺始也。阿爾倫二子。長卜赤。次也明。皆幼。阿著稱小王子。未幾死。衆立卜赤。稱亦克罕。亦克罕大營五。曰。好。陳。察。罕。兒。曰。召。阿。兒。曰。把。郎。阿。兒。曰。克。失。旦。曰。卜。爾。報。可。五。萬。人。卜。赤。居。中。牧。屯。五。營。環。衛。之。又。東。有。崗。留。罕。哈。爾。填。三。部。岡。留。部。營。三。其。酋。滿。會。王。罕。哈。部。營。三。其。酋。猛。可。不。卽。爾。填。部。營。一。其。酋。可。都。留。三。部。可。六。萬。人。居。沙。漠。東。偏。與。朱。顏。爲。鄰。西。有。應。紹。不。阿。爾。禿。廝。滿。官。噲。三。部。應。紹。不。部。營。十。亦。不。刺。遁。西。海。去。遂。分。散。無。幾。惟。哈。刺。噲。一。營。僅。全。

阿爾禿厮部營七。故亦屬亦不刺。今從吉囊。滿官噴部營八。吉囊俺答皆出入河套。二酋皆阿著子也。諸種中獨強。時寇延甯宣大。南有哈喇噴。哈連二部。哈喇噴部營一。一酋把答罕。哈連部營一。一酋失刺。台吉居宣府大同塞外。北有兀良罕營一。故小王子北部也。因隙叛去。常相攻。又西爲瓦剌。世與土魯番爲讐。諸敵雖逐水草。遷徙不定。然營部皆有分地。不相亂。嘉靖元年秋。敵入花馬池。大掠西安鳳翔。三年七月。大同軍叛。多走出塞降敵。四年。敵數侵掠陝西諸塞。殺吏民。起少傅太學士楊一清爲兵部尙書。兼都御史。提督陝西邊務。未幾召入內閣。六年八月。敵入寧夏塞。提督尙書王憲總兵杭雄禦敵。斬首三百。二十七年正月。敕兵部右侍郎王廷相。整飭陝西邊防。尋止。十一月。敵大掠寧夏。是年胡世寧爲兵部尙書。起王瓊總督邊務陝西。八年十月。吉囊俺答數掠榆林寧夏塞。瓊出兵禦之。敵亦得利去。瓊遂請修邊牆。據要害。且堅厚。至今賴之。十二月。敵入大同塞。掠甘坪應朔。是年李承勛代世寧。九年五月。敵入漁陽塞。不數日。又入遼西塞。是月。敵大入寧夏塞。六月。入宣府塞。十年三月。入大同塞。大同巡撫王大用。請貽書召小王子。李承勛以爲不可。力阻之。九月。敵犯陝西遼東。十月。敵入大同塞。四路殺掠吏民。遣將出京營。兵禦之。敵得利去。遂止。十一年二月。敵入榆林塞。掠陝西內郡。是年敵道松藩漳。腦寇四川西境。十二年十月。敵侵鎮遠關。守將王勳破敵。斬首一百四十。大同軍復叛。發兵討之。久不克。與敵通。十三年閏二月。遣大臣賑撫大同。叛者北走。從敵幾千人。七月。吉囊入榆林塞。大掠安定會寧金縣。八月。始由青沙峴出。花馬池塞。總督尙書唐龍上捷書。言斬敵首四百五十四。兵部以王越封伯。例請敕給事中覈覈。竟以功報。

陞賞有差。十四年六月，吉囊入榆林塞，掠內郡。八月，又入榆林塞，守將梁震擊敗之。十五年、十六年、十七年，敵數入塞。十八年二月，上巡承天，以翟鑾、毛伯溫爲行邊使，出帑金五十萬兩賞塞上將士。八月，敵入宣府塞，四路參將賈英見敵少，出禦之，亂行而前，入敵伏，失將士千人，戰馬千匹，益深入南路，殺掠人畜萬計。敵會青台吉、哈刺台吉、那林台吉，皆屯牧萬外，時掠宣府。總兵江桓竟不出勦罷。十月，大同五堡成大同總兵梁震家丁數千，素勇悍善戰，時出劫敵營，震妻乞收尺籍二百人，餘皆走降敵。十二月，敵入宣府深井諸堡，逮總兵江桓下詔獄。敵又入榆林塞，殺守將宋隆。十九年二月，甘肅守臣上言：河西一鎮，達賊盤據於西海，番族住牧於南山，回彝入貢，往來交馳，套敵乘機出沒搶掠，中通一徑，勢甚孤危。疏入報聞。三月，鹵入榆林塞，破清平堡，入米脂，殺掠人畜萬計，焚芻糧數萬，長驅而出。總兵周尙文駐兵青秋原，敵退，以捷告。敵又入宣府塞，破北路馬營諸堡，擄去神鎗銃炮千計，芻粟牛羊萬計，往時敵多掠婦女，近數年乃掠穀畜火器，遇婦人輒殺不掠。四月，風霾，旨下兵部議防邊方略。言官交章劾兵部尙書張瓚貪鄙誤國不聽。七月，敵入宣府塞，大掠至蔚州，盡破其關廂堡塞，殺人盈野。總兵白爵遇敵於水泉兒，大敗。副總兵雲冒遇敵於馬連堡，又敗。先是大同歸正人王九子言敵會哈刺噴，糾俺答、兀祿吉囊、青台吉、赤台吉等十人，禱旗、晾馬，負十日食入塞。北報至，敵已過順聖川，抵蔚州，留宣府境內者幾兩月。撫臣守將竟論功陞職。八月，薊州撫臣言朵顏會革蘭台結北口，且并力侵邊，令撫臣諭革蘭台，敵覘大同兵東援宣府，遂乘虛寇大同西路，殺掠人畜數十萬。先是大同叛卒逐出城，盡走口，口擇便捷，費多與牛

羊綬嘆令爲僧道乞丐入謁我邊西至甘涼東出山東或入京師凡地理險易兵馬強弱撫鎮將領勇怯利害盡走告敵曾吉囊俺答十九年二酋分進入塞大同軍顧與敵約無掠我人畜我亦不復攔若敵喜嚙指折箭去至秋竟越大同抵鴈門度寧武入嵐靜交城掠殺人畜萬計大同軍有得擄掠我輻畜名買路錢大同巡撫史道總兵王陞幸無事若不聞聞亦不問大同軍亦驕悍不用命宣府總兵白爵調援亦不肯戰敵益無忌顧且欲攻鴈門山西撫臣陳講告急大同撫臣史道竟匿不以聞講疏言八月六日敵由井坪至朔州城七日分三路由井子登青蛇峒侵至陽方邊接連水口等處殺官軍掠人畜又由水口灰泉等處深入省城西南十日與嵐交城平敵與汾州文水清源十數州縣封壤接連一望平原民皆村居曾無堡寨比之邊城萬萬不侔且敵勢未遭剽延住腹裏數日不出人心驚惶禍變莫測後報聲息尤爲可駭晉兵追逐不滿八千大同援兵雖至大約一千五百臣遣人督戰觀望不前兵報至此後將何支詢問敵中歸正人皆言賊多華人鄉導近年大同叛軍向順無門助賊爲惡卽爲酋領生長中原習知險易又覘我軍脆弱非其所敵故敢於橫肆漸窺中土山西地連畿輔密邇京師又與河南諸省止隔一山若徒循常襲故不早振舉必成大患乞下廷臣集議更紘改轍兵部不以爲意謾曰寇且退矣是月陝西總制尙書劉天和率兵九千駐花馬池寇數萬入安邊塞大掠固原撫按羽書沓至天和爲寇隔逾月奏不至旣而告捷言斬寇首五百卒張奴兒殺吉囊之子敵諸酋大哭遁去加天和太子太保敍一子錦衣正千戶陞賞三鎮文武吏士凡千餘人張奴兒陞世指揮僉事內閣兵部皆加宮保廕敍世職十二月

敵大入大同塞。二十年八月，吉囊先入大同塞。是月壬戌，提督三關副總兵丁疇出師至寧武東北，遇敵力戰死。敵遂入關，以樊繼祖總督宣大偏保軍務，與銀九十萬兩，又起翟鵬總督京城南面，山東河南軍務。敵至繼祖不出，縱其深入山西，遊擊將軍周宇禦敵太原北，力戰死。敵遂至省城，又越而南，殺掠人畜萬萬，吉囊纔出關，未至塞上，俺答復入，又越太原而南至石州，殺掠益甚。十一月，令侍郎張漢賑山西被敵郡縣。二十一年二月，言官交章劾繼祖，竟不罪，得歸田。陳講史道爲民，宣府大同總兵王陞白爵，僅罷官。鵬亦召還京。是月，敵掠蘭州。三月，邊臣言敵且至，又以鵬總督宣大偏保及山東河南軍務。五月，時相惡鵬直，遂會鵬乞兵糧，批罷鵬總制官，專責大同宣府山西保定等龍大有楚書、劉泉、劉隅四巡撫。五月，右清紀郎周鈇言敵必再至，乞早爲防禦計。講鈇廬州府知事。六月，敵又大入塞。時吉囊病死，其子板不孩居套中。小王子不及兒台吉，駐威甯海上。俺答糾數酋，經朔州，破鴈門，掠太原。京師戒嚴。七月，召鵬復爲兵部右侍郎兼僉都御史，提督宣大偏保山東河南軍務。上出賞格，擒斬俺答，賞銀千兩。陞不次，他酋三百兩。陞三級。時俺答青台吉、叭蠟、哈哈刺漢及叛人高懷知、李天章各擁萬衆，越太原，列營汾河東西，散掠上黨、平陽、下邑。時鵬未至，大兵連營，莫相攝。觀望不肯戰。縱賊益深入，賊大營駐平遙，介休間，散入險山中，殺掠人畜。諸將竟不肯乘險邀擊。敵掠我牛羊衣襖，男女逆遁。就大營結陣，且歸。偏師張世忠等自太原侯城材起營，盟約諸將，逼敵力戰。諸將閉不相援。賊見世忠軍壯戰力，呼集精騎三十餘，合圍世忠。世忠憤曰：「諸將獨不念血盟耶！」世忠被射傷，果瘡下馬，四面步戰。賊亦窘，會矢火藥盡。世忠憤呼曰：「我

軍被圍戰苦。諸將竟不相援。國憲天刑。甯汝道耶。復上馬。往來督短兵血戰。自己至西。賊見我兵死傷衆。無援。久戰力竭。遂薄營。世忠首中二矢。墜馬死。張宣、張臣等痛世忠死。猶率旗軍。曾五等力戰。宣臣並死。又分掠定襄、孟五臺。又自代州出繁峙、靈邱、廣昌。從廣武站出關。安行經大同左衛及陽和塞去。敵自六月丁酉入塞。至七月庚午。凡掠十衛三十八州縣。殺擄二十餘萬人。牛馬羊牲畜二百萬。衣襖金錢稱是。焚公私廬舍八萬區。蹂田禾數十萬頃。贈世忠右都督。與銀十斤。宣臣各四十兩。仍祠祀。時羽書急。議築京師羅城。興役有日。九月。給事中劉養直力言不可。遂止。二十二年八月。敵入榆林塞。又入甘肅塞。二十三年春。調各鎮兵至大同防秋。是秋。敵入大同塞。總督尙書鵬舉之。敵退。時敵曾遣我叛人至京師。入兵仗局習佛郎機。獲誅之。遂散各鎮防秋兵。十月。敵破宜府塞。入紫荆關。鵬及薊州巡撫朱方械下詔獄。二十四年。敵大入榆林塞。總督尙書張珩延綏巡撫張子立。謫戍。二十五年。敵深入口西。總督侍郎曾銑。遂上復河套議。二十六年冬。河西總兵戚甯侯仇鸞爲銑發其奸賊。被逮。遂許銑行賂。掩敗冒功。妄議復套。關中人情大搖。亦逮銑詔獄。出兵部尙書王以旂代銑。而以劉儲秀代以旂。儲秀謝恩疏中語忤上。削籍去。又以趙廷瑞代儲秀。落少師夏言官。以尙書致仕。銑至。坐交結近侍律。明春三月。銑死。西市。并逮言。言時行至丹陽。就逮。論死。械繫錦衣獄。鸞竟釋不問。九月。敵大入塞。直抵居庸關。嚴嵩謂敵以河套故。報復也。十月。言死。西市。二十八年。敵入宣府大同。二十九年八月。俺答遂入漁陽塞。犯京城。焚劫至德勝。西直門。窺八陵。掠教場。上震怒。殺兵部尙書丁汝夔。都御史楊守謙。自是調邊兵入衛京師。無虛歲。三十年。俺

答於去冬求貢不許。仇鸞密遣人結俺答脫脫使貢馬互市。俺答利貨幣譯書。總督蘇佑以聞。嚴嵩主謀。趙錦會鸞等議許之。上乃起史道理馬市事。兵部員外楊繼盛疏諫十不可。五謬觸嵩怒。謫於上。謂阻撓邊務。訊杖貶狄道典史。七月。叛逆白蓮妖通敵。仇鸞奏懸賞購之。俺曾執獻。詔磔於市。十月。侍郎何棟獲哈密叛逆哈丹兒等。訊實。告謝靈壇郊廟。行獻俘禮。十一月。敵以羸馬市厚值。弗予。輒大譁。隨市隨寇。朝暮開市。鹵衆往來無忌。將士不敢言。邊防盡撤。省臺屢諫。史道獨護市局。以遼東巡撫都御史言。乃寤。三十一年。敵入犯。參將姚天謨潰圍死。守備王相力戰。或曰敵勢重宜避去。曰。以此一腔血報國恩。身被十餘創死之。贈都督同知。麻一子正千戶。七月。敵犯薊州。得仇鸞通敵狀。戮屍。妻子死西市。籍其家。三十三年。敵攻薊州塞邊。楊溥擐甲登陴。率將卒禦甚力。不得入。上喜。發萬金犒將卒。賜溥衣一襲。三十四年。攻馬蘭峪。參將趙傾葵禦之。敗死。四月。犯宣府青邊口。參將李光啓等兵敗。被執至城下。索金帛贖。光啓大罵。敵殺之。三十八年。總兵劉漢破鹵於豐州。在大同右衛邊外三百里。水草豐美。我叛人邱富趙全等居築城構宮殿甚宏麗。開良田數千頃。接東勝川。號曰阪升。每導敵入寇時。俺答徒大青山。漢等率兵三千襲之。斬首八十三級。生擒七十六人。焚其巢。餘衆奔匿。時富隨俺答北徙。趙全匿墩上。已而敵騎大至。漢等兵退還。與大兵會。翌日入邊。往返凡五日。以聞。上悅。頒賞有差。三十九年。敵窺喜峯口。劉漢乘虛攻其巢。斬首三十。獲駝七十五隻。敵遁還。追之不及。先是敵留巢窺塞。無敢問之者。漢倡爲之。自後敵始有戒心。徙遠其幕。四十二年。敵入犯京東。敕諸大臣分兵城守。京師戒嚴。勤王總兵馬芳等相繼至。逐敵通州。

參將孫擯爭先斬三百餘級。敵遁去。四十三年九月間。敵大舉入寇。先是三衛素與敵通。朱顏會曰。通罕者。尤爲桀黠。總督都御史楊選。執通罕父子三人。輪繫薊獄。以爲質。通罕積恨。遂導敵入寇。自牆子嶺入。長驅至密雲。三河順義。至張灣。將攻通州。犯京師。以張灣河凍。復由牆子嶺出。四十四年八月。黃台吉率輕騎自宣府突入。散掠。把總江汝棟以銳卒二百人。按伏堡中。不知其爲黃台吉也。出搏之。黃台吉聚騎直前。汝棟奮擊之。墜馬。幾獲之。敵衆致死奪去。得其盜刀而還。自是不敢窺邊者數年。上聞。陞汝棟二級。隆慶四年五月。俺答孫把漢台吉者。會婦所鍾愛也。以鄭於俺答。挾其妻闖入邊。總督王崇古留之。邊吏謹曰。此孤豎。無足重輕。勿宜留。崇古曰。此奇貨可居。俺答卽急之。因以爲市。諭以執送叛人趙全等還。我乃優遣。以慰其舐犢之愛。而制其命。其弗急。則我因而撫納。如漢質子法。使招其故部。居近塞。俺答老且死。而黃台吉勢不能盡有其衆。然後以居著谷。蠶秩置塞外。其與黃台吉構。兩利而俱存之。弗構。則以師助之。外以博興滅扶危之名。而內收其力。廷臣譁然以爲不可。俺會婦恐戕其孫。日夜涕聲。俺答亦悔見。念乃以款來。而擁十萬衆壓境。崇古因論以存卹恩。而要其縛叛示信。會婦感且愧曰。漢乃肯全吾孫。吾且齧臂盟。世服屬無貳。奚有於叛人。遂訂盟。通貢市馬。而諸敵亦貪漢財物。願市。於是俺答款塞。縛叛人趙全等。獻闕下。誅之。封俺答爲順義王。諸敵皆攝伏。受封比屬國。而俺答弟老把都駐牧上谷。有五子十萬騎。強盛。恥與俺答會盟。上谷諸帥務以餌中之飽其欲。於是利漢財。從俺答上表通貢。封其父子官有差。崇古以款敵功。加少保兵部尙書。世襲錦衣千戶。賜蟒衣白金。願至告廟。羣臣遷賞如例。於是邊防大

弛。敵生齒日繁。識者憂之。萬曆三年春。王杲糾敵入犯。副總兵曹簋厚市犒賞。僕杲匿酋阿哈納處。簋勒精騎馳勦。得二十六級。杲走卒獲之。二十二年。哮拜反。事在亂賊傳。自此後雖有入犯。無大舉。而所患不在西北矣。

史官曰。圖





明書卷一百六十九

列傳二十二

補元臣傳

史官論曰。或謂元不當有臣。子何譜元臣哉。予應之曰。是春秋之義也。春秋於吳楚之王。不絕其爲君。於季札子文之忠。皆賢而予之。不沒其爲臣。君之於臣。命也。無所逃於天地之間。既委質臣事人。而又二心以逃之。曰是不可君。吾去其非君。此與於亂賊之甚者爾。以元之爲君而有若臣。以元之若臣而君子猶不沒其節而表之。使人湛然而自悟曰。君臣之義。乃至於此。以愧天下之不爲元臣而不如元若臣者也。是則春秋之義也。

擴廓帖木兒傳

擴廓帖木兒者。潁州沈邱人也。別名王保保。少育於舅察罕帖木兒。因爲子。察罕故元別部後。至正間盜四起。與羅山民李思齊結鄉里豪傑。前擊賊有功。部下且數萬人。轉戰至關中。勢大振。援商州。敗朱李武。崔德。進陝西行省右丞。連敗於冀甯路及壺關。復興元鳳翔。走白不信。大刀放等。戊戌。復涇州。平涼。移兵守鞏昌。別部賽因赤復晉甯。走王士誠。遣關保擊寇於高平。大敗之。還守洛陽。詔進行省平章政事。得便

宜進止。己亥，大發諸道兵討劉福通。圍汴梁。三月下之。庚子，元詔平章李羅帖木兒守冀甯，守者疑不納。李羅遂以兵圍城。察罕救之，敗其兵。自是與李羅相攻。辛丑，悉部鐵騎凡數十萬討山東諸賊。諸郡次第下。降田豐、王士誠等。明年夏月，白氣起，危宿掃太微垣，占失良將。察罕攻益都十餘月，且下而豐、士誠者陰通賊。誘察罕至營勞軍，刺殺之。詔贈察罕忠襄王，諡獻武。事在元史。詔以擴廓帖木兒中書平章政事，知河南山東行樞密院事，代將父兵。擴廓既已將，大痛憤，享士日夜督攻城拔之，獲豐、士誠，剖其心以祭。察罕齊地平。癸卯，李羅將竹貞據有陝西。擴廓遣顏高合李思齊夾攻之。竹貞降。李羅復掠冀甯，則身逆戰逐北，獲其將烏馬兒、殷興祖。甲辰，李羅犯關，逐皇太子走。擴廓遣關保等十餘萬騎討之。下大同，而李羅爲其下所殺。詔封河南王。總制關陝晉冀山東迤南諸郡。先是李羅死，皇太子還京，欲遂因擴廓兵威，挾廢皇帝自立。擴廓微知其意，至京可二十里外，敕吏士散就州邑食，而獨身從太子朝。太子以是陰恨之。而李思齊、張良弼者，故察罕行也，恥爲下，舉兵攻擴廓。部將關保、竹貞、顏高亦詞知太子恨狀，輒叛以應之。元詔削擴廓官。李思齊等就討之，得分其地，非朝廷意也。然擴廓持臣節，不敢抗。顏高等前攻真定，不克，退去。會明兵逼河南，思齊、張良弼各散走。已而顏高關保攻晉甯。擴廓與戰，覆其軍，擒二將。以聞。詔誅之。加擴廓太傅、中書右丞相。其徵兵勤王。戊申，明大將軍達將兵逼大都。元主走應昌。擴廓還援太原，以萬騎來壓明兵，鋒甚銳。達與遇，春合策，夜掩襲之。擴廓倉卒，得驛馬，帳後走出塞。盡喪其士十萬，馬四萬匹。明年復收兵，掠定西。與大將軍達遇，夜以萬騎掩左丞胡德濟營，衆擾亂，達自救之。擴廓大潰，死。及

降者八萬人。乘馬、駝、牛、羊數十萬。以數千騎走和林。見元少主。任以國柄。久之。大將軍達復出塞。擴廓悉騎卒死鬪。明兵敗歸。又數年乃卒。初。太祖屢遣使者遺書幣甚恭。輒留不答。後招之。亦不復。顧太祖以是益心敬擴廓。一日。宴功臣。問諸君度誰爲男子者。衆舉常遇春。太祖曰。不然。遇春吾得而臣之。吾竟無以臣王保保。其人男子也。册其妹爲秦王妃。

史官曰。當察罕之圍汴而走劉福通。明止有濠耳。李羅江而察罕內顧。是李羅代爲明間也。其破益都。而如山之鐵騎壓江東立靡矣。田豐王士誠之刺行。而擴廓悉力以僅勝。是二人又代爲明間也。夫旣以誅李羅靖內難。而明之舉漢滅周。擴廓之力屏矣。太子乃以欲速之私憾。而分其將。蓋退削者踰歲。雖幸而稍振。而十不能支明一矣。是太子又自爲間也。嗚呼。明以江東之微起。而養之使強。皆元爲之。非元爲之。天爲之也。雖然。擴廓奮其智勇。終始不二。能以餘燼執大將軍。烈矣。設曰。惟楚有才。晉實用之。諺云。勝棋之著。敗棋之棄。方之擴廓。何如乎。

陳友定傳

陳友定。字安國。世爲福清人。徙汀之清遠家焉。故業農。沈勇好遊俠。借軀報讐。不顧也。以是衆皆憚服。至正壬辰。盜起海上。汀判蔡汝安募士乘城守。友定率鄉里數千人從之。汝安一見友奇其器識。使權黃土寨。巡檢以討賊功。遷清流令。己亥。漢友諒遣將鄧克明寇汀州。友定以總管禦之。敗於黃土。克明獨身脫去。旋又大敗之。陞行省參政。開省延平。太祖旣平陳友諒。圍贛州。乃分遣朱亮祖率兵攻友定。取蒲城建

陽崇安等縣。時胡深爲浙東行省郎中。總制處州。友定入寇。深縱兵擊之。友定約建寧守將阮守柔。將兵四萬屯錦江。逸出深背。深遣兵擊敗之。克松溪。獲其將張子玉。進攻建寧。友定率銳卒攻深。深突入其陣。馬蹶被獲。友定頗禮遇之。深爲具道朝廷威德。并陳天命所在。且援漢竇融故事。友定不甚省。會元遣使者督迫。友定恐見疑。遂殺深以謝過。元以爲友定功。命爲福建行省平章政事。友定威行八閩。率矯制以漳州守羅良不肯下。發兵攻之。城陷。良自殺。歲往往遣貢舶由海道達大都。至者十不得三四。元主大賜優慰。吳元年丁未。以平章胡廷瑞征南將軍。右丞何文輝等副之。由江西入杉關。而湯和廖永忠兩將軍。旣平方國珍。移師從海道取福州。友定築壘爲備。每五十步更築一臺。嚴兵以守。而自率精銳去守延平。湯將軍等舟師抵五虎門。敗其將曲出。受叅政袁仁密款。破南門入。同僉賴正孫等遁去。叅政尹克仁赴水死。行宣政使朵再麻不屈。死於獄。時僉樞密院柏鐵木兒居侯官。聞福州破。曰。戰守不可爲矣。積薪樓下。殺其妻妾兩女。縱火焚之。遂自刎。和移檄興化。漳泉諸路。徇諸縣之未下者。進攻延平。先使人招諭。友定大會諸將。殺使者。取血奠酒中。喋之。誓必死以報元。和馳約沐英。自鉛山逼平之。西門。友定出戰不利。閉關以老明師。勒吏士日夜擊刁斗。嚴被甲偶立。不得更番休息。衆茲怨。則又疑蕭院判劉守仁有異。奪其兵。守仁叛。友定來歸。士卒多縋城走者。圍十日。會城中軍器局失火。礮發。我兵疑有內變。急乘。友定計促。乃與諸文武決曰。公等各爲計。吾自死元爾省堂。按劍仰藥自盡。樞密副使謝英輔。與達魯花赤。白哈麻。具服北向拜泣。自經死。叅政文殊。海牙等開門降。時值大雷雨。友定氣未絕。昇至東門復甦。子海聞城

破。自長樂來就死。并送京師。因置延平衛。以部將蔡玉守之。太祖面詰友定。元已亡。若爲誰守而死。我胡將軍友定。悲曰。死耳。毋多言。卽安得加死我乎。以賜胡深子楨。楨腐其肉。祭父深焉。友定子棄市。時漳州元守將達魯花赤。迭里迷實。見楸。具服焚香北面再拜。持斧斫印章。引刀自刎死。於是廷瑞旣降。建陽。沐英亦克崇安。會兵攻建寧。守將達里麻等。知不可戰。乘城固守。力竭潛降。副將軍文輝。廷瑞怒。欲屠其城。文輝爲謝解。乃止。傳諭延汀等處皆降。獨友定故將金子隆不肯降。率餘衆復寇延平。蔡玉敗之。追至沙縣。負險自固。卒與沐英夾擊。潰遁去。

史官曰。友定氣其足千古哉。被執死。竟不辱身而易志。何其忠也。方其起擾鋤。非有父兄服休之素也。從市人子弟。約束烏合。非有吏士之守也。揭竿奮挺。非有武庫之利也。一旦委質。雲蒸龍變。八閩之地。爲元有者。十六七年。當兵戈之集。越山海而委輸。彼其反掌瞻視。爲陳張所爲。豈不易而卒至。驅妻子。駢首東市。乃其踰於節明矣。至迭里迷實等。岸然不降以死。真不愧臣誼者歟。

蔡子英傳

蔡子英。永甯人。元末舉進士。擴廓丞相開府河南。辟參軍事。累薦。遷行省參政。猶不離丞相幕。從定西。爲明兵所敗。與丞相失。單騎走關中。轉入南山。久之。爲人所覺。捕詣京師。渡江。一夕脫去。變姓名關中。爲人賃春。時求元遺臣。急復迹得之。械見湯將軍。長揖不拜。湯將軍怒。抑使膝坐。不屈。火灼其鬚。且盡。罵罵自若。子英有妻。流落洛陽道中。求見子英。子英叱不顧。曰。吾故無妻。已逮至京。太祖令置外舍。沐欲官之。子

英退而因舍人上書曰。皇帝恢廓宏度。曲宥亡國之臣。不自死。慙負皇帝。往者軍敗見收。漏命刃下。荆棘之息。延及七載。重勞吏卒搜捕。自外大化。復忤貴臣。萬分不足以辱齊斧。皇帝不卽下司敗。使得以衣冠待罪。外傳。傾否賜新。授骨封肉。感上恩德。死且不朽。臣有痼疾。迷於心志。藥石匪解。竊惟少本書生。奪志行伍。過辱北帥知薦。仕底七命。躍馬食肉。十有五年。進不能効尺寸。陪國家之論。退不能畢命枹鼓。以愧封圉之臣。一遭板蕩。覲顏失節。皇帝既丕昭武功。踐華苞宇。窮髮臣嚮。堅甲利兵。宿積陳廩。猶以爲歎於志。下有司飭學校。褒予死節。風示後世。豈以耆俊盈列。侍臣爲多。令亡命俘。玷維新之化哉。皇帝幸哀憐臣。毋血藁街。而以投瘞海。禦魍魎。無人之境。臣若茹薺。書上。太祖益重之。陰戒舍人。謹事子英。亡恙。以旦夕閒起居。毋令天下謂我有殺義士名。自是每夜深號不止。舍人問之。曰。吾自念故主耳。乃具狀聞。上歎曰。吾何苦一蔡子英。彼喋喋泉下。替我哉。縱出塞。追故元主於和林。後不知所終。

史官曰。君行命。臣行志。豈不以天子之威。極於使之死止矣。元諸忠臣義士。委銜銜有之。然未有並其身全之者。夫節士所守。不見奪於人。聖主所風。不以奪人守。太祖子英。兩有以全之。

伯顏子中傳

伯顏子中者。其先西域人。官江西家焉。子中少好學。業成。五舉有司薦。不第。行省辟授西湖書院山長。遷建寧路教授。慷慨談兵。饒技略。會江西盜起。行省馳拜子中都事使。扞治贛州。子中從諸生趨贛。贛已破。爲漢子中倉卒募吏民。與漢兵鬪城下。不勝。吏民死且盡。子中獨身閒道走閩。時閩師陳友定方聚兵。欲

以固守報元。薦授行省員外郎。子中出奇計復建昌。因浮海抵大都獻捷。遷行省郎中。再進吏部侍郎。持節發廣西何真兵使救閩。至則德慶侯廖將軍已破降何真。子中跳墮馬。折一足不死。致軍。廖將軍欲脅降子中。不屈。義而釋。子中遂變姓名。冠黃冠游行江湖間。元之故臣義人哀憐之。爲傳致食。太祖數徵求子中不得。則錄取妻子沒掖庭矣。子中竟自匿不顧。曰。吾元臣。死元分。購鳩自隨。會事稍稍解。子中乃遁還里中。而上令郡國臚舉故元耆碩。令不應者。坐大辟論。會有言子中歸狀。上使使持詔以幣聘子中。使者至。子中借大泣曰。死晚矣。乃以詔汚我。歌詩七章祭祖父自鳩死。

史官曰。嗟夫。介哉伯顏子中也。其間關險阻。躓而愈振。何與廬陵信國異焉。天下時盡屬明。分已定久。而子中亦幾無日處死矣。詔至乃從容就義。竟示不臣忠之時也。後世有一隊夷齊下首陽之歌。觀茲寧不作羞塚耶。嗟夫。子中曾爲友定畫策。早通何真。封仙霞杉關。而專爭章貢門戶。則南海龍川之業可幾。奇計哉。使友定聽之。胡將軍未必能得志。

滕克恭簡祖英

附高

李徵臣傳

滕克恭字安卿。祥符人。初號耕學。晚更號謙齋。父敬甫。教子耕讀。隱居不仕。母李生三子。長直卿。善治生。勤力農事。季遜卿。讀書執禮。鄉黨稱善人。克恭其仲也。性明敏。勤學好問。博通經史。至正壬午。舉進士。仕江陵錄曹。公廨稍東有曲江亭。遠亭盡植梅。澄澄景霽。簿書之暇。散步徘徊。閒發有歌詩。寄興蕭遠。時人

莫之知也。遷翰林院經歷。累官至集賢院直學士。致仕歸。兵亂。避地錢塘。與楊廉夫相友善。克恭詩律清婉。南州人士多傳誦之。時時懷鄉見吟咏。其寄李提舉曰。錢塘經亂後。應是減繁華。遠信秋憑鴈。遊魂夜到家。兩江擢殺掠。四海廢桑麻。何日重攜手。春風汴水涯。送段大使還汴曰。長淮杳杳暮雲橫。君到蘇門兩月程。北擁關山猶戰騎。東連滄海未梟鯨。千金竊念垂堂調。一笑誰成搏虎名。我欲買舟從此去。寄書先爲問柴荆。嘗與諸名勝。譙集江閣。酒酣。占念奴嬌詞。擊節自歌之。聲振四野。一座盡傾。因題於壁。其詞曰。百年塵世。歎人生南北。馬牛風逸。客思淒迷。重九過。霜重井梧雕碧。往事難憑。佳辰易失。到處留鴻迹。浩歌聲烈。同誰傾寫心臆。回首淮海煙塵。兵戈阻絕。難寄西飛翼。獨前夕陽江閣。遍衰草。斷雲何極。便解征衫。掀髯一笑。花下重醺適。免教人道。西風門掩秋寂。明兵定河南。復歸故里。歎曰。吾得至此。豈非天哉。人民非故。天地自如。足以老矣。壽百餘歲。終於家。著宗譜圖說。謙齋稿。春秋要旨。嘗謂子禮字敘儀者曰。耕足矣。萬勿仕也。禮著文名有隱德。

簡祖英。字世英。東莞人。學問該博。有才略。事元爲江西都省員外。又從左丞何真起兵保鄉邑。贊平邵宗。愚功居多。廖永忠克廣東。乃徵祖英赴闕。燕勞之。資以緡帛。不受。以爲建平知縣。不拜。以母老疏辭。其略曰。臣祖英九歲失怙。惟慈親鞠育。少長知學。冀或用世。酬罔極之恩。臣之志也。向以叨食元祿。爲何左丞參佐。適值三山強寇。剽掠廣城。一門妻女。死節者五人。老母陳氏。爲所拘囚。臣隱忍不能卽死。其有愧於石苞多矣。茲遇聖朝維新。征討不服。率土效順。咸蒙嘉休。乃者三山逆敵。悉嬰鐵鎖。臣母生還。雖不孝之

罪固所難逃。而得以展區區羗鳥私情者。陛下之賜也。臣母子離散復完。白骨再肉。銘感聖德。徹於肝肺。雖九死其何能報。陛下復加甄錄。寄以民社。此正臣隕首思效之秋也。而臣逡巡不敢拜命者。以罪戾已深。不宜職在民牧。欽惟聖朝。以孝道治天下。以仁心懷遠人。臣經事元朝。幸已逃誅。母年逾耄。孤苦特甚。伏望聖慈。矜其愛日之短。俾遂歸養之願。則臣母子拭目清平。謳歌德澤。爲幸大矣。今臣年四十有九。老母年八十有一。西山之日。其來幾何。苟違親而事主。陛下安所用之。上從其請。終老於家。又有高彬者。字文質。南海人。仕元至萬戶。佩金虎符。入明。乃走江湖爲商賈。太祖聞其名。徵爲武職。固辭歸讀書。學爲詩。有奇語。孫賁亟稱之。晚年日坐一小樓。讀易。絕不與外人交。卒有詩集。號蟾溪集。

李徵臣。揚州人。仕元爲翰林待詔。洪武中。召至京。欲用之。不屈。家屬盡賜死。終不屈。謫戍寧夏。永樂間。有王某爲侍郎學士。太宗雅重之。一日召問。汝少從誰學。某以徵臣對。且言其德行文學。上密遣人取徵臣入京。召對稱旨。他日上問王某。欲見汝師乎。叩頭卽與相見。且欲官之。徵臣對曰。臣於洪武中。旣不受官。則今日義不復受。上曰。然則欲何之。對曰。行伍。上曰。今朕已召卿。可復從戎乎。乃遣還家。對曰。臣已無家。可歸。惟吳中有一故人曰盛景華者。願依之。上從其請。景華遂館之。命其子弟從學焉。居數年卒。史官曰。滕克恭。其古靖節之流歟。不仕亦不使其子仕。可謂世報君國矣。祖英不受命。婉詞得歸。卓哉見乎。李徵臣艱難險阻。卒獲令終。誠金石不移者也。屈指元末飯降之臣。始或榮遇。終必擯斥。如危素張以寧輩。皆所不免。方之此數君子者。不啻鸞鶴置塞。鷄鶩廁食者矣。



明書卷一百七十

列傳二十三

敘傳一

傅氏之先出於帝舜。舜庶子七人。其四封於傅。賜姓傅氏。歷夏入商爲諸侯。滅於商。居傅巖者仍傅氏。其所滅者。遷於海上。曰傅餘氏。傅巖之初。著者曰說。相商高宗。後繁衍。累代皆有顯者。凡傅氏無凶德人。入明居江北。以開國功。隸羽林右衛。爲正千戶。占籍上元縣。永樂二十一年。遷北京。隸錦衣衛。進指揮曰才。才之前譜牒失。傳以爲出穎公後。然未嘗稽考。弗敘也。才有子二人。一留官京師。其一曰寬。徙居靈壽。官京師者。與靈壽恆往還。序宗派。萬曆二年。居京師者絕。居靈壽者事耕讀。以武世職。子孫易蕩逸。弗屑襲。於是靈壽爲民籍。寬生千。千善治生產。雄於財。樂善好施。鄉里悅服。千生三子。曰濟。漆。洧。濟字惠民。尤篤厚。時以兵興。需豆三千石。迫甚。官不及徵。諸民濟詣官。自願輸千五百石。其親友李氏者。亦輸千五百石。事聞。明宣宗降褒語。賜章服。漆爲邑諸生。強力任俠。以人之緩急爲己事。洧讀書力學。有古隱君子風。生鳴會。中嘉靖庚戌。進士官給事中。有直聲。彈射不避權貴。權貴惡之。擠出守平陽。遂致仕。積書至數十萬卷。濟生鳴世。字汝鳳。內行純備。言笑不苟。性至孝。宗族鄉黨無閒言。爲名儒。隱居教授。千里負笈者。常以

數十計。所著有五經圖考。理性名言。文山集。書要錄。諸書學者稱爲桐岡先生。鳴世生二子。承訓承問。承訓字愧軒。克敦古道。讀書通大義。性恬澹。以鄉舉。惡煩劇。不爲牧民官。就代藩典儀於王府。修汰多所裁。正。王甚重之。所得俸有贏餘。輒以贍窮宗。蕭然公署。日手一編。意豁如也。居十載。不調。解去。王固留。承訓曰。魚鹿側。王僚今十年。王德業成就。無所庸匡維。敢乞骸骨歸老。王曰。人各有志。不能強也。因出郊。會諸王僚。共賦詩祖道。時人榮之。里居多行陰。罵事與物無競。訓迪子孫。以勉善爲諄戒。絕口不言干進。恆語曰。爾能自奮於功名。盡忠報稱。事在爾等。吾第願爾等爲鄉里良士民。其安分敦行如此。承問字巖軒。少聰慧。十歲通經。下帷苦學。然不事舉子業。考貴天人。根極性命。慨然以聖道自任。以鄉選守許州。多惠政。移秦府審理正。承問爲人。方毅嚴正。羣宗多不逞。每繩以法。反覆援古今譬喻之。羣宗懾服。王初以爲嚴厲。久之嘆曰。傅子之惠吾宗大矣。使諸宗人爲賢聖人。不骫於法。厥惟良哉。上王官殿。最爲天下第一。故事。王官不得它補。承問謝病歸。王固留之。見其囊橐。上書數卷。賜以狐白千金之裘。承問辭歸。居里閭。日事誦讀。其於古今經史。淹貫博洽。足跡不至公衙。積二十年。所著有一得語二十卷。十卷言學。十卷言政。巖軒集五十餘卷。行世。皆以孫贈資德大夫。吏部尙書。承訓生三子。曰鈍。鈍承問無子。以兄之仲子。鋌爲嗣。鈍爲邑諸生。善治家產。益拓資擅一方。性豪舉。好客。揮擲自如。諸凡琴奕精絕。所至無與媿者。鋌。麟祖也。字用礪。性和易。不忤於人。少彊學。舉於鄉。爲岐山令。一以德意感化。有訟者。爲和解之。柘楊措而不用。百姓悅服。號小西周。出迎春。有雙鹿隨車。馴擾。五雉立。繖蓋。人咸異之。頗好道家。修攝。官岐四年。厭

而歸。歸靜坐樂山水。自號樂樂子。又號識一山人。著內外景及神驗仙方諸書。以子封資德大夫吏部尚書。銛字印之。少有大志。慷慨以風節自勵。倜儻不羈。嘗入深山讀書。不事生產。至貧不舉炊。不問也。所得輒買書。喜裁割。未幾棄去。獨居魯柏山茅屋。數年不出。後親友勸之出。以萬麻戊午。與其子永濬同舉於鄉。仕五臺令。五臺俗悍多藏奸。銛捕摘無遺。人目爲神。當熹宗時。權璫魏忠賢肆虐。流毒縉紳。威加無不糜碎。諂者皆於名勝建生祠。山西撫按諸官欲建祠五臺。催銛具呈。銛曰。五臺名勝也。余爲其地主。忠賢奸閹。不可以辱山靈。屢拒之。值熹宗崩。八月中。忠賢生日。閩省官皆吉服舉賀。望拜。銛獨服斬衰。望闕痛哭。各官皆汗下爲銛危。出公署。遇在籍都御史孫傳庭。亦斬衰。兩人攜手行。曰。當此時。惟吾兩人耳。後會多官議公事。有如緹騎。負責鞫從。巡撫中門入。人人面灰。銛談笑自若。曰。此五臺事。何與衆人。果忠賢親筆。但云五臺好漢好漢。饒他饒他。衆爲賀。銛曰。生死命也。何賀爲。而多官竟建祠五臺山。日督土木。銛不一至工所。祠前有僧塚。多官欲平之。銛馳至。曰。僧雖異教。然既死。則與吾儕同。古人惜枯骨。何平爲。銛今日爲枯骨。至不爲祠。至也。遂曰。子爲五臺令。而使其地有淫祠。吾何忍官於此。乃乘印於多官。單騎歸。愛山水。營於正坳。種松竹。作亭榭。其友滿琯白至。愛之。遂決贈焉。復選賈山曰。太子坳。山深邃窈窕。種植如前。斷溪蓄水。可放舟。又棄去。至又山。開稻田。種蓮數十畝。日徜徉其間。以老著詩文數十卷。曰。癖山譜。銛生三子。永清。永濬。永淑。永清果毅有志節。爲諸生。棄隱不仕。永濬字惺涵。鱗之父也。父生而聰慧。少多異徵。過目成誦。終身不忘。少多藝。能丹青。棄曰。小技耳。奈何以此爲人役。作耳目玩耶。遂取家藏書肆力讀。

鳴會祖有知人鑒。嘗語人曰：此子必大成。器度軒豁，文心雋永，非凡品也。天啓辛酉，舉於鄉。明年以曲臺魁南宮。初筮楚房縣令。房故唐宋來爲遷徙流人之所，而石劉復久據地曠多窮，崑蓬谷易匿奸民，獷狎夙設。所軍最橫，不以有司爲意。而有司亦莫敢鉗約。父下車，卽花令軍民各安業。如佛法，不女貸，摘其狡戾者置之法。軍肅然。有趙族大而驕武，多殘虐鄉里。每恫喝有司。父先召其父老諭之曰：聞女子弟多不法，須改行爲善。不然，吾不畏汝嚇。將掃爾族矣。嗣有犯者，卽發遣配。趙族相戒不入西門爲良民。民安之。奸民窟深山，往往出爲剽掠。父擇愿謹富民，僞與賊往來，盡知其人其地，突掩捕。自是匿奸絕，俗健訟。父每先勸解之曰：家有衣食，縣官不爾擾，爾安享之。奈何資訟師分理其曲直，各得其意而去。不責餒，勝者負者皆悅。久之，至於無訟。房歲課三千金，起解者不過千金。百姓輸納足其數，輒上之藩司。餘兌軍役，而鄉民利兌。第予山中皮張藥料以充，不必入城，頗易銀也。衝齋閒寂，時止母及余，與僮奴二三人，皆布衣蔬食。人以其清而明，號曰冰爺。房處萬山中，士樸陋，久不發科第。父爲建書院四處，擇俊秀者讀書其中。父日與講說經義，指竄文理。二年，卽有中鄉試高等者。山開多溪，而山麓有土可耕者，民不知種植，輒棄廢。父爲步履山開，鑿疏三十六堰，設機使水上山，嶺成膏腴。或此山有水而彼山有土，相去百餘丈，父爲斬山木作架，列規引灌之。曰：高規低規，計墾灌田數萬畝。民以富饒，斗米十文。巡按御史楊新期特疏調繁武陵，會撫治鄖陽都御史蔡復一復一不許。曰：君全省好官多矣，吾隸止此一官，而欲奪之耶。相與聞，再疏留。語父曰：當爲房造萬年福也。房西南通蜀，有洪坪者，山險峻，中有平曠可屯。楚蜀奸徒數千，噓

聚其中。做石劉稱通天王。改號大安。戕閩左。時兵巡僉事某者。性貪鄙。惡父不賄。祝使之入山勦撫。父止率三五役騎而入。其地不容騎。步行攀援山葛。負餼而食者百餘里。遣人齎諭詞先。遂孤身入賊穴。賊聞父名。咸屏息聽。父諭禍福。願隨來歸。焚其巢穴。父率詣軍門。卒籍爲兵。時貴州亂。調赴甚得其力。居五載不遷。丁外艱。歸日。士民擁車號泣。不得行。送至漢水上。計三百餘里。乃生祠祝。凡後令有不便於民者。輒衆哭於祠。曰。安得我傅天再來也。服闋。補山西芮城令。芮瘠邑。父至。一意撫綏。民安堵樂化。日焉。獨其地瀕解池。鹽丁往往不均。爲民累。父衡其分數而均之。役無苦偏勞。甲子湖廣。庚午山西。皆分校禮經。居芮二載。崇禎辛未。召爲河南道監察御史。去芮亦如去房生祠。祀爲御史。抨彈不避權貴。其時門戶甚盛。有所謂西黨南黨東黨者。咸來招父。父峻拒之。曰。爲朝廷臣子。盡職分。殫力竭心。猶日不暇給。何黨爲。言者每慚而退。而東廠錦衣衛。權傾中外。縉紳羅患。父每刺及之。諸閹佞側目。以父清謹無如何。時邊關多事。爲敵窺伺。恆躡入。司關者苦之。爲畏途。乃衆擠父往巡關。欲借陷。父單騎履關隘。出關每數十里。相其險易。置戍守。謹烽燧。補塞垣。教習火器。於通河無城垣處。立木爲城。號捨城。鼓勵將士。有庸懦者。輒彈去之。自山海西至紫荆。皆數回。向關使往還。諸弁苦供具。父止數吏隨。一飯一蔬。餘無擾焉。行無定處。恆數至。是以將卒皆不敢懈。出關嚴冒濫。清兵餉。每語諸將曰。破敵當於其營陣未立時。若俟其定。卒難拔也。諸將遵之。果大捷。敵敗去。而各關出哨多斬獲。晉父職一級。制五年一大閱。無肯代者。廷臣咸曰。某有成效。仍宜遣。加特敕。得舉斥大帥。大帥皆擐甲參。父益鼓勵之一日。乘車往廣寧。忽傳烽。左右皆請介。馳入近。

城避。父視風日曰：偽也。斷無敵耗。已而果然。人咸服其神。奏報。上嘉之。再晉一級。計彈吏及經畫。述情形。疏凡二百四十上。皆得命旨。時正多善差。獨陝西流寇猖獗。縱橫數十萬人。復以爲畏途。衆仍擠父。巡按陝西。父曰：吾志也。吾每恨不得柄翦滅。此正吾志也。毅然往。以甲戌入秦。而潼關以西。皆賊橫肆地。巡撫都御史某者。巽懷。兵將不聽指揮。每有警。以令箭調之。將官羣飲號。不顧也。促之。擲箭於地。其時有撫臺令箭。不如阜隸催籤之詔。父上章列其狀。劾之。逮下刑部獄。因請得董兵將。而當事者第覆得綜核。糾察如故。賊至。每有所計畫。輒殲敗之。賊探知甚恨焉。父巡河北。抵邵陽。賊悉數萬圍邵陽。而數重。日日夜夜。急。父偕士民登陴守。城卑薄。其所以防固者。不遺餘力。賊每攻輒不利。相與坐困。布按諸臣。每邀歸省會。父曰：吾在河北。七城將來。猶有救。吾去。是棄河北也。益堅守。相持七十餘日。而省兵皆爲賊所習。不畏也。父相度邵陽城。北瀕黃河。夜使人齎文於三邊。徵兵。未幾。得榆林兵五千。順河而下。夜啓北門入。賊不覺。朝賊復悉衆來攻。父使開三門受敵。以二千登陴。三千各一門。魚貫列矢銃。賊逼。倏發。斃者不可勝計。遂衝出。殺戮無算。父騎隨。大破之。追渡河。賊咸奔終南。而河北以完。歸西安。口不言功。時懷宗甲戌。以都御史陳奇瑜爲總督。督陝西。山西。河南。四川。湖廣。兵專辦流賊事。捐餉數百萬。兵號十三萬。聲勢震耀。凡賊所移處。皆得調度。不限地。河南賊聞之。亦奔終南。奇瑜入關。賊悉衆度棧入漢中。值蜀兵出階文。楚兵溯漢水。他兵皆集。而漢中霖雨兩月。賊困促。父語奇瑜曰：賊弩解。刀鏹馬蹶穿。衣甲涸爛。進勦之。成功在斯時矣。奇瑜曰：待天晴。賊漸出棧。乃可戰。父曰：晴而出棧。尙可盡殲耶。奇瑜不聽。賊載厚賂。賂奇瑜左右。求

撫奇瑜故怯戰。欲撫之。父曰：賊數十萬，卽就撫，何以安頓？保能革心耶？力主勦，而奇瑜幸苟且，必欲撫。上撫疏，父哭留疏曰：此機一失，天下事不可知矣。兵部尙書張鳳翼黨奇瑜，遂覆宜撫。賊從容出棧，與官兵歡飲數日，忽鼓行而西，破鳳隴、汧陽諸州縣，遂不可制。父上疏劾，其略曰：臣竊惟自古聖王之世，不能無小醜之憑陵，而區畫得人，則雖有搶攘，旋歸底定。僮經理者，關於事機，感於左右，昧於攻取，剛復自用，苟且爲懷，關於事機，而偏拒達務者之謀，感於左右，而偏殫燭奸者之忠告，昧於攻取，而不信知進止者之痛哭流涕，以至縱寇殃民，禍遺君父，不止於壞一方，而使國勢不支，鼎圖搖動，天下事有不可言者。無如五省總督陳奇瑜，兵部尙書張鳳翼也。臣思流寇發於延慶，蔓於秦楚，毫豫戕人民，壞城郭，所過之處，白骨橫野，千里斷絕人煙。皇上宵旰焦勞於上，司農仰屋，百執事盱衡於下，糜費帑藏，至於空虛，損兵隕將，不知幾何矣。向來勢分而地廣，勢分則調度不專，地廣則兵難邀截。皇上明見萬里，洞徹事機，乃以陳奇瑜爲五省總督，敕以便宜行事，賜以尙方劍。若奇瑜者，僮能以皇上之心爲心，當何如畫策？何如感憤，合五省之兵，殺一賊則少一賊之擄掠，滅一股則少一股之蹂躪，而奇瑜則有大謬不然者。流賊初聞有五省合勦之舉，以中州平原曠野，難於藏匿，乃西踰關嶺，合秦寇入終南，及奇瑜率兵入關，賊皆度棧入漢中。漢中西隣巴蜀之險，南止漢水之通，東有棧道之扼，所謂釜餽之地也。當其時，蜀兵出階文矣，楚兵屯漢水矣，大兵數十萬，據長安，包隴陝，控嶠函矣。一鼓而入漢中，計可旦夕翦除，爲皇上舒西顧之憂，爲國家雪十餘年之恥，爲數百萬生靈解流離殺戮之厄，而奇瑜又有大謬不然者。逍遙河上，作好軍中，今日

曰候餉矣。明日曰練兵矣。日復一日。業已半年。值漢中霖雨連霖七十餘日。賊之刀刃鏽蝕。弓弩弛解。衣甲渴壞。馬駭盡穿。數日不能一槍。其零賊稍稍亡去。地方道府州縣。報日數十至。其困頓情形。極真極確。臣乃執奇瑜手曰。滅此朝食。此其時矣。而奇瑜則曰。俟彼勢促。吾第撫之。不遺一矢。成此大功。臣曰。數十萬流賊。卽就招撫。何處安頓。卽有安頓之地。彼狼子野心。能保革心耶。不及此時進勦。恐天晴出棧而西。雖欲成功。豈可得歟。屢次催促。至於垂涕而道。而奇瑜堅不進兵。賊乃大悉金寶入奇瑜營。徧賂左右。左右皆不欲戰。遂朝夕以撫策進。竟不會臣。具疏請撫。而張鳳翼受奇瑜左右之賄。遂力主撫議。覆疏得旨矣。嗟嗟。凡撫者。必勦殺之餘。所遺無多。我可以制其死命。始可言撫。臣非不知撫之省力。而實非當撫之時也。賊乃整隊從容出棧。與奇瑜之兵。揖讓釀飲。易馬而乘。抵足而眠。賊之無衣甲者。有衣甲矣。無弓刀者。有弓刀矣。數日不殮者。飽飲食矣。遂蹶然而起。西度隴右。破鳳隴。汧陽諸處。而撫局大壞。以至燎原。而奇瑜且謂諸有司之敗撫局也。參數登陴固守之令。不知賊自出棧以來。其擄婦女掠畜物殺百姓如故。而奇瑜若罔聞知。彼守土之官。安得不登陴固守。而甘以倉庫遺賊也。謂一二守令之敗撫局。其誰信之。臣思奇瑜數年司道之官。受茲寵命。官大司馬。假節鉞。握尚方劍。皇上待之者如此。其隆任之者如此。其重計奇瑜當必臥薪嘗膽。枕戈援袍。慷慨激烈。以答寵命。而乃悠悠忽忽。輕信閒諜。不能盡力所當爲。是路溺職。自流賊發難。蘇我人民。屠我兵將。喪地糜餉。不知凡幾。爲臣子者。宜誓不俱生。殄滅而後快。而奇瑜全無同誓之義。坐令釜底遊魚。爲出柙猛虎。是謂玩寇。明知其不可撫也。而撫之。致使數十萬之賊。安

然逸去。是謂失機。果其爲撫也。賊未出棧。當思所以解散之方。賊既出棧。當思所以制馭之策。乃使兵賊交易。益以堅甲利兵。而且力護撫局。如喚咻小兒。唯恐叛去。使賊之鋒益銳而力益強。是謂助盜。及守令各爲地方計。謹倉庫。愛人民。而乃謬謂其不開門揖盜。隱蔽題參。欲自揜其撫局之失。不思欲蓋而彌彰也。是謂嫁禍。既自墮於賊網。又串通張鳳翼。表裏爲奸。共成敗著。而卒致債事。是謂黨惡。十年逋寇。兇暴酷烈。天地爲之慘淡。鬼神爲之悲號。皇上日夜殷憂。不啻五申三令。奇瑜則立視萬民之塗炭而不知救。夫力之不足。勢之不可。猶可言也。矧茲趕桓之衆。屯於關中。五方之師。控乎險隘。而奇瑜忍漠置之。虧損國威。舉皇上授鉞之廟算。一旦棄擲。爲賊所竊笑。是謂辱國。豈不知若干巨賊。頭目未嘗而縛入軍中。黨羽未嘗烏散就隴畝。斷斷乎不可撫。而鳳翼奇瑜。奸惡相濟。巧於得旨。是謂欺君。今賊既西矣。奇瑜並不提兵尾賊。而晏然省會。使賊勢披猖。橫掃延慶。臨鞏之閒。近復聞其欲渡河入山西。萬一殘汾晉。踰太行。躡畿輔。烽火通於甘泉。兇鋒觸於陵樹。國家事尙忍言哉。是謂禍天下。臣不知已損之國威。何時復振。已辱之君命。何時乃復得伸也。臣所以激切拜疏。拊膺而痛哭也。伏乞皇上大奮乾剛。爲生民計。爲封疆惜。爲宗社慮。立將陳奇瑜張鳳翼逮訊。置之重典。使服辱國縱寇之辜。別選賢能。及此時大兵雲集。帑金及各直省轉運糧餉。正當充足。力爲勦除。相機撫插。以雪國恥。而震天威。庶幾國家無疆之福也。疏入。懷宗震怒。逮奇瑜下詔獄。張鳳翼戴罪自贖。餘將領皆戴罪。奇瑜初知上疏。左右皆切齒。欲甘心焉。一日盛兵邀父飲。有告者曰。事且不測。盍勿往。或往必以兵。父曰。我朝廷命官。奇瑜無此膽力。以數人往。談笑自若。

終席左右雖眈眈終莫敢動。懷宗復以某督五省兵。某與父頗協。或勦或撫。凡事商榷。而聞王九條龍蝎子塊八大王諸賊。漸次除掃殆盡。惟李自成號闖將者。獨渡河。緯山西。據太行。時出沒畿輔間。時父察吏嚴。墨吏咸遁。一切供億。悉以賞有功者。及歸。不持錮誅。乙亥得代。入爲京畿道。刷卷清釐。獨多。尋掌河南道。理計典。帶掌江西四川兩道印。丁丑。陞太僕寺少卿。督東路馬政。軍興需亟。委曲綜析。馬不苦乏。攝寺篆。戶部以缺餉。借寺馬價十萬。父曰。馬國家之長技。與軍餉等。奈何以餉廢馬。靳不與。未幾果發兵。大索馬。父爲市得數千匹以應。懷宗喜。獎諭有加。戊寅。陞左通政。尋陞太常寺卿。父以雅樂多弛廢。爲遊樂官。著雅樂鴻編。方督肄而邊報急甚。羽檄旁午。其時兵部缺左侍郎。廷推以右轉。而懷宗中旨用父。時父守德勝門。漏下三鼓。中使紛沓至。傳上命。父卽夜任事。尙書辦兵馬一切部務。皆倚父。父爲夙夜在公。雖百事蠲集。而暇定周應。皆中竅。繁敵退。議者欲自通惠河北。遶京城。灌河渠。防突攻。父曰。三岔非不廣。山海非不險。而能於彼守。何用臥關。邊坑塹耶。不聽。遂以父董其事。屢諫復不聽。移疾以去。就爭而終不聽。以河事責工部。而用班軍修濬。則以父領之。日在郊野。時都察院缺掌院。左都御史部疏名凡十三上。懷宗皆不用。一日。御宏政門。召吏部左侍郎林棟隆及父。與兵部右侍郎王道直於御前。懷宗曰。左都御史一官何如。棟隆道直先後對。父乃對曰。夫左都御史一官。爲朝廷耳目之司。作四方紀綱之倡。爲此官者。須以清嚴自勵。不徇情。不受賄。懷宗顧問大學士蔡國用曰。云何。國用以六字對。懷宗連曰。是是。父又對曰。爲皇上據法糾彈。解散朋黨。力擊貪墨。使十三道御史各盡職分。畢力王事。十三道亦各以清嚴自勵。爲

皇上激濁揚清。察吏安民。如此則官方正而生民安。民安而盜賊自息。懷宗喜悅而獎諭立拜爲左都御史。且以卽行所言。父遞謝。懷宗曰。卿素廉直。朕所鑒也。又問盜賊充斥。何以靖之。父曰。盜賊之起也。起於歲荒。有司不能多方撫綏。以致窮無所歸。而後之不靖。皆因將惰兵驕。督撫按之權不重。而監視內臣。復縱兵如驕子。日事宴遊。不肯殺賊。而督撫按無如之何。卽列款題參。不過降一二級。照舊管事。夫以短後無恥之徒。豈畏一二級之降。況監視內官。巧於護局。旋借名題復。更爾加陞。以致功罪不明。賢愚不辨。殺良冒功。避賊宴處。及賊一過而兵將尾之。搶掠之慘。萬倍於賊。兵將利於有賊而不利於無賊。夫兵將勦賊者也。而實益賊者也。伏乞盡撤各方監視內臣。專責督撫。按以賊之有無爲功罪。勿以逐出己境爲功。以隣爲壑。而將領有不肖。及罪狀顯著者。卽行正法。不必關會兵部。使錢神有靈。以內之題覆。掩外之功罪。況近來兵將之所以不用命者。皆以上官稍繩以法。卽掉臂鼓譟。地方官恐致罪戾。百方招撫。加之餉。苟且了事。自今凡鼓譟兵將。必行勦殺。不得姑縱。備有如昔弊端。容臣等白簡從事。庶兵將奮力而賊不足平矣。上大悅。未幾盡撤內監視。父之力居多。總西臺一年。多所彈射。羣黨側目。而廠衛邏卒日伺左右。已卯。掌大計。嚴絕苞苴。無私交。廠衛亦無如何。修憲綱。定差規。權貴請託皆不行。御史有不稱職者。多奏去之。臺班肅然。明年庚辰。轉吏部尚書。父見其時吏部凡用人銓除。皆寄近侍權貴及緹帥之口。而且黨人耽逐。衆口囂滋。恐力爲擔荷。易至僨事。辭奏上。懷宗答曰。卿公忠端亮。統均重任。特茲簡畀。已有成命。不准辭。應卽任事。以副委任。至意。父復暢道時會情狀再辭。懷宗報曰。卿清謹素著。一切銓政。務破情

面力爲主持。朕自鑒之。父乃於三日中。清理積案。應陞遷銓注處分者。二百餘事。皆相宜奏行。門絕請謁。總憲既缺。諸權貴黨人。皆有所求。父曰。此僉邪。豈可任風紀。將攘寇無厭。不惟壞朝政。且自斃矣。其人銜之。乃噉言官論父剛愎自用。懷宗曰。典銓自應執法。皆以謗訕罪之。且曰。勿以人言墮任事心也。父因上銓務十事。曰。慎會推以重品望。曰。增督督以防賊渡。曰。遴邊才以儲督撫。曰。起廢閒以求老成。曰。斥緘默。戒浮議以重言路。曰。公選法以防弊端。曰。明舉劾以端吏治。曰。須久任以責成功。曰。用不次之擢以拔異才。曰。清咨選以疏壅滯。懷宗嘉納之。舊弊每選廠衛直指美缺各二人。而他賄囑倍是。皆以單籤入筒。使掣不平甚。父乃截分南北缺。以進士舉人貢士爲上中下。先榜示諸缺目。臨期一同入籤。而選司郎中張羅彥猥爭。以爲如此必釀大禍。父曉之。選人皆服悅。而私囑者獨恨。每考職亦如銓選。諸奸邪藉此牟大利。父每考坐公堂出題。親收卷。使諸與考生勿出署。會同左右侍郎及諸司公閱。勿交讒。卽日批職唱名。同諸考生散。衆皆心服。至公。凡會推。先查資俸探望重者。會詢諸大臣科道。無不以爲精確。諸忌者日夜思逐去無策。先是庚辰大計。懷宗頗好詞察。時外吏多以苞苴賂貴近。會以他事召公。卿大臣於平臺問對竣。乃曰。聞外吏多輦金入都門。賂揜穢狀。詞捕何無奏聞。大學士薛國觀爲首輔。對曰。誠如聖諭。多爲詞役鬻釋。皇上釐奸至意。皆此輩借端聚斂計。懷宗怒。立召東廠內官呵斥之。欲加以法。力乞乃止。東廠內官出至左順門。語其黨曰。我等今有對頭矣。未幾。羅織國觀數事。入贓三千餘金。謂之事件。入奏。懷宗信之。下五府九卿科道會議。時定遠侯顧肇迹。掌後軍都督府。宣城伯衛時春。掌中府事。例議單。二人主

之會母夫人彭卒。懷宗諭父暫假。而會單於中府始啓封。單三請。或以大臣免議。或以回籍聽勸。或勒令致仕。而給事中曾應遴曰。朝廷意不測。免議似難結局。遂舉筆抹去。或以大臣免議六字。奏上。上果怒。下錦衣衛鎮撫司提證佐嚴鞠。鎮撫司掌司事者。希東廠指示。悉實之。奏入。上勒令國觀自裁。下擬諸株連罪。而鎮撫司復招疏末曰。國觀當會議日。浼中書舍人梁維樞走囑某。議單從輕是實。懷宗見奏猶疑。漏下三鼓。差中官及守衛官至父私寓。取月來門簿。舊例家宰門簿。有專官司之。夜啓宮門取覽。月內無維樞名。復下鎮撫司。又復曰。維樞與某爲兒女姻。焉有蚤夜至親相過而登門簿者乎。懷宗亦不怒。第准父致仕。父上疏謝。以爲半肩行李。策蹇言歸。在銓部僅半載。慎惜人材。獎拔幽滯。持己廉靖。人不敢干以私。乃入太行石門山。不問縉紳陞遷。不閱邸報。不交遊往來仕大夫。不一字入長安。布衣折巾。有時步行塵市閒。人不識爲舊冢宰也。山居四載。歲甲申。李自成陷京師。父北向痛哭。遂攜家口入東海島中。家中所有。皆委棄弗顧也。海居六月。會大清定鼎。詔頒天下。於是從海上還家。既破。食貧。從來無聲色耳目之玩。園囿亭榭之娛。自奉儉素。日事誦讀。孜孜誨人不倦。絕不入公門。見長吏。然有不便於民之事。務力爭。每走隴畝。雜農老。勸迪慇懃。訓約族人。期於爲善。有子曰維楨。更名維鱗。屹屹事誦讀。從少時以直道自任。年三十餘。不得志。己卯庚辰之閒。民遭兵火。兼以天災。作士傳民語。以當長歌痛哭之意。其文多弗錄。甲申從之海上歸。閉戶力學謝人事。



明書卷一百七十一

列傳二十三

敘傳二

大清鼎運肇興。文明大啓。順治三年歲丙戌。開進士科。維鱗獲中式。選。改庶吉士。入內翰林國史院。明年丁亥。授編修。改內翰林祕書院。又五年。晉左春坊左中允。兼內翰林宏文院編修。鱗得分修明史。所纂不過二十餘年。止類編實錄。不旁採。工無庸多。鱗以清暑餘暇。素餐抱愧。乃接求明興以來。行藏印抄諸本。與家乘文集碑誌。得三百餘部。九千餘卷。參互明朝實錄。考訂同異。不揣固陋。纂成明書。乃起而言曰。鱗生也晚。遘明末造。才譎澆微。神識黯淺。然隨祖父宦遊。多歷山川。久居京國。既聞掌故。兼得日依壽獻。行年三十。未獲功名。遭遇清朝。濫竽史館。事既簡靜。偃息多閒。傷大官之坐廢。悲歲月之流邁。既無政事之揮霍。上匡翼之謀謨。復不得吐發議論。敷奏章疏。効諫諍之萬一。負性剛直。徒鬱中懷。思惟史職。爲史乃其本然。既奉簡命。敕纂明史。列局分曹。不能悉窺全冊。又止採實錄。嚴禁旁搜。除所闕二十餘年。他勿得過而問矣。妄肆野鄙。搆此明書。然而史亦難言矣。或生不同時。年久則事實多舛。或生與並世。地遠而傳聞未真。憑空結撰。無本易乖。依樣葫蘆。波靡不斷。不得不依據曩牒。旁采遺逸。國家傳信之書。莫如實錄。

古者史職。咸出世官。天子言動。左右必記。事既親見。言亦耳聞。筆之於書。金石不泐。後世則不然。官無定員。職無定人。疏逸人主。邈隔九重。不特宮中之動靜。迥不相關。卽殿上之謨謀。瞞不相及。而各曹政務。又全不與聞。及易世之後。始取所貯奏章。及起居敕諭。以次騰書。又總領以勳臣。提調以宰輔。無論執筆者之邪正。改竄者之公私。而追書舊事。茫昧者多。國祚衰闕。表之有吠主之嫌。冒功僞名。暴之有操戈之釁。或奪於權勢。或隘於見聞。或怵於利害。或徇於情面。孝子慈孫。每委曲欲掩覆其祖父之短。富豪權要。陵競欲矯飾其一日之長。致使孤而無援者之謀。猷勳業。滅沒不彰。而奸險情態。則無以發其微。而垂戒後世。嗟乎。明之實錄。大概如此矣。而野史之弊。則又甚焉。或有爲而作。激烈成編。圖報暢榮。挾憾汗鱗。寄雌黃於匪眚。彰黻繡於黨同。妄肆貶褒。謬厥聖闇。或人品粗率。才識平庸。輕聽惑滋。據爲堅確。陋巷妄述。廊廟之事。下市偶聞。傳說之言。遂信爲真。哀然成軼。或詭誕偏僻。好爲其創。本前代之事。而輒作時人。實風影之譚。而妄云果有。務爲可驚可愕。以取媚聽聞。總之各抒智臆。不顧傳疑。是非混淆。眞贋相半。而家乘又頌揚之辭。碑銘皆諛骨之作。豈可盡信哉。況合而觀之。有此譽臬。彼譏共鯨。年月不同。姓名互異。齟齬違錯。千狀百端。而欲以一之。此其所謂難也。麟則考證典章。恪宗文獻。徵是非之互異。卻忌諱之顧慮。前人多與。則存以嘉榮。故策皆疵。則彰以斧鉞。卽其平生良顯。一事之誤。則善爲原心。果其素習陰詭。一言之出。則酌爲誅意。名爲當代諱。不敢指斥者。則直書其非。律爲祖父隱。不欲明言者。則竟摘其實。至於論贊。閒探舊文。或異昔稱。不嫌專擅。進退錄棄。頗極苦心。起元天曆元年戊辰。迄明崇禎十七年甲申。於

萬厯以前。釐然詳備。秦昌而後。多有闕略。緣故牒散失。國無藏書。事近人存。野史未出。以故真聞真見。乃始濡毫。而恍惚疑似。寧俟來者。撰述本紀。宮闈紀。表志記。世家列傳。凡七十七目。一百七十一卷。爰爲之敘。其敘曰。

皇皇明祖。龍飛淮澳。元政不綱。九有顛仆。腥涎濁甸。乾承坤覆。擊視鯨擊。羣驚戰陸。神武丕憲。祥靈有毅。怪光室耀。赤蛇弁宿。江沱式澄。神州載肅。謀猷借滅。黃麾弗蚬。紛梗削平。游魂懾服。恩覃萬方。威伸五域。英賢共理。典章穆穆。煌敷文教。禮樂都郁。聖學超傑。功高六日。月重朗。天人禔福。懲元弛懈。嗟嚴媿戮。不變穢風。無傷轉育。纂太祖本紀第一。

嗣承貽厥。天位不易。有炳其文。藻黻盜眸。魚水堂簾。優敷仁恕。衆虎環哮。穉子何寐。齊黃進策。國燾隨甚。北平眈眈。橫槩指南。□任伎怯。金川莫函。吁嗟何歸。白首瞿曇。節義顯著。餒死孔甘。匪維培植。亦又奚貪。纂建文皇帝本紀第二。

太宗英挺。奮興幽朔。鉞屈君側。元黃戰血。靡應不清。修江翼檝。爰革家孫。御六改紀。有典有則。絃移柱易。嘉徵屢見。一關重譯。十族蔓殃。日星陰晦。三王幽死。骨肉慘顛。孫蒙祖號。革除何志。遠略紛紜。聖德頗累。纂太宗本紀第三。

仁宗孝謹。專志文學。讒惡幾構。執躬益卓。脫險卽彝。河魁乃握。美善兼盡。簡冊跣踣。嘉師阜康。天奪胡速。纂仁宗本紀第四。

宣帝嗣業。奮策雷迅。兵不血刃。掃清大慙。祇奉先型。政無慙戾。寬仁恭儉。文采煥發。庶歌喜起。綜核名實。蔽服弗長。淪浹必世。靜慈貽悔。交南敵屣。纂宣宗本紀第五。

英宗幼冲。昏極肆禍。尙賴聖善。彈服抑遏。初政清平。內贊力巨。攘竊罔覺。土木淪播。潢池多弄。誰執其咎。返轅南宮。銜憾螻伏。貪天之功。奪門名澆。疑獄殺良。二豎爲虐。晚節攬綱。言路宏拓。治成精明。殷憂聖作。止殉出建。盛德弗過。纂英宗本紀第六。

景帝潛邸。遭家不造。倉卒履疚。盤石鴻寶。轉危爲安。厥功匪眇。迎立無意。易儲草草。子臧之節。僭莫循考。纂景帝本紀第七。

憲宗踐阼。二后同尊。合祔陵廟。有脊有倫。忘嫌復號。憫忠錄孫。柔遠能邇。綏戢元元。彭殂商去。萬劉秉軸。盡緒薦起。百度內蠹。權閹煽焰。羣小貪祿。羅織縉紳。道路以目。構怨外彝。言路閉窒。黠質戒服。觸根蠹蒂。異術販竊。賞罰倒置。純而不純。星變弗息。纂憲宗本紀第八。

孝皇出震。謙恭仁孝。盛節著聞。天意有在。紹休前烈。躬親庶績。霽顏晝接。都俞孚昔。君臣一德。怠荒是戒。秩秩左右。奮庸熙載。邳隆鼎盛。成康無愧。纂孝宗本紀第九。

武宗才武。足用爲善。比暱日非。廢格滋薦。八黨執權。淫巧心眩。狼毒凌轡。公卿屈膝。刊落重臣。臺諫挺斃。天民交變。偃仰酣快。昏濁薰灼。袞袞封拜。名義乖謬。程駿中外。逆藩傳檄。匪曰無故。海宇沸騰。鼎國幾覆。小人勿用。弗省易戒。不至喪滅。實惟天幸。纂武宗本紀第十。

肅皇威神興於藩服實叡實聰制作煜煜孝思過則以致羣哭疑獄蔓支載岸載逐不思其反終行冒臚元修醮籙狂惑邪術崇祥悅諛土木不息中興赫濯聲靈旁皇享厥長久明祚孔陽纂世宗本紀第十一穆宗皇皇嚴恭若神敦厚寬大天下歸仁制節謹度盡□皆盡好生惡殺愛民釋怒異方琛贄超邁遠古綏邦屢豐餘糧棲畝六載唐虞培栽獨茂纂穆宗本紀第十二

神宗履極冲齡粹質馮張柄政猶復虎噬毅然夫決四海望治兵革不睹康衢作息鼎運熾臧受天百祿聖孝融融宮闈穆穆倭播肆靖厥謨孔武晚年靜攝亦曰勸勤百度頽圯啜隔臣隣黷貨無厭鑷稅紛紜如木漸蠹枝葉無恙弛而弗張明道不亢纂神宗本紀第十三

帝少孤微遺閔孔多羣諍充耳恭孝益嘉天眷聖哲卒凝璇圖踐阼百日政化宏敷馮几顧命下多遠北藉事擻譽俾蒙不睦纂光宗本紀第十四

熹宗蚩蚩好行小慧牝姆盜柄比於閹魏殺戮忠貞縉紳重足彪虎虐威刑獄浚削內寇外彝交訐莫支本實既撥宗祏其危纂熹宗本紀第十五

懷宗勵精好學勤政破格用人昌言是聽聰察東溟左右竊伺兵荒萬方度支詘匱優禮武弁兵驩莫制宦寺秉鉞鼎臣摧劇宵旰雖勞無拯彫落猾賊款逼亡國烈烈天祿永終匪帝之咎纂懷宗本紀第十六有明家法肅肅維嚴牝難弗晨無遂協占孝慈輔運百度有則列后依範咸絕陰惡孝誠宏濟張周死節闡教夙端婉孌之傑四經廢徙悉無疵涅皇英伊緝彤史弗喪纂宮闈紀第十七

惟木暢茂枝葉本根。猗歟明制四祖同尊。一十五王終於廟食。匪云矯誣。親親相及。纂祖系故。王表第十

八。廢土苴茅。藩屏不瑕。易稱建國。書志協和。二南兩東。維城孔嘉。高文及憲。定角嵯峨。武宗絕嗣。整授入楨。厥後衰微。丹書亦罕。興替之際。天運其亶。纂同姓諸王表第十九。

神武不顯。乘鉞殫謨。老成英特。并力齊驅。剖符載纒。奕葉帶礪。燕興以後。哀哉殞涕。強藩城峻。混濟再波。左右翼飛。稱効皇途。鐵券永昭。十世珥貂。嶽圯天眇。爾名乃應。英憲以還。亦有赴桓。固本靖圍。宣力據丹。金章燦燦。與鼎偕殘。纂公侯伯表第二十。

懿聖孝慈。沖遙弗候。文后動閔。推公兩京。椒房戚屬。咸佩簪纓。二張之肆。匪自孝誠。惠安殉難。無愧令名。佞幸昏惑。辱我圭榮。纂恩澤公侯伯表第二十一。

大道昭揭。如日中天。聖謨洋洋。百代所尊。帝王賓師。慶流裔昆。緣緜朱紱。世及象賢。纂聖賢世裔表第二十二。

崇勳勳力。殉節殺身。名誼攸關。天子爲鑿。蓋棺論定。幽泉氣伸。卽有濫廁。亦惟皇仁。纂追封王公侯伯子男表第二十三。

阿衡光輔。坐論資治。寅亮迓衡。厥職匪細。六卿分理。執憲匡濟。不凝庶績。羽翼帝室。嘻惟重哉。僉壬僭國。貞淫並列。以垂鑒戒。纂輔臣部院正卿年表第二十四。

三公一命。衰則有加。懸象台垣。經回六符。寰海表儀。一人毗倚。惟德惟勳。無曰翰矣。易紀棟隆。比於鉉耳。纂柱國公孤表第二十五。

彰文炳炳。標型肅肅。維國之華。多士攸服。道宗師表。奚容樸楸。纂學士祭酒表第二十六。

參貳大臣。匪資坐嘯。贊助匡救。協恭之道。集事寧民。無忝崇邵。纂卿貳年表第二十七。

厥制未定。或因故名。創闢既條。卽事迫更。兼攝弗曠。亦有虛益。纂先設後革諸官表第二十八。

弓旌四賁。羽儀鴻漸。爰焚荔裳。豹蔚霞綯。士不古處。黨私以薦。制科永垂。繫稱嘉選。雄雋輩出。匪緣玉銜。

觀文化成。旁塗彝賤。纂制科取十年表第二十九。

蒼穹懸象。曜緯列焯。經度不渝。氛祲無作。王事惠逆。始繁媿若。如景隨形。如響逐著。威嘉僭忒。不爽毫末。

寅旼祇懼。以迓景福。纂司天志第三十。

河山條紀。爰峻畛界。巨海環舉。以奠方域。皇皇禹績。殫懷分畫。羣生康毓。功濟來許。世變割裂。首體不屬。

明德肇闢。遂統九服。慎固封守。郡縣蕃布。我疆我理。因革可據。纂方域志第三十一。

重元恢灑。氣運眇穆。大撓容成。垂法千古。世紹遐明。星官廡師。推測品驗。軌度是釐。天行有常。六家焚燼。

創異立新。幾法旁博。義欽衡齊。豈曰謬附。疇人單心。帝天大務。纂廡法志第三十二。

精會神人。以統天地。殷秩設教。寅清萬世。禮文既闕。事多創臆。侵躐不經。馬難列祀。猗夏禍烈。二正以乘。

明祖有嚴。條之品式。二邱九廟。酌法符萃。歷承勿替。庶無昵忒。世宗崇元。醮籙焚熾。靡神不舉。大禮摧剝。

搜始鏡終。膺非揚。賸募郊祀志第三十三。

善動千里。片言移象。令出惟行。悔過息謗。恩覃九有。播敷三禮。略存厥文。王言攸赫。纂繪渙志第三十四。禮之所陳。有義有數。義則其理。數則其儀。五禮既備。六用乃施。精義難知。其儀可循。品節升降。載於典文。爰錄大略。垂示後人。募禮儀志第三十五。

大雅淪亡。荒淫代續。理情節性。譬如捫燭。簡編殘蠹。尺量銷蝕。鍾律參生。叩槃多屋。靡靡蘇哇。泯泯百年。諸奏於明。釐正宮懸。秩秩太常。肄習尙專。募樂律志第三十六。

黨庠術序。辟離泮宮。考德興藝。師儒是宗。人足表帥。乃作長吏。役而爲民。教而爲士。升秀論官。三事爲一。後世漸分。政教殊塗。治曰官吏。教則師儒。用興學歧。寔尋粉飾。詩書道學。梯榮捷竇。有明設學。徧於蘇荒。文物攸崇。鼓鐘皇皇。末季陵遲。視爲市藪。道術祭。學官芻狗。瞻茲簡冊。怒焉疾首。募學校志第三十七。登庸載采。疇咨反復。翁受敷施。九德爰陟。申命特命。交讓風稷。黜陟不替。賓興齊肅。辯論考治。惟功惟德。機智橫生。素古程則。或取浮名。或限資格。黨結賄進。譽毀課績。宦途之升。明多紛例。撮其綱紀。庶幾仕籍。募選舉志第三十八。

元后御極。法天不動。左右厥辟。百揆適總。公弼化元。卿理羣重。庶案承序。宣德幅運。文武不分。道器費用。主德罔弼。釋道議政。清濁攸異。遂滋百孔。有明建官。小大相維。內重外輕。繞馭不剛。於稽其名。各括所司。崇卑沈品。庶鑒來茲。募職官志第三十九。

邱澤與行。阜育人物。土中勦稼。開民之麗。疆理裁成。導利均市。封建既湮。井不可復。秦軼唐炎。爲禍孔蠹。後世弗變。古今異故。明祖考古。田列等則。官民屯場。名殊實一。立元元命。莫匪爾極。纂土田志第四十。則環定賦。任土作貢。因民任力。百代不易。益上曰。損損上曰。益。剝安附地。夫忌居德。理亂克關。利害勞逸。天子修和。載重司計。詳覽登耗。可爲懼惕。纂賦役第四十一。

濫溢懷襄。帝用震做。四載導底。後乃橫放。既欲蘇害。復虞利梗。匪若江湖。匯澤宣疏。天都在燕。漕之咽喉。維陵維漕。背馳兩憂。資運關鉅。國之命脈。豈第漢唐。湮蕩足駭。並逮水利。兆民允賴。纂河漕志第四十二。天降肆殺。以濟乎陽。五材地殖。金首於行。聖人觀象。昭德保治。禁暴戢亂。爲生民衛。好之者殃。棄之者弱。周則氣全。隙則輔缺。合農利興。分之病茶。維明創制。有軍有兵。治亂盛衰。成由以成。駭不可使。國祚頌傾。纂戎馬志第四十三。

刑匪淫戮。用以弼教。後世弗慎。藉張威暴。霜雷慘慄。一時而消。刑期無刑。平允勿滔。謬棄德禮。釋任律例。舞文利昧。沈寃奚雪。律令昭昭。破名或恣。祖法既定。莫掩情辭。撮其惠虐。讞鞠之師。纂刑法志第四十四。天立兩戒。限口隔越。崇山峻嶺。遠控漠磧。王公設險。以虞森穢。安不忘危。備以無患。築削樓櫓。雄屹列行。盛衰之際。觀其順逆。古人垂訓。曰惟慎德。中國之力。半爲邊數。塞垣多躡。內脩示卻。纂邊防志第四十五。秦火燎原。六經逸失。或存或亡。簡冊漸集。自漢逮唐。散缺多有。小道弗堅。豈秦之咎。明祖肇興。專官訪購。裒然天府。百代之富。石室金匱。世宗立宸。於以考之。經書孔盛。惜無卷數。止於名存。盜毒威焰。半屬煨燼。

纂經籍志第四十六

聖帝垂衣體象乾坤等威釐辯卑無踰尊制作淺滋驚蠢以圮古道如髦明珠翠羽裂毀與悲哲人何吁煌煌明聖作述有華文物煥闢威儀昭尹符璽章信典藏克謹纂服璽志第四十七

星霄載旂建旆十丈千乘萬騎陪衛峭嶸供六百里民其憊惘無誕無矜饜儀足傲繁儉弗紊萬方是仰纂輿衛志第四十八

國脈攸關民天是賴筐篚萬方則壤陬界祿錫費泄仍餘殺戒憲典所尊度支弗瘵泥沙可虞仰屋嘆殺掎克在服經文示誠康阜鼎興困竭衆解清心寡欲庶無凶敗纂食貨志第四十九

太祖肇運宮室樸約太宗因元聿煥樓櫓世宗多營土木繁作迹明遺址匪若古昔不侈不陋允爲式則纂營建志第五十

禍福在人豈緣事物穿鑿傳會絲紆鏗沸號祥載賀名妖則戒象形暴彰奧理潛湧箕訓休咎歸機衰蔽天子脩德轉移倏歛纂禮祥志第五十一

太祖廣允懿文不祿列服象賢燕爲戰血三王慘劇建庶幽鞠漢踵父跡滅於暴熖趙敦棣鄂仁亦獻仁宗十字列藩惟六英景並帝宜無季叔英子十一半屬天促惟憲多男孝幾奪辱寧觀不悛爰膺顯戮

武宗斬嗣世乃入繼育數雖八昌止於穆穆分一潞神七光嗣及帝熹懷熹絕懷覆聖愚賢否載於掌故撮其事言以爲鑒戒纂皇子諸王宗室記第五十二

元鹿弛維。蜩蟬沸羹。龍躍猊奮。斬黃以旬。韓厥藉勢。滌穢淵宅。慶元反覆。天完下懿。狡武豪悍。楚衡勁敵。坐擁雄資。吳自輓戟。巴蜀控險。夏隨駟書。友定既平。北伐孔威。迹其廢興。咸矯英姿。仁暴殊別。天命乃來。纂起兵諸國記第五十三。

煉石柱天。斷鰲維地。弼佐乘時。旂常炳麗。中山秉鉞。寔爲助首。義旗所揮。摧枯拉朽。帶礪永新。佑贊元后。開平如熊。懷德誓歸。擒敵拓漠。若俯拾遺。河魁告殞。百身莫追。韓公老成。託契藩幕。開物創典。規謀殫度。東甌龍潛。宏績吳閩。平蜀釋兵。功存不競。甯河烈烈。無堅不先。江漢波靜。崑崙回轍。皇胄黔甯。於爍赴。豪鷲神啓。機權中秀。樹穎化魁。裔垂永久。穎國之雄。暗鳴震盪。劍閣中森。昆池弗浪。重譯多勳。悲哉弗賞。宋公玉立。實惟心腹。克紹哲兄。揚威原鹵。大人之吉。以忝征。岐陽英武。作鎮扼獍。北逐應昌。歸敷禮讓。英公有嚴。一呼隕敵。平漢蛟窟。捨虎子。匪藉椒房。再膺彤矢。元勳孔庶。十人實傑。纂開國王公世家第五十四。

攀附飄起。滌穢曜朗。鼎鉉干城。厥伐孔長。疊生骨肉。糜頂匪功。旁著廓清。亦與流鴻。因事樹立。躬罹刃矢。專圖燕帷。決勝千里。或封或否。以視薄厚。太常可釋。勿雜稗莠。纂勳臣傳第五十五。

天植忠貞。星回霜隕。勁氣峻詞。懸揭千古。金石無泐。日月不汨。支碎膚裂。膝不少曲。盆瘕狴犴。五宗荼苦。從容慷慨。成仁酬志。伏竄遐荒。藁席衢市。俯仰無慚。用風奕世。折檻斷裾。廷諍據謨。完節朝寧。正氣堪與。纂忠節傳第五十六。

聖王設教。師儒閭里。道術漸歧。道學乃起。擯黜紛異。獨抽名理。有明之初。崇儒重道。徵聘四出。禮樂探討。後多在野。自有所悟。師徒相授。無與利祿。漸至凌。縉紳黨結。名曰講學。實滋簧舌。明儒三變。變則益時。於稽澗源。恕厥抑辭。纂儒林傳第五十七。

英哲代生。善絀不辱。謀斷兼資。文武並錄。濟難扶顛。轉禍爲福。斯其弗偶。辟於龜玉。坐鎮雅俗。一善足稱。不干清議。備位疑丞。善長惡短。古法梗侃。不沒其名。萃茲穎管。募名臣傳第五十八。

表範天經。防維人紀。橫塞因心。貞懷不泚。發於至性。匪由師承。履信思順。政化濯興。松青玉白。矯矯弗伍。閭巷具瞻。無須圭組。感幽通明。樹型今古。纂孝義傳第五十九。

維茲林總。載舟覆舟。撫則順嗣。虐則寇讎。九重渺絕。守牧是寄。民命所關。國運攸繫。政平訟理。親民民親。移風易俗。愛養循循。明祖嚴馭。禁貪法厲。黜陟有條。吏用敕畏。末季恣玩。聲由苞苴。敲骨何堪。鼎以摧竄。纂循良傳第六十。

赳赳干城。予曰禦侮。長子帥師。有力如虎。戮力邊陲。奮身行伍。一節著稱。弗爲棄吐。從燕匪動。蘇之於武。纂武臣傳第六十一。

石戶墨蘇。草萊沈銅。鴻飛冥冥。弋人何慕。漸遠亦洩。自惜厥羽。驥躍皇衢。弗視弗顧。或怡泉岩。或甘窮固。結綬顏羞。策名躬污。高風勁節。克光簡素。纂隱逸傳第六十二。

中原板蕩。蝟甲林鋒。自拔來歸。如雲從龍。咸輸智謀。以輔英雄。俊傑識時。錫伐球鐘。去故就新。既多膺公。

回首故都甯無少恫。纂雜傳第六十三。

揆藻宣情。矜氣發秀。片言驚座。集異翊宮。憑心顯理。物靈登奏。人各名家。喙飛價售。炳炳天才。屏黜釘釘。二百餘年。極其刻鏤。爰據舊章。追恤遺漏。纂文學傳第六十四。

威福予奪。天子之柄。臣道無將。罔與凌橫。世宗元修。嚴竊太阿。神宗幼冲。張乃肆訛。跡其咆哮。亦明僅有。用垂大戒。陽秋弗宥。纂權臣傳第六十五。

驗宿吾右。望雲知輿。肇運君臣。推測至精。恆德洞垣。佐天司命。察理不易。斯名仁聖。詭異幻渺。無翼大道。用廣稗聞。取厥慧巧。方士吐納。事屬虛誕。巫覡矜神。誣人昏罔。擯而弗錄。以懲妖妄。纂藝術傳第六十六。婦德柔順。平稱履安。貞心峻節。霜日同嚴。彤管有光。清操勇骨。忠壯誠篤。金石裂發。名鬱里閭。嘉懿汨沒。舊文可循。勒之版冊。衣冠大夫。頤聞慙死。纂烈女傳第六十七。

明興鑿古。外戚弗庸。緋玉聯翩。無預權戎。孝慈不封。徐氏二公。椒房雖寵。顯戮勿蒙。張氏微蕪。鐵飲頸血。萬田昵私。罔干法度。漢晉諸戚。卽云烜盛。駢族勳彝。百信不勝。憲典永遵。晚宗之幸。纂外戚傳第六十八。易戒其朋。詩惡羣小。蠱惑傾側。奚俟僂孌。中欲入主。投其陰好。儉邪易入。正直閒越。宣淫弄枋。殆鮮畏忌。樹援列黨。天聰蔽塞。誅竄以終。愛乃爲害。纂佞倖傳第六十九。

刑以正暴。匪肆苛情。古異章服。民用以懲。季世道衰。莫敷教化。淫威誅慘。逞其刻察。太祖嚴武。陳開肆毒。太宗褻暴。參森獨苦。廠衛旣設。酷虐踵接。剗刈忠鯁。磨牙飲血。懷宗末年。蠶輩尤猖。鑿空投隙。殘巖善良。

天日昏蔽。明祚以亡。纂殘酷傳第七十。

才武陰詭。以濟私計。僉壬高張。國之蠹蝕。輸情他人。無念祿絳。弭首轉徙。傷哉君主。富貴目前。誅戮多有。跡其所由。用懲豕狗。篡奸回傳第七十一。

考鏡古昔。惟閹難辟。近狎弗疑。窺竊孔易。明祖防嚴。屢申禁誡。厥後弗乘。太宗愛蔽。振直祥瑾。保泊忠賢。播弄威焰。四海沸煎。熹懷之世。乃典兵權。雖云武始。季禍更炎。兵將驕悍。職維是故。文令不行。事極顛覆。開門揖盜。孽豈可誅。明之廢興。厥自刑餘。纂宦官傳第七十二。

隆代元哲。神明通德。禮樂導和。因物納極。疵癘不興。誕悖不作。理教衰微。二氏乃興。微妙自翊。瑰妄以矜。緣據竅奧。端攻弗勝。君臣聰慧。竄懷而入。尊靈每過。大道棘塞。纂異教傳第七十三。

潢池盜弄。民生實殘。國運熾隆。旋維奠盤。末季荒災。魃虺肆鬧。闕左墟莽。白骨委野。朝宁焦勞。司農愁嘆。寇益哆滋。國事多難。攘奪神器。終屬亂賊。神州如故。玉步已易。纂亂賊傳第七十四。

禮優門屏。樂奏昧禁。四彝來賓。兼覆德大。中外限隔。古訓有戒。舍逆取順。治以不治。明驅朔漠。拓是南方。玉關重譯。日出來王。三黎著績。赫赫武揚。後多萎墮。日盛此疆。於稽向背。或略或詳。因厥舊文。表裏邊防。

纂四國傳第七十五。

洛邑頑民。殷之義士。通筠重進。亦輝宋史。擴廓男子。蹟而蹶起。友定不辱。子來就死。蔡子長掛。鉞胄無悔。伯顏奮儒。膏領齊斧。滕李弗屈。自甘沈汨。炳若天虹。光於大鹵。舍是後夫。風我來裔。纂補元臣傳第七十。

六

僧操筆削。獨懷慙憤。整躋傲悅。疎才陋識。抱惜隙駒。用摠吾直。統理帝王。扶剔陰則。釐綴本支。闡猷翼翼。崇此聖宗。廣勵庶職。典章森列。神人協極。天地旣官。顯擢幽測。功罪宏昭。忠邪弗冒。網羅逸文。剖判矇惑。平心壯氣。夙夜匪敕。敷以歲月。無曠退食。成茲明書。敷我先德。纂敘傳第七十七。



中華民國二十六年五月初版

(50903)

國學基明書十二冊

每部實價國幣貳元捌角

外埠酌加運費

編纂者 傅維麟

發行人 王雲五

印刷所 商務印書館

發行所 商務印書館

本書校對者

劉紹勛 蔡仲宣 林懷民 童振編 馮寶武
王養吾 金雲峯 楊瑞文 尤惠民 盧金聲
王煊蕃 鮑嘉祥 余大猷 徐昌楨 王重慶
胡達聰 徐鼎銘 滕秉全 章德宣 朱廣福
錢光祿

著者(清)傅維麟編纂

Author

書碼 626.01
Call No. 7567

書名明書 一百七十一卷：十二

Title

登錄號碼 007892
Accession No.

月日	借閱者	月日	借閱者
Date	Borrower's Name	Date	Borrower's Name

104	吳子地		

國立中央圖書館

書碼 626.01
7567 登錄號碼 007892



國家圖書館



000007892

